

48918/B

S. TH. SOEMMERRING

DE

CORPORIS HUMANI
FABRICA.

LATIO DONATA AB IPSO AUCTORE AUCTA ET
EMENDATA.

TOMUS PRIMUS.

DE OSSIBUS.

TRAIECTI AD MOENUM,

SUMTIBUS VARRENTRAPPII ET WENNERI.

1 7 9 4



THE JOURNAL OF THE

II

CORPORATION

1880

THE JOURNAL OF THE

THE JOURNAL OF THE

THE JOURNAL OF THE

THE JOURNAL OF THE

THE JOURNAL OF THE



PRAEFATIO AUCTORIS.

Defectus enchiridii, quod veras structurae corporis humani notiones solide, apto nexu, omissis nimia prolixitate et degressionibus traderet, me impulit, ut periculum conscribendi libri facerem.

Benigna rei iudicum de me opinione motus, ad rem faciundam a viris eruditione conspicuis invitatus, et, quod maximum fuit, exoptata mea opportunitate uti me decere, persuasus, opus absolvi.

Compendium, quod omnes, in cognitione nostri corporis, scientia, non nisi sensibus perceptas, examinatu igitur et confirmatu faciliores notiones continente, ad ultimum saeculi nostri decennium usque factos progressus, et basin, facilem deinceps a quovis alio correctu, contractu vel auctu, sisteret, edere mihi in votis fuit; et ideo nusquam in contextu primam personam dico.

Paucae scientiae hodiernis temporibus tantum auctae sunt, quantum anatome, in singulas enim systematis partes tam eximius labor

a magnis viris impensus est, ut pauca, exceptis partibus quibusdam doctrinae nervorum, glandularum, systematis lymphatici, et quorundam viscerum, vel iniectioe, vel microscopio, vel cultro, vel alia quadam subtili encheiresi detegenda adhuc superesse videantur.

Verum, quum res agitur, ut quaestiones solvantur: Quid tam validas vitae actiones ad musculos advocet? Quomodo cerebrum et nervi agant? Quomodo generatio, secretio, et nutritio fiant? plenior naturae arcanorum cognitionem desperant; quid, quod innumerae hypotheses et lites inde ab antiquissimis temporibus agitatae parum certi exhibuerunt.

Accuratior vero *singulis* partibus adhibita cura non obstat, quo minus decretorum *collectio* desiderari posse videatur.

Solida, nihilominus autem concisa, perspicua tractatione, et certissime meliori nexu omnia exponuntur, si notiones, *nudae*, quales sese offerunt, traduntur, nullo respectu habito, utrum hic, an ille naturae scrutator, hanc vel illam partem primus notârit, vel eius actiones intellexerit, vix enim nominis virorum ratio, quum solita, sana corporis conditio examinatur, habenda est, quam diu in re publica ita est constitutum, ut exercitatus propriis sensibus et manibus structuram corporis rimari possit.

En causam, cur, qua ratione illustratio decreti cuiusdam pedetentim nata sit, hoc in

compendio non exposuerim, neque nominibus partium corporis humani nomina auctorum, quamvis usitatissima visa, addiderim.

Nonne enim historia litteraria docet, saepius partes, quae auctorum nomina immortalitati tradere iubentur, ab iisdem neque primis detectas esse, neque exactissime descriptas, neque verissime delineatas? Nonne HAVERS, COWPERO glandulas articularum, *Haversianas* vocant, cognitae fuisse, ipse fatetur? Nonne FALLOPIA diu ante BAUHNUM valvulam intestini coeci, valvulam BAUHNI vocant, novit? Nonne HALLERUS longe exactius valvulam venae cavae descripsit, EUSTACHIO? Nonne ALBINUS optimam valvulae intestini coeci iconem dedit?

Nonne igitur notandis virorum nominibus iure supersedere possumus?

Maximis corporis humani scrutatoribus, exactissimis descriptoribus, acutissimis physiologis ubique maximam iniuriam factam esse invenies; quot enim partibus nomina GALENI, HALLERI imponenda essent, quot nomen ALBINI, omnium, qui umquam fuere, physiologorum, elegantissimi et perfectissimi? Quae nam vero pars horum virorum nomine signatur?

— *Nulla.*

Adnotationibus eiusmodi historicis et meritis nominibus eum, qui nil quaerit, nisi quod

caput doctrinae tangit, detineri, experientia facile edocemur.

Collige ex maiori opere HALLERI physiologico, quidquid ad cognitionem hepatis veri momenti est, confer cum minori opere *eiusdem* physiologico, et videbis, minus opus; quae ad verum momentum faciunt, uberius; quam maius opus, tradidisse.

Quod veri momenti est, memoriae iamiam satis rei suppeditat, cui bono igitur nominibus superfluis eam gravare velis?

Quot vero anatomiae doctores hos auctores umquam viderunt, ne dicam, legerunt, quum vel in paucis publicis bibliothecis collectos eos invenies?

Equidem magnum fructum, quam historia cognitionis partium corporis humani ab initio ad finem usque indagata, adfert, bene perspicio, et voluptatem, quam historiae conspectus exhibet, novi, verum a compendio, quod nil, nisi vera atque absoluta docet, aliena visa est, in integra enim historia tradenda multum temporis et spatii consumendum, et forsitan ipsa paucissimis eorum, quorum in gratiam scribo, magni momenti visa fuisset.

Ea compendii ratio, ut nil deesset, quod ad rem faceret, et ut maxima lectorum pars plurimis eorum, qui ante me scripserunt, carere posset, maximis in votis quidem fuit, quorum vero compos esse non potui, ea qui-

dem in primis ex causa, quod descriptionibus icones iungere nunc quidem temporis nolui; ergo etiam severo delectu habito *optimos tantum auctores*, et *optimas icones* citavi, neglectis auctoribus et iconibus, non nisi vetustate, raritate, vel alia quadam, quaecumque sit, virtute, excepta *solida et perfecta* obiecti *tractatione*, sese commendantibus, eaque de causa neque VESALII, neque EUSTACHII, ex tunc temporis ingenio non satis laudandas tabulas cito, quae enim continent, ea omnia SANTORINI, ALBINI, HALLERI, WALTERI aliorumque tabulae incomparabiles multo melius exhibent.

Delectus optimorum auctorum, quos in opere meo citavi, quique collecti egregiam librorum suppellectilem constituunt, omnibus punctis satisfaciet. Qui integram historiam litterariam, et bonos et malos auctores cognoscere cupit, HALLERI bibliotheca anatomica carere nequit.

Numquam vero, nisi quum summa necessitas urgebat, vel partium cognitio sine iconibus difficilior videbatur, hinc inde cum partium descriptionibus litteras vel numeros iconum iunxi, e. c. cum descriptione labyrinthi, vel nervorum difficillimorum, nervi vagi, sympathici. — Spatio alibi parcendum esse, omisis citatis, credidi.

Quaenam partes nondum delineatae essent, indicavi.

Alia insuper ratione motus rem litterariam arctioribus limitibus adstrinxî, veritatem enim plurimorum anatomicorum decretorum *αὐτοπτος* testari possum, *rararum vero varietatum*, quas ipse non vidi, testes citavi, partim, ne *aliis observata* tamquam *mihî visa*, tacite mihî arrogarem, partim, ne *fidem meam pro aliis interponerem*, si forte de auctoritate dubitarem.

Nexui cum bibliotheca Gottingensi, et amicitiae meritissimorum, qui nunc vivunt, physicologorum commodam occasionem, omnia novissime detecta in usum meum conferendi, debeo.

Maiores nostri metaphoras in denominandis partibus dubio procul nimis amârunt, quod vocabula: *tunica villosa*; *nates cerebri*; *pars petrosa ossis temporum*; *hemisphaerium*; *crista galli*; *alae vespertilionum*; *cisterna chyli*; *pons cerebelli*; *dura mater*; *vena haemorrhoea*; *pes anserinus*; testantur.

Admitti quidem hae denominationes possent, si corpori humano semper responderent. Comparata vero interna intestinorum canis tunica cum eadem hominis tunica, denominationem: *villosa*, e cane ad hominem, invitata natura, translatam esse, statim adparet. Comparatio corpora quadrigemina cerebri vitulini inter et humani denominationem: *nates*,

e vitulo ad hominem translata esse, illico monstrabit. *Denominatio, pars petrosa* non nisi ad calvariam vitulorum vel aliorum brutorum apta est. Omittam perturbationes, a translatis denominationibus subinde natas, unam vero tantum adducam. Longe alios arteriarum ramos RUYSCHIUS *rete mirabile* vocavit, quam qui in ruminantibus *rete mirabile duplex* constituunt, huiusmodi enim *rete mirabile* in homine nusquam invenire potuit.

Servandae essent hae denominationes; si similitudinem ubivis recte exprimerent, ita, ut neque in demonstratione partium restringendae essent, neque, tamquam causae erronearum idearum caute vitandarum, notandae. Nonne enim naturae, simplicitati et veritati propius accedunt vocabula: *tunica interna; pars cerebri dextra*, quam *tunica villosa; hemisphaerium cerebri dextrum*? — Singulari itaque attentione, eademque, ut in re botanica, cura, in emendanda, et, quoad eius fieri posset, stabilienda huius artis vocabulorum vi iam dudum opus fuisset. Plures quidem, optime de necessitate rei persuasi, novas denominationes descriptioni singularum partium, aucta quidem hac ratione synonymorum copia, non inmutata verum totius rei summa, addiderunt.

Quare singularem attentionem et curam huic rei impendi, e multis, quae aderant, synonymis simplicissimum, aptissimum vocabu-

lum elegi, repudiatis ridiculis, obscoenis, erroneas ideas moventibus; novis usus sum, si res alia ratione bene cedere noluit.

Obiectio: *veterum anatomicorum et practico-
rum scripta hoc modo obscura fieri*, additis usitatioribus synonymis tollitur. Perpendenti vero, initium tandem emendandae terminologiae, ut e. c. in re botanica, ponendum, et iure meritoque verissima, simplicissima luculentissima, hinc optima nomina servanda esse, obiectio-
nes, vel omissis synonymorum indice, minoris momenti visae sunt.

Non numquam nomina ambiguitate non carent, v. c. Nomen: *nervus cardiacus*, hoc enim vocabulum et nervum sic dictum cordis, et nervum ventriculi vi etymologiae notat.

Normam in describendis partibus corpus quantum ad sceleton perfectum, ad prolium generationem aptum, et iustae aetatis elegi.

Res novare, quantum fieri potuit, in tradendis singulis anatomes partibus opere quodam absolutissimo nixus, vitavi.

Ossa describens principem sequor ALBINUM, verum tamen praeter antiquiores, BOEHMERI, WALTERI, BLUMENBACHII, SCARPAE, MAYERI, HILDEBRANDTII aliorumque, et in describendis dentibus HUNTERI opera diligenter contuli. Ab ALBINO tamen in computandis vertebrae, et vocabulo *orbita* loco *foramen oculorum* e. q. s. r. deflexi.

Praeter indicatas multas a consueta structura declinationes, vel multa utilia, quae frustra aliis in libris quaeruntur, in generali partium homogenearum tractatione, invenies, v. c. adumbrationem et descriptionem ossium in praecipuis vitae periodis, et s. p.

Uberius, quam qui me praecesserunt, gravem super dentibus doctrinam exposui.

Doctrinam de nexu ossium ubertate et gratia ornare in primis studui, eo quidem fine, ut naturalis historiae studiosis, compagem ossium cognoscere cupientibus, sigillatim vero partes percurrere nolentibus satis rei esset, in cuius contemplatione ingenium exercere possent. Inquirantur meletemata super calvaria, spina dorsi, thorace, pelvi, nexu ossium artuum superiorum et inferiorum, eorumque alterna similitudine et alterno discrimine.

In tradenda *syndesmologia* sequor WEITBRECHTUM, verum tamen hinc inde quaedam correxi et addidi, et reliquis partibus magis conformem et simpliciozem methodum curavi.

Myologium exponens itidem praecipue ALBINUM sequor, in subtiliter dividendis et denominandis musculis experientissimum, prudentissimum, exactissimum, ideoque in ordinandis et denominandis musculis, vel in indicando eorum positu et usu non, nisi raro, ab eo secedere me oportuit, e. c.

In ordinandis musculis: Ceratoglossum,

Chondroglossum, et *Basioglossum*, quos ille tres musculos esse voluit, ego cum aliis anatomicis unicum musculum *Hyoglossum* esse statuo; *gemellum* et *soleum* unicum tantum *suralem* musculum esse arbitror, quum naturae rei sit aptissimum, musculos, saepius continuo nexu cohaerentes, iunctos ordinare et describere. — Naturae enim maxime consentaneum videtur, partis alicuius musculos, qui non raro cohaerent vel coniunguntur, etiam describendo iungere, v. c. *Anconeum* cum *Tri-
cipite Brachii*.

In denominandis musculis: Nomini *coracohyoideus* praetuli nomen *omohyoideus*; musculo *uvulae*, saepius non impari, perperam cognomen *azygus* imponitur; nomen *M. pectoralis minor* magis e re est, quam nomen *M. serratus minor*; musculos *intertransversarios*, ab imis incipiens **ALBINUS** numerat; solum *M. extensorem digiti minimi* vocat *M. extensorem proprium auricularem*, reliquos vero omnes digiti minimi musculos *M. digiti minimi*; nomina: *M. rectus femoris*, *sphincter palpebrarum*, *sphincter oris*, aptiora certissime sunt nominibus: *M. rectus cruris*, *orbicularis palpebrarum*, *M. orbicularis oris*; aiunt enim *M. quadratus femoris*, et *sphincter ani*.

In constituendo Musculorum usu: e. c. *M. biventrici maxillae inferioris*.

Ceterum eiusdem *historiam musculorum*

cum *tabulis musculorum*, *annotationibus academicis*, *tabula vasis chyli ferè* exacte collatam invenies. Exactiorem quorundam musculorum descriptionem, vel maioris formae et elegantiae icones ab aliis passim traditas, suo loco indicavi.

Praeter alios auctores, usus sum HAL-
LERO in describendis musculis linguae, pha-
ryngis, laryngis, thoracis et partium genitalium.
Quod ad icones attinet

Icones musculorum faciei et pharyngis a SAN-
TORINO et COURCELLES,

diaphragmatis ab HALLERO, ROEDE-
RERO, SANTORINO,

musculorum intercostalium ab HODLEY,

cervicis ab ASCHIO et NEUBAUERO,

brachii et ani a CAMPERO,

partium genitalium utriusque sexus a

SANTORINO, et virilium a CAMPERO datas
citavi.

Pluribus locis varietates a me ipso obser-
vatas tacite addidi, v. c. in descriptione M. bi-
ventrici maxillae inferioris, retrahentium au-
ris, geniohyoidei, latissimi colli, recti et py-
ramidalis abdominis, latissimi dorsi, supina-
toris radii brevis, extensoris pollicis longi, ab-
ductoris digiti minimi.

Bursas, ut aiunt, *mucosas* describens MON-
ROUM potissimum secutus sum, non neglectis
tamen operibus IANCKII, FOURCROY et KO-

CHII. Falsam esse ostendi ab omnibus fere receptam thesin, qua, bursas mucosas solis in artubus inveniri, adfirmant, discipulorum enim meorum quidam ab HAGEN, qui omnes totius corporis bursas mucosas rimatus est, quo loco M. circumflexus palati hamulum alae inferioris ossis sphenoccipitalis ambit, bursam mucosam primus invenit; ut bursas mucosas M. sternohyoidei, stylopharyngei, eamque, quae nonnumquam parti diaphragmatis sternali adhaeret, a cl. CREVÉ, bursas mucosas M. obliqui superioris bulbi oculi et biventrici maxillae inferioris obliqui externi a me ipso inventas, taceam.

In *doctrina de arteriis* praecipue HALLERUM sequor, cuius etiam denominationes, apertissimas plerumque, retinui. Maxima tamen diligentia descriptiones MAYERI, MURRAY, WALTERI filii cum *Halleriana* contuli. Quibusdam forte descriptio arteriarum a me data subtilior iuste videbitur, erunt tamen, qui gratias mihi habebunt, qui otium notandarum varietatum, quas heic collectas inveniunt, illis fecerim.

In *doctrina de venis* HALLERUM sequor, MAYERUM et WALTERUM.

Vasorum lymphaticorum descriptionem MASCAGNIO in primis praeunte, de quo LUDWIGIUS tam bene meritus est, composui, collatis egregiis operibus HUNTERI, MONROI, MECKELII, WALTERI, HEWSONII, CRUIKSHAN-

KII, SHELDONI, WERNERI, FELLERI, HAASII, LUDWIGII, BLIZARDI, WRISBERGII, ASSALINII, REZIAE, MEURSII, SCHREGERI aliorumque. Etsi quidem opusculum meum cum operibus CRUIKSNANKII et MASCAGNI collatum tenue videtur, nullum tamen memorabile decretum a me omissum, sed eorum numerum auctum esse, persuasum habeo.

Mira brevitatem, concinnitatem, iustam tamen ubertatem materiem bene dispositam tractari posse, volumina vero, notitiis litterariis intertextis, et dictis saepius repetitis, facile augeri, vulgo non respicitur. Practicam huius doctrinae partem edoctus sum in *Anglia* et *Scotia*.

In *doctrina de cerebro* nullum auctorem secutus sum, in *doctrina* autem de *nervis* eximios, quos in conspectu optimorum librorum super *nervis* indicavi.

Praecipuam vero huius doctrinae notitiam egregiis praeceptis, practicis institutionibus et optima amicitia magni mei praeceptoris WRISBERGII me debere, palam gratus profiteor.

En igitur difficillimas physiologiae partes, quibus systema structurae corporis humani nititur, quae iunctae versionem meam minoris operis physiologici *Halleriani*, de cuius uberate WRISBERGIUS et MECKELIUS tam bene meriti sunt, integrum systema interim constituunt, in quo neque magni momenti factum,

neque ullam acutam explicationem facile desiderabis.

In describenda qualibet doctrinae parte eo ordine utor, ut, generalioribus absolutis, in descriptione per partes de capite, tum de trunco, deinde de artubus loquar. Sine illis vita desinit, horum vero dignitas non ea est, ut ad continuandam vitam plane adesse debeant. Rationes, quibus in ordinandis singulis partibus nitor, e conspectu, cuivis volumini praefixo, facile adparent, quare brevitatis studiosus et spatio parcens earum explicationem heic lubens omitto. Descriptio tunicae retinae, e. c. cum descriptione nervi optici in neurologia iungenda est, ideoque in explicatione visus eius repetitio iure abesse potest. Itidem in eo conspectu musculorum ac ligamentorum doctrinam in partes, quibus nusquam aptior locus erat, secui, ideoque repetitionem in textu omisi.

Lucido ordine non solum perspicuitas augetur, sed etiam repetitio vitatur.

Forsan inconcinnam sic dictae purae anatomiae separationem a physiologia descriptione singulorum ossium et musculorum, expositis antea generalioribus ossium et musculorum qualitatibus, vitavi. Nonne enim re penitus perspecta anatome vocanda est physiologia, et physiologia anatome? Certe fines earum numquam exacte definiti sunt, apud omnes enim

enim auctores descriptionem vel demonstrationem musculi vel ossis explicatio usus statim sequitur. Nonne contemplatio usus ossis vel musculi physiologia est vocanda?

Neque veteres, neque inter recentiores *Britanni* hanc separationem sequuntur; verum tamen, quod partibus homogeneis commune est, separatim lustrare liceat.

Singulari cura varietates structurae partium collegi, et, ut perspicuitas poscebat, vel statim adieci, vel privis sectionibus exposui: nam vel in *his ipsis varietatibus natura certum quemdam ordinem servat, ita, ut, deducta fortuita magnitudine partium, minime infinitus varietatum numerus inveniatur.*

Morbidas partium mutationes sicco pede praeterire non potui, partim, quod in medicorum gratiam liber conscriptus est, partim, quod solidam et perfectam cognitionem legum, vis, et verae naturae nostri corporis saepius declinationes morbidae demum perficiunt.

Tantum dumtaxat e brutorum anatome inserui, quantum ad explicandam corporis humani structuram, vel illustrandam physiologicam thesin opus esse videbatur, partim, quod nihilominus rerum dicendarum ambitus late patet, partim, quod immensum anatomes brutorum studium multum adhuc a perfectione abest, partim, quod argumenta e brutis collecta, non nisi maxima cum cautione in ho-

minem conferri possunt, partim, quod praecipue medicis practicis consulere volui; neque enim de studii defectu, neque de ignorantia ii certe me accusabunt, qui, non solum maximos huius studii professores, BLUMENBACHIIUM et CAMPERUM, praeceptores et amicos mihi fuisse, sed etiam me ipsum, favente fortuna, rarissima bruta, simias omnis generis, camelos, elephantes, pantheras secuisse, eorumque notatu dignissimas partes adservare, norunt.

Manifestos, et dudum reiectos errores re-coquere, et prolixè refellere nolui, eos tantum excitavi; qui vel saepius adhuc occurrunt, vel nondum refutati sunt. Ingentem vero errorum numerum tacitus emendavi.

En methodum, qua, quod mihi cognitum erat, et certa fide nitebatur, in unum redigere studui.

Nova, quae mihi sumere crediderim, erunt fere:

In osteologia: Substantiam dentium vitream non solum ex radiatis, sed etiam ex cincinnatis fibris constare; — Dentes mollitis et absorptis particulis mutari; — Usus medullae in diminuendo ossium pondere consistere; — Esse ab aliis hucusque omissum canalem in vestibulo, e cortice, reliquis labyrinthi partibus simillimo, confectum; suturas calvariae cum cartilaginibus diaphyses inter

et epiphyses ossium cylindricorum congruere, easque, quod cartilagineas contineant, eodem modo, quo ossa cylindrica, crescere; — terram ossium ab humano lacte, quod sponte acuit, solvi, ossa igitur eo molliri; — ossa, acidis mersa et eluta, in aqua putrescere; — skeleton Nigrittae ab Europaei scheleto multum differre; — calvariam femineam ad reliquas scheleti partes multo maiorem et ponderosiores esse virili; — columnam vertebrarum, et integram, et in partes suas sectam secundum sexus, et rationem ossium sterni aliorumque ossium differre; — massam osseam in diaphysibus omnium cylindricorum ossium, eiusdem licet longitudinis ac superficierum articularium magnitudinis minore copia adesse in corpore femineo et q. s. s. — fractum vel abscissum cylindricum vel latum os, nullo excepto, molitis, absorptis, laevigatis, lymphae effusae, vasculosae, in os tandem versae ope coniunctis, marginibus sanari; — callum, ut vulgo aiunt, luxuriantem non exsistere; — regenerationem sani, perfecti ossis locum in homine non habere, exceptis raris, dubiis mihi visis casibus; — quin foramen, a baptisto factum, non semper massa ossea expleri; externum ossium habitum pro varietate causarum, morbos inferentium, diversissimam esse.

In syndesmologia: Ossicula auditus capsulis articularibus iungi; — ligamenta, ut aiunt,

mucosa, vasis ligamentorum advehendis et avehendis inservire; — hiatus ossa inter fibris tendinosis, ad avertendum ossium attritum, impleri.

In myologia: Substantiam fibrarum muscularium a substantia fibrarum tendinosarum plane differre, easque his velut infusas vel adglutinatatas esse; — tendines igitur non, nisi musculorum ligamenta esse; — numquam duo inter plane immobilia puncta fibras musculares in statu corporis sano inveniri; — fibras cordis musculares minimis nervis instructas esse.

In doctrina de bursis mucosis: Non tantum in artubus, sed etiam in capite et trunco veras bursas mucosas inveniri.

In doctrina de cerebro: Substantiam cerebelli triplicem, ni quintuplicem esse; — in cerebri substantia vel duas albas lineas inveniri; — acervulum ad structuram cerebri naturalem pertinere; — medullam inter omnia fere viscera paucissimis vasis sanguinem vehentibus instructam esse; — partes cerebri, destructis nervis, quibuscum cohaerent, mutari; — cerebrum humanum, ratione ad nervos tantum nec ulla alia habita, pro maximo inter animalium hucusque cognitorum cerebra habendum esse, eoque veram causam patere, cur solus homo rationis sit particeps, vel animal rationale; medullam spinalem nequaquam maximum nervum dici posse.

In neurologia : Fila nervea progrediendo manifeste crassiore fieri, et revera conos, apice cerebrum, basi superficiem corporis respicientes, minime vero cylindros constituere; Spiralem formam nervos tensos perdere; — dolores, vel calendaria, ut aiunt, cicatricum e nervorum pressione facile explicari posse; — nervum olfactorium esse laminam medullarem plicatam; — eundem hunc nervum in embryonibus maximum omnium esse, et cavum videri; — nervos opticos revera decussari; — origines tertii nervorum paris ad locum usque nigrum crurum cerebri protendi; — quartum nervorum par nervo quinti nervorum paris ophthalmico ope ramuli nonnumquam evidenter iungi; — portionem quinti nervorum paris minorem ad ramum eiusdem paris tertium abire; — nervum adcessorium singulari ratione per duram membranam traici; — nervum sympathicum non nisi nervum vasorum sanguinem vehentium, et inprimis arteriarum esse.

In doctrina super arteriis : Arteriarum truncos ubivis in articulorum flexura positos esse, ideoque nullo corporis motu canalem eorum claudi posse.

In doctrina super systemate absorbente : Partim cryptis, partim vasis, partim ambobus coniunctis glandulas componi; — vasa absorbentia in hominibus proceris ampliora, in

hominibus autem statura exilibus angustiora esse ; — a vasis absorbentibus in utroque ossium sterni latere positis partem vasorum mammae lymphaticorum recipi ; — lympham hominis admixto mercurio sublimato corrosivo cogi.

In splachnologia : Ductum pancreaticis excretorium valvulosi quid habere ; epididymi vasculum , quod semen in venas ducere dictum est , clausum finem habere ; — omnia testiculi vasa spermatica mercurio impleri posse.

In dermatologia : Rete malpighianum continuam membranam esse , saltem in Aethiopis scroto id demonstrari posse.

In doctrina de organis sensuum : In centro vero expansionis nervi optici , quam vulgo retinam vocant , punctum luteum et foraminulum.

PRAEFATIO INTERPRETIS.

Quum in eo sum, ut versionem egregii operis *Soemmerringiani* publicam lucem videre iubeam, non possum non, quin, quibus rationibus motus, versionem susceperim, paucis declarem, laborumque meorum rationem reddam.

Ipse egregius auctor, qui pauca ea legerat, quae lucusque latino idiomate scripsi, dignum me iudicavit, qui latius opus suum donarem, et ideo in litteris humanissimis laborem mihi delegavit. Bona egregii viri de me opinione motus libentissimus opus suscepi, et statim labori me adcinxi, cuius prima pars nunc prodit.

Summa, qua potui, diligentia et attentione opus peregi, quod, ne quid dissimulem, multum saepe laboris fecit, tam ex materie, quam ex tractationis indole, et ideo saepius dictionis stilus non nihil negligendus fuit, ne, genio nimis indulgens, perspicuitate nocerem. Multus vero in eo fui, ut bonis veteribus auctoribus incognita vocabula, quibus hodierni anatomici iusto liberius utuntur, numquam, nisi summa necessitate urgente, adhiberem, sed probatis tantum vocabulis uterer, ergo

etiam exactum delectum feci, in quo faciundo optimus *NOLTENIUS* me multum adiuvit.

Quantum potui, plana et perspicua dictione usus sum. Recte enim *WEITBRECHT* *), *Pes mere anatomicae*, ait, *per se frigidae sunt et ieiunae, et si in horum extremorum aliquo* (dictione sublimi, vel nimis populari) *peccatur, tanto maior nausea lectori creatur. Doleo, multos esse egregios libros, in quibus legendis plus opera danda est, ut, quid dicere velint scriptores, quanquid dixerint, intelligas.*

Plurimas auctoris adnotationes, egregia supellectili libraria, et plurimis, iisque pretiosis libris, in opere citatis, instructus, examinavi, nonnulla citata correxi, et hinc inde quaedam adieci, ipsique tamen operi inserui.

Quae si prima haec pars viris et anatomiae et philologiae peritis non improbabitur, calcar mihi addet, ut reliquas partes summa, qua potero, industria et cura elaboratas sistam.

D. C. F. C.

*) *Syndesmologia* praef.

CONSPECTUS OSTEOLOGIAE.

L I B R I.

OSSA GENERATIM SPECTATA.

§. I. *Qualitates ossium.*

§. II. Eas docet analysis chemica.

§. III. Gluten ossium.

§. IIII. Terra ossium.

§. V. Duritiem et fragilitatem ossa terrae debent.

§. VI. Nec minus opacitatem.

§. VII. Et albedinem.

Rubia tinctorum tingit ossa.

Ossa infantum fusciolem colorem habent.

§. VIII. Ossa non sentiunt.

§. VIII. Putredini resistunt.

§. X. Siccata pristinam formam servant.

§. XI. Systema omnium ossium audit sceleton, quod
vel naturale vel artificiale.

§. XII. *Divisio, nomina, numerus ossium.*

§. XIII. Pondus sceleti.

§. XIII. Ossa paria, imparia.

§. XV. Symmetria sceleti.

§. XVI. *Divisio ossium ad normam formae.*
in longa, sive cylindrica,
lata et
mixta.

§. XVII. – XVIII. *Substantia ossium, ratione formae,*
lamellata, reticularis, spongiosa, ratione
indolis vero, ubique eadem.

§. XX. *Periosteum;*

Initio est perichondrium.

Internum, externum periosteum.

Tendinibus et ligamentis articularum iun-
 gitur.

Periosteum sinuum in capitis ossibus.

Densius est periosteum embryonum, quam
 adultorum.

Arterias, venas, vasa absorbentia, et ner-
 vos excipit.

Rubia tinctorum non tingitur.

§. XXI. Usus periostei.

§. XXII. Ossa limitibus non coërcet.

§. XXIII. Medulla.

Mollior est reliqua corporis pinguedine.

Ex oleo, rel. constituitur,

Ab arteriis secernitur,

Venas habet, et

Vasa absorbentia;

Nervis caret.

§. XXIII. Dilutior est embryonum.

§. XXV. Usus medullae.

§. XXVI. Neque nutrit ossa,
 Neque elasticitatem ossium adiuvat,
 Neque in articularum cava exsudat,
 Neque ossium stamina iungit.

§. XXVII. *Cartilago.*

Glutinis spissioris habitum gerit.

Hinc inde fibrosa est,

Ceterum vero unius eiusdemque formae.

Cartilago permanens;

Raro cartilago vertebrae inter in os vertitur.

Cartilago temporaria;

Embryonum paullo mollior est,

Nullo artificio in os mutari potest,

Proprium involucrum habet,

Aquae immissa vel

fibrosa, vel

lamellata evadit.

Hinc inde fibrae tendinosae illi adduntur,

E tela cellulosa construitur,

Arterias, venas et

Vasa absorbentia habet,

Nervis et sensu caret.

Rubia tinctorum color eius non mutatur.

Vulnerata, cicatrice sanatur,

Morbo diutius saepe, quam os, resistit,

Vix propriis morbis patet,

Destructa non renascitur.

XXVIII

§. XXVIII. Spiritu vini immerfa opacior evadit.

Acidis dilutis non roditur,

Aquae vaporibus solvitur,

Facile siccatur.

§. XXVIII. Usus eius est multiplex.

MUTATIO CARTILAGINIS IN OS.

§. XXX. Arteriae succum osseum cartilagini advehunt.

§. XXXI. Arteria ossea fieri,

§. XXXII. Vel succo osseo oppilari, nonnumquam videtur.

§. XXXIII. *Incrementum et mutatio ossium.*

Mollis initio embryonum cartilago sensim
firmior evadit.

Inter initia secundi mensis prima ossis fu-
turi rudimenta adparent.

§. XXXIII. Habitus ossium fetus maturi.

§. XXXV. — — — post partum.

§. XXXVI. — — — pubertatis tempore,

§. XXXVII. — — — aetatis maturae tempore,

§. XXXVIII. — — — ab aetatis anno vigesimo
quinto, ad trigesimum usque.

§. XXXVIII. Ossium forma mutari vel restitui num-
quam desinit.

§. XXXX. Habitus ossium aetate senili.

§. XXXXI. Rationes harum descriptionum.

§. XXXXII. Diaphyses, epiphyses ossium.

§. XXXXIII. Ad mensent nonum usque incrementum
ossium aequè celerrimum est, ac reli-
quarum partium.

§. XXXXIII. Perfectionem sexus potioris ossa citius
attingunt.

- §. XXXV. *Restitutio ossium laesorum.*
Quae desunt, interdum post partum nascuntur.
- §. XXXVI. Ferro avulsum os nonnumquam iterum, marginibus vero laevigatis, coalescit.
- §. XXXVII. *Callus.*
- §. XXXVIII. *Sanatio fracti ossis sani.*
- §. XXXVIII. - - - *ossis morborum.*
- §. L. Qua ratione cavitas ossis serra desecti occludatur.
- §. LI. *Generatio novi articuli.*
- §. LII. Interdum pars ossis avulsa aliquatenus,
- §. LIII. Integrum vero os perditum aegerrime,
- §. LIII. Verum tamen dens unus vel alter restituitur.

IUNCTURAE OSSIIUM.

- §. LV. *Immobiles; suturis; harmonia.*
- §. LVI. *Semimobiles; Ligamentis cartilaginosis, vel mera cartilagine.*
- §. LVII. *Mobiles: Articulis, vel adstrictis, vel cardiniformibus, vel trochlearibus, vel orbicularibus, vel laxis.*
- §. LVIII. *Foveae et tubera ossium.*
- §. LVIII. *Usus ossium communis.*
- §. LX. *Discrimen sceleti ratione aetatis.*
- §. LXI.-LXII. - - - *et singulorum ossium ratione sexus.*

DISCRIMEN OSSIIUM RATIONE GENTIUM.

- §. LXIII. *Europaeus.*

§. LXIII. *Asiani.*

Persa, Colchus, Sigynus.

Tatarus, Calmuccus, Iacuta, Tungusa.

Sinensis.

Ex insula Celebe.

Asianus incognitus.

Casaccus.

Turca.

Indus orientalis.§. LXV. *Afri.*

Aegyptus, vel caput Mumiae.

Cingarus genuinus.

Incola insulae Teneriffae.

Aethiops.

Hottentota.

Incola insulae Madagascar.

Gonaquois.

Mulatta.

§. LXVI. *Americani.*

Incola Americae Septentrionalis;

- - Insulae, vocatae Hond - Eyland,
ex Caribaeis.

Caribaeus.

Canadensis.

Squimaeus.

Incola terrae ignis.

§. LXVII. Incolae insularum oceani australis.

Incola insulae Otaheitae.

- - Mallicolo.

- novae Hollandiae.

- novae Zeelandiae.

- §. LXVIII. *Discrimen sceleti ratione individui.*
 §. LXVIII. *Discrimen ossium ratione victus.*
 §. LXX. *Discrimen ossium ratione consuetudinum,*
vitae generis, amictus.

- §. LXXI. *Discrimen ossium ratione morborum.*

Morbi non uno modo ossa tentant.

- §. LXXII. A pure solvi videntur.
 §. LXXIII. Putridum os, aëri expositum, nigerrimum
 colorem induit.
 §. LXXIII. Rhachitis.
 §. LXXV. Cretini.
 §. LXXVI. Hydrops et alii tumores compagem ossium
 distringunt.
 §. LXXVII. Ossa venerea.
 §. LXXVIII. Ossa hydropica.
 §. LXXVIII. Ossa periosteo privata.
 §. LXXX. Ossa scorbutica.
 §. LXXXI. Ossa arthritica.
 §. LXXXII. Spina ventosa.
 §. LXXXIII. Exostosis.
 §. LXXXIII. Os putridum.
 §. LXXXV. Forsan posteri ex solo ossis adspectu
 morbi genus cognoscere poterunt.
 §. LXXXVI. *Discrimen ossium ratione praeparationis*
ac conservationis.
 Sub dio cretaceum colorem induunt.
 §. LXXXVII. Aes cyprium viridi colore ea tingit.
 Mumiarum ossa.
 §. LXXXVIII. Hucdum anthropolithi veri non inventi
 sunt.

DESCRIPTIO SINGULORUM OSSIUM.

- §. LXXXVIII. – LXXXXVIII. Os frontis.
- §. C. – CVIII. Ossa bregmatis.
- §. CVIII. – CXXV. Os basilare vel spheno occipitale.
- §. CXXVI. – CXXXIII. Ossa temporum.
- §. CXXXV. – CL. Organa auditus ossea. Labyrinthus.
- §. CLI. Malleus.
- §. CLII. Incus.
- §. CLIII. Stapes.
- §. CLIII. – CLXIII. Os ethmoideum.
- §. CLX. – CLXX. Ossa maxillaria superiora.
- §. CLXXI. – CLXXVII. Ossa palatina.
- §. CLXXVIII. – CLXXXVI. Ossa zygomatica.
- §. CLXXXVII. – CLXXXII. Ossa nasi.
- §. CLXXXIII. – CLXXXVII. Ossa lacrimalia.
- §. CLXXXVIII. – CCVI. Ossa turbinata inferiora.
- §. CCVII. – CCXIII. Vomer.
- §. CCXIII. – CCXXIII. Os maxillae inferius.

*D e n t e s.**Libri de dentibus.*

- §. CCXXIII. Discrimen generale dentes inter et reliqua ossa.
- §. CCXXV. Substantia dentium vitrea.
- §. CCXXVI. Ossea dentium pars.
- §. CCXXVII. Divisio dentis.
- §. CCXXVIII. Classes dentium.
- §. CCXXVIII. Ordo dentium iunctorum.
- §. CCXXX. Incrementum dentium generatim spectatum.

§. CCXXXI.

- §. CCXXXI. Dentes decidui.
- §. CCXXXII. Series, qua dentes primi erumpunt.
- §. CCXXXIII. Ordo, quo dentes cadunt et renascuntur.
- §. CCXXXIII. Modus, quo dentium permanentium
formatio absolvitur.
- §. CCXXXV. Mutatio dentium progrediente aetate.
- §. CCXXXVI. Dentium varietates.
- §. CCXXXVII. Usus dentium.
- §. CCXXXVIII. - CCXXXVI. Ossa lingualia.

OSSA CAPITIS, GENERALIS CRANII

NOTIO.

- §. CCXXXVII. Compages ossium cranii immobilis.
- §. CCXXXVIII. Suturis iunguntur; sutura coronali,
sagittali, frontali, lambdoidea,
squamosa.
- §. CCXXXVIII. Suturae externa in superficie crispio-
res sunt, quam in interna.
- §. CCL. Usus suturarum.
- §. CCLI. Ossa triquetra.
- §. CCLII. Centrum gravitatis cranii.
- §. CCLIII. Septem ossa calvariam constituunt.
- §. CCLIII. Calvaria homini, ratione vultus, maxima.
- §. CCLV. Forma calvariae catagraphica.
- §. CCLVI. Externa calvariae facies satis laevis, et
spongiosior est, facie interna.
- §. CCLVII. Cavitas calvariae.
Variae eius foveae.

§. CCLVIII. Calvariae crassitudo non ubivis eadem.

Sinus frontales.

§. CCLVIII. Interna calvariae tabula.

Cerebri imaginem exprimit.

§. CCLX. Substantia ossium capitis saepe varietates exhibet.

Varietates ossium capitis ad sceleton, ad se invicem, ad magnitudinem et numerum.

§. CCLXI. Linea faciei.

§. CCLXII. Hominis et simiae orbitae clausae sunt.

§. CCLXIII. Solius hominis foramen magnum occipitale in planum horizontale porrigitur.

§. CCLXIII. – CCLXVI. Orbitae.

§. CCLXVII. – CCLXXIII. Sinus nasales.

§. CCLXXIII. Fornix palatinus.

§. CCLXXV. Foramina, intervalla, hiatus et aperturae canalium in externa et interna cranii parte generatim perlustrata.

§. CCLXXVI. Regiones calvariae.

§. CCLXXVII. – CCLXXXIII. Atlas, prima colli vertebra.

§. CCLXXXV. – CCLXXXVII. Epistropheus, secunda colli vertebra.

§. CCLXXXVIII. – CCCII. Quinque inferiores vertebrae colli.

§. CCCIII. – CCCXII. Vertebrae dorsi.

§. CCCXIII. – CCCXXXIII. Costae.

§. CCCXXXV. – CCCXXXVIII. Ossa sterni.

- §. CCCXXXIII. - CCCLIII. Vertebrae lumborum.
- §. CCCLV. - CCCLXVIII. Os sacrum.
- §. CCCLXX. - CCCLXXVI. Ossa coccygis.
- §. CCCLXXVII. - CCCLXXXVIII. *Spina dorsi.*
- §. CCCLXXXX. - CCCCXII. *Cavitas ossea thoracis.*
- §. CCCCXIII. - CCCCXXXIII. Ossa coxarum.
- §. CCCCXXXIII. - CCCCLI. *Pelvis ossea.*
- §. CCCCLII. - CCCCLVIII. Claviculae.
- §. CCCCLVIII. - CCCCLXXI. Scapulae.
- §. CCCCLXXII. - CCCCLXXVIII. Ossa humeri.
- §. CCCCLXXVIII. - CCCCLXXXV. Ulnae.
- §. CCCCLXXXVI. - CCCCLXXXII. Radii.
- §. CCCCLXXXIII. Ossa navicularia.
- §. CCCCLXXXIII. Ossa lunata.
- §. CCCCLXXXV. Ossa triquetra.
- §. CCCCLXXXVI. Ossa orbicularia.
- §. CCCCLXXXVII. Ossa multangula maiora.
- §. CCCCLXXXVIII. Ossa multangula minora.
- §. CCCCLXXXVIII. Ossa capitata carpi.
- §. D. Ossa hamata.
- §. DI. - DVI. Ossa metacarpi.
- §. DVII. Os metacarpi pollicis.
- §. DVIII. Os metacarpi digiti indicis.
- §. DVIII. Os metacarpi digiti medii.
- §. DX. Os metacarpi digiti annularis.
- §. DXI. Os metacarpi digiti auricularis, sive digiti minimi.
- §. DXII. - DXVI. Phalanges digitorum generatim spectatae.

- §. DXVII. – DXXI. Phalanges posteriores.
- §. DXXII. Phalanges mediae.
- §. DXXIII. Phalanges priores, sive phalanges unguium.
- §. DXXIII. Ossa digitorum manus sesamoidea.
- §. DXXV. – DXXXII. *Compages ossium artuum superiorum.*
- §. DXXXIII. – DLII. Ossa femoris.
- §. DLIII. – DLVIII. Tibiae.
- §. DLX. Patellae.
- §. DLXI. – DLXVI. Fibulae.
- §. DLXVII. – DLXXI. Astragali.
- §. DLXXII. – DLXXX. Calcanei.
- §. DLXXXI. Ossa navicularia.
- §. DLXXXII. Ossa cuneiformia generatim spectata.
- §. DLXXXIII. Ossa cuneiformia magna.
- §. DLXXXIII. Ossa cuneiformia parva.
- §. DLXXXV. Ossa cuneiformia media.
- §. DLXXXVI. Ossa cuboidea.
- §. DLXXXVII. Ossa metatarsi.
- §. DLXXXVIII. Os metatarsi pollicis pedis.
- §. DLXXXVIII. Ossa metatarsi reliquorum digitorum pedis.
- §. DLXXXX. Os metatarsi secundum.
- §. DLXXXXI. Os metatarsi tertium, sive medium.
- §. DLXXXXII. Os metatarsi quartum, sive penultimum.
- §. DLXXXXIII. Os metatarsi quintum, sive ultimum.
- §. DLXXXXIII. Phalanges digitorum pedis generatim spectatae.

- §. DLXXXV. Phalanges posteriores.
- §. DLXXXVI. Phalanges mediae.
- §. DLXXXVII. Phalanges priores, sive phalanges un-
guis. *guis.*
- §. DLXXXVIII. Ossa digitorum pedis sesamoidea.
- §. DLXXXVIII. - DCXXII. *Compages ossium artuum inferiorum.*
- §. DCXXIII. - DCXXX. *Comparatio superiorum et inferiorum artuum, quantum ad ossa.*
-

OPTIMI LIBRI

SUPER

OSTEOLOGIA.

BERNHARD SIEGFRIED ALBINUS, *de ossibus corporis humani*. Lugd. Batav. 1726. 8vo. Liber saepius recusus, eximius.

EIUSD. *Icones ossium foetus humani*. Leid. 1737. 4to. Ad hoc usque tempus sui similem non habet librum. Non omnia ossa ad unius eiusdemque aetatis fetum esse delineata, iure dolemus.

EX. *Tabulae sceleti et musculorum corporis humani*. Lugd. Batav. 1747. fol. max.

EX. *Tabulae ossium*. Leidae 1753. fol. max. Exceptis quibusdam capitulis hoc in libro delineationibus minus perfectis, aegre consummatius quid hisce libris invenies, stili veritate, eximia diligentia, ornatisima tractatione et egregia descriptione satis superque sese commendantibus. Ectypa, partim minore forma edita, prototypum longe post se relinquit.

EX. *De sceleto humano liber*. Leide, 1762. 4to. Perfectissima atque exactissima, quae umquam prodiit, ossium descriptio, ad antecedens opus semper relata.

EX. *Annotationum academicarum libri octo*. Ib. anno 1754. ad annum 1768. usque. 4to. Quorumdam ossium, v. g. dentium, labyrinthi auris delineationes supplentur, egregia physiologica observata notantur, quare classicus, notatu dignissimus liber.

GODFRIDI BIDLOO. *Anatome H. C. centum et quinque tabulis*. Amstel. 1685. Idem liber, inscriptus: *Ana-*

tomia corporum humanorum, centum et quatuordecim tabulis aucta a G. COWPER. Amstel. 1739. Ossa sceleti muliebris singulatim, tota quanta, sat bene delineata exhibet.

JOHANN GOTTLIEB WALTER, von trocknen Knochen. Berlin 1763. 8vo. Exactissima descriptio.

JOHANN FRIDERICH BLUMENBACH, Geschichte und Beschreibung der Knochen, Gött. 1786. 8vo. Propter anatomiam comparativam magni aestimandus liber.

Scripta super singulis partibus data occasione citabuntur.

O S S A M O R B O S A.

FRED. RUYSCH, in suis operibus aliquot eximias delineationes dedit.

CORN. TRIOEN, Observationum med. chir. fasciculus. Lugd. Bat. 1743. 4to. Pulcherrimae et exactissimae delineationes.

GUILIELMI CHESelden Osteographia. Lond. 1733. fol. magn. Plurimas delineationes, solida graphide factas, continet. Rarissimum opus, pauca enim exemplaria typis exscripta sunt.

Nonnullae delineationes a *GEORG. CRISTIAN. REICHEL* factae hinc inde in dissertationibus inveniuntur, e.g.

In *CHRIST. GOTTL. LUDWIG Progr. de colli femoris fractura.* Lips. 1775.

GEORG. CHRIST. REICHEL de epiphysium ab ossium diaphysi diductione. Lips. 1759. recus. in *SANDIFORT Thesauro.*

IOANN. FRED. KNOLLE, de ossium carie venerea. Lips. 1763.

G. CHRIST. REICHEL, de ossium cylindraceorum fissura. Lips. 1764.

IOH. GOTTH. HERRMANN, *de osteosteatomate*. Lipsiae
1767.

CHRIST. GOTTL. LUDWIG, *Progr. de paraplegia ex
fractura vertebrarum*. Lips. 1757.

Specimina egregiae delineationis et calcographiae.

ANDR. BONN, *Descriptio thesauri ossium morbosorum
HOVIANI*. Amstel. 1783.

EI. *Tabulae ossium morbosorum Fasc. I. II. III.* Amst.
1785. — 88. Omnium pulcherrimae et utilissimae.
Continuatio operis in maximis votis habetur.

EDUARDUS SANDIFORT, *Museum Anatomicum Aca-
demiae Lugduno-Bataviae*. Volumina dua. Lugduni-
Batavorum. 1793. Folio mai. — Opus splendidis-
simum, praestantissimum.

GENERALIS OSSIUM NOTIO.

§. I.

Inter omnes corporis nostri partes ossa plurima duritie et fragilitate pollent, prorsus fere opaca sunt, ex albo flavescent, omni sensu carent, diutissime putredini resistunt, et exsiccata pristinam figuram servant.

§. II.

Hae qualitates e contemplatione elementorum, chemica arte separatorum, facile explicantur, *) alteram enim dimidiam ossium partem e gelatina, alteram vero e terra calcaria, acido phosphoreo fixo, et particulis ferreis **) iuncta, ideoque usta in calcem vivam abire nescia, constitui, analysis docet.

§. III.

Gelatinam ossis ostendit. 1) Coctio in clauso cacabo, ubi vapores aquei totum fere os in gelatinam resolvunt; 2) Acidum vitrioli tenue, acidum salis, praecipue autem acidum nitri et phosphori ***), quin lac humanum, quod acuit, terrea

*) *Succow Chymie*, p. 242. ubi *GAHNII* methodus explicatur.

**) Ossa humana maiorem coloris caerulei copiam praebent, quam ossa brutorum. *BUCHOLZ* in *Journal de Physique* 1783. mens. Febr. *BONVOISIN* über die Reinigung der Knochensäure in *Sammlungen zur Physik und Naturgeschichte*. Leipzig 1791. 4. Band, 5. St.

***). Acrius erodit acidum phosphori ossa, acido nitri. *FOURCROY* in *Hist. de la Société de Med.* 1782. et 1783.

elementa, relictæ gelatina solvunt, ita, ut formam quidem os servet, substantia vero eius cartilaginosa reddatur. Verum tamen, soluta ossis terra ope acidorum, gelatina infantibus mollior et viscidior, quam adultis, remanet.

§. III.

Terream partem monstrat 1) Calcinatio, quæ caute instituta minime formam ossis, sed gelatinam tantum destruit. 2) Pluvia et calor sub dio expositum os gelatina privant, remanente terra, quæ aquam avidè absorbet. Initio quidem terra formam ossis servat, donec tandem fissa, lamellarum instar separata, dissipata, sensim sensimque pereat.

§. V.

Magna terræ copia ossibus *duritiem et fragilitatem* largitur, ideoque trahi vel extendi nescia franguntur potius vel rumpuntur; quo maior igitur terræ copia, eo maior fragilitas, v. g. Infantum ossa, quæ minorem terræ copiam, quam adultorum, habent, flecti possunt, nec franguntur, quod thlasis calvariae infantilis probat; senum vero ossa, quæ ad ætatis rationem maximam terræ copiam habent, facillime franguntur; — inde ossa, ablato omni glutine, omnium facillime franguntur.

Quod tamen non impedit, quo minus, dummodo forma, ut e. c. in costis, congruat, præsertim tenues lamellæ osseæ elasticitatem (quemad-

modum vitrum, etsi omnia corpora fragilitate superans,) exhibere possint.

Rursus vero acida, vel morborum materiae, quae terram solvunt, glutini autem parcent, ossa flexilia, et cartilaginum in morem elastica reddunt; exemplo sint scorbutus, rhachitis, osteosarcosis.

§. VI.

Opacitas a terra oritur; os enim, quamdiu cartilago est, semidiaphanum, maiore terrae copia, opacum redditur. Calcinatione vel alio modo (§. II.) gelatina ablata, summum opacitatis gradum attingit; absorptis vero elementis terreis, vel ab acido, vel a morbo, semidiaphanum os redditur.

§. VII.

Albus quoque color terrae debetur, qui, quantum gelatina minuitur, tantum augetur, rursus vero tantum diminuitur, quantum pars terrea absorbetur. Haec est causa, cur ossa calcinata cretaceum colorem habeant.

Rubia tinctorum vel galium aparine coccineo colore ossa tingunt. *) (vid. §. CV.)

Quin magno icteri gradu flavescunt. **)

Ceterum infantum ossa propter diversam staminum qualitatem, et vasorum sanguinem vehen-

*) I. B. BOEHMER de callo ossium e rubiae tinctorum radicis pastu insectorum. Lips. 1752. et Petri DETHLEF Diss. ossium calli natura per fracta in animalibus rubiae radice pastis ossa demonstrata. Götting. 1753. 4.

**) Th. KERCKRING Spicileg. anatom. p. 118. Io. Zach. PLATNER de ossium conformatione et colore. Lips. 1753. p. 7.

tium copiam cinereum, absoluto vero incremento albidiorum colorem exhibent; senum vero ossa magis, quam iuniorum, flavent. Quo loco tenuia calvariae ossa sanguinis colorem transire patiuntur, magis cinerea, quam alba videntur; separato vero osse, locus minime diversus adparet; quo maior igitur crassitudo et densitas, eo albidior color ossi, ceteris paribus, contingit.

Plerumque epiphyses, in primis ossium cylindricorum infantum, fusciori colore tinctae sunt, quam adutorum.

§. VIII.

Ossa hominum in statu sano *omni sensu carere* inter omnes convenit, quod, ut in descriptione periostei videbimus, e defectu nervorum oritur. Nusquam natura materiem mere terream sensu donasse videtur.

§. VIII.

Facultas etiam, quae putredini resistunt, maxima ex parte ad terram transferenda est, inde, dirutis iam dudum partium mollium et medullae structura et forma, vel aëris vi expositorum, vel sepulchrorum ossium formam servatam invenies, quae si cartilaginosa essent, facile putrescerent, eorum enim gelatina putredini non resistit, quod experimentum probat. Detractis enim ope acidi nitr diluti elementis terreis, os, probe abluto acido, aqua immersum cartilaginis instar solvitur et putrescit.

§. X.

Tandem etiam *immutabilitas* formæ ossium siccorum partium terrearum copiae tribui potest. Omnes reliquæ partes siccatae formam penitus mutant et corrugantur, — os vero, (exceptis paucis tenuissimis laminis osseis, quæ calore aut humiditate cinnamini ad instar convolvuntur) vel siccissimum magnitudinem et formam vix mutat. Quare inter omnes corporis nostri partes ossa facillime servantur, quæ post sæcula, dummodo nimia aëris acoribus inquinati vis arceatur, parum vel nihil indolem mutasse videntur.

§. XI.

Omnia ossa, exceptis ossibus lingualibus, mutuo sibi nexa, corpus, quod *skeleton* vocatur, constituunt. — *Skeleton naturale* vocatur compages ossium, propriorum ligamentorum et cartilaginum ope inter se coniunctorum. *Skeleton artificiale* vocatur copulatio artificialis ossium antea se junctorum. *Sceleta* infantum ad annum usque septimum vel octavum numquam siccanda, sed in spiritu vini ponenda sunt, integra enim cartilaginum, id est, ossium futurorum forma, corrugando perditur, ideoque non nisi distracti ossium nuclei adparent.

Debita scientia et indefessa inter siccandum attentione, parata *sceleta naturalia*, ob nexus veritatem utilissima et optima sunt, etsi corrugatis ligamentis cartilaginosis, laminis cartilaginosis, vel superficiebus articularibus, ultra pollicem altitudo

naturalis amittit, quod, si integra spiritu vini conduntur, non accidit.

DIVISIO, NOMINA, NUMERUS OSSIUM.

§. XII.

In ossa *capitis*, in ossa *trunci* et in ossa *artuum sceleton* dividitur.

Ad *Cranium* pertinent

I. vel II. Ossa frontis,

II. Ossa bregmatis.

I. Os sphenobasilare.

II. Ossa temporum,

II. Mallei.

II. Incudes.

II. Stapedes.

I. Os ethmoideum.

Ad *Faciem* — — II. Ossa maxillaria superiora,

II. Ossa palatina.

II. Ossa zygomatica.

II. Ossa nasi.

II. Ossa lacrimalia.

II. Ossa turbinata,

I. Vomer.

I. Maxilla inferior,

XXXII. Dentes.

Ad *Linguam* — V. Ossa lingualia.

Summa ossium

capitis — LVIII. vel LX. ossa. Iunctis vero ossibus lingualibus LXIII. vel LXV.

Ad *Collum* — — VII. Vertebrae colli.

- Ad *Thoracem* — XII. Vertebrae dorsi.
 XXIII. Costae.
 II. vel III. Ossa sterni.
- Ad *Lumbos* — — V. Vertebrae lumborum.
- Ad *Pelvim* — — I. Os sacrum.
 III. Ossa coccygis.
 II. Ossa coxarum.

Summa ossium

trunci — — LVII — LVIII. ossa.

- Ad *Scapulas* — II. Claviculae.
 II. Scapulae.

- Ad *Humeros*. — II. Humeri.

- Ad *Antibrachia* — II. Ulnae.
 II. Radii.

- Ad *Carpos* — — II. Ossa navicularia.
 II. Ossa lunata.

- II. Ossa triquetra.
 II. Ossa orbicularia.

- II. Ossa multangula maiora.
 II. Ossa multangula minora.
 II. Ossa capitata.
 II. Ossa hamata.

- Ad *Metacarpos* — X. Ossa metacarpi.

- Ad *Digitos* — — X. Phalanges posteriores.
 VIII. Phalanges mediae.
 X. Phalanges priores, vel phalanges unguium.
 VIII. Ossa sesamoidea.

Summa ossium

artuum superiorum LXXII. ossa.

Ad *Femora*, — — II. Femorum.

Ad *Tibias* — — II. Tibiae.

II. Patellae.

II. Fibulae.

Ad *Tarsos* — — II. Astragali.

II. Calcanei.

II. Ossa navicularia.

II. Ossa cuneiformia magna.

II. Ossa cuneiformia parva.

II. Ossa cuneiformia media.

II. Ossa cuboidea.

Ad *Metatarsos* X Ossa metatarsi.

Ad *Digitos pedis* X. Phalanges posteriores.

VIII. Phalanges mediae.

X. Phalanges priores, vel Phalanges unguium.

• VI. Ossa sesamoidea in pedum pollicibus.

Summa ossium

artuum inferiorum LXVI. ossa.

Quare integrum sceletum CCLVIII. vel CCLXI. ossa constituunt.

Plerumque in ligamento hyothyreoideo utriusque lateris ossa orbicularia inveniuntur, quae si adsunt, CCLXII. CCLXIII. ad CCLXIII. ossa corpus continet.

Nonnunquam etiam tendo ventris externi musculi suralis unius vel utriusque lateris haud exiguum ossiculum includit.

§. XIII.

Naturale integrum sceleton virilis corporis mediae staturae siccum pondo est CL. unciarum ad CC. uncias usque, feminei C. ad CLX. *)

§. XIII.

Quibus ex ossibus plerumque os frontis, semper vero os sphenoccipitale, os ethmoideum, vomer, maxilla inferior, vertebrae, ossa sacrum, os coccygis, ossa sterni et os linguale medium *impria* sunt, et, quod in medio corporis posita sunt, *symmetrica*, reliqua omnia ea ratione *duplicia* vel *paria* sunt, ut quodvis par altero dextro, altero sinistro osse constituatur.

§. XV.

Structura igitur *totius sceleti* est *symmetrica*, linea enim perpendicularis per medium corpus mente traiecta, vel ipsa ossa *impria* in alteram dextram, in alteram sinistram partem dividit. **)

Quod vero laxius intelligendum, plerumque enim neque dextri lateris os socio sinistri lateris, neque pars dextri lateris ossis imparis sinistrae parti in omnibus respondet. Saepissime ex ossibus paribus dextrum, ex imparibus dextra pars natura longiora, latiora, crassiora, solidiora et ponderosiora, vel versa vice, minora, con-

*) Fr. Xaver. SWEDIAUER Diss. exhibens descriptionem praeparatorum, quae possidet Facultas medica Vindobonensis. Vienn. 1772. 8. p. 61. singulorum ossium pondus et longitudinem indicat.

**) F. H. LOSCHGE, Progr. De symmetria corp. hum. inprimis sceleti. Erlang. 1793. 4.

tractione, tenuiora, rariora, quin et aliter formata sunt, quam os sinistrum, vel pars sinistra.

Quam curvatum plerumque os vomer? Quantum symmetriae defectus saepissime in calvariae interna superficie invenitur? Saepe costa ultima sociam alterius lateris longitudine pollicis superat. Symmetria saepissime ossa sterni carent. Raro cartilagines costarum utriusque lateris cum sterno posito e regione sibi opposito iunguntur. Saepe articuli costarum cum vertebra multum in hoc et illo latere inter se discrepant; verum tamen symmetriam formae exterioris, quantum ad summam, hoc discrimine laedi raro videmus, natura enim plerumque alio ordine hunc symmetriae defectum tegit, quanto enim v. g. dextra vertebrae pars elatior est sinistra parte, tanto plerumque (non enim de morbis heic agitur) dextra pars proximae, vel incumbentis, vel subiectae vertebrae, vel cartilaginis intervertebralis, depressior est, ita ut perpendicularis columnae vertebralis habitus in universum non vitietur.

DIVISIO OSSIUM AD NORMAM FORMAE.

§. XVI.

Quantum ad formam ossa dividi solent, a) in ossa *longa* sive *cylindrica*, b) in ossa *lata* vel *plana*, c) in ossa *mixta*.

Ossa longa, id est, ossa, quorum longitudo latitudinem et crassitudinem superat, plerumque epiphyses crassiores habent quam diaphyses, quae

excavatae medullam continent. Omnia artuum, et superiorum, et inferiorum ossa, exceptis ossibus carpi et tarsi, scapulis, et ossibus sesamoideis, huc referuntur.

§. XVII.

Lata vel plana ossa, id est, quae insigni ambitu conspicua exiguam vel modicam crassitudinem habent, diversis locis diverse crassa sunt, nec alio loco, nisi quo aliquantum crassiora sunt, caveas, medullae recipiendae aptas, habent. Omnia calvariae ossa, scapulae, ossa coxarum, ossa sterni, costae, os linguale medium, et utrumque os linguale laterale hisce adnumerari debent.

§. XVIII.

Ossa mixta omnia reliqua ossa vocantur, quibus maior crassitudo, quam longitudo et latitudo, vel paullum rotunda figura est, quae igitur neque inter ossa longa, neque inter ossa lata referri possunt. Ossicula auditus, ossa faciei, omnes vertebrae, os sacrum, ossa coccygis, ossa carpi, tarsi, patellae, ossa sesamoidea, ossa lingualia orbicularia, dentes denique huc pertinent.

SUBSTANTIA OSSIUM.

§. XVIII.

Omnium ossium, exceptis dentibus, substantia externe, si vasorum foramina excipias, solida, interne autem, crassitudine dimidia lineae parte non minore, rarior observatur.

Ossa cylindrica externam superficiem versus

gradatim solidiora vel densiora, internam vero versus in diaphysi *lamellata* *), tum laxiora, deinde cava, interne epiphyses versus *reticulata*, in epiphysibus ipsis autem *spongiosa* **) conspiciuntur.

Quibus in locis valde tenuia sunt ossa *lata*, in iisdem plerumque solidissima sunt, quibus vero in locis quartam lineae partem crassitudine superant, in iisdem internum versus diploën habere solent ***).

Ossium *mixtorum* plus minusve crassus cortex internum versus in substantiam modo magis *cellularem*, modo *reticularem*, modo *spongiosam* desinit.

Ceterum substantia ossium subtilius considerata, (exceptis dentibus, et substantia labyrinthum cingente ****), omnibus locis eadem, vel unius eiusdemque indolis est, nec nisi nexus sub-

*) Egrege delineata est haec structurae forma, microscopio etiam adhibito a REICHEL Diss. de ossium ortu et structura. Lips. 1760. 4. recusa in SANDIFORT Thesaur. Diss. Vol. II. p. 186. Haec lamellata structura impedit, quo minus fractura ossis transversa fieri possit. v. CAMPER in Essays and observations physical and literary before the physical society of Edinburgh. Vol. III. 1771. 8. p. 537. GAGLIARDI descriptio, quam Tab. III. fig. 1. illustrat, minus subtilis est.

**) GAGLIARDI Anatome ossium. Rom. 1689. 8. vel Leidae 1723. Tab. III. Adcuratissime delineatum hunc habitum invenies in BOEHMERI Institut. osteologicis Tab. III. fig. 1. ALBINI enim delineatio Tab. VI. Annot. acad. Lib. III. subtilior esse posset.

***) Omnium optimam delineationem HALLERUS dedit in Iconib. anatom. Fasciculo III. Tab. ossium narium.

****) Minus evidens in homine est, quam in brutis, v. g. vitulo, elephante, quare veteres, non nisi bruta secantes, hanc massam ob singularem duritiem et fragilitatem, vel singularem indolem os petrosum vocasse arbitror.

tilissimorum elementorum osseorum ad integrum os constituendum mutatur, seu *massa*, *minime vero forma ossium in toto corpore eadem est.*

Excepto forsitan infantum cranio, ossa fibris vel lamellis construi minus recte dicuntur.

Ea extremarum partium nondum adhuc absolutorum ossium pars, quae laminae cartilaginosae contigua est, et diaphyseos et apophyseos non solum, ablata lamina cartilaginosa, holoserici faciem mentitur, sed etiam paullo ultra mollior est, et incisa singulare quid, arenam quasi inspersionem, simulat.

PERIOSTEUM.

§. XX.

Omnem omnium ossium habitum (exceptis coronis dentium peculiari massa tectis) membrana arcte adhaerens, densa, tela cellulosa, arteriis, venis et vasis absorbentibus composita, putredine facile ab osse secedens, *periosteum* vocata, ad superficies cartilaginosas usque obducit.

Eiusdem naturae membrana, quae cartilagine costarum, et ossa, quamdiu cartilagine sunt, involvit, vocatur *perichondrium*.

Sola ea membrana, quae internam calvariae faciem obducit, pluribus notis cum omni reliquo periosteo discrepat, (Neurologia §. 1.) una enim opera calvariae periosteum, cerebro tegmen et sinus sanguinis, nervisque involucrum praebet.

Haec membrana, quae, ut a subtili, faciem

internam ossis obducente tela cellulosa, sive *periosteo interno*, distinguatur, *periosteum externum* a nonnullis vocatur, tela cellulosa, ad os tensa et firma, externam vero superficiem versus ob nexum cum vicinis partibus, cute, musculis, tendinibus, pinguedine, membranis, visceribus et nervis laxiore, aspera, floccida componitur.

Ossi vasorum et filorum telae cellulosae ope iungitur.

Difficillime a ligamentis articularum et tendinibus, et quibusdam locis recens ne hilum fere separari potest, ad tubera enim ossium adultorum, quibus validi tendines illigantur, intime iis miscetur, ut nullo modo ab iis seiungi possit.

In capite, cuius ossa vel sine articulis inter se copulantur, vel mutuo sese recipiunt, continuo nexu ab uno ad alterum os abit, (firmiter tamen suturis adhaeret) quare, skeleti compagem periosteo continuo quasi tramite tegi, quidam crediderunt.

Periosteum, quod sinus frontales, ethmoidales, sphenoccipitales et maxillares superiores obducit, optime explorari potest, hic enim superficies eius laevis, nec ullis aliis membranis tecta reperitur. Generatim hocce periosteum medium esse externum inter et internum periosteum videtur. Ad magnitudinem ossium, periosteum embryonis et infantum, quod plerumque externa cartilaginis lamina ei iuncta manet, validius et crassius est periosteo adultorum, et ab externa facie non solum purius et distinctius cognosci, sed

etiam facilius ab osse separari potest, pluribus etiam arteriis in infante, velut reliquae omnes partes, abundat.

Arteriae periostei *) maiorum ossium maiores et copiosiores, arteriis minorum ossium, comparatae vero cum arteriis musculorum, subtiles, a vicino quodam trunculo, et plerumque, exceptis maioribus et constantioribus ramulis, in descriptione arteriarum negliguntur. Ramulos spargunt, quorum surculi vel periosteo immerguntur, vel inter fibras osseas, quarum directionem sequuntur, repunt, vel ad intimam usque ossis partem, ad medullam usque perveniunt. Hisce, qui directionem fibrarum ossearum sequuntur, surculis, iniectioe feliciter gesta, vel in particula periostei de cylindricis ossibus ablata, quae ossi contigua fuit superficies, facile discerni potest. Alii, subinde insignes rami, spatium in periosteo antea non emensi, directione obliqua, raro perpendiculari, substantia ossis penetrata, ad medullam perveniunt. Horum maximos atque copiosissimos ramos in epiphysibus ossium cylindricorum, inprimis ossis femoris, cernere licet.

Venarum rami et surculi iuxta arterias, ut in plurimis corporis partibus, positi sunt.

Haec vasa telam cellulosam externi periostei

*) *Arteriae periostei ossis bregmatis infantilis adcuratissime depictae sunt in ALBINI Icon. oss. foetus, Tab. ult. ossis cylindrici in RUYSEH Advers. anatom. Dec. III. Tab. II. Fig. VIII.*

ad internum ducunt, quadam igitur ratione utrumque coniunctum dici potest.

* Vasa absorbentia quibusdam periostei locis distincta patent, phaenomena etiam ossis sani et morborum magnum eorum numerum esse debere, ostendunt *).

Nervi in periosteo, exceptis dentibus, non inveniuntur, quare nec ipsum, ideoque nec os, quod ab eo tegitur, in statu sano vi certissimorum experimentorum sentit, etsi hinc inde surculi nervorum illi incumbunt **), qui vero non ad periosteum, sed ad alias partes pertinent, ramuli etiam, qui arterias in os usque comitantur, non ad os, sed ad arterias ***) pertinent. Quare ossa sana rasa, serra divisa, vel perforata ne vestigium quidem sensus exhibent.

Rubia tinctorum periosteum, quamquam os subiectum colore inficitur, non mutatur.

§. XXI.

Usus periostei: Adducendo et abducendo vasa formationi, nutritioni, et tegmini ossis inservit, pars enim ossis periosteo nudata corrumpitur et separatur. Dentium radices, multos saepe annos nudatae, nec tamen corruptae contrarium

*) *W. CRUIKSHANK the anatomy of the absorbent vessels.* London. 1786. ed. german. p. 107.

**) *In ligamentis vertebrarum. WALTER Nerv. thoracis et abdom. Tab. I. fig. 1. nr. 171. 195. 196. 197. 198: 85. 123.*

***) *KLINT (potius WRISBERG) Diss. de Nervis brachii. Götting. 1785. fin. §. III. recusa LUDWIGIO in Vol. 2. Scriptorum Neurologicorum.*

rium non probant, ab interioribus enim partibus arterias accipiunt, ideoque alio modo nutriuntur.

Vasa, medullam secernentia, ducit,

Praeterea insitioni musculorum et tendinum, et cohaesioni epiphysium cum diaphysi in ossibus nondum perfectis inservit.

§. XXII.

Neque incrementum ossium, neque succus osseus a periosteo coërcetur; etenim 1) Embryonibus et infantibus crassissimum ac validissimum est periosteum, quum ossium, quae nihilominus crescunt, magnitudo exigua est. 2) Externum calvariae periosteum infantis recens nati tenuius est periosteo ossium pelvis, quae tamen, licet a crassiori periosteo pressius coërcenda, longe maius incrementum capiunt. 3) Crassissimum periosteum, dura cerebri membrana, formationem sinuum frontaliū coërcere nequit. 4) Contuso periosteo, non tumores oriuntur, sed quae plane oppositae sunt, inflammatio et exfoliatio, sive, quod eodem redit, diminutio nascuntur. 5) Nudatum periosteo os, non in tumorem surgit, sed corrumpitur. 6) Rupto licet vi fracturarum periosteo, callus non colligitur, callus enim luxurians non datur. Quis unquam sexcentas inter fracturas sanatas cetera sanorum ossium, in museis adservatorum, vel unicum exemplum inveniet *)?

*) Ueberius explicatam hanc doctrinam invenies in SÖMMERING *Abhandlung vom Bruch und Verrenkung des Rückgraths*. Berlin 1793.

M E D U L L A *).

§. XXIII.

Internum ossis cavum oleum vel pinguedinem, *medullam*, *meditullium* ossium vocant, recipit. Spississima est medulla in diaphysi magnorum ossium, et quod membrana cingitur, sat magnam portionem cohaerentem extracta refert.

Tenuior est et pellucidior reliqua corporis pinguedine, quod vesiculis subtilis telae cellulosaе, periosteo, ut vulgo audit, interno, continetur. Oculo armato lustrata acervum globulorum sistit, quorum quisque pollicis partem sexcentesimam neque diametro superat, neque parte pollicis octingentesima minor est. Unusquisque globulus vasis sanguinem vehementibus obductus est **).

Aqua, oleum, acidum sine alcali medullam constituunt, inde illa aegre putrescit.

Ab arteriis, ubique in os penetrantibus, discernitur ***).

Venis etiam instructa est. Optime haec vasa conspiciuntur, si post artificiosam vasorum repletionem os serra divisum in oleo terebinthinae adservatur.

A vasis absorbentibus aufertur et nonnumquam (v. g. in hydrope) omnis evanescit, ut vices

*) FRANCISC. GRÜZMACHER Diss. de ossium medulla. Lips. 1748. recus. in HALLERI selectarum dissertationum anatomicarum Vol. III. Tabula vero non exacte excepta est.

**) ALEX. MONRO on the bursae mucosae. Tab. VIII.

***) ALBINI Annot. acad. Libr. III. Tab. V. fig. I. Arteriae vero nimis crasse delineatae sunt.

eius serum gelatinosum, vel in ipsis latis ossibus, suppleat.

Nervi numquam in medulla detecti sunt, omni igitur sensu in homine caret.

Maiores ossium *arteriae* nervos comites habent, qui tacti dolorem, medullae tamen minime tribuendum, excitant.

§. XXIV.

In embryonum ossibus vices medullae oleosae mera fere gelatina supplet, quae sensim, quo propius maturitas fetus instat, eo oleosior et pinguior evadit, semper tamen etiam nunc plus aquae et sanguinis habet, quam medulla adultorum. Oleosissima est medulla in diaphysi ossium cylindricorum, languide flavens, durante vita pellucida, post mortem subopaca. In epiphysibus vero et ossibus mixtis plus gelatinae et sanguinis habet. Senum vero medulla croceo colore tincta est.

A rubia tinctorum nil mutatur.

Si osse cylindrico vel serra abscisso, vel alia ratione corrupto, novum, quamvis deforme generatur, quo mollitum, partim absorptum pristinum os cingitur, novi ossis generatio, destructa pristini medulla, egregie iuvatur, mors enim, sive necrosis pristini hac encheiresi adceleratur.

§. XXV.

De vero medullae usu nondum constat. For-
san vero nullus alius est, quam ut os particulis ipsa aqua multo levioribus, repleatur, ossa epim, tota quanta solida, pondus insolitum, quaedam

certissime duplo maius haberent *). Nonne enim multis aliis locis pinguedinem ea de causa adesse videmus, ut cava repleantur? Tenerior, quod subtiliore tela cellulosa secernitur, heic videtur.

§. XXVI.

Nutritioni ossium inservire, non solum ossa avium, medullis carentia, sed etiam ossa hominum, v. g. os ethmoidale, revincunt.

Ad tenacitatem conferre, ossa infantum, quamdiu medulla carent, tenacissima, et experimenta refutant, quae os oleo tinctum citius frangi, gelatina vel aqua tincto, docent.

*In articulo*rum cavum effusam medullam cartilagine lubricare, partim udus cartilaginum articulo-
rum habitus, partim plurima medullae copia in medio ossium cylindricorum ab articulis remotissimo loco, partim ossa infantum, quorum articuli ex meris cartilaginibus vix nucleos osseos, ne dicam medullam, continentibus constant, et tamen minus fragilis naturae sunt, confutant.

Elementa ossium ab ea uniri, refutant tum ossa, quae, etsi medulla carent, nihilo minus tamen vi resistunt, tum medullae, absoluta demum ossium fabrica, generatio, tum summus, quum maxima medullae copia, ratione ossis habita, ad-
est, fragilitatis gradus, v. g. in senibus.

*) Os coxae et os sacrum meae collectionis, quae tota fere quanta solida sunt, pondus habent XIII. unciarum cum dimidia. Ambitus maioris os coxae et sacrum vero tantum X. unciarum.

CARTILAGO *).

Quodvis os genuinum (exceptis forsan dentibus) e cartilagine, vel in cartilagine gignitur, ita, ut substantia tantum, minime vero externa figura mutari videatur. Attamen, cartilaginem inter et os etsi plurimum similitudinis est, evidens discrimen inter utrumque intercedit. Discernitur enim ab osse colore albo, opaleo, semipellucido, multo humore, maxima, qua inter omnes partes pollet, elasticitate, eadem ubique, nisi ubi vasa eam permaneant, densitate et summa nativae superficiei laevitate.

Cartilago sinceræ, spissioris, et lactei coloris gelatinae habitum optime refert. Superficies sectarum, fractarum, vel ruptarum cartilaginum splendent, aliae autem e. g. cartilaginum costarum, præcipue vero in adultis, habitum quodammodo fibratum repræsentant. Modica humoris copia leniter expressa, pori in cartilaginibus conspiciuntur.

Cortices articulorum cartilaginosi unius lineæ diametro plerumque tenuiores, nonnumquam ex fibris perpendicularibus compositi videntur.

Massa omnium cartilaginum ubivis eiusdem est naturæ, sive os ex illa nascens, quantum ad interiorem conditionem attinet, diversissimum,

*) Io. Gottlob HAASE Diss. de fabrica cartilaginum. Lips. 1767. 4. multa experimenta continet. William HUNTER in philos. Transact. Nr. 470.

vel spongiosum, vel reticulatum, vel lamellatum, vel densum evadat, sive cartilago in os vertatur, sive haec mutatio non eveniat.

Cartilagines palpebrarum, nasi, auris, epiglottidis, tracheae, quae ad sceleton non pertinent, cartilagines intervertebrales, cartilagines ossium pubis, articulorum maxillae inferioris, articuli claviculae cum sterno, extremi inferioris cubiti, et genu, per totam vitam eadem permanent (*cartilagines permanentes*), et earum ossificatio praeternaturalis habetur, raro autem contingit, ut cartilagines costarum, cartilagines ossium sterni, laryngis, ad aetatem senilem usque non in os vertantur *).

Raro, vertebri etsi cortice osseo saepius iunctis, cartilagines intervertebrales in os vertuntur **). Vera etiam symphyseos ossium pubis in os mutatio rarissima est ***). Fibrae tendinosae, hisce car-

*) Nihilominus tamen KEIL in viro CXXX. annorum (Philosoph. Transact. Nr. 306.) et HARVEY adeo in homine CLII. annorum cartilagines costarum non in os versas invenerunt. (*Anatome Thomae PARRI. Lond. 1669. in Ei. operibus: et adnexa Ioh. BETTII Tract. de ortu et natura sanguinis. Lond. 1669.*)

**) Possideo tamen plura exempla cartilaginum intervertebraliū, sine ulla hyperostosi in os mutatarum, prouti et SANDIFORT tale specimen delineat in Museo anatomico. Tab. 40.

***) Eduard SANDIFORT. (*Obs. anat. Patholog. Libr. II. Cap. VI. p. 115. Tab. VIII. Fig. II. et Museo anatom. Leidens. Tab. 63.*) casum vidi, lamina ossea in superficie posteriore sita ossa iungit. Ipse ego nascentem et perfectam quoque ancylosin ossium pubis possideo, sed posteriori in casu ossa fracta fuerunt. Neque a WYNPRESSE de *Ancylosi* L. B. 1783. fig. 17. et 18. delineata, quam nunc ARNE MANN possidet, genuina est, ossa enim non solum morbo venereo tacta, sed etiam sede

tilaginibus admixtae, quum aegre in os mutantur, causam fortassis exhibent.

Unica quoque ancylosis articuli claviculae cum sterno nota est *), etsi aequae facile fieri posse videtur, ac ancylosis maxillae, quae non adeo rara est **).

Omnes vero reliquae cartilagine infantum, quum incrementum ossium absolvitur, exceptis tenuibus laminis, superficies articulares obducen-
tibus, in os vertuntur, (*cartilagine temporariae, vel ossescentes*).

Initio, quando cartilagine embryonum tene-
rorum adparent, molliores sunt, quasi aquosio-
res et pellucidiores, quam pergente incremento.

Acido nitri diluto, quin et lacte acido, ossa quodam modo in cartilaginem iterum verti possunt, (§. III.) nullo autem hucusque noto ar-
tificio cartilaginibus ossea natura reddi potest.

Omnes, tam permanentes quam temporarias

mota sunt. Ad hoc usque tempus unica solummodo genuina ancylosis ossium pubis mihi nota est, quam D. CREVE possidet: minus recte Ioan. Gottl. WALTER de dissectione synchondroseos ossium pubis in partu difficili. Berol. 1782. 4. §. 18. post annum trigesimum ossa pubis unum os fieri asserit, quem Iosephus MOHRENHEIM Ab-
handlung über die Entbindungskunst, Petersburg 1791. p. 8. sequitur.

*) GOTTHARD, Professor Bambergensis, hoc specimen servat, extremum vero sternale claviculae simul a morbo tumet.

**) Saepius eam vidi. Duo specimina in CAMPERI collectione adservantur. SANDIFORT l. c. Lib. I. Cap. VII. p. 98. et Lib. II. Cap. VI. p. 117. Idem magnitudine naturali delineatum dedit in Museo anatomico. Tab. 16.

cartilagine, ubique, excepta superficie articulari, membrana tetigit, quae periosteum simillima est, *perichondrium* audit, et quum cartilagine in os vertuntur, in periosteum abit; *perichondrium* enim non, nisi in infantibus, vel in adultis, post longam ossium macerationem a cartilagine superficialium articularium separari potest.

Integrum mensem maceratae organorum sensuum cartilagine in fibrillas dividi possunt, rariores igitur, eaque ex causa flexiliores reliquis videntur.

Cartilagine costarum vero coctae, vel, quod magis e re est, aliquot menses maceratae, ex ovatis laminis, quas sibi invicem circumvolutae, et transversis fibrillis inter se iunctae fibrae constituunt, compositae adparent. Maior igitur illis et densitas est et elasticitas.

Cartilaginibus intervertebralibus, cartilaginibus ossium pubis, et cartilaginibus os sacrum inter et os coxarum, et cartilaginibus interarticularibus *) admixtae fibrae tendineae distincte conspiciuntur **).

Quadamtenus igitur quasdam cartilagine *tela cellulosa* minus densa, quasdam vero multo densior, id est, massa, ad partem sanguinis coagulabilem proxime adcedens, constituit.

*) *WINSLOW* sur la *Mechanique des Cartilages semilunaires*, in *Mem. de Paris* 1719. p. 157. *ALBINUS* de *scelecto in descriptione tibiae*. *MORGAGNI* *Adversaria anatom.* altera. Tab. I.

**) *BONNI* egregia commentatio in *Verhandeligen v. h. Genootschap te Rotterdam*. Parte III. Tab. II. III. Nec minus *BENTLEY* de *sectione synchondroseos*. Argentor. 1779.

Arterias et venas a perichondrio adductas, et ipsam intimam cartilaginum compagem penetrantes accipiunt, nulla vero vasorum species in corticibus superficierum articularium cartilaginis hucusque detecta est, sed, iniectioe quamvis felicissime facta, vasa ad marginem earum desinunt.

Non potest non esse, quin et *vasis absorbentibus* instructae sint, quae stamina cartilaginis absorbent et avehant, quum cartilago ante solida non solum ossi locum dat, sed et medullae excipiendae causa excavatur.

Omnis cartilago *nervis* et omni sensu caret.

Rubia tinctorum intus adsumta colore rubro eam non tingit.

Cicatrice vulnera cartilaginum sanantur,

Tardius, quam ipsa ossa, ab acrimoniis mor- biferis solvuntur vel atteruntur *), quum vero cor- rumpuntur, quasi liquescunt.

Vix propriis morbis obnoxiae inveniuntur. In morbo quidem arthritico adeo atteruntur, ut ossa ossibus affricentur, et re apse laevigentur **).

Ablatae non nascuntur ***).

*) *Guilielm. HUNTER Medical obs. et inquiries Vol. I. p. 348. Itidem POTT in Opp. Tom. II.*

**) Quarum multas siccatas, et quasdam iniectas, spiritu vini mersas adservo. V. *Commentationem meam super ossibus arthritide tactis in BLUMENBACHII med. Bibl. T. III. P. III.*

***) Nonnumquam tamen in statu corporis morbooso massa quaedam cartilaginosa, ubi abesse deberet, invenitur. vid. *HAASE. l. c. p. 18.*

§. XXVIII.

Spiritus vini generosus aliquantum opacas eas reddit.

Acidis dilutis resistunt.

Aquei vapores in cacabo clauso eas solvunt, et in gelatinam mutant.

Facile exsiccantur, cartilaginee vero costarum aetate provectorum hominum finduntur, aqua vero mersa putrescunt, etsi inter partes molles diutissime putredini resistunt.

§. XXVIII.

Exceptis organorum sensuum et laryngis cartilaginibus, quarum usus suo loco explicatur, *cartilaginee temporariae* proplasma quasi sunt, vel typus ossium (moule), quoad formam externam.

Quare ossa, partem crescentem cingentia, v. g. os sphenoccipitale, per quod medulla spinalis penetrat, sternum, quod thoracis cavitatem cingit, ossa coxarum, quae externa in superficie caput femoris, in interna vero, vel pelvi, vesicam et partes genitales post partum demum penitus recipiunt, pluribus, cartilaginosa massa inter se iunctis partibus componuntur, quae, auctis his partibus, ipsae etiam crescunt, quod fieri non posset, si continuum, vel in unum coniunctum os sisterent.

Reliquae laminae cartilagosae articulorum non solum superficiem epiphysium augment, sed etiam laevissimae superficiei ope motum iuvant,

attritum minuunt, earumque peculiaris elasticitas pressioni resistit.

Cartilagines intervertebrales (v. *Syndesmologia* §. XXIII.) vertebrae coniungunt, motum tamen non impediunt. Causae sunt, cur spina vertebralis, longum tempus homine erecto, contrahatur, sat longum tempus vero reclinato, iterum extendatur. (§. CLIV.)

Cartilagines costarum musculis sursum versus ipsas trahentibus facile cedunt, mox vero propter elasticitatem resiliunt, hoc pacto respirationem iuvant, quam in os mutatae difficilem reddunt.

Cartilagines, quae ossa pelvis coniungunt, sub partus tempus spatium cavitatis pelvis augeri sinunt. (*Syndesmologia* §. XLIX.)

MUTATIO CARTILAGINIS IN OS.

§. XXX.

Quum sero sanguinis materies massae cartilagosae satis similis contineatur, cartilaginem arteriarum ope crescere, et perfectam suam magnitudinem obtinere posse, patet.

Quaevīs cartilago temporaria formam ossis futuri sensim sensimque consequitur, nec ullum genuinum skeleti os sine cartilagine primigena oritur. In cartilagine, partes osseae crescendo sibi invicem quasi occurrunt, donec iunctae, unum continuum os tandem constituent. Omnis igitur massa ossea, partibus, quae cartilagosae non fuerunt, inspersa, insolita et praeternaturalis os-

sificatio habetur, quae, ortum a primigena cartilagine non ducens, definita vel constanti forma caret.

Antea, quam os gigni incipit, cartilago perfectam ossis futuri magnitudinem obtinet, et typum quasi, in qua os perficitur, exhibet. (§. XXVIII.)

Cartilagine ad tenuēs usque epiphysium suarum laminas in os versa, os perfectum est, nullum longitudinis suae incrementum amplius capiens *).

Qua vero ratione cartilago sensim sensimque in os vertatur, explicari nequit.

Certum tamen est, et ab omnibus receptum:

I) Arteriis periostei materiem osseam, vel, ut aiunt, succum osseum, ad ossa advehi; utrum vero succus osseus per arteriarum membranas exeat, an per apertos canales in cartilaginem effundatur, dubium adhuc videtur. Itidem dubium est, an succus osseus secretus crassior sit, v.g. bile, urina, cum tenerrima ossa, vel ipso in homine, praecipue vero in brutis, v.g. stapes, os ethmoidum inveniantur.

II) Eadem ratione, qua arteriae cartilaginem adeuntes dilatantur atque augentur, cartilaginem augeri, res ipsa docet, inde tum demum osseam materiem in cartilaginem effundi, quidam credunt, quum arteriae pro recipiendo succo, qui crassus ipsis videtur, satis dilatatae sint. Quam tenera vero est stapedis vel labyrinthi structura?

*) Animalia, quae ossium loco cartilagines habent, perpetuo crescunt, v. g. nonnullae piscium species.

III) Aucta magnitudine nuclei ossei in cartilagine magnitudo et copia arteriarum minui videntur.

III) a) Media in parte aliarum cartilaginum v. g. patellae *) primus nucleus osseus observatur, qui sensim sensimque advecta materiae osseae copia augetur. b) Aliarum autem cartilaginum v. g. phalangum priorum manus vel pedis apex primus in os vertitur. c) Aliarum, v. g. cartilaginum costarum, laryngis superficies externa plerumque prima in os verti solet.

V) Haud dubie vasa absorbentia massam cartilagosam recipiunt, et sanguini admiscent. Hac ratione avecta subtiliore, aquosiore materia terreas partes restare, facile hinc intelligitur.

§. XXXI.

Re autem exactius lustrata, hinc inde, v. g. in epiphysibus ossium cylindricorum arteriae oculis patentes passim veluti vagina ossea vel theca cinctae videntur, inde, versis in os arteriis cartilaginum, ossa oriri quidam crediderunt; verum enim vero neque internus ossium contextus reticulatus, si summam spectes, arteriarum reti similis est, neque haec explicatio quidquam valet, qui enim, qua ratione arteria in os vertatur, cognoverit, eandem cartilaginis metamorphosin intelliget.

*) v. Io. Gottl. *WALTERI* egregias delineationes in *Hand. buch von den Knochen*. Edit. I. 1763.

§. XXXII.

Aliis locis, v. g. in patella, genesi ossium in cartilagine ulterius progressa, grumus osseae materiae in medio cartilaginis adparet, quae materies ex arteria scaturisse quibusdam videtur, inde ruptis tandem arteriis, materia ossea fartis, cartilaginem in os verti, crediderunt. *) Verum enim vero 1) nemo ad hoc usque tempus fissuram in arteria natam monstravit, (siccatae partes hic nil probare possunt). 2) Non uno impetu grumus osseus nobis conspicuus nascitur, antea enim, quam oculis patet, iam dudum incepit. 3) Iniectiones has arterias nonnumquam apertas adhuc, non vero semper obstructas esse, docent **).

Prima ossificationis stamina oculis nostris sese surripiunt, et partes, quae hanc theoriam stabilire creduntur, ultimum formationis gradum iam tetigerunt. 4) Nulla adest ratio, qua ruptis arteriis eiusmodi concinna compages oriri possit. Interior vertebrae forma constans est, et toto coelo a forma calcanei vel patellae differt. 5) Structura ossis nil habet, quod obstructioni tribui possit; quid quod multis locis foraminulis pertusa, ac medulla impleta est. 6) Neccausae patent, quibus arteria, in tam denso corpore, cartilagine latens, et per omnes partes aequè bene ac firmiter minuta, rumpi

*) *WALTER* Libr. citat. in Explicatione II. III. et V. figurae.

**) Ipsi in citatis delineationibus, inprimis vero fig. V. in exemplaribus rite excusis sursum versus transreptionem arteriae progredientes observantur. v. *Io. Christl. KEMME Zweifel wider die Ernährung der festen Theile*, Halle 1778. p. 48.

posset. 7) Denique maiores arteriae facilius, quam minores, in os vertuntur, longeque alia tunc est earum facies; et quis umquam exiles arterias longe laxiorum partium, multo humore fartas et occlusas, ruptas vidit?

Multum igitur ad cartilaginis in os mutationem vasa absorbentia conferunt. Non solum enim materiem, quae cartilagine, sed tandem etiam, quae ossa constituit, avehunt. Qua enim ratione, os primis aetatis annis totum fere solidum, vel saltem spongiosum, sensim sensimque in interiore parte cavari posset *)? cuius rei exemplum basis ossis sphenobasilaris offert.

*) Diversas, partim valde miras doctorum super ossium generatione hypotheses B. S. *ALBINUS* Annot. Acad. Libr. VII. Cap. I. collegit, eleganter exposuit, et praesertim *Du HAMEL* theoriam fortiter refutavit. *HIPPOCRATE* et *GALENO* auctoribus exustione quasi, vel saltem calore ossa generantur, etsi calidum, quod vocant innatum, vim vitalem latissimo sensu indicat. *ARISTOTELI* ossa excrementum seminale audiunt. *ARNOBIO* adversus gentes Lib. III. p. 85. narrante propria huic operi Dea praeest. Dea ossipanga ossipaga. — *PLATONE* auctore mersa alternis vicibus igne et aqua oriuntur. *VESLINGIO* lentescente paulatim semine; quin *STENONE* ex tendinibus; *CONNOR*, *VERDUC* et *MONRO* auctoribus, nisu ex omnibus partibus; *PALFYNO* in spissatis partibus terrestribus vasorum ope medio in osse; aliis auctoribus arteriarum ictu, et mutuo ossium attritu; *NESBITT* auctore cartilago ossi cedit; *HERISSANT* auctore cartilaginem ossea materia, velut spongiam, implet; *KERCKRING* et *Du HAMEL* auctoribus os arborum in modum stratis nascitur, alterum post alterum periosteum generatur; *GAGLIARDI* auctore ex parvis osseis laminis, peculiaribus clavis nexis; *GUNZ* auctore ex opere celluloso. *LANCKE* de ossibus mandibularum puerorum septennium, Dissert. prior. Lips. 1751. p. 17.

His iungantur hypotheses *NESBITT*, *REICHELII*, *Will. HUNTERI*, qui ossa arteriis in os versis generari autumant

INCREMENTUM ET MUTATIO OSSIUM.

§. XXXIII.

Embryonum, aliquot lineas magnitudine non excedentium cartilagine molliissimae sunt, (§. XXVII.) donec aucta magnitudine ad maiorem firmitatem perveniunt *).

Sensim sensimque circa medium vel exeuntem secundum mensem, numquam ante quintam et sextam hebdomadam, in claviculis, costis, vertebis, osse frontis, osse sphenobasilari, maxillis, femoribus, tibiis, ossibus brachii, antibrachii, quin et in scapulis, primi nuclei ossei **) ossium cylindricorum oblongi ***), latorum fibrati, mixtorum orbiculati, angulati, serrati ****) cernuntur.

§. XXXIII.

et *WALTERI*, quo auctore repletis materia ossea arteriis, obstructis, et tandem ruptis, ossa oriuntur, quas verò hypotheses §. XXXII. productae rationes refutant. Quas ut hypotheses probarent, patellam praecipue elegerunt.

*) Cartilagine costarum embryonis quinque lineas parisienses magnitudine aequantis, et aetatis quatuor vel quinque hebdomadam delineatas vide in *BLUMENBACHII specimine Physiologiae comparatae*. Götting. 1789. fig. 1.

**) Ad hoc usque tempus sceleta eiusmodi tenerorum embryonum nondum adcurate delineata sunt. Icones, quarum nobis copia est, ad exempla siccando corrugata factae sunt.

***) *ALBINI* Iconum ossium foetus Tab. LXXII. Nullam iunioris femoris iconem ego quidem novi.

****) Elegantem iconem sceleti embryonis sex hebdomadam saltem ad hoc usque tempus optimam, vid. in *BOEHMERI Institut. osteolog. Tab. I. fig. III. IIII. V.* Idem embryonis trium mensium Tab. II. *CHESELDEN* in *Osteographia* non contemnendas icones sceleti infantis unius cum dimidio anno, et pueri novem annorum exhibet, videsis etiam

§. XXXIV.

Ad nonum usque mensem, vel tempus maturitatis fetus cartilagine et ossei nuclei, qui in illis generantur, crescunt, ita, ut eo tempore.

Ossicula auditus (XXXXVI—LI.) *) labyrinthus (XVIII.) eaque pyramidis pars, quae tympani cavitatem sistit, (XVIII.) sola sint omnibus numeris absoluta ossa **).

Haec ossa claviculae (CXV. CXVII.) costae, (LX. LXI. LXII. LXIII.) et tria ossa lingualia maiora (CLII. CLIII. CLIII.) excipiunt.

Quae ossa calvariae, excepto osse ethmoideo, sequuntur. Os frontis (III. IIII. V.) duabus, os sphenobasillare novem (VI. VIIII. X. XI. XII. XIII. XX. XXI. XXII. XXIII. XXIII. XXV.), os temporum XIII. XV. XVI. XVII.) duabus partibus componitur. Ossa bregmatis (I. II.) initio fibratam speciem repraesentant, ceterum vero tenuibus cartilaginosiis laminis, vel, ut aiunt, *fontanellis*, invicem iunguntur, (vid. §. CCL.)

Excepta divisa adhuc maxilla inferiore,

etiam H. Eyson de ossibus infantis. Groning. 1659. 12. et SUE in *Memoires présentés*, Tom. II, p. 575. sur les Proportions du squelette depuis l'âge le plus tendre jusqu'à celui de 25. 60. et au delà; imprimis vero Ferdin. Georg. DANZ *Grundriss der Zergliederungskunde des ungebohrnen Kindes*. Francof. 1792. 8.

*) Numeri huius paragraphi egregias figuras in ALBINI *Iconibus ossium fetus humani* indicant. Sola calvariae ossa non eiusdem aetatis sunt, cuius reliqua ossa, sed e fetu nondum maturo sumta, quod iamiam in notitia litteraria indicavi.

**) ALBINI *Annot. academic. Lib. III. Tab. I. et II.*

ossium nasi (XXXVI. XXXVII.) lacrimonum (XXXIII. XXXV.) maxillarum superiorum (XXVIII. XXVIII. XXXIII.) palatinorum (XXVII. XXX. XXXII.) zygomaticorum (XXVI. XXXI.) totum ambitum osseum cartilago cingit.

Post scapulae (CXVIII. CXVIII. CXX.) quatuor mere cartilaginosae apophysibus adhuc instructae sequuntur.

Similiter vertebrae et os sacrum plures nuclei ossei (LII — LVIII.) constituunt.

Os sterni medium (LXIII. LXV.) plures nucleos osseos habet.

Ossa longa, v. c. ossa brachii (CXXII. CXXIII.) ulnae (CXXIII. CXXVI. CXXVIII.) radii (CXXVII. CXXVIII. CXXX. CXXXI.) femora (LXX. LXXI.) tibiae (LXXV. LXXVI. LXXVIII. LXXX.) fibulae (LXXVII. LXXVIII.) ex tribus partibus constant, quarum sola media ossea est.

Ossa coxarum (LXVII. LXVIII.) tribus partibus constituuntur.

Idem ossa metatarsi (LXXXXV -- CII.) metacarpi (CXXXIII -- CXXXVIII.) posteriores et mediae *) phalanges digitorum manus (CXXXX -- CXXXXVIII.) et pedis (CIII — CXI.).

Priores vero phalanges digitorum manus (CXXXXIII. CXXXXV. CXXXXVIII.) et pedis (CXII. CXIII. CXIII.) duas partes, apicem osseum et basin cartilaginosam habent.

*) Iam iam in embryone trium mensium nucleos osseos in phalange secundi digiti pedis media observo, quae in infante bienni rhachitico mere est cartilago.

Tarsi ossium soli calcanei (LXXXI. LXXXII.) et astragali (LXXXIII. LXXXIII.) osseos nucleos habent.

Reliqua vero tarsi ossa (LXXXV. LXXXVIII.) velut *ossa carpi*, (CXXXII.) mere cartilaginosa sunt.

Ossa coccygis, patellae (LXXIII. LXXIII.) ossa sesamoidea digitorum pedis, (CXV.) manus, (CL. CLI.) et ossium lingualium (CLIII. etc.) non nisi cartilagines sunt.

Omnes dentes *) radicibus carent, nec ullum vestigium duorum vel trium posteriorum dentium molarium invenitur.

§. XXXV.

Post partum tum externa ossium forma, tum interna eorum compages vario modo mutatur, donec anno aetatis quinto decimo vel vicesimo, sub coelo clementiori, raro citius, vel tardius, ultimum perfectionis vel formationis gradum attingunt.

Sensim sensimque lata, fibrata calvariae ossa densa et crassiora evadunt, imposita quasi simul externae et internae superficiei in dies maiore osseae materiae copia.

Primis iam iam vitae annis partes ossis frontis, et ossis sphenobasilaris in unicum os coeunt. Suturae, obviam sibi invicem ductis particulis osseis in lamina cartilaginosa, ante continuata, nec vestigium nexus soluti monstrante, formari

*) *ALBINI Annot. academic. Lib. II. Tab. I. II.*

incipiunt, initio simplicis, dentatae, vel valde curvae, sensim sensimque vero, adposita superficiebus, praesertim externae, materia ossea, crispioris vel involutioris lineae speciem referentes, ita, ut omnes suturae in superficie calvariae interna multo simpliciore videantur, quam in externa. Quare corticum, diploën cingentium, substantia sensim sensimque crassior evadit. Eodem hoc tempore non solum superficies calvariae interna perfectiori nunc cerebro, vasis dilatatis, et crassiori durae cerebri membranae tam adcurate aptatur, ut imaginem vasorum et gyrorum cerebri sistat, sed etiam superficies externa hinc inde exasperatur, ita, ut vel loca, quibus singuli musculi illigantur, distingui possint. Quid, quod in ipsa substantia ossis frontis, ossis ethmoidei, ossis sphenobasilaris, ossis temporum, ablata e substantiae medio materie ossea, et adposita orbi marginum nova, — ampla cava gignuntur.

Ratione igitur reliquorum ossium habita, calvariae ossium fabrica omnium brevissimo tempore absolvitur. Faciei vero ossa, aucto, et sensim in os mutato toto marginum cartilagosorum orbe, multo magis increscunt. Ossis maxillae inferioris, dextra et sinistra pars primis iam iam annis in unum os coëunt. Ossis maxillae superioris, basin reliquorum faciei ossium constituentis cavitas, aucta et tandem in os versa cartilagine, sensim ampliatur.

Dentes vero maxime mutantur, prouti peculiari capite demonstrabitur.

Os sterni medium plurimas varietates, quantum ad numerum et figuram nucleorum osseorum, repraesentat.

Capitula costarum longum tempus cartilaginosa indolem servant, quae pubertatis demum tempore in os versa cum reliquo osse coeunt.

Columnae vertebralis fabrica, excepta fabrica atlantis et ossis sacri, longum tempus non absolvitur.

Ossium longorum diaphyses multo magis longitudinem quam latitudinem augent, eaque de causa ex naturae decreto epiphyses diu cartilaginosa indolem servant, donec circa annos pubertatis ossa ratos longitudinis fines fere tetigere, et epiphyses a diaphysibus nonnisi tenuis cartilago separat, quae absoluto incremento tandem et ipsa in os vertitur, eoque os in unum coalitum sistit, cuius neque ab exterioribus, neque ab interioribus partibus pristinae divisionis vestigia amplius adparent, cuiusque longitudo non amplius augetur.

In epiphysibus quorundam ossium longissimorum, quae in infante recens nato simplicis cartilaginis speciem habent, plures ossei nuclei simul nascuntur, e. c. in superiore parte ossis femoris.

Simili ratione reliqua ossa mixta sese habere solent.

§. XXXVI.

Hinc circa annos pubertatis in utroque sexu *).

Absoluta est fabrica

Capitis; (Raro quintus dens molaris deest.)

Atlantis;

Ossium lingualium;

Ossium carpi et tarsi;

Phalangis prioris digitorum manus et pedis;

Patellae, et ossium sesamoideorum;

Ossium coccygis.

Non absoluta vero fabrica

Sex reliquarum vertebrarum colli, quarum apophyses adhuc a diaphysi separatae sunt;

Partis sternalis clavicularum;

Costarum, quarum capitulum adhucdum apophysin habet.

Ossium sterni;

Scapulae, cuius anguli, superior et inferior, adhucdum apophysin instructi sunt;

Ossis brachii, extremum enim eius superius apophysin habet, inferioris autem extremi, praeter condylum externum, exigua apophysin instructum, fabrica absoluta est;

Ulnae et radii; supra apophyses cum diaphysi in unum coierunt, infra vero cartilago interposita est.

*) Nonnumquam paullo aliter ossa sese habent. Ut plurimum in apice ossium sterni fetus maturi osseus nucleus adest, nonnumquam autem ne vicesimo aetatis anno quidem. Sceleti et singulorum ossium icones *EUSTACHIUS* ad iuvenile corpus expressit; minime vero *ALBINI* iconibus conferri queunt.

Ossium metacarpi et metatarsi; extremi eorum superioris, minime autem extremi inferioris fabrica absoluta est.

Ossium coxarum; crista enim, spina et tuber nondum cum osse coaluerunt.

Ossis sacri; exigua vero pristinae separationis vestigia adparent;

Vertebrarum dorsi et lumborum; minus perfecta est earum fabrica, quam vertebrarum colli, quin et in superficie superiore et inferiore corporis lamina ossea, et in apophysi spinosa nucleus osseus distincte cernitur.

Ossis femoris; cum diaphysi eius neque trochanteres, neque condyli perfecte cohaerent, quin ipsum caput femoris pristinae separationis vestigia refert.

Tibiae et fibulae; utrumque earum extremum apophyses habet.

§. XXXVII.

Aliquot annis post et hae apophyses cum diaphysi iunguntur. Omnium tardissime crista ossium coxarum, apices apophysium spinosarum vertebrarum dorsi et lumborum, cum reliqua ossis parte in unum os coeunt; ultimus fere angulus inferior scapulae corpori eiusdem ossis iungitur. Iam cellulae, medullam continentes, ultimum perfectionis gradum attingunt, hinc inde ossis crassitudo augetur, apices magis prominent, altitudo sulcorum et impressionum, materie ossea ambitum vasorum et nervorum ubique cingente, auge-

tur *), integrum igitur os maiorem osseae materiei copiam recipit, verum illius longitudo, ut iam dictum est, non augetur.

Hoc temporis spatio ossa firmissima et perfectissima videntur.

§. XXXVIII.

Ab anno aetatis vicesimo quinto ad quadragessimum vel quinquagesimum usque ossa non adeo mutantur, sinus tamen frontales ampliantur, dentes quotidie magis atteruntur **), tubera, limbi, margines, sulci *ossium latorum* increscunt, anguli longorum magis protenduntur, et *ossa mixta aspera*, inaequalia evadunt.

§. XXXVIII.

Verum enim vero ossium indoles et forma vel hoc temporis momento mutantur, quod rubia tinctorum et morborum adcessus probant. — Attenuato nervo optico, foraminis optici ambitus minuitur. — Luxato osse, nec rite reposito, sensim sensimque cavitas articularis minuitur et evanescit ***). Tumor ossis venereus, adhibitis aptis remediis, abit. — Fracti ossis partes perfecte inter se iunguntur ****). Os, alii iusto longum tempus ad-

*) ALBINUS *Annotat. academic. Lib. III. p. 13. — Lib. III. p. 15.*

**) PROCHASKA *Annotat. academic. Fasc. I. Tab. ultim.*

***) ALBINI *Annotat. academ. Lib. V. Tab. II.* Ipsi mihi ad manus sunt ad minimum quadraginta eiusmodi exempla. — LOESECKE *Obs. anat. chir. Berol. 1754. Tab. I.* — PALETTA *de claudicatione congenita. Tab. I.*

****) BONN *Tabb. oss. morbosorum, X. XI. XIII.* egregias eiusmodi delineationes sistit.

clinatum, nec motum, tam arcte ab interioribus et ab exterioribus cum eo nexum init, ut ne vestigium quidem pristinae separationis adpareat, et ipsae cellulae medullares iuncta serie ab uno ad alterum os transeant. — Absorptis, feliciter cyphosi sanata *), corporibus aliquot vertebrarum, vertebrae, interiectis his nunc ablatis corporibus ante ab invicem separatae, in unum coëunt, et s. p.

§. XXXX.

Sub senectutis adventum bonus ossium habitus perit.

Attriti, attenuati, interdum rupti dentes intermoriuntur, emolliuntur, acrimonia absumuntur, vel resoluti multum excavantur; vel reliquiis eorum sensim loco simul quasi motis, tandem integri pereunt, vel in frusta divisi excidunt. Ossa maxillaria tam adcurate attenuantur et aequantur, ut ne vestigium quidem pristinorum alveolorum relinquatur **), et maxillae inferioris latitudo ad priora, si antea altitudine minor fuerit, hanc nunc superet. Non desunt tamen exempla, quae ad annum septemgentesimum usque, quin diutius, dentes condorem, firmitatem ac numeri integritatem conservasse docent ***).

*) *RUYSCH Obs. anat. chir. tabula ad pag. 64. relata. conf. POTTERWORKS P. II. p. 363.*

**) Conferatur *RUYSCH* icon edentuli capitis, (*Observat. anat. chir. Fig. LXV.* *BIDLOI* iconi capitis, et *Ioann. HUNTERI* icon (*on human teeth. Tab. VII.*) *ALBINI* iconibus.

***) *KEMME Zweifel wider die Ernährung der festen Theile. Halle 1778. p. 56.*

Suturae citius ut plurimum interna in superficie, quam in externa, interne tamen superficiem utramque inter, non numquam tardissime, abolentur.

Omnia ossa firmum, eburneum textum amittunt, maiorem terrae copiam recipiunt, rigidiora evadunt, obscuriorem, cerinum colorem medulla induit. Sensim sensimque tenuantur, ideoque etiam vel plus quarta parte pondus eorum minuitur, inde facilius franguntur, quin quorundam ossium, e. g. subtiliorum calvariae ossium materies ossea penitus avehitur, ut foramina et magni hiatus oriantur, inde levitas senio confectorum, praesertim muliebrium corporum tanta est, ut aqua non mergantur *). Hinc inde articuli coalescunt, facillime vertebrarum dorsi, quin et plerumque cartilaginee permanentes (§. XXVII.) in os vertuntur.

§. XXXXI.

Haec igitur tabula docet:

I) Quaenam cartilaginee citius, quaenam tardius in os vertantur; quorum nempe ossium adumbratio in fetu maturo maxima fuit, eorum formatio citius absolvitur, formatio igitur capitis prima perficitur, deinde trunci, post manuum et pedum, tum reliquarum artuum superiorum et inferiorum partium.

*) Duo eiusmodi exempla hominum viventium vide in Ioann. Bernhard. de FISCHER diss. de senio eiusque gradibus et morbis. Erford. 1754. 8. p. 88.

II) Quaenam ossa ex uno, quaenam e pluribus nucleis osseis oriantur.

III) Quaenam ossa, infante in lucem edito, vel integra, vel per partes tantum cartilaginosa sint.

IV) Quaenam ossa pubertatis tempore maximum perfectionis gradum tetigerint, quaenam minimum.

§. XXXXII.

Formatione ossium cylindricorum nondum absoluta, h. e. partibus eorum nondum perfecte unitis, *diaphysis* ab *epiphysibus*, quarum quaedam iunctae postea corpori vel diaphysi ossis, processus vel apophyses audiunt, discernitur *).

Cocto osse, vel soluto nexu epiphysium cum diaphysi, putredine, vi, morbis **), superficies epiphyseos parvis colliculis instructa, plerumque vero cava adparet, et gibbae, pariterque colliculis instructae diaphyseos superficiei iungitur ***). Ceterum vero superficies et epiphysium et diaphyseos non solum holoserici speciem mentiuntur, sed etiam facilius secantur, et cultro arenosi quid obiciunt. (§. XVIII.)

*) HENSING *Diss. de Apophysibus*, in HALLERI *select. disput. anat.* Tom. VI. — Divisio in apophysin veram, h. e. in apophysin, quae numquam epiphysis, sed a prima origine cum diaphysi ossium continuo nexu iuncta fuit, v. c. apophysis nasalis maxillae superioris, et in apophysin spuriam, h. e. quae olim epiphysis fuit, e. c. processus coracoides, nimis subtilis et praeter necessitatem videtur.

**) REICHEL. *Dissert. recus.* in SANDIFORTI *Thesauro.* T. I.

***) ALBINUS. *Icones ossium foetus*, Tabula ultima.

§. XXXXIII.

Perinde vero, ac incrementum integri nostri corporis, prima vitae periodo, ad nonum usque mensem, cum reliquis periodis collata, celerissimum est, et formatio ossium hac periodo promptius procedit.

§. XXXXIII.

Ossa sexus potioris citius ad perfectionem perveniunt, quam ossa sexus sequioris, citius id quoque fit vita laboriosa, quam quieta. Omnium vero morborum rhachitis plurimum ossibus nocet (§. LXXIII.) non solum enim formae perfectionem impedit, sed etiam factum iam os resolvit.

RESTITUTIO OSSIUM LAESORUM *).

§. XXXXV.

Si quando os infanti recens nato deest, id non numquam auctis annis nascitur **).

§. XXXXVI.

Segmentum, a calvariae osse ferro divulgum, periosteo autem non nudatum, et quodammodo adhuc cohaerens, si res optime procedit, ope lymphae plasticae iterum cum osse iungitur, et periosteum restituitur.

Semper vero acutos istiusmodi segmenti margines, advecto humore mollitos, et actione va-

*) Sequor meas in hominibus captas observationes.

**) GEHLER Progr. de dentitione tertia, Lips. 1786. p. 5.

• Post partum palatum osseum puellae sensim demum natum vidit.

orum absorbentium detritos, renatae, reliquo ossi simillimae massae copia quam minima iungit.

§. XXXXVII.

Haecce renata plastica materies ossea, sive callus, initio medium membranaceam substantiam inter ac cartilagosam tenet, ex multis, itidem renatis vasculis, sanguinem vehentibus rubet *), sensim sensimque albidiorum colorem, maiorem firmitatem, et plus terrae acquirit, et naturam osseae substantiae tam perfecte induit, ut ne vestigium quidem **) discriminis os inter et callum tandem adpareat, nec, nisi mutata forma, incisum olim vel fractum locum prodatur.

Fracta igitur ossa prima periodo reapse conglutinantur, mollitis, et in vivum, vasculosum gluten versis marginibus, ac effuso medios inter eos vivo glutine, paucas post hebdomadas in verum os verso.

Qua ratione cicatrix ossium, quae ossa in

*) Quibusdam igitur caro novella, GALENO iam iam caro, CEESO caruncula audit.

**) Errat igitur HALLERUS, Elem. Phys. Lib. XXVIII. sect. III. §. 26. p. 334. Callum, dicens, vasa, quam ps. numerosiora habere, et osse esse rubicundiorum et duriorum. In perfectum callum plane hoc non convenit. ITIDEM l. c. p. 334. 356. Callum tamen inorganicum, semper cellulosum, et spongiosum, aut solidum concrementum esse. Ego quidem vel sexcenta ossa sanata aliter sese habere, observavi; idem etiam expertus est BONN in Descript. Thesaur. oss. HOVII, et in Tabb. ossium morbosorum. Perfectus callus perfectissimo et sanissimo ossi simillimus est. Contrario modo CHESELDEN (Osteographia Introduct.) callum minus vasculosum vocat. Veritas igitur et hac in causa in medio latet.

unum quasi coacta prodit, deteratur, ex hoc facile perspicitur.

§. XXXXVIII.

Similis est ratio cuiuscumque alius ossis fracti, vel sit latum, vel cylindricum, vel mixtum, parī enim modo margines acuti emolliuntur, absorbendo deteruntur, vel obtusi redduntur, et (excepto capite ossis femoris vel osse pubis) quam minima substantiae renatae copia iunguntur.

§. XXXXVIII.

Os vero morbosum, lue venerea, rhachitica *), scorbutica tactum, vel causa interna fractum, annulo quasi, vel cortice spongioso, a sana ossea substantia discretu facili, conseritur.

§. L.

Praemortui vel causa interna vel externa ossis ambitus mollitur, et in membranaceo cartilaginoso, vasculosum, sensim absorbendum marginem vertitur, donec sulcus nascatur, et praemortua pars tota a sano secedat **). Os serra desectum eodem fere modo sese habet; mollitur et absorbetur margo asper, vel, osse prominente, sulcus emolliendo natus praemortuam partem circumcludit, qua expulsa plerumque circa integrum ambitum unus vel alter apex osseus gignitur, et totum vulnus membrana firmiter inhaerente clauditur.

*) *BLUMENBACH Knochenlehre Tab. I.*

**) Egregie id confirmant *BONNI* optima icones et descriptiones, v. g. In ossibus bregmatis Tab. XV. XVI. Osse femoris Tab. XVIII. XVIII. tibia et fibula Tab. XVII. XVIII.

§. LI.

Osse luxato, nec reposito, nonnumquam cavitas, novo articulo similis, adcuratius vero inspecta, cum pristino articulo multum discrepans gignitur, neque enim iustam formam habet, neque cartilagine tecta, neque ligamentis articularibus instructa est; semper vero effluxo iusto temporis spatio pristinus articulus perit *), eadem ratione, qua perduto dente alveolus evanescit.

§. LII.

Ablato vel resecto osse, novum, pristino quodam modo simile os nonnumquam, verum non semper, gignitur **), foramen enim modiolo factum non semper ***), maiora foramina fere numquam massa ossea claudit ****).

*) Cf. icones §. XXXVIII. citatas.

**) Exempla videsis apud HALLERUM *Elem. Phys. Tom. VIII.* p. 356.

***) ARNEMANN *Tom. II. Tab. VII.* exemplum profert in bruto observatum. Pag. 19. in nullo experimento, ait, se vel vestigium ossificationis reperiisse. — Narrante TENON *Histoire de l'Acad. des sciences*, 1778. non nisi octo vel novem mensibus post foramen modiolo factum massa perfecte ossea clausit. — Auctore ARNEMANN ossa plana tardius cylindricis regenerantur. — Ipse ego exemplar ossis calvariae humanae modiolo perforati perfecte quidem sanati, sed massa ossea non clausi, possideo; verum tamen in homine nonnumquam istiusmodi massa foramen claudi dicitur. GEHLER *Programma de dentitione tertia.* 1786. pag. 6.

****) BALDINGER *neues Magazin für Aerzte*, T. VI. p. 351. CHESELDEN *Osteographia in sine capitis primi.* SALZMANN *Diss. sistens miram cranii fracturam in homine per XXXX. annos superstita.* Arg. 1718. adiecta figura minus exacte. *Journal de médecine* 1790. mens. Ianuar.

§. LIII.

Quotidie enim ossa nasi et s. p. deperdita vel corrupta non amplius renasci videmus. Quin, quamvis segmentum calvariae gladio penitus avulsum iterum iungitur *); post sanationem passim lacunae tamen remanent, quod etiam post vulnus, non nisi amplitudine excedens, evenit **).

§. LIIII.

Excussi, vel una cum alveoli parte suppuratione ablati dentes interdum restituuntur ***).

IUNCTURAE OSSIUM.

§. LV.

I. IMMOBILIS IUNCTURA, sive *Synarthrosis* constructur:

- 1) vel *sutura* ****), quae est
 - a) vel *sutura dentata* sive serrata, marginibus ossium *multum prominentium* ligularum *sinuatarum* vel denticulorum ope inter se nexis, e. g. sutura ossa bregmatis inter et os frontis.
 - b) vel *sutura harmonica*, *harmonia*, marginibus *plerumque in rectum* protensis, vel tantillum

*) *Bonn Tab. ossium morbosor. Tab. II. Fig. I.*

**) *Ibid. Fig. II.*

***) *GEHLER Progr. de dentitione tertia, Fig. II. delineatam maxillae superioris partem una cum duobus dentibus molaribus deciduis, et eiusdem ordinis permanentium dentium molarium primitiis suppuratione ablatam, nihilominus vero omnes quinque dentes molares postmodum progenitos vidit.*

****) Absit absona divisio in *suturam veram* et *spuriam*.

tillum incurvis mutuo sibi adiacentibus, e. g. nexus ossium nasi inter se.

c) vel sutura squamosa; totis marginum oris paulatim extenuatis, et squamarum instar sibi invicem insidentibus, qualem connexio ossium temporum cum ossibus bregmatis offert.

d) vel sutura limbosa; ligulis marginum *ser-ratis*, quin *ramosis* et mutuo se *excipien-tibus*, et *sibi invicem insidentibus*; e. g. nexus ossium bregmatis cum osse sphenobasilari.

2) vel *gomphosi*, e. g. nexus dentium cum alveolis. Utrumque genus istiusmodi immobilis nexus non, nisi in capite invenitur.

§. LVI.

II. SEMIMOBILIS IUNCTURA, AMPHIARTHROSIS, constituitur:

1) vel *ligamentis cartilaginosis, symphysi*; cartilaginosa et ligamentosa quasi substantia ossa iunguntur; e. g. vertebrae et ossa coxarum inter se, et ossi sacro.

2) vel *genuina cartilagine, synchondrosi*; Exemplum offert connexio paris primi costarum cum osse superiori sterni, vel mutuus nexus ossium sterni.

Utrumque genus istiusmodi nexus non nisi in trunco sceleti perfecti invenitur. Immobilis enim

ossis infantilis iunctura epiphyseos cum diaphysi per synchondrosin huc non pertinet.

§. LVII.

III. MOBILIS IUNCTURA SIVE DIARTHROSIS, IUNCTURA ARTICULUS;

superficies epiphysium cartilagine tectae ligamentis, externam earum superficiem circumcludentibus, *syndesmosi* *), iunguntur, remanentibus in articulo cavitatibus.

- 1) Vel superficies articulares duorum ossium arcte sibi invicem iunctae, adstrictae quasi sunt, nec, nisi vi, loco moveri possunt. — *Articulus adstrictus* — Exemplo sunt pluri-
ma carpi et tarsi ossa, eaque metacarpi et

*) *Syntenosis*, h. e. nexus tendinum ope, cuius exemplum patella esse dicitur, nil a *syndesmosi* differt: ligamentum enim patellae cum ligamentis lateralibus femoris et tibiae convenit, et versa vice tendines m. extensorum digitorum manus et pedis phalanges iungunt, officio igitur ligamenti capsularis funguntur, recte itaque haec connexio *syntenosis* vocari posset. — Neque *synnevrosis* a *syndesmosi* differt, ossa enim sterni, quae huius connexionis exemplum praeberē dicuntur, et *synchondrosi* et *syndesmosi* iunguntur. — *Synimesis*, h. e. connexio membranarum ope; qualis ossium capitis connexio dicitur, non datur, sed antiquo errore nititur, ex quo capitis ossa membranis, non cartilaginibus, sive *synchondrosi* inter se iungi dicta sunt. — *Synostosis*, quae ex opinione quorundam epiphyses tandem diaphysi iungit, superflua est distinctio, quamdiu enim epiphyses adsunt, connexio per *synchondrosin* perficitur, post ossificationem vero non nexus tantum, sed intima unio locum habet. Nec, ut vulgo audit, *syssarcosis*, sive connexio carnis ope in corpore humano invenitur, scapulam enim, quae exemplum esse dicitur, valida ligamenta cum clavicula, ideoque cum sceletō coniungunt, quid, quod quinque ossa lingualia non solum inter se vera *syndesmosi*, sed etiam saepius ligamento, adeoque vera *syndesmosi* cum processu styloideo ossis temporum coniunguntur.

metatarsi, extremis posterioribus partibus arcte inter se iuncta.

- 2) Vel motus est rotatio quasi cardiniformis, — *Diarthrosis trochoides*, sive *rotatio*. — Hac ratione prima vertebra colli circum secundam vertebam, et radius circum condylum humeri et ulnam agitur.
- 3) Vel motus est trochlearis, et ossium superficiebus inutuo se excipientibus, ad rectam tantum directionem fieri potest. — *Ginglymus* *) — Exempla offert connexio ulnae cum humero, femoris cum tibia, et duarum priorum phalangum digitorum manus et pedis.
- 4) Vel sphaerica superficies unius ab excavata alterius ossis excipitur, et velut in capsula movetur. — *Enarthrosis*. — Unicum exemplum connexio ossis femoris cum osse coxarum praebet.
- 5) Vel sphaerica ossis superficies super minori sinu movetur. — *Arthrodia*; cuius exempla sunt articulus humerum inter et scapulam, articuli primas digitorum phalanges inter et ossa metacarpi.

In articulo ossium maxillarium, claviculae et ossis sterni superioris, extremi inferioris ulnae et radii, femoris et tibiae, superficies articulares inter cartilago posita est.

Singuli articuli in syndesmologia exponuntur.

*) *ISENFLAMM de ginglymo*. Erlang. 1785. 4.

FOVEAE ET TUBERA OSSIUM.

§. LVIII.

Vocabula technica, passim in descriptione singulorum ossium occurrentia, quae vel *foveas* vel *tubera* indicant, nulla explicatione, utpote facilia intellectu, egere videntur. FOVEAS indicant: *Impressio, Cavitas glenoidea, Cavitas cotyloidea, Fovea sive Fossa, Cella, Sinus sive Antrum.* INTERSTITIA: *Fissura, Sulcus, Incisura, Foramen, Meatus, Labyrinthus.*

TUBERA: *Caput ossis, Collum sive Cervix, Condylus, Processus sive Apophysis, Tuberositas, Spina, Crista vel Spina continua, Linea, Stylus, Margo, Angulus, superficies, Extremitas sive Extremum, Corpus.*

USUS OSSIUM COMMUNIS.

§. LVIII.

Ossium valida compages formam, altitudinem, magnitudinem et agilitatem nostri corporis definit. Partes corporis molles ab ossibus firman-
tur ac fulciuntur. — Comminuendo cibos nutritionem iuvant. — Musculi, exceptis paucis quibusdam, corde, musculo latissimo dorsi, musculo linguali, sphinctere ani interno, adceleratore urinae, constrictore cunni, musculis bulbi oculi, praeter musculum obliquum superiorem, musculo uvulae, musculo palmari brevi ossibus illigantur.

Versa vero vice, exceptis dentibus, non nisi sedecim ossa dantur, quibus musculus vel tendo

non inseritur, quae sunt os ethmoideum, os unguis, os turbinatum, vomer, incus, os naviculare, lunare, et triquetrum carpi, et astragalus.

Capsulae, fiscinae vel pelvis specie capitis, thoracis, abdominis viscera excipiunt. — Omnibus sensuum organis inserviunt, nervos scilicet apicis digitorum fulciendo, linguam fornice muniendo, explicationem nervi olfactorii servando, sonum ad nervum auditorium propagando, quin ipsos oculos muniendo.

Quocirca, fulciendo, iuvando et servando formam, favendo motui, et augendo sensuum oblectationes, ad servandam hominis vitam ossa multum faciunt.

DISCRIMEN SCELETI.

Skeleton non solum ratione singularum partium invicem comparandarum differt, sed etiam singula ossa ratione aetatis (§. LX.) sexus (§. LXI.) gentium (§. LXII.) individui (§. LXVIII.) forsitan etiam alimentorum (§. LXIII.) consuetudinum, vitae generis et amictus, (§. LXX.) morborum (§. LXXI.) praeparationis et adervationis (§. LXXXVI.) differunt.

DISCRIMEN SCELETI RATIONE AETATIS *).

§. LX.

Praeterea, quae iam iam in doctrina de absoluto incremento et mutatione ossium dicta sunt (§. XXXIII.) hic, quae sequuntur, notanda veniunt.

*) Vid. §. XXXIII. citatae icones.

Quo iunior, si a vigesimo anno retro computaveris, homo est, eo maius volumen est capitis ad truncum et artus collati.

Secundo mense caput dimidiam fere,

Fetus praematuri caput quartam,

Infantis trium annorum quintam,

Absolute incremento octavam reliqui corporis partem magnitudine aequat.

Eo minor est proportio ossium faciei, eo maior vero organorum auditus ad calvariam.

Eo maiores sunt fonticuli.

Eo depressior ac planior est pars faciei inferior.

Eo amplior thorax ad pelvim collatus.

Eo breviores sunt artus.

Eo maiores claviculae.

Eo maior est pars cartilaginosa ossium.

Eo planiora et laeviora sunt ossa *lata*, eo teretiora *cylindrica*, eo incertior vero forma est ossium *mixtorum*.

Eo pluribus nutriuntur vasculis.

Quo provecior vero aetate infans, eo plus ossa maxillaria producuntur, quod dentibus erumpentibus latitudo ossium maxillarium saltem eadem ratione non augetur, et omne incrementum maxillae semper in priora magis tendit.

Articulus maxillaris puerorum edentulorum in eodem fere plano, quo gingiva maxillae superioris, paullo altius vero articulus maxillaris senum edentulorum positus est.

Qua ratione periosteum, medulla, cartila-

gò, quin singula ossa, quatenus e pluribus partibus composita sunt, vel quod firmitatem, colorem adinet, praecipuis vitae periodis, ad absolutum usque sceleti incrementum, differant, iam iam dictum est, modus vero, quo dentes mutantur, infra describetur.

Hac igitur unicuique aetati propria forma, os infantis ab osse adulti, os adulti ab osse senis, praeter magnitudinem ossium, discerni potest, quaedam facilius quidem, quaedam difficilius, quaedam vero ob exilitatem v. g. ossicula auditus, omnino fere discerni nequeunt.

DISCRIMEN SCELETI ET SINGULORUM OSSIUM RATIONE SEXUS.

§. LXI.

Sceleton muliebre *) per omnia minus,
Et gracilius est masculino.

Calvaria cum omnibus dentibus corporis muliebris, ratione ponderis ad reliquum sceleton habita, masculinae calvariae pondus *superat*, vel reliqua ossa, cum calvariae ossibus collata in femineo sceleto leviora sunt, ratione 6 : 1, in masculino ratione 10 : 1. vel 8 : 1.

*) *CHESELDEN Osteographia Tab. XXIII. — TARIN Osteographie. Paris 1753. Tab. XXIII. — SUE Traité d'Osteologie. Paris 1759. Tab. III. icones sceletorum muliebrium sistunt, quae vero negligenter expressae cum ALBINI iconibus sceleti masculini conferri non possunt. ACKERMANN Diss. de discrimine sexuum. Mogunt. 1788. 8. vertente I. WENZEL.*

Ambitus etiam calvariae femineae pari licet sceletorum altitudine, vel primo adspectu maior videtur.

Calvaria ad faciei ossa feminis maior est.

Omnia calvariae foramina,

Fornix palati et totum *oris cavum* angustiora sunt.

Totus *thorax* brevior est — *supra*, vel ad quartam costam usque paullo *amplior*, — *infra* vero *angustior* — *mobilior* — *dolio similior* — minus *conoides* — in priore parte *magis gibbus* quam masculinus — *longius a pelvi distans*, interstitium enim, ultimam costam inter et marginem ossis coxarum maius est — *minus prominens*, quare, corpore erecto vel supino, in sexu sequiori symphysis ossium pubis, in sexu autem potiori thorax prominet.

Ut plurimum cartilagines costarum verarum, ratione ad partem costarum osseam habita, longiores sunt.

Costae spuriae maiore, quam in sceleto masculino, proportionem, ultimam costam spuriam versus decrescunt.

Hiatus cartilagines inter septimae, octavae, nonae costae sursum versus *multo acutiorem* angulum constituit.

Sinus corporis vertebrarum, qui medullam spinalem recipit, *maior* est; *totus* etiam *canalis capaci*or.

Hiatus laterales *canalis medullae spinalis*, qui

ab arcu, e corpore protento vertebrae, et ipsius vertebrae corpore, et quidem a binis iunctis vertebris, maiorem tamen partem a superiore vertebra construuntur, et nervos excipiunt, *multo sunt ampliores.*

Vertebrarum *processus spinosi* minus prominent.

Ossa sterni iunctim breviora, *propius extremo thoracis superiori* ad lineam fere, per planum horizontale quarti costarum paris, in sceleto vero masculino quinti paris ductam, desinunt, longius igitur ab ossibus pubis distant. — Auctoribus quibusdam longius etiam a columna vertebrarum distare dicuntur.

Maior est longitudo lumborum.

Angulus, qui ab ultima lumborum vertebra et osse sacro efficitur, *promontorium* dictus, *acutior est.*

Omnes pelvis diametri maiores sunt. Cristae et tubera ossium coxarum longius ab invicem distant.

Spatium *ossa pubis* inter maius est, ligamentum igitur symphyseos latius est, crassius, quamvis brevius.

Os sacrum magis reflectitur, neque apex illius neque a *ossa coccygis* tantum in pelvim porriguntur.

Acetabula longius ab invicem distant, ideoque mulieres incedentes vacillant; quum vero superficiei pelvis priori propria sunt, procedente graviditate libramentum corporis, cuius gravita-

tis punctum tunc temporis propius non nihil priora tangit, melius servatur.

Gremium amplius est.

Ossa *artuum inferiorum* acutiorem angulum inferiora versus sistunt.

Pedes minores sunt.

Humeri devexiores.

Articuli humerorum non tantum ab invicem distant.

Artus superiores breviores,

Digiti magis acuminati sunt.

Skeleton feminae debilis, iuvenili aetate saepius enixae, thorax planus, tergum amplius, crassiores ossium pubis cartilagineae *) a *sceletto* virginis discernunt.

§. LXII.

Plerumque eiusdem magnitudinis os *maturnum* femineum pauciores asperitates, minores spinae, exiliores sulci, minores articuli, forma tornatior, maiorque laevitas a *virili* osse distinguere solent.

Plerumque os muliebre cylindricum eadem longitudine eademque superficierum articularium latitudine, qua os virile, praeditum, maiore diaphyseos exilitate distinguitur, **) quo fit, ut iunctorum ossium ponderi, ad calvariae pondus relato, tantum, quantum supra (§. XIII.) diximus detrahatur.

*) PINAEUS de notis virginitatis Lib. II. Cap. VI. p. 117.

**) Confer. BIDLOI icones ossium feminiorum cum ALBINI iconibus ossium masculinorum.

Saepissime etiam ossa feminea molliora virilibus sunt.

In summa, feminei quid, difficile descriptu, gerunt.

Tardius etiam perficiuntur, vel eorum extrema diutius cartilagosam naturam servant.

Angustiores sunt *sinus frontales*, glabella minus elevata est, arcus superciliares minus prominent.

Omnia *faciei ossa* sunt subtiliora.

Limbus alveolaris maxillae superioris et inferioris feminarum magis est ellipticus, virorum vero magis circularis.

Dentes ipsi sunt minores.

Ossa lingualia sunt subtiliora.

Quod ad *vertebras* adinet. a) Proceriora sunt corpora vertebrarum, b) ab utroque latere magis sinuata sunt, hinc minus retusa videntur. — c) Magis retrorsum tendunt *processus transversi*, quo fit, ut sulci, medios inter eos et processus spinosos per posteriorem columnae partem, ab utroque processuum spinosorum latere descendentes, profundiores sint. — d) Acutiores sunt *processus spinosi*, e) breviores — f) devexiores.

Costae tenuiores, planiores, ideoque margines et superior et inferior, acutiores sunt.

Cartilagines costarum superiorum facilius in os verti — *mediarum* latiores — *inferiorum* vero longiores osse, quibusdam dicuntur.

Ossium sterni superius, cum inferiori com-

paratum, plerumque multo longius est in sceletto femineo, quam in masculino, ut saepius duplex longitudinis suae modus ab inferiori sterni osse non contineatur, superante medio osse sterni in sceletto masculino vel duplicem superioris longitudinem. Superius etiam, ratione ad inferius habita, crassius est. Istud sexus discrimen jam in embryonibus cernitur.

Vertebrae lumborum proceriores sunt et graciliores.

Os sacrum latius est, magisque sinuatum, quibusdam longius etiam videtur.

Ossa coccygis graciliora sunt, mobilia, magis prorsum versus tendunt, minus tamen prominent. An forsitan quinque ossa coccygis frequentius in sexu sequiori occurrant, quam in potiori?

Ossa coxarum latiora sunt, planiora, magisque in exteriorem partem reclinata; maior est angulus rami descendens ossis pubis cum symphysis, ideoque angulus ossa pubis inter potioris sexus acutus est, sequioris vero gradus LXXX-LXXXX. attingit, propiusque ad figuram arcus adcedit. — Tubera ossium coxarum maiora sunt, planiora — Spatium tubera inter et acetabulum minus est — incisura ischiatica maior — Foramen ovale amplius — Incisura, tendinem muscoli obturatoris externi tuber ischii inter et acetabulum excipiens, angustior videtur.

Claviculae minus curvae sunt, ut scapulae, modo ad coxas latas iusto, ab invicem distent, et

adfatim reprimantur. Viriles vero claviculae magis curvae sunt, ut scapulae magis, quam si claviculae in rectum protensae fuissent, producantur. Masculini sceleti claviculae magis deorsum versus tendunt, et cum ossibus sterni obtusum, feminei vero sceleti claviculae rectum fere angulum constituunt.

Scapulae minores sunt, tenuiores, planiores; anguli earum acutiores.

Ossa femorum magis in priora curvata sunt; collum cum corpore maiorem angulum constituit; condylus internus maior est, magis gibbus, et non nihil longior externo condylo.

DISCRIMEN OSSIUM RATIONE GENTIUM. *)

Super sceletis diversarum gentium paucissimae tantum observationes, calvariam spectantes, prostant; quid, quod ne icon quidem sceleti Nitritiae datur, etsi passim sceleta adservantur. Calvariae aliarum gentium paucae tantum in collectionibus reperiuntur. Amplius igitur posteris patet campus. — Nota haec fere sunt.

Europaeus.

§. LXIII.

Ad normam, a *Germanicis* calvariis nobis suppeditatam, reliquarum gentium calvarias inter se comparamus.

*) Multas citationes omisi, credens, in omnium manibus versari egregium librum, *MEINERS Grundriss der Geschichte der Menschheit*, et *BLUMENBACHII Diss. de generis humani varietate nativa*, *EIVSDEMQUE Decades collectionis suae cranium diversarum gentium*. Gött. 1790. et *Carl GROSSE physikalische Abhandlungen*. Zittau und Leipzig 1795. 8. capite über die Menschenrassen.

Inter *Europaeos Belga* calvariam oblongo rotundam, *Germanus* et *Italus* rotundam, maxime vero rotundam *Turca* habere dicitur. *)

Hamburgenses feminae caput fasciis involvendo et comprimendo, oblongae calvariae formae quam maxime olim studuisse dicuntur. **)

Calvarias incolarum *Stiriae* et *Carinthiae* singularem formam habere, narrant. ***)

*) *INSFELD de Lusibus naturae*. Lugd. Bat. 1772. §. 25. „Amat *Belga* caput oblongo rotundum, rotundior *Germanis*, maxime rotunda figura *Turcis* placet, triangularem appetunt *Aethiopes*, quadratam *Calmucci*. Forsan sensum dictioni paululum posthabuit auctor, vel secutus est *VESALIUM L. I. Cap. V. p. 23. ed. Oporin.* dicentem: „*Genuensium* et magis adhuc *Graecorum* et *Turcarum* capita globi fere imaginem exprimunt (quam illorum non pauci elegantem et capitis, quibus varie utuntur, tegumentis accomodum censent) obstetricibus nonnunquam magna matrum sollicitudine opem ferentibus. *Germani* vero compresso plerumque occipite et lato capite spectantur, quod pueri in cunis dorso semper incumbant, ac manibus fere citra fasciarum usum, cunarum lateribus utrinque alligentur. *Belgis* oblongiora caeteris propemodum referuntur permanentve capita, quod matres suos puerulos fasciis involutos in latere et potissimum temporibus dormire sinent.”

Genuenses cum a *Mauris* progenitoribus acceperint morem, ut infantibus recens natis tempora comprimerentur, nunc absque ullo compressu thesritico et capite et animo nascuntur. *SCALIGER Comm. ad Lib. V. THEOPHRASTI de causis plantarum, p. 257.*

**) *LAUREMBERG Pasicompe nova, p. 163.*

***) *VESALIUS* quidem, omissa ulteriore explicatione, haec narrat. Pauca tantum haec profert: *Stiria* et *Carinthia* varia raraque hominum et animo et corpore alunt monstra. in *G. FALLOPII Examen* p. 768. ed. *ALBINO*. Nifallor, homines fatuos, specie rhaclitidis adfectos, quosque *Fexen* proprio nomine adpellant, intellexit. Horum hominum crania *MICHAELIS* mihi monstravit.

Scotis multum prominentia ossa iugalia esse dicuntur. *)

Calvaria *Rossica* **) et *Suecica* ***) in collectione *Albiniana* Lugduni Batavorum et *Anglica* ****), *Hispanica*, *Franco Gallica* *****), *Italica* *****) et *Feminae Hannoveranae* *****) in theatro anatomico eiusdem urbis adservantur.

Lappo, magnitudine corporis non excellens, sed platy et macrocephalus, narrantibus testibus oculatis, facie plana et lata, et prominente mento distinguitur.

Ego quidem calvarias inter *Germanicas*, *Helveticas*, *Franco Gallicas*, *Suecicas*, et *Rossicas* collectionis meae genuinum discrimen non invenio, exceptis orbitis in calvaria *Rossica* contractis, marginibus orbitalibus quadrangularibus et dentibus minutis. Aliis autoribus pars ossis palatini horizontalis in calvaria *Rossica* angusta videtur.

A S I A N I.

§. LXIII.

Calvariae antiquorum *Persarum* comparatae cum calvariis *Aegyptiorum* multo fragiliores fuisse

*) IOANNES HUNTER, RAMSAY, LICHTENBERG citt. a BLUMENBACHIO *Decad. p. 8.* Sic sese res habere, mihi etiam videbatur.

**) BLUMENBACH, *Decas. I. p. 22.* et E. SANDIFORT Tab. 9.

***) Del. ap. E. SANDIFORT. *Mus. anat. Acad. Lugd. Bat. Vol. I. Tab. 4.*

****) Ibid. Tab. 5.

*****) Ibid. Tab. 6.

*****) Ibid. Tab. 7.

*****) Ibid. Tab. 8.

dicuntur, quod caput *Persae* mitra semper operiebant. *)

Pristinus *Colcharum* mos, caput recens natorum vinculis coërcendi, et manu premendi, causa dicitur, cur tandem sponte hanc formam calvariae posteriorum induxerint. **)

Sigynorum ***) (gentis ad mare caspicum, ut videtur, olim habitantis,) quidam studio consilioque macrocephali videri voluisse, et frontem tantum, ut ultra mentum prominere, protrudisse dicebantur. ****)

Caput *Tatari Casani* prostat in collectione *Albiniana* Lugduni Batavorum.

Tatari Casani calvaria in collectione *Blumenbachiana* ****) fronte est ampla, parum formicata, arcubus superciliaribus aequaliter invicem iunctis, ossibus nasi a fronte pulcra directione descendentibus, dentibus superioribus prae inferioribus paululum prominentibus, mento prominulo.

Tatari sunt maxillae prominentes, mentum acutum, dentes multum ab invicem distantes, tibiae

*) *HERODOTUS*, *ARISTOTELES* *Politic.* L. I. *PLIN.* L. VI. Cap. III. *Lib. VII.* *Pomponius MELA* L. I. C. XXI. *STRABO* *Lib. VII.* *CAELIUS Rhodiginus* *Lib. XVII.* C. XIII.

**) *HIPPOCRATES* de *are, aquis et locis*, *Opp. ed. LINDEN.* T. I. p. 348.

***) *STRABO* *Lib. II.* p. 358. edit. *CASAUBONI.*

****) Novi Baronem ab H. et Comitem H. tam alta fronte praeditos, quantam haec gens aegre habuit.

*****) *Dec. II.* p. 6. *Tab. XII.* Cranium *Tatari* delineatur apud *Ed. SANDIFORT* *Museum anat. Academiae Lugdun. Bat.* Vol. I. *Tab. 2.*

biae breves. Saltem, quos ipse olim vidi, hanc formam habuerunt. Quantum quidem reminiscor, *Baschkiri*, quos ego vidi, non tam monstrose tortam faciem, qualis hinc inde delineata invenitur, etsi hisce iconibus haud absimilem, *) ex adverso parte conspiciendam dabant.

Calvaria *Calmucci* **) facie est complanata, vertice depresso, ossibus nasi parvis, ad perpendiculum fere declinatis narium apertura angusta, fovea malari multum plana, plurimum igitur cum *FISCHERI* ***) icone convenit.

Hanc calvariae formam *Calmucci*, quos vivos inspexi, habuisse mihi visi sunt. — Calvaria *Calmucci* Lugduni Batavorum in collectione *Albiniana* adservatur. ****)

Calvaria, *PETRO CAMPERO* calvaria *Calmucci* visa, *****) ab eodemque delineata et descripta, calvaria potius *Nigrittae* videtur.

Calvaria *Calmucci* et calvaria *Sinensis* et in

*) Apud *GEORGI*, quem secuti sunt *WÜNSCH* et *LAVATER*.

**) *BLUMENBACH*. Dec. I. Tab. V.

***) *FISCHER* Diss. de modo, quo ossa se vicinis partibus accommodant. Lugd. Batav. 1741. 4. Tab. I. Calvaria *Calmucci* e regione boreali Asisae. Respondet huic calvariae ea, quam *BLUMENBACH* Dec. II. Tab. XIII. delineavit.

****) Haec calvaria et *Rossica* et *Suecica* e pugna sunt apud *Wilmenstrand*. v. *Supellex anatomica* B. S. *ALBINI*. N. 414. 415. 416. Cranium *Kalmukki* delineatur apud *Eduard SANDIFORT* museum anatomicum academiae Lugduno Batavae. Lugd. Bat. 1793. fol. max, Tab. I.

*****) *Unterschied der Gesichtszüge*. Berlin 1792. 4. not. Proem. p. 14. Tab. I. Fig. III. Tab. III. Fig. III. *BLUMENBACH* Dec. II. p. 10. 11.

Museo regio Parisiensi et in *CAMPERI* Collectione adservantur. Calvariam *Calmucci*, quam in Museo *Ludwigiano* Lipsiae vidi, *WÜNSCH* delineavit. *)

Cum calvaria *Calmucci* in coll. *Blumenbachiana* Tab. V. convenit calvaria *Iacutae*. **) Forma nempe est fere quadrata, orbitis amplissimis et magno spatio ab invicem remotis, glabella prominente, naribus minus patulis.

Calvaria *Tungusae* ***) habitu est perfecte mongolico, facie plana, ad arcus iugales latissima, fronte depressa, organo olfactus amplissimo.

Sinensium dentes incisores superiores inferioribus priores magis esse dicuntur, quam in *Europaeo*. ****) Capita eorum ovatam figuram habent.

DAUBENTONO vero calvariae et *Sinensis* et *Tartari* nil ab *Europaei* calvaria differre visae sunt.

In *CAMPERI* collectione est calvaria feminae ex insula *Celebe*. —

In museo anatomico Lugduni Batavorum calvaria feminae *Malabaricae* adservatur. ****) Ossa superiora tenuia sunt, maxillae contractae.

*) *Kosmologische Unterhaltungen*. Leipz. 1780. T. III. p. 63. Tab. F. nr. III. Dolendum, nimis parvas esse icones. Omisso *WÜNSCHII* nomine exceptas invenio in *LATZARI* *Essai sur la Physiognomie*. 1783. P. II. p. 148.

**) *Dec. II. p. 10. Tab. XV.*

***) *BLUMENBACH* *Dec. II. p. 11. 12. Tab. XVI.*

****) *HALLER* *Elem. Physiol. Tom. VI. p. 24.* Quod in *Sinensi*, quem curatius inspexi, invenire non potui.

*****) *ALBINI* *Index Legati Raviani. N. XXI.*

Calvaria incognitae *Rosso Asianae*, probabiliter vero *Tataricae* gentis, carinata, quo loco olim partes, os frontis constituentes, seiunctae fuerunt, vertice contracto, cuneiformi, occipite declivi, longo, delineata est Tab. III. decadis sive collectionis *Blumenbachianae*.

Integrum sceleton *Casacci Donensis* habet *BLUMENBACHIUS*, cuius calvariae iconem exhibet Tab. IIII. orbitis profundis et latis, narium apertura late patula, alis maxillae superioris deorsum tractis, foramine occipitali angusto, ossibus crassiss, firmis ponderosis.

Casaccus Kirgisa, cuius cranium *BLUMENBACHIUS**) servat, facie est ad ossa iugalia sat lata, superficie malari ossium maxillarium plana, fovea malari deleta, orbitis profundis, glabella protuberante, dorso nasi arctiori, lamina ossium palatinorum horizontali angusta, habitu igitur *tataricum* inter et *mongolicum* fere medio.

Calvaria, qua me Dr. *BEHREND*s, cui calvaria *Turcae* visa est, donavit, cuboides est, et substantia firma, solida. Verum utrum *Turca* sit *Asianus*, an *Europaeus*, me fugit.

Duas simillimas *Turcarum* calvarias dono accepi Viennae a *VERINGH*, et ibidem quam plurima *Turcarum* crania lustravi. Pleraque, quantum ad formam cuboidem, inter se conveniunt.

*) *Decad. II. p. 8. Fig. XIII.*

Siccum *Turcae* caput est in Musæx Regio Goettingensi, et tria *Turcarum* capita sunt in collectione *BLUMENBACHII*, quorum unius iconem dedit. *) Calvaria est fere globosa, occipitio vix prominente, fronte lata, glabella prominente, fossis malaribus leviter sinuatis.

Calvaria *Indi orientalis* e collectione *Ludwigiana* a *WÜNSCHIO* **) delineata est occipite brevi, robustissimis maxillae et totius faciei ossibus. Orbitae *Europaei* omnium minimae, *Indi orientalis* vero, cui valde prominent, maximae videntur. Utrum haec calvariae forma artificio quodam fronti illato, ***) sine climatis influxu, nascatur, nec ne, aegre diiudicari poterit.

Ceterum vero integra gens *Tataria* exigua est statura, magnis, ratione reliqui corporis habita, capitibus, scapulis elevatis, nucha brevi. Quo viciniore *Tatari* polo, ****) eo minoribus et retracrioribus sunt oculis, eoque breviori naso.

*) *Decad. I. Tab. II.* Obstericio artificio haec forma nasci ipsi videtur.

**) *L. c.*

***) *D'ULLOA Voyage dans l'Amerique meridionale, Tom. II. pag. 77.* — *EIVSDEM Voyages au Nord. Tom. V. p. 14. 15.* quasdam *Indiae Orientalis* gentes frontis formam mutare narrat. Idem faciunt *Sinenses*, referente *DE HALDE* *Tom. II. p. 95.* — et *Mindanenses*, auctore *DAMPIER Voyage autour monde Tom. II. p. 34.* Utrum idem faciant *Maliolenses*, nec ne, *FORSTER* in observationibus suis in ambiguo haeret.

****) *SMITH Essay on the causes of Variety of the human species.*

A f r i.

§. LXV.

Caput Mumiae *Aegyptiacae*, dubio procul veteris in collectione *Blumenbachiana* *), est angustum, ad latera, inprimis ad occiput, maxime vero ad verticem compressum. Facie idemque est recta, perpendiculari fere, sed longa, inprimis parte nasi radicem inter et mentum; Fronte vero parva, ab utroque latere oblique sursum versus compressa, ita, ut calvaria stricte sic dicta ab elato occipite ad frontem depressam pergens, in brevem cuneum quasi desinat, et cum inferiori ossium iugalium valde prominentium margine triangulum aequilaterum fere constituat; verum tamen elegantissimè fornicata est, margini plani semicircularis arcuato pro insitione musculi temporum, acute prominente; Orbitis amplis, propter longam faciem et frontem depressam alte sitis; Arcubus superciliaribus valde prominentibus, fossa profunda super nasi radicem ab invicem separatis, maxilla inferiore elata, angulo maxillae laterali gradus CXVIII. attingente; Dentibus omnibus magnis et robustis, coronis mire crassis et obtusis, quales in pluribus mumiis observantur. **)

Ceterum, quum Viri *Aegyptiaci* onera capiti imponere soliti fuerint, mulieres vero humeris,

*) Dec. I. p. 13. Tab. I.

**) MIDDLETON in mumia Cantabrigiensi. *Miscellaneous Works*, Vol. III. p. 170. BLUMENBACH in *Göttinger Magazin* Tom. I. P. I. p. 109. *H. Knochenlehre*, p. 87. et 246. Icon. in *Decad. I. Tab. I.*

quatuor mumias ab ipso exploratas, depressum verticem habentes, masculinas fuisse suspicatur. *)

Caput vero mumiae, quod Cassellis in museo servatur, nil fere ab *Europaeo* differt. **)

Caput etiam mumiae in theatro anatomico *Marpurgensi* servatum, cuius exacta delineatio ad manus est, nil a capite *Europaeo* deflectit.

Pulcerrima et optime servata, forsân virilis mumiae calvaria optimae aetatis, qua me *MIEG*, Professor Basileensis benevole donavit, quaeque olim in collectione *F. PLATERI* fuit, distincte formam *Africanam*, alte progrediente vestigio insitionis musculi temporalis, repraesentat. Vertex non est compressus, neque ossa faciei robustiora sunt ossibus *Europaeorum*. Densum ordinem integri pulchri dentes sistunt, non, nisi inferiores incisores et canini oblique priora et inferiora versus attenuati sunt, plurimum vero medium incisorum par, brevioribus ea de causa coronis instructum.

Plurâ itidem fragmenta calvariarum mumiarum possideo, quae vero, et quae supra descripsi, nil singulare, quantum ad crassitudinem, referunt ***).

Calvaria mumiae hominis senio confecti, ab eodem *MIEG* mihi data, *Aegyptiacam* ossium fa-

*) *BLUMENBACH* de generis humani varietate nativa, p. 81. Götting. 1781.

**) *BRÜCKMANN'S* Nachricht von einer Mumie. Braun-schweig, 1782. 4to hanc mumiam descripsit.

***) Forsan male intellexit *Herodotum SHAW* (*Travels*, p. 377. Lond. 1757.) crassam esse mumiarum calvariam contendeus.

ciei formam minus accurate repraesentat; verum dentes incisores exteriores inferiores, et dentes canini modo, quem supra indicavi, sese habent, distant nimirum inter se, et in planum sunt attenuati.

Medium par dentium incisorum inferiorum periit, nec ullum alveolorum vestigium adest. Omnes etiam superiores dentes senectute perierunt.

Calvaria *Cingari* genuini in collectione *Blumenbachiana* *) facie est oblonga, fronte parva, fornicata, arcibus superciliaribus pone glabellam valde prominentibus, orbitis admodum profundis, maxillis aliquantum prominulis, dentibus magnis, in primis molaribus ingentibus; magna igitur similitudo hanc calvariam inter et caput mumiae intercedit.

Virile, et femineum corpus siccatum ex insula *Teneriffa* Amstelaedami servantur. **)

Par omnibus numeris simillimorum corporum virilium (dubio procul ex eadem insula) in museo est Cassellis, unum horum corporum, calvaria eius inprimis, notas *Nigrittae* exacte refert. Incisores dentes ab invicem distant, obtusi sunt, laeves, acuendo quasi attenuati, eaque de causa coronam planam in morem mumiae Aegyptiacae habent. ***)

*) Dec. II. p. 4. Tab. XI.

**) Bonn, *Descriptio thesauri ossium morbosorum*. Horii, N. 463. p. 137.

**) Ironem methodi, qua hae mumiae servantur, videsis in *Histoire générale des Voyages*. Tom. III. p. 40

Nigrittae caput, ad reliquum corpus relatum, *) in universum maius est, quam *Europaei*, calvaria vero, ad maiora faciei ossa, minor **) et ab utroque latere compressa.

Caput vertebrae colli incumbit prorsum magis inclinatum, quare cervix, quo loco occiput et tergum coeunt, minus est sinuata.

Caput *Nigrittae*, ablata maxilla inferiore, tabulae planae impositum, tantum reclinatur, ut series dentium tabulam non attingat, sed sursum versus tendat.

*) Pulcherrimum sceleton naturale *Nigrittae* perfectae magnitudinis Academiae militari Caes. Reg. Ioseph. Viennensi tradidi, quod delineari mereretur. Ipse ego duo virilia sceleta, et unum femineum sceleton possideo, et absque his tres *Nigrittarum* calvarias, itidemque duo embryones, num vero hi genuini sunt, dubito. In collectione *Camperiana* pulcherrimum est sceleton *Nigrittae*. Videsis a me scriptam commentationem *von der körperlichen Verschiedenheit des Negers vom Europäer*. Ed. II. Francof. 1785. 8.

**) Icones calvariarum *Nigrittarum* dedit *PAAWIUS* in *Primitiis anatomicis Figura ad pag. 29. referenda*, et *FISCHERUS* in *Diss. citata*. Utraque vero icon genuinas notas non exhibet. — *WÜNSCH l. c. n. 3.* — Tres diversas *Nigrittarum* calvarias delineatas dedit *BLUMENBACH* in *Decad. Tab. VI. VII. VIII.* Cranium Aethiopsis del. Ed. *SANDIFORT* in Museo anat. Acad. Lugd. Bat. Vol. primo. Tab. 3. Calvarias *Nigrittarum* exhibent multae collectiones *Amstelaedami*, *Cassellis*, *Berolini*, *Götttingae*, *Lankumani*, *Lugduni Batavorum*, *Lipsiae*, *Londini*, *Moguntiae*. Caput feminae *Nigrittae* thesaurus *Hovianus* *Amstelaedami*. Calvariam Viri *Nigrittae* *Lugduni Batavorum*, *ALBINUS l. c.* describens: „Nasus,” ait, „totaque facies lata, plana et repressa sunt. Supercilia ossea prope nasum admodum eminent, et versus inferiora insigniter deprimuntur,” et de calvaria, dubio procul feminae *Nigrittae*: „Caput osseum mirabiliter crassum, compactum, durum, forte, ponderosum, mire etiam ubique a naturali specie recedens.”

Foramina calvariae sunt ampliora; *thorax* do-
lio similior; *humeri* contractiores; *lumbi* procerio-
res; *artus* superiores et inferiores in universum
longiores; *manus* et *pedes* robustiores et planiores;
genua maiori spatio ab invicem separata.

Comparata singula *Nigrittae* ossa cum *Euro-
paei* ossibus ostendunt: *os frontis* brevius et pla-
nius; *ossa bregmatis* minora, sibi invicem vicinio-
ra, et vestigium insitionis musculi temporalis al-
tius procedens, vel suturae sagittali magis propin-
quum; *Os sphenobasilare* planius, *foramen occi-
pitale* amplius, magis posteriora versus situm; *or-
bitas*, *cavitatem narium* et *fornicem palatinum* ca-
paciores; interdum *ossa nasi* frontem versus eviden-
ter acuminata; *ossa faciei* crassa, robusta; apertu-
ram anteriorem narium inferiora versus arcuatam;
aperturam narium posteriorem capaciore; *con-
chas* circumvolutiores, nonnumquam etiam *os eth-
moideum* maius et amplius; orificium meatus
aurium, quamvis *minori osse temporum*, maius;
stapedem brutorum *stapedi* similiorem, utpote
breviorem et excavatiorem, *maxillam superiorem*
angulo graduum LXX. prominentem, exiguam
vero eiusdem ossis spinam nasalem; *maxillam in-
feriorem* saepius robustiorem, ubique elatiorem,
crassiorem, latiore; angulum eius lateralem non-
numquam. ut in simiis, ad perpendiculum ad-
scendentem; *foramina* et *intervalla* ossa capitis
inter, pro recipiendis nervis, maiora; *dentes* mul-
tum latos et robustos, saepius forsan, quam in

Europaeis, numero excedentes; substantiam omnium ossium compactiorem, solidiorem et duriorum. *)

Calvaria feminae *Hottentotae*, similis calvariae *Nigrittae*, est in museo *Camperiano*. **)

Eodem in museo servatur calvaria iuvenis ex insula *Madagascar*.

Auctore le *VAILLANT* ***) *Gonaquois* ratione formae medii sunt, *Hottentotas* inter et *Caffros*. Multum prominentibus sunt ossibus iugalibus, ideoque eo loco facie valde lata, ossa maxillaria vero et mentum versus multum compressa, ideoque capiti, ratione reliqui corporis, tenuem et exilem habitum impertiente, naso valde plano, vix sex lineas parisienses alto, dentibus parvis, reliquo vero corpore perfectissimo.

Calvaria novem mensium *Mulattae*, matre *Europaea*, et patre *Aethiope*, in collectione mea, praeter robur ossium faciei, supra descriptas cal-

*) Iam iam *HERODOTUS* ut supra indicavi, hanc indolem calvariis *Aegyptiorum* tribuit, causamque positam esse ait in tonso es nudo a prima inde iuventute capite. *V. Ed. REISKII* p. 237. *PLINIVS* vero de calvariis *Aethiopum* in *Succenturiat. anat. Lugd. B.* 1616. p. 14: non os, inquiens, sed militarem te tangere dicas galeam, et gladios, calvariam ferientes, diffringi, venae poeticae indulsit.

**) Egregia effigies gypsea capitis *Hottentotae*, quae mihi ad manus est, similiter indolem refert *Nigritticam*.

***) *Voyage dans l'interieur de l'Afrique*. Paris 1796. om. II. p. 117.

variae *Nigrittae* notas mihi quidem non perspicue satis exhibet.

Fetus maturus *Mulatticus* sexus sequioris matre *Aethiope*, et patre *Europaeo*, servatur in *Hovii* collectione Amstelaedami *).

POLLUX gentis macrocephali in *Libya* mentionem facit **).

A m e r i c a n i.

§. LXVI.

Calvaria incolae *Americae septentrionalis* in collectione *BLUMENBACHII*, cuius adcurata delineatio mihi ad manus est, cuiusque ipse iconem *Tab. VIII. Decad.* dedit, est vertice magno, lato, quadrato fere, valde depresso, ab utroque latere ossa temporum versus globoso; marginibus plani semicircularis ab ossibus iugalibus verticem versus multum ab invicem recedentibus, non, ut in *munia*, conniventibus; ossibus iugalibus valde prominentibus, sinuatis; cavitate narium amplissima ***); arcubus superciliaribus magnis, et alte fornicatis; linea faciali perpendiculari fere, occipitio latiori, quam *Europaeorum*, ne dicam *Nigrittae* vel *muniae*; dentibus incisoribus maxillae superioris (deest enim inferior) cestrorum instar

*) *Bonn l. c. nr. 447.*

**) *Onomasticon Libr. II. Cap. III. §. 3. — Notat — ne forsan HERODOTI Troglodytas, (Lib. 3. III. 183.) ad sinum Arabicum habitantes, quum Libya et integram Africam indicat? an STRABONIS Κυναμολυγας? (XVI. p. 530.)*

***) *ERXLEBEN Mammalia, p. 2. naribus patulis.*

in acutam aciem desinentibus, opposita plane *mu**
miae dentibus figura; ossibus latis valde tenuibus,
 integro capite valde levi, omnibus igitur fere ali-
 ter sese habentibus, quam in calvaria *Nigrittae* *).

Calvaria incolae *Americani* insulae vocatae
Hond Eyland **) similis est calvariae *Nigrittae*,
 vestigio insitionis musculi temporalis suturam sa-
 gittalem fere tangente, capite ab utroque latere
 compresso, occipite longo, ossibus maxillaribus
 prominentibus; ossibus nasi parvis, orbitis amplis,
 fronte et ossibus iugalibus planis, dentibus inci-
 soribus latitudinem dentium molarium attingenti-
 bus; in universum forma, simiae, quin canis cal-
 variae multum simili.

Egregie quamvis forma minuta, sed notis ge-
 nuinis delineata est calvaria *Caribaei* et descripta
 ab *Hunauld* ***).

Huic simillimae *Caribaei* calvariae, magnitu-
 dine naturali, sed non eadem anatomica veritate,
 icon est in *ROZIER Journal de Physique* 1789. mens.
 April. quo loco *ARTHAUD*, hanc formam innatam,
 non arte factam esse, contendit.

Cum utraque hac icone tres icones, quibus
 me *VAN MEURS* donavit, ita concinunt, ut om-
 nes quinque ab una eademque calvaria descriptas
 esse crederes. Hae calvariae sunt: Ima. ex *Insula*

*) *BLUMENBACHS Knochenlehrp.* 89. et p. 248.

**) *Memoires de l'Academie royale des Sciences de Paris*,
 1722. descripta est calvaria a *WINSLOW* p. 324.

***) *Memoires de l'Academie des Sciences de Paris.* 1740. p. 384.

St. Vincentii in collectione *Cliniana* Londini; *IIda* in theatro anatomico Oxoniensi ex *King George's Sound*; *IIIda*. in collectione *Thomsoniana* Oxoniae, ultimo *COOKII* itinere allata.

Omnes hae quinque calvariae in universum deorsum versus compressae sunt, occipite prominente, orbitis igitur minus profundis, plano earum superiori propulso, fronte, praesertim media parte, perexigua*), tubere insigni, quo loco os frontis suturam sagittalem tangit, ossibus iugalibus elatis, ossibus nasi brevibus.

Ad unguem cum hac descriptione convenit calvaria feminae *Caribaeae* ex insula *St. Vincentii* in coll. *Blumenbachiana* Tab. XX.

Artificiis tenero infantum capiti illatis, has singulares calvariarum formas produci posse, negari nequit, imprimis, quum modum procedendi testes oculati fide digni adcurate describunt**). Mihi quidem insigne tuber os frontis inter et ossa bregmatis facile explicatu videtur, tenero enim infantis recens nati capite, hoc loco mere cartilagineo, non potest non esse, quin fronte adfatum compressa, locus in formam tuberis surgat.

*) *ERXLEBEN Mammalia* pag. 2. Genuinam notam esse frontem parvam.

**) Certas *Caribaeas* gentes hoc artificio uti, testantur *OLDENDORF Geschichte der Mission* P. I. p. 23. *LABAT nouvelles relations*, T. II. p. 72. *BLUMENBACH* Dec. II. p. 15. — Idem de Incolis *Americae septentrionalis* testantur I. *ADAIR Hist. of the Nord American Indians*, p. 8. 204. — *Voyages au Nord* Tom. X. p. 14. 15. 113. — *CHARLEVOIX Hist. de Paraguay*. p. 187. 323. — *ULLOA*. l. c.

Simile quid *Drusi* etiam, in monte *Libanon* habitantes, fecisse videntur*).

Laponibus similis gens in sinu *Hudson* habitare dicitur**).

Huic similem calvariam una cum maxilla inferiore delineari curavit *BLUMENBACH* Tab. X. Fronte est repressa, orbitis sursum versus spectantibus, plano orbitae superiori, ut in hydrocephalis, valde declivi, inde ingens distantia sulcum pro recipiendo nervo frontali inter et os unguis.

Auctore *CHARLEVOIX* alii indigenae *Canadenses* sunt calvariis globosis, alii depressis. Utramque formam arti tribuit.

Squimaei et *Groenlandi* sunt parvi, sed macrocephali, facies planis, genis plenis, naso autem non impresso***).

Incolae *Terrae ignis* sunt macrocephali, thorace et humeris latis, corpore brevi, sed subnixo; femoribus gracilibus, genibus crassis, tibiis macilentis****).

Incolae Insularum Oceani australis.

§. LXVII.

Calvaria incolae *Taheitensis*, cuius icone idem v. *MEURS* benevole me donavit, in theatro anato-

*) *ARRIÈUX* Mémoires T. I. p. 358.

**) *SMITH* l. c.

***) *CRANZ* Geschichte von Grönland, p. 169. Idem vidi in egregiis, quas *BLUMENBACH* possidet, iconibus. Rursum iconem *Grönlandi* v. in *OLEARI* Gottorpschen Kuns-kammer. Tab. III.

****) *FÖRSTER* Bemerkungen, p. 224. 225.

mico *Oxoniensi* servatur; egregia videtur esse forma, occipite pulchre globoso.

Calvariae *Mullikolensium*, testibus oculatis patre et filio *FORSTERIS**) a radice nasi sursum versus planiores sunt, occipite compresso, ideoque inter omnes gentes haec gens simiis simillima est.

Incolae novae *Hollandiae* exigua sunt statura **).

Incolae vero novae *Zeelandiae* magno et robusto corpore, tibiis vero macilentis***).

DISCRIMEN Sceleti Ratione Individui.

§. LXVIII.

Alii crassa magis quam longa, alii vero longiora****) et latiora, sed non eadem proportionem crassiora ossa habent.

Sceleta quorundam nonnunquam, sine ulla aegritudinis suspitione, sunt capite magno vel parvo; humeris latis, vel contractis; thorace elato vel plano; spina vertebrali curva, vel recta; lumbis iunceis vel brevibus; coxis crassis vel gracilibus; femoribus brevibus vel longis, tibiis altis vel humilibus; manibus et pedibus longis vel brevibus; digitis manuum et pedum in acutum vel obtusum desinentibus.

*) *FORSTER* l. c. p. 217. 240.

(**) — l. c. p. 250.

***) — l. c. p. 237. et 241.

****) Haec est ratio ossis femoris, quod *MERK* in *Hessischen*

Quin ipsa substantia vel subtilitas massae osseae diversa videtur*).

DISCRIMEN OSSIUM RATIONE VICTUS ET MEDICAMENTORUM.

§. LXIX.

Nonne victus etiam et medicamenta vim habent in mutanda ossa? Nonne forsan chemica analysis discrimen quoddam ossa hominum magis sarcophagorum inter et magis phytophagorum detegere posset? — Quidnam discrimen est ossa hominum inter et diversorum brutorum?

Humanis quidem ossibus plus ferri inest. (§. II.) — Quo differunt inter se ossa brutorum sarcophagorum et phytophagorum? An hocce nil facit ad fabricam ossium? — Quaenam res, praeter rubiam tinctorum et galium aparine ossa imprimis tangunt? Calamus aromaticus forsan, sabina, vel asa foetida ossibus conducunt? — Non dum etiam constat, quisnam cibus, vel quaenam praeparatio, utrum calida an frigida, dentibus v. g. magis noceat.

DIS

Beiträgen T. I. P. I. describit. Ad mantis mihi est longius etiam, idemque crassius.

*) Exactas dimensiones ossium mulieris gigantis vid. in *Bonn Descript. Thesaur. Hoviani* 462. qui eodem loco plures eiusmodi observationes citat. — Icone sceleti viri valde robusti et praegrandis vid. in *CHESELDEN Osteographia*. Gigantum immania sceleta Viennae vidi. Duos alia in theatro anatomico Berolinensi vidi.

DISCRIMEN OSSIUM RATIONE CONSUE- TUDINUM GENERIS ET AMICTUS.

§. LXX.

Haec paragraphus media quasi est anteceden-
tem inter et sequentem, quod saepius nulla alia
causa, nisi amictu, morbi evidenter nascuntur.

Incolae *Americae septentrionalis* capita infan-
tum recens natorum, imposito sacco arena re-
pleto, et situ in cunabulis humiliori complanare,
et hoc modo descriptam (§. LXVI.) formam ex-
torquere dicuntur*). Globosam calvariae formam
Turcarum obstetrices vi perficere, fama est **).

Drusi vero in monte *Libanon* habitantes ca-
pitibus infantum oblongam formam conciliare
tentarunt.

Aethiopes nasum infantum premendo simum
reddere dicuntur. Verum, nunc quidem ejusmodi
nasum innatum esse, extra omne dubium positum
est. Omnes Cassellis nati *Aethiopum* infantes eadem
fuerunt facie plana, non comprimendo nata; la-
bia magna resima et s. p. certissime comprimendo
et complanando oriri nequeunt. Quaedam gentes
dentes sollicitè tingunt.

Persarum operto semper capite incedentium,
calvariae debiliores, *Aegyptiorum* vero tonsae et

*) I. ADAIR Hist. of North American Indians. Lond. 1774.
4. p. 8. 284.

**) VESALIUS l. c. (vid. §. LXIII.) — BLUMENBACH Decad.
I. p. 16.

nudatae multo robustiores fuisse dicuntur*). — Calvarias *Nigrittarum* duriores esse, certum est et exploratum. Num forsan quod plerumque nudo capite incedunt?

Descriptum (§. LXIII.) discrimen formam inter calvariae *Germanicae* et *Belgicae* diversae rationi situs infantum in cuneis deberi dicitur.

Forsan, quod *Aegyptii* non nisi herbis et radicibus tenacibus vescebantur, dentes descriptam (§. LXV.) formam induerunt.

Europaeae nobiliores thoraci filiarum contrariam naturalis formam cataphractis conciliare student; natura amat thoracem superius contractum, inferius vero latiore, *Europaeae* vero oppositum. Per aliquod tempus quidem scopo potitae videntur, verum tandem anno aetatis vicesimo quinto, nonnumquam ante hoc tempus, corporis forma corrumpitur, vel gibbo deformatur**).

Student porro, vel invita natura, scapulas ad dorsum arctius adprimere.

Vel variis machinis, spinam ad perpendicularum, quantum quidem fieri potest, torquere.

Capillorum crispatoribus, altera manu pecten tractante, altera vero quieta capillos tantum retinente, thoracis ossea compages in moto latere,

*) Id iam iam notat *Herodotus*, *persicas* calvarias ἀσθενείας, *aegyptiacas* vero ισχυράς vocans. Αἱ τῶν Περσέων κεφαλαὶ εἰσι ἀσθενείας ἔτω, ὥς τε εἰ θελαίς ψηφῶ μουνὴ βαλεῖν, διατετρανείας αἱ δὲ τῶν Αἰγυπτίων, ἔτω δὴ τι ισχυραὶ, μογίς ἂν λιθῶ παισας διαρρήξει.

**) Vid. *Comment. meum von den Schnürbrüsten*, edit. secund. Berolin. 1793.

musculis humeri perpetuo agentibus, tandem elevatur.

Herniae vincula exostosis ossis pubis producere dicuntur *). Multa equitatio iuniorum artus inferiores incurvat. Equitatio *Anglorum* more feminis humerum dextrum elevat**), et os coccygis immobile reddit.

Qui multum genibus nituntur, his patellae diducuntur.

Europaeae nobiliores altis calceamentorum sustentaculis tandem pedes adeo mutant, ut tarsus et metatarsus praeter naturam curvantur, ita, ut post annum quintum et vicesimum vel tantillum in rectum porrigi nequeant. Saepissime tandem perfecta ossium tarsi ancylosis sequitur ***).

Iisdem altis calceamentorum sustentaculis directio totius sceleti longe alia nascitur. Supposito enim calci hominis erecti cuneo eadem, qua sustentaculum, altitudine, non potest non esse, quin homo, nisi corpus reclinetur, pronus cadat.

Sinenses calceamentis angustis omnem pedum usum feminis tollere dicuntur.

Digiti pedis omnium, qui recepto more factis calceamentis pedes muniunt, saltem luxati sunt, quid, quod plus minusve deformes ****).

*) *BLUMENBACH Osteologia, p. 319.*

**) *British Mercury. 1790. p. 47.*

***). *Exempla habeo in collectione mea.*

****) *V. CAMPERI egregium librum: Von der besten Form der Schuhe, in Er. kleinen Schriften, Tom. I. P. I. p. 119.*

DISCRIMEN OSSIUM RATIONE
MORBORUM *).

§. LXXI.

Ab aliis morborum materiis ossa mutari videntur hoc, ab aliis alio modo.

Nullum est dubium, quin hac in doctrina praestari adhuc possint multa magni momenti, haud dubie enim priva quaevis morborum causa peculiari quadam tenus ratione, et forsan plures diversis periodis diversa ratione ossa mutant.

§. LXXII.

Os periosteo nudatum et ichore circumfusum sensim sensimque molliri, et solvi videtur. Hoc modo corrosa ossa, loco chirurgica manu nondum inciso, neque nigrare, neque multum foetere solent.

Non numquam integrum os corroditur, ut particulae, vel puri mixtae, vel in illud demersae, manifesto abscedant. (Exfoliatio sensibilis.)

§. LXXIII.

Plerumque vero os corruptum, non nisi adcedente demum aëre, nigrescit et putrescit **).

§. LXXIII.

Rhachitis ossa infantum non solum mollit, eorumque epiphyses ambitu auget, sed etiam colorem eorum propria quadam ratione corrumpit. Omnibus in casibus ossa iustam longitudinem non assequuntur, sed tuberosa evadunt. Superficies

*) Optimas ossium icones morbosorum in litteratura osteologiae catholica iam iam citavi.

**) *Bonn in explicatione Tab. XX. fig. I. et Tab. XXII. fig. II.*

ossium mollitur, pluribus vasis ditatur, semidia-phana et cartilaginosa fere evadit, quemadmodum os recens dilutis acidis inmersum; reliquus vero ossium textus reticularis scaber, spongiosus, vermibus quasi exesus, vel arrosus, vel solito rarior videtur. Os frontis ea parte, qua in os verti incipit, surgit; suturae solvuntur quasi. — Dentes non solum iusto tardius erumpunt, sed etiam colorem naturalem amittunt, et frustillatim decidunt. — Pectus carinatur, omnisque generis gibbi oriuntur. — Quin ossa cylindrica quae antea fuere complanata, curvantur, primaeque plerumque tibiae, natura iam iam hanc directionem secutae, introrsum tendunt. Pelvis deformatur, quin, quum ad ultimum ventum est, artus superiores curvantur. Phaenomena, mollitae nec adfatim rigidae substantiae osseae summo iure tribuenda*).

Fugato morbo, curvum, vel ultra modum complanatum os iterum solidatur et calvaria nonnumquam inmensum in modum densatur, plerumque tamen calvaria gibborum omnium minimum damnum subit, dubio procul, quod arteriae caput tendentes minus adfliguntur.

Nihilominus vero vel aduultorum ossa nonnumquam, et brevi quidem tempore, molliuntur**).

*) STRACK de Rhachitide os femur lardi instar mollitum observavit.

**) BRÜNNIGHAUSEN vom Bruch des Schlüsselbeins. Wirzburg 1792. p. 23. omnia virginis olim vegetae et procerae ossa

§. LXXV.

Sic dictis *Cretinis*, ut videtur non singulari generi hominum, sed aegrotis tantum *) pars occipitalis ossis sphenobasilaris **) a foramine magno ad perpendiculum adscendit, parallelo hoc foramine cum linea corporis centrali, quia condyli priora spectant; quo facto priora tendit, angulum rectum servans, et pars basilaris, eundem, quem pars sphenoidæa, situm horizontalem servat. Interior partis basilaris superficies gibba potius est, quam, ut alias solet, cava; inde fit, ut calvaria multo spatio privetur, processus medullaris cerebri transversus valde comprimatur, sinus transversus, quo foramen iugulare attingant, iterum adscendere debeant, et vertebrae colli, condylis iungendæ, multum priora versus curventur. Satis, credo, hoc probabit, hunc non cutis tantum, sed

spatio trium hebdomadum ceræ inter flexilia fieri vidit. Ipse ego mirum hoc exemplum Wirceburgi vidi.

Vid. etiam T. LAMBERT *Relation de la maladie de Bernard d'Armagnac sur un ramollissement des os*. Toulouse 1790, et S. F. MORAND *Histoire de la maladie singulière, et de l'examen du cadavre d'une femme devenue en peu de tems toute contrefaite par un ramollissement general des os*. Paris 1752. Novissimum exemplum narrat I. Petr. WEIDMANN *de necrosi ossium*. Francof. ad Moen. 1793. fol. pag. 2. not. b.

CHESELDEN *Osteograph. Introd.* partem maxillæ inferioris trans dentes molares in substantiam semiligamentosam et semicartilaginosam mutatam vidit.

*) Aegrotos esse *Cretinos*, vid. BLUMENBACH *de generis humani varietate nativa*. Gött. 1781. §. 88. p. 123.

**) V. ACKERMANNI fictam istiusmodi calvariae, quarum duo exempla Professor FRANK Ticini possidet, iconem in *Dissertatione von den Kretinen*, Gothæ 1790.

etiam firmissimarum partium, morbum esse, cognitione, ut videtur, cum rhachitide mixtum.

§. LXXVI.

Aqua intra calvariam collecta, ossa distendit, calvariae magnitudinem, nec non, si, quod autem raro accidit, superstes infans fuerit, crassitudinem auget*).

Nec minus hydro thorax vel pyothorax costas nonnumquam diducit.

Anevrysma - ossa - loco movet, quin absuinit**).

Pus, vel quicumque demum sit, tumor sinum maxillae superioris immensum in modum interdum distendit, ut os chartae instar rarescat***).

§. LXXVII.

Miasma venereum brevi tempore singularem massam osseam periosteum inter et os, vel lamina ossis inter deponit. (*Exostoses, Nodi.*) Nonnumquam os corrodit, vel maligne ulcerat. Rarissime vero aliam partem ossis, praeter firmissimam, tentare videtur****).

*) SANDIFORT *Exercitat. acad. Lib. I. et II.* continent indicem istiusmodi observationum. V. Ei. Mus. anat. A. L. *Tab. X. XI. XII.* Perbellum tale caput est in bibliotheca Gymnasii Thorunensis. Immane caput, aqua distensum, WALTER adservat.

**) HUNTER *Medical observations and Inquiries, Vol. I. p. 25.* Egregia eiusmodi specimina vidi, quae Lipsiae in theatro anatomico servantur.

***) SIEBOLD *Diss. de insolito maxillae superioris tumore.* Wirceburgi 1776. c. fig. Plura istiusmodi specimina vidi in servo. Elegantissimam iconem Sandifort *Mars. anat. L. Tab. XXX ad XXXIII.* exhibet.

****) CHESELDEN *Osteographia.*

§. LXXVIII.

Ossa hydropicorum interdum pro medulla gelatinosa materie plena sunt *).

§. LXXVIII.

Os, periosteo nudatum, moritur, et pone vel circum hunc locum, mollita, et a vasis absorbentibus avecta materie, sulcus, semper altius descendens, gignitur, donec pars solvatur et eiiciatur (Necrosis §. XXIII.) **), vel *integra* solvatur. (Caries, Exfoliatio insensibilis.)

Istiusmodi frustum simile est ossi in ventriculo animalis sarcophagi non nihil soluto ***).

§. LXXX.

Nec minus proprio modo ossa scorbutus corrumpt****). Mollia, spongiosa fiunt, quin sponte, hoc loco in cartilaginosam massam soluta, franguntur.

§. LXXXI.

Arthritide ossa sensim sensimque superficiebus articularibus nudantur, inde mutuo sibi atteruntur, et superficies eorum poliuntur *****).

§. LXXXII.

In quibusdam, qui rarissimi videntur, mor-

*) John HALL in Lond. medical Journal 1786. P. II. p. 157.

**) Multi casus narrantur a WEIDMANN de necrosi ossium. Francof. 1793.

***) TRIOEN. Tab. VIII.

****) HOFMANN vom Scharbock. Münster 1782.

*****) Cfr. Diss. meam de ossibus arthriticis in BLUMENBACHII medicinischer Bibliothek. III. Band.

bis, os tumefit, inflatur quasi, rarescit et pondere multum minuitur. (Spina ventosa)*).

§. LXXXIII.

Nec minus in aliis morbis tumefit, verum densatur simul, solidatur lapidis instar, et pondere augetur; nonnumquam os inter et periosteum materies ceterum sana, sed spissa, deponitur, formam inmaniter turpans**). (Exostosis reliquo osse sano vel morbo.)

§. LXXXIII.

Os putrescens, aëri expositum, carbonum colorem induit, et proprium, valde nauseosum odorem spargit.

§. LXXXV.

Forsan posteri, diligenter hoc argumento tractato, e solo externo ossis habitu, utrum hoc an illo morbo tentatum fuerit, diiudicare, et, quod caput rei est, versa vice per hunc vel illum morbum hoc nec ullo alio modo, os hominis vivi mutari posse, stabilire poterunt.

DISCRIMEN OSSIUM RATIONE PRAEPARATIONIS ET CONSERVATIONIS.

§. LXXXVI.

Ossa in aquam immersa, donec omnis caro

*) Egvegie delineatam iconem vide apud *TRIOEN* Tab. VII.

**) Memoratu dignissimum exemplar in museo Electorali Bonnae vidi, videlicet calvariam una cum dimidia maxilla inferiore simillimam depictae in *Oryctologie par M. des sociétés de Londres et de Montpellier*. Paris 1755. 4. p. 330. Tab. XVII. Similia specimina Viennae et ex bove Dresdae vidi. In sceleto gallinaceo, quod mihi ad manus est, eundem hunc morbum video.

putrescat, et facile ab ossibus separetur, saepiusque sub ipsa purgatione, et post eam abluta, posteaque caute, verum neque nimis urente sole, neque in locis nimis umbrosis, insolata, nullo alio artificio adhibito albidissima fiunt et nitidissima *); cave verò, ossa nimis adultorum adhibeas.

Albidissima fiunt ossa iuniorum, phthisicorum et hydropicorum.

Minus albescunt, coquendo separatione carnis tentata, praesertim, quod calore substantia dentium vitrea facile avellitur.

Istiusmodi ossa per integra saecula in scriniis servari possunt, neque magnas mutationes subeunt.

§. LXXXVII.

Nonnumquam in sepulcris ossa humana penitus, thyitis instar, viridia, inveniuntur, qui color ab adiacente cupro vel aurichalco oritur, quod spiritus salis armoniaci monstrat. Ossium *munia-
rum* cava medullaria asphaltum vel resinam cedri continent.

§. LXXXVIII.

Ad hoc usque tempus *anthropolithi* veri nondum inventi sunt.

*) V. PAULI in *Actis Havniensibus*, Vol. II. Obs. XVIII. et XXXIII. — LYSER *Culter anatomicus*. — M. B. VALENTINI *Theatrum Zootomicum*, fin. — WAGLER in *den Göttingschen gelehrten Anzeigen* 1763. p. 1157. I. Leonh. FISCHER *Anleitung zur praktischen Zergliederungskunst*. Leipzig 1791. Cap. I. — VIII.

OS FRONTIS.

conem nexi reliquis ossibus dedit *ALBINUS* Tab. ossium I. III.
III. V.

Infantis, *ALBINUS* in *Iconibus ossium foetus*. Tab. II.

§. LXXXVIII.

Os frontis, os indivisum plerumque, separat sutura coronalis I. II. ab ossibus bregmatis; sutura fere squamosa III. ab ala maiore ossis sphenobasilaris, sutura minus serrata ab ala minore huius ossis; IIII. V. sutura vera ab ossibus zygomaticis; VI. VII. VIII. harmonia vel linea curva ab osse ethmoideo, et ossibus lacrimalibus; VIII. X. XI. XII, sutura ab ossibus maxillaribus superioribus, et ossibus nasi; nonnumquam etiam XIII. harmonia a spina nasali ossis ethmoidei.

Seiuncto ossi a reliquo crânio superficies interna cava, externa gibba conchae formam imperitiuntur.

Superiorem, priorem et nonnihil internam calvariae partem, superius orbitae planum, et altissimam cavi narium partem constituit. — Quare in partem frontalem, in partes orbitales et in partem nasalem, dividitur.

§. LXXXX.

Pars frontalis maxima est et crassissima, externe gibba, et praeter quaedam foraminula et vestigia vasorum laevis. — Super arcus superciliares, partem frontalem inter et orbitalem, quo loco primum in os verti incepit, plerumque levis vel parva protuberantia, in illis, qui rhachitide laborarunt, valde conspicua, invenitur. Eiusdem

loci interna superficies cava est, apicemque lobi prioris cerebri excipit. — In adultis praesertim, super nasi radicem ab utroque latere est *tuber frontale*, quae duo tubera vel coeunt, vel seiuncta, saepius multis foraminulis pertusa sunt, plerumque vero plus minusve elata et ampla sinus frontales retro positos produnt. Protuberantias inter et tubera, quo loco supercilia cutem plerumque non tangunt, *glabella* posita est. — In parte laterali *planum semicirculare*, sive vestigium asperum, in-sitionis musculi temporalis observatur.

§. LXXXXI.

Pars orbitalis, quae cum parte frontali angulum constituit, multo tenuior est, eiusque superior superficies plus minusve gibba, — infra vero hanc partem arcus superciliaris parti frontali iungit. Externa superficies cava, eademque trigona, praeter vaga vasorum vestigia, fossam glandulae lacrimalis habet — interiora versus, super harmoniam cum osse lacrimali, plerumque foveolam, raro *spinam trochlearem*, cui trochlea musculi obliqui superioris bulbi illigatur. — Ceterum pars frontalis et orbitalis nexae *apophysin molarem* constituunt, vel orbitariam externam, quod quidam auctores apophysin nasalem vel orbitariam internam describunt.

§. LXXXII.

Pars nasalis medias inter partes orbitales sita est. — Parte priore crassa est, et ob suturas, quae eam ossibus nasi et ossi ethmoideo iungunt

valde serrata, oriturque ex ea *spina acuta, nasalis*, cui os ethmoideum et ossa nasi iunguntur, post autem et super eam *sinus frontales* positi sunt. — Utramque posteriorem partem, plures, acutis caractis separatas cellulas exhibentem, et opercula quasi cellulis ethmoidalibus praebentem, lamina ossis ethmoidei cribrosa ab invicem separat.

§. LXXXXIII.

In *interna* ossis frontis *superficie* magis aequata res descriptae partes minus ab invicem distinguuntur. In media parte posita prominens, et a *spina nasali* incipiens acuta linea, sive *crista interna*, sensim sensimque sursum versus in *sulcum frontalem*, vel plana desinens, cui falx durae cerebri membranae adnectitur, in partem dextram et sinistram dividit. Inferiora loca, praesertim partes orbitales, incisura ethmoidea et foveolis, et cristae ossis ethmoidei excipientibus ab invicem separatae, eminentias et impressiones, vel ectypa lobi prioris cerebri, plus minusve conspicua; planiora vel profundiora vestigia arteriae prioris et mediae durae cerebri membranae, nonnumquam etiam in utroque sulci frontalis latere fossas, glandulosa durae matris corpora excipientes, ostendunt.

§. LXXXXIII.

Quo loco crassior est *substantia* huius ossis, cellulae medullares inveniuntur; verum in priore parte laminae eius ab invicem secedunt; quo *sinus frontales*, vagae quidem figurae constituentur. — Non-

numquam septo vel solido vel foraminibus pertuso, vel duplici, quod a spina frontali oritur, seiunguntur; nonnumquam vero septum deest; nonnumquam cellulas habent; raro autem utriusque lateris sinus eadem ratione formati sunt; nonnumquam integram partem orbitalem permeant, alasque ossis sphenobasilaris attingunt. Non uno modo cellulis ossis ethmoidei iunguntur, et in partem priorem meatus narium medii effunduntur.*) Partem ponderis capiti hoc loco demunt, quod, solido osse frontis, et eadem forma externa servata, maius fuisset; quare tantis gaudent elephantes, alioquin enim calvariae pondus iusto maius fuisset. Vocem augere nequeunt.

§. LXXXV.

Foramina in osse frontis observantur a) Foramen supraorbitale (plerumque vero incisura,) permeatum a nervo frontali primi rami quinti paris, sociis nonnullis vasis, sanguinem vehentibus. Raro divisum est, vel reapse duplex vel triplex, rarius canali simile. Hoc loco vasa, sanguinem vehentia et nervorum surculi exigua foramina pervadunt, et in sinus frontales sese recipiunt; nonnumquam vestigia vasorum, quin nervorum, ex hoc foramine in frontem procurrunt. — b) Foramina ethmoidea, vel orbitalia interna, quae quidem vel dimidiatae, vel integrae in parte nasali transverse positae canales sunt, numero vel duae maiores,

*) *BLUMENBACH de sinibus frontalibus. Gött. 1779. 4.*

vel tres, quatuor, quinque minores, quarum prior canalis plerumque maxima est. Vel solum os frontis, praesertim priorem, canalem vel socio osse ethmoideo has canales constituit; priorem ramus nasalis primi rami quinti paris nervorum; socia exigua arteria, percurrit, posteriores vero rami arteriae ophthalmicae transgrediuntur. c) Raro et in fossa glandulae lacrimalis amplum foramen, pervasum arteria lacrimali, tunc de arteria priore durae cerebri membranae oriunda, invenitur. *) d) Foramen coecum in superficie interna, quod vel ab osse frontis solo, vel socio osse ethmoideo formatur. Huic initium processus falciformis durae cerebri membranae illigatur, idque exigui arteriae ophthalmicae surculi, a sinibus frontalibus excepti, percurrunt.

§. LXXXXVI.

Arcui superciliari inseritur M. frontalis, et M. corrugator superciliorum, inferiori partium lateralium parti M. temporalis, internae partis orbitalis parti trochlea M. obliqui superioris bulbi.

§. LXXXXVII.

Primum ossificationis punctum in arcu superciliari observatur. **) Os frontis fetus maturi e duabus partibus constat, quae iam iam primis vitae annis invicem iunguntur; verum non nisi membranae cartilagosae ope cum circumiacentibus

*) HALLER Icon. Fasc. VII. Tab. VI.

**) RUYSCH Adversar. anatom. Dec. III. nr. LVIII. p. 30.

ossibus, inprimis ossibus bregmatis, quibuscum in vertice sic dictum fonticulum maiorem constituit, cohaeret.

§. LXXXXVIII.

Sinus frontales primis vitae annis exigua sunt amplitudine, et peractis demum pubertatis annis ratam amplitudinem nanciscuntur. Vel duodecimo vitae anno non nisi vestigium eorum in inferiore ossis parte conspicitur, eo enim loco, quem posthac occupant, tunc temporis nil est, nisi diploë.

Varietates.

§. LXXXXVIII.

Nonnumquam os frontis utriusque sexus, vel alta sit frons vel humilis, vel contracta vel lata, genuina sutura in duas partes per omne vitae tempus dividit, — duo igitur tunc sunt ossa frontis, dextrum et sinistrum. Saepius vero infra in superficie externa dumtaxat, rarius vero et supra breve istiusmodi suturae vestigium superest.

Nonnumquam os frontis parum tantum gibbum est, sed admodum planum et humile *) — nonnumquam vero elatum magis, quam latum, ita ut in suturae frontalis regione os quasi carinetur.

Nonnumquam ad perpendicularum fere adscendit, et pars orbitalis non in planum porrigitur, sed a priore parte sursum quasi tracta est.

Non-

*) LAVATER *Fragmente*, p. 219. Huius, ut reliquarum fere omnium observationum, exempla, ad manus mihi sunt.

Nonnumquam ultra solitum breve est.

Nonnumquam vertex illius in medio angulatus fere est, non, ut alioquin solet, globosus.

Nonnumquam os frontis inter et suturam sagittalem interposita sunt ossa triquetra.

Infinitus vero est varietatis modus sinuum frontium, quod ambitum, partitionem, formam, transitum in vicinos ossis ethmoidei sinus, aperturas eorum attinet. Nonnumquam sinus frontalis in uno vel altero latere penitus deest.

O S S A B R E G M A T I S

sive *ossa verticis, syncipitis, verticalia, vel parietalia.*

Iconem reliquis ossibus nexorum vide in *ALBINI Tab. Oss. I.*

III. Disiunctorum Ib. Tab. VI.

Infantis, in *ALBINI Icon. oss. foetus. Tab. I.*

§. C.

Ossa bregmatis, simplicissima calvariae ossa partem superiorem, mediam et lateralem calvariae constituunt.

I. Sutura sagittali utrumque os bregmatis inter se, II. Sutura coronali ossi frontis, III. Sutura squamosa alae magnae ossis sphenobasilaris et ossi temporum, IIII. Sutura lambdoidea parti occipitali eiusdem ossis sphenobasilaris iunguntur.

§. CI.

Soluto nexu quadratam concham os bregmatis sistit. Primus, rectus fere angulus est *angulus frontalis*, secundus acutissimus *angulus sphenoides*, tertius *angulus mastoideus*, quartus obtusissimus *angulus occipitalis*. Margines quatuor, iuncti angulos constituentes, sunt: *margo superior*, sive *sagittalis*, longissimus et rectissimus; *margo anterior*, sive *coronalis*; *margo inferior*, sive *temporalis*, brevissimus, tenuissimus et omnium curvatissimus; *margo posterior*, sive *occipitalis*, sive *lambdoideus*, crassissimus. — Ad angulum sphenoidem os frontis osse bregmatis, hoc vero eodem loco osse sphenobasilaris et temporali, et angulum mastoideum supra processu ossis temporalis ma-

stoideo, infra vero eundem processum eodem angulo tectum fuisse, conspici potest.

Superficies externa sphaerica est, eminentia, praesertim in iis, qui rhachitide laborarunt, quo loco in os verti incepit, valde conspicua. Superior dimidia pars satis laevis est, inferior vero aspera, ex insitione musculi temporalis, et superstite marginis eius circularis vestigio, quod cum plano semicirculari ossis frontis coit; nonnumquam hac in superficie vestigia quaedam sunt arteriae temporalis profundae.

§. CIII.

Superficies interna cava et ubique, ad marginem superiorem usque, distinctis vestigiis arteriae meningae mediae, quarum rami maiores angulum inter sphenoideum adscendunt et mastoideum mox plangniores, mox profundiores sulcos, nonnumquam hinc inde, praesertim quo loco oriuntur, veros canales constituentibus, obsita est. Vestigia gyrorum cerebri debilia sunt, nec nisi inferiore in parte observari possunt. (§. CCLVIII.) Quo loco sutura sagittalis ossa bregmatis invicem iungit, media inter ea communis, posteriora versus latior sulcus; vestigium sinus falciformis superioris durae matris, nonnumquam praecipue vel solummodo in dextro vel in sinistro osse conspicitur. Iuxta hunc sulcum cernuntur *foveae* sive vestigia glandularum durae cerebri membranae positu, numero, magnitudine, altitudine diversa. Plerumque in angulo mastoideo brevis est sulcus, sive vestigium sinus lateralis durae

cerebri membranae; verum tamen, si nonnumquam infra hunc angulum posito, non semper adest.

§. CIII.

Substantia posteriore in parte crassissima est, priora versus paullo tenuior, priore in parte marginis temporalis tenuissima.

§. CV.

Iuxta suturam sagittalem, occiput versus, conspiciuntur, verum non semper, foramina oblique tendentia, *foramina parietalia*, quorum unum saepius altero multo maius est. Nonnumquam duplicia sunt, nonnumquam vel in uno vel in altero latere desunt. Raro oblonga sunt vel vasta. *) Horum foraminum ope arteriae, venae (forsan et vasa lymphatica?) durae cerebri membranae cum vasis cutis coeunt **).

§. CVI.

Ossi bregmatis non nisi musculus temporalis a latere illigatur.

§. CVII.

Embryonibus os bregmatis fibrosum est, angulique, et frontalis et mastoideus, meras cartilagine, fonticulos, ut aiunt, sistunt, ***) circa secundum vero aetatis annum in os vertuntur.

D e c l i n a t i o n e s.

§. CVIII.

Post vicesimum aetatis annum fonticuli raro inveniuntur. ****)

*) LOBSTEIN *Diss. de nervis durae matris*. Argentor. 1772. adiecta icone.

**) LANCKE *Progr. de foraminibus calvariae eorumque usu*. Lips. 1762. Icon. minus adcurata.

***) CAMPER *Betrachtungen über die Geburtshülfe. Tab. I.*

****) V. §. CCL.

OS SPHENO OCCIPITALE *)

sive *Os basilare.*

Iconem nexi reliquis ossibus sistunt *ALBINI* Tab. Oss. I-VI.
soluti Tab. VI.

Infantis *ALBINI* Icon. Oss. foetus. Tab. II. III.

§. CVIII. ¶

Os sphenoccipitale mediam et posteriorem fundi calvariae partem, sive basin constituit, cui cerebrum et origines omnium nervorum de eo oriundorum innituntur, quam omnes, cerebri nervi, exceptis nervo olfactorio, auditorio, faciali, medulla spinalis, et arteriae cerebri permeant, et cuius ope caput columnae spinali iungitur.

§. CX.

Dividitur in partem priorem, sive *sphenoidalem*, et in posteriorem, sive *occipitalem*; lamina cartilaginosa hanc ossis partitionem ad annum usque decimum quintum vel decimum sextum efficiente, absoluto vero ossis incremento ita abolitam, ut interna in superficie ne tantillum quidem vestigii, in externa vero vix ullum supersit, eodem modo, quo diaphysis ossis cylindrici sensim sensimque cum apophysibus, ante ab ea seiunctis, unitur.

*) Ab omnibus auctoribus ad hucusque tempus describitur, tamquam duo seiuncta ossa, nempe os sphenodeum, alaeforme, cuneiforme, polymorphon, multiforme, vespiforme, et os occipitis, quae tamen multis aliis ossibus nondum perfectis, iam dudum unicum os indissolubile sistunt. Rupta vel fracta pars basilaris, nexu ossium capitis anatomica encheiresi soluto, veterem hunc errorem non defendit. Saltem in descriptione utraque pars esset iungenda.

§. CXI.

Ab utroque latere I. II. Sutura lambdoidea, ab osse bregmatis, supra ossa bregmatis tegens, infra ab iisdem tectum, III. IIII. Sutura mastoidea, harmonia, cuius lacunae massa cartilaginosa aequantur, sutura dentata ab osse temporum et rursus sutura squamosa ab osse bregmatis, V. VI. sutura dentata ab osse frontis et zygomatico, VII. VIII. harmonia ab osse maxillari superiori, VIII. X. harmonia et sutura ab osse palatino, XI. in cavitate narium harmonia et sutura brevi ab osse ethmoideo, et tandem interna in superficie sutura denuo ab osse frontis separatur. XII. Denique condyli illius ab atlante excipiuntur.

Quare omnia reliqua calvariae ossa, et ab utroque latere quatuor ossa faciei huic ossi, tamquam basi, adclinantur et innituntur.

In sutura lambdoidea huius ossis plerumque ossa triquetra, separatas quasi eius partes constituentia, inveniuntur.

§. CXII.

Pars occipitalis in universum externa superficie est gibba, interna cava, et infanti e quatuor partibus composita, I. *Parte occipitali*, stricte sic dicta. II. III. *Partibus lateralibus sive condyloideis*, IIII. *Parte priore sive basilari*.

§. CXIII.

1) *Pars occipitalis* utrimque in parte inferiore exhibet *lineas*, sive *arcus transversos*, asperos, *superiorem et inferiorem*, falcem constituentes, mox

in maius, mox in minus tuber sive *protuberantiam occipitis externam* coeuntēs e qua linea acuta sive *spina occipitalis* ad perpendicularum adscendit. Lineae transversae superiori sursum versus M. occipitalis, deorsum versus M. cucullaris, pars M. sterno et cleido mastoidei, infra hunc muscūlūm pars M. splenii capitis, et M. biventer cervicis; — Lineae transversae inferiori M. complexus, a latere M. rectus posterior maior et M. obliquus superior capitis illigantur. — Infra hanc lineam utrimque iuxta spinam occipitalem fovea aspera est, cui M. rectus minor posterior capitis inseritur. — Raro in parte media superiore sutura sagittalis continuatur. *)

Superficies huius partis interna praeter quaedam vasorum vestigia in medio fere *protuberantiam occipitalem internam* exhibet, ad quam sulcus ossium bregmatis, sive vestigium sinus falciformis superioris sensim sensimque aucta latitudine continuatur, posteaque divisus et arcuatus utrimque ad foramina venarum iugularium usque decurrit; dextra pars plerumque elatior est, et sat validam continuationem sulci istius sistit, sinistra vero pars exilior. Denique de *protuberantia* ad perpendicularum descendit acutissima nonnumquam, raro duplex linea, *spina* sive *crista occipitalis* interna, cui falx minor durae cerebri membranae adnectitur. *Protuberantia* igitur in medio linearum cruciatarum posita est. Fossae cerebrales supra lineam

*) ALBINUS de ossibus, p. 131.

transversam sitae ectypa lobi cerebri posterioris, sive iuga cerebralia exhibent. Nonnumquam, maxime vero ad dextram sulcus sat magnus iuxta spinam internam descendit, et vestigium sinus occipitalis posterioris, marginem foraminis occipitalis legens, et ad fossam venae iugularis usque protensum sistit; nonnumquam etiam foramen occipitale vestigio sinus circularis circumcluditur. In fossis infra lineam transversam lobi cerebelli, falce minore ab invicem separati, positi sunt.

§. CXIII.

2) Partes *condyloideas* posteriora versus pars occipitalis, priora versus pars basilaris ab invicem separat. Quaevis lateralis pars in externa superficie *condylo* eminet, quem, praeter priorem condyli partem, quantum ad maximam partem constituit. *Condyli*, atlanti iungendi priora versus mutuo sibi adpropinquantur, plerumque leviter gibbi, saepius plani fere, maiore longitudine, quam latitudine, media in parte latissimi, priori extremo vel contracto, posteriori lato vel utroque contractioni, nonnumquam serpentine quasi. Semper vero margo externus elatior est interno; nonnumquam alter vel uterque quasi in duas partes dividitur. Marginem externum asper sulcus legit, cui membrana capsularis, internum vero *protuberantia*, cui ligamentum laterale epistrophei adhaeret. — Post se *foveolas* pinguedine repletas habent, et *canales condyloideos posteriores*, quos venae, quae e nucha oriuntur, et in sinus durae cerebri membranae

sanguinem effundunt, permeant. — Iuxta vero eminentia aspera, proxime processum ossis temporum styloideum, musculum rectum lateralem excipiens, posita est.

Interna in superficie utraque pars condyloidea, ut foramen venae iugularis formetur, quae maximam sanguinis partem de capite deducit, partim cava est, partim prominens et inaequalis, ibique processus spinosus, sive iugularis, adest, cuius ope parti posteriori pyramidis ossis temporum iungitur, pone quem finis sulci pro recipiendo sinu laterali sistus est, de quo sulco tuber surgit, cui canalis nervi lingualis medii subiicitur.

§. CXV.

5) *Pars prior sive basilaris*, conum asperum sistit, *externe* condylum absolvit, et cum corpore partis sphenoidalis coalescit, inque media sui parte, cui pharynx illigatur, *tuber* maius, sive spinam basilem, utrinque vero *tuber* acutius habet, cui M. rectus internus maior, et minor adnectuntur; haec pars et condylus sulcum laevem includunt, qui ligamentum capsulare recipit.

Superficies *interna* leniter cava est, et quo loco pars basilaris pyramidi ossis temporum iungitur, sulcus sinus petrosi inferioris mox dextro, mox sinistro in latere magis patet.

§. CXVI.

Substantia partis occipitalis non ubique eadem est crassitudine, maxima, quo loco *externe*, et

interne tubera posita sunt, minima, quo loco cerebelli lobos tegit.

§. CXVII.

In parte occipitali observantur: a) *Foramen occipitale magnum*, ut plurimum ovatum, diametro coniugato longiori, transverso breviori, e quatuor arcuatis marginibus quatuor partium, occiput constituentium, compositum, raro magis orbiculatum, quam ovatum. Praeter medullam spinalem, vagina e dura cerebri membrana oriunda vestitam, aliquot venas et arterias spinales, nervum adcessorium, et arterias vertebrales excipit. — b) *Foramen amplum vagae* magnitudinis et formae, a parte condyloidea et pyramide ossis temporum formatum, foramen iugulare sive lacerum, quod vena iugularis interna, nervus glossopharyngeus, nervus vagus et adcessorius transgrediuntur. Nonnumquam lamina ossea nervum glossopharyngeum a reliquis separat. Nonnumquam in priore foraminis parte propria lunata incisura est pro nervo vago. — c) *Condylis superiora foramina nervi lingualis medii*, ab interioribus ad exteriora oblique vergentia, *foramina condyloidea anteriora*, plerumque simplicia, non raro autem, vel ad dimidium, vel ad totum divisa, quin etiam distincte duplicia, quae praeter nervum arteria duram cerebri membranam ingressura, percurrit. — d) *Pone condylos priora versus oblique tendentia foramina venarum*, ab externis partibus venientium, et in sinus durae cerebri mem-

branae sanguinem effundentium; *foramina condyloidea posteriora*, quae non raro vel in uno latere vel in utroque desunt. — e) Foramina omnium maxime vaga, posita, quo loco pars occipitalis et processus mastoideus ossis temporum inter se coniunguntur; *foramina mastoidea*, quae vel sola parte occipitali, vel socio processu mastoideo ossis temporum, vel solo osse temporum constituuntur, nonnumquam vero plane desunt. Interdum vero iuxta spinam occipitalem externam uno, vel duobus foraminulis, pro excipiendis vasis, sanguinem vehentibus, os perforatur.

§. CXVIII.

Parti occipitali inseruntur muscoli, quos iam iam exposui, M. occipitalis, M. sterno et cleido mastoideus, M. cucullaris, M. splenius colli, M. biventer cervicis, M. rectus capitis posterior maior, et minor, M. rectus capitis lateralis, M. obliquus superior et pharynx.

§. CXVIII.

Pars prior sive *sphenoidalis* ossis sphenoccipitalis a) in *basin* sive *corpus*, et ab utroque latere b) in *alam superiorem*, c) *mediam*, d) *inferiorem*, dividi potest.

§. CXX.

Basis, sive continuatio partis basilaris occipitis crassissima est, et os ethmoideum tangit. Priora et inferiora versus *laminam acutam*, sive *rostrum* emittit, quod interdum e iunctis cornibus *sphenoidalibus* oritur, marginemque superiorem laminae

perpendiculari ossis ethmoidei iungit, inferiorem vero laminis vomeris interponit, eoque modo ad formandum septum narium confert. Rostro cornu posterius ossis palatini iungitur.

Superior superficies instructa est fovea orbitali, hypophysin, sive glandulam cerebri pituitariam excipiente, *sella*, ut vulgo audit, a fronte *tuberculo*, a tergo autem pariete sive *lamina perpendiculari* cincta, ab utroque vero latere aperta. Utroque in laminae angulo unus vel duo, plus minusve acuti apices inveniuntur, qui, ut anguli alarum superiorum, vel apices priores, sive processus clinoidei anteriores directe oppositi, laminaeque ope nonnumquam cum illis iuncti, distinguantur, *processus clinoidei posteriores* audiunt. Nonnumquam *mediis* apicibus *conoideis*, sive *processibus clinoideis mediis*, sive *pyramidalibus* iunguntur, ut annulo arteriam carotidem cingant. Nonnumquam haec paries laminam quasi reflexam, sive *clivum* effingit.

Lateralis sellae superficies incisuram semilunarem habet, sive sulcus arteriae carotidis cerebri lente adscendit, subito tandem reflectitur, et incisuram lunatam in angulo posteriori alae superioris constituit. Nonnumquam angulus, donec sellam tangat, reflexus, foramen format. — Hoc loco dura cerebri membrana, quam diu os ea obtenditur, sinum cavernosum format.

Nonnumquam ligula, foramen rotundum inter et ovale nata, externum carotidis cerebri

latus, tensura quasi ad aperturam priorem canalis carotiei in pyramide, cingit. Nonnumquam vero huius loco liberum, durae cerebri membranae adnexus ossiculum reperitur.

Priora versus tuberculum sellae, divisum nonnumquam medio tuberculo in partem dextram et sinistram, vel in planum desinit, vel antea sulcum transversum format; nonnumquam autem margo foraminis optici posterior acutus lineam obliquam acutam, tuberculo superiorem, constituit.

Tuberculo, quod ut plurimum in superficie superiore sulco transverso instructum est, nervi optici se invicem decussantes incumbunt; sulcus vero sensim sensimque ad latera et prorsum versus curvatus, prono aliquantum itinere in foramina optica abit, quae in radice alae superioris, e basi oriunda, inveniuntur. Initio, sive a tergo foramina ab utroque, praesertim vero ab interno latere angulosa videntur, donec procedendo orbiculata evadunt.

In basi duo sinus, dexter et sinister, sive *sinus sphenoides*, observantur, lamina tenui et perpendiculari ab invicem separati, vagae magnitudinis et formae in sinuum frontaliū morem, sive dexter, sive sinister amplior, iam ambo loculosi, iam ad alas usque maiores adscendentes, iam vero versa vice ad foramen usque magnum occipitis descendentes. Foramen orbiculatum habent, in meatum narium superiorem hians, clauso

interdum altero foramine. In iunioribus, quandoque etiam in adultis, sinus vice cellulae medullares funguntur. Nonnumquam sinus infra, non nisi cornibus sphenoidalibus, clauditur *). Raro sinum inter et cavitatem cranii commercium ope foraminis in sella intercedit **). Nonnumquam ad latus sellae foramen sat amplum invenitur, quod in canalem oblique priora et inferiora versus vergentem, et in superiorem fossae pterygoideae partem hiantem, ducit.

§. CXXI.

Ala superior sive *minor* latissimo principio e basi orta, ad latera modice adscendit, donec in acutum apicem desinat. Margo eius prior acutus sutura non nihil dentata ossi frontis et ossi ethmoideo iungitur. — Margo vero posterior, solutus, arcuatus, acutus, fines lobum cerebri priorem inter et posteriorem constituens, et formationem superficiei superioris orbitae non nihil adiuvens, tuberculum crassiusculum, nonnumquam hamatum, sive processum clinoideum anteriorem retro emittit. — Superficies eius superior plerumque, quod restat vestigiorum lobi cerebri prioris, offert, superficies vero inferior laevis est.

§. CXXII.

Ala media, superiore multo maior, sive processus lateralis anterior, sive ala maior e basi, deorsum versus magis magisque latescente proten-

*) BOEHMER Instit. osteolog. Tab. III. Fig. V. VI. VII.

**) HALLER Icon. Fasc. III. Tab. narium intern. not XI.

la, lacunam media ossa bregmatis inter, ossa temporum et os frontis explet. Fissura orbitalis superior, lunata, sursum versus gibba, initio lata, tandem vero acuta hunc processum ab ala, sive processu superiori ope marginis obliqui separat. Priora versus vel ad latera ulterius processu sive ala superiore procedit, ut ossi frontis ope superficiei latae, dentatae, trigonae, priora et inferiora versus ossi zygomatico, posteriora versus ossi bregmatis ope marginis parvi, lunati, partem vero ossis temporum squamosae ope maioris marginis lunati, pyramidi ossis temporum ope spinae angularis, sive *apophyseos spinosae*, et harmoniae, membrana cartilaginosa expletae, iungatur. Apophysi spinosae pars musculi circumflexi palati illiatur. Uterque margo lunatus serpentinus est, ut supra os bregmatis exteriora versus minorem tectat, inferiora versus vero ab eodem tegatur, eodem modo, quo maiorem os temporum supra tectat, infra vero ab eodem tegitur.

Interna superficies alae maioris sinuata est, et vestigia arteriae durae cerebri membranae mediae et gyrorum cerebri ipsi incumbentis exhibet. Externam superficiem lenius sinuatam linea transversa aspera, vel tuber in partem superiorem maiorem, cui musculus temporalis inseritur, et in partem inferiorem, cui initium musculi pterygoidei externi adnectitur, dividit. Prior illius pars vis, minus exacte rhomboidea, sursum versus arcuata, partem maiorem superficiei

externae et posterioris orbitae constituit. Margo superior ossi frontis, externus vero ossi zygomatico iungitur, inferiori et posteriori solutis, et angulum convolutum constituentibus, qui foramen rotundum, secundum ramum quinti nervorum paris excipiens, sub se habet. Superior margo cum ala maiore *fissuram sphenosphenoidalem* sive *orbitalem superiorem*, inferior cum osse maxillari *fissuram sphenomaxillarem*; sive *orbitalem inferiorem* constituit. Pars pyramidi adiacens, sulcum, sive vestigium *tubae acusticae* offert.

§. CXXIII.

Ala inferior, sive *processus pterygoideus* e basi et ala maiore oriunda ad perpendicularum fere, et parumper tantum ad latus maxillam superiorem et ossa palatina versus descendit. Utriusque descendentis superficies posterior sensim sensimque tantum pro excipiendo musculo pterygoideo interno cavatur (*fossa pterygoidea*), ut tandem *fissura* satis magna, sive *fissura pterygo palatina* in internam, contractionem, verum crassiorem *laminam nasalem*, et in latiore, sed tenuiorem *laminam muscularem* alam dividat, quas inter pars externa ossis palatini adacta quasi per suturam serratam externe, per harmoniam vero internae laminae iungitur. — Haec fossa, posteriora et externa respiciens, discedente usque lamina externa ab interna, sensim latior evadit. — Superficies prior, serrata, apice deorsum versus spectans, formationem fossae ipsam inter, os palatinum et

maxillam superiorem positae, sive fossae pterygo-palatinae adiuvat.

Lamina externa extrinsecus aliquantum sinuata et aspera pro recipiendo musculo pterygoideo externo posteriora versus in scindentem plus minusve acutum marginem abit.

Lamina interna magis ad perpendiculum descendens, contractior, superficie, quae fossam pterygoideam respicit, aspera, ea vero, quae aperturam posteriorem narium construit, et ossi palatino iungitur, laeviore, in obliquum, posteriora et externa versus curvatum, leniter capitulatum, descendente, et tendini muscoli circumflexi palati iunctum hamulum desinit.

Superior initio huius laminae sulcus, cui pars muscoli circumflexi palati interna adnectitur, in sulcum tubae acusticae quasi abit.

Sursum versus in lamina interna *sulcus pterygo palatinus*, nervum palatinum superiorem et arteriam palatinam superiorem excipiens, propior vero basi apophysis vaginalis, e lamina interna incipiens, cornibusque sphenoidalibus iuncta, conspicuntur.

§. CXXIII.

Foramina observantur:

a) *Foramen opticum* in basi alae superioris, pro excipiendo nervo optico et arteria ophthalmica. Raro arteria ophthalmica primum foramen penetrat.

b) *Fissura orbitalis superior*, quam praeter vasa tertium, quartum, sextum par nervorum, et primus ramus quinti nervorum paris permeant.

c) *Fissura orbitalis inferior*, quam secundus ramus quinti paris penetrat.

d) *Foramen rotundum*, sive potius canalis brevis prorsum versus vergens, pro recipiendo secundo ramo quinti paris, quod ex origine alae maioris natum, et in basi orbitae positum, in fissuram orbitalem inferiorem quasi transit.

e) *Foramen ovale* multo maius, raro orbiculatum vel duplex, in extremo posteriori et inferiori alae maioris situm, et oblique non nihil externa versus tendens, quod tertium ramum quinti nervorum paris excipit. Hoc inter et rotundum foramen nonnumquam sulcus parum profundus, sive sulcus nervi maxillaris superioris conspicitur.

f) *Vaga arteriarum foramina*, in dextro et sinistro huius foraminis latere. — Infra nonnumquam fovea, quam pars musculi circumflexi palati replet.

g) Retro foramen ovale foramen spinosum, quod truncus arteriae mediae durae cerebri membranae cum vena transgreditur. Nonnumquam sulcus est iuncta pyramide in foramen demum mutatus. Nonnumquam foramen venae a foramine arteriae *) separatum est.

h) Radice alae inferioris superior, et interna versus positus *canalis conoides*, *pterygoideus*

*) HALLER Icon. Tab. Basis Cranii. c. not. XXII.

quem nervus recurrens secundi rami quinti nervorum paris permeat. Orificium canalis anterioris, soluto osse maius est, et valde conspicuum, posterius vero minus et occultius. Orificium anterioris, non dissuta calvaria, in fossa pterygo palatina ad latus basis calvariae, quo loco cornu ossis palatini posterius basi iungitur, positum est. Examinanti basin non dissutae calvariae, posterius orificium, apice superiori, laminae nasalis alae inferioris, qui e diametro apici inferiori pyramidis opponitur, tectum, vel ad priora in initio lacunae spinosae orificii anterioris canalis carotici quasi absconditum offertur.

i) Raro foramen in superficie orbitali, vel supra eam, *) quod ramus arteriae et venae meningae mediae permeat, ut in orbitam perveniat, plerumque enim haec arteria traiecta fissura orbitali superiore in orbitam pervenit.

§. CXXV.

Locis notatis parti sphenoidali inseruntur: M. pterygoideus externus et internus, M. temporalis, M. circumflexus palati.

Infantum os sphenodeum ad angulum lambdoideum fissum, novem partes constituunt.

*) ALBINUS, Tab. I. X. Tab. V. Fig. VII. U.

O S S A T E M P O R U M.

Nexa reliquis ossibus sistunt ALBINI Tab. Oss. I. II. III. soluta Tab. VI.

Infantis Et. Icones Oss. foetus Tab. III.

§. CXXVI.

Ossa temporum inferiorem, mediam et lateralem calvariae partem constituunt, et organa auditus continent.

Utrumque os temporum I. partim sutura, partim harmonia, partim vero substantia semiligamentosa et semicartilaginosa interiecta a parte occipitali et sphenoidali ossis sphenobasilaris, II. III. sutura squamosa ab ossibus bregmatis, IIII. sutura dentata a processu ossis iugalis temporali separant. — Recens ligamenta maxillae inferiori iungunt.

§. CXXVII.

Apte in partem *squamosam* et in *pyramidem* in fetu ab invicem separatas dividitur.

§. CXXVIII.

a) *Superficie* externa pars postica aspera est, et inaequalis, et inferiora versus in contum, sive processum mastoideum, modo teretem, modo curvum, modo acuminatiorem, modo obtusiolem, modo gibbiorem, modo planiorem, modo magis lamellatum, modo magis squamosum, modo crassiore, modo tenuiore testa formatum, cui M. sterno et cleido mastoideus adnectitur, desinit. Interiora processus mastoidei cava et cavernosa, cavitati tympani continuo nexu iunguntur. Cellulae modo minores sunt et plures vel den-

siores, modo maiores et pauciores vel rariores. *)
 Interna processus superficies incisuram profundam, mastoideam dictam, pro excipiendo ventre posteriori muscoli biventrici maxillae et ulterius interiora et posteriora versus incisuram minus profundam pro excipiendo musculo trachelo mastoideo offert. b) Quo facto, et formata fovea plana et linea transversa, vel termino posteriori muscoli temporalis, superficies externa sursum versus in *partem squamosam* transit, superficie externa leniter quidem gibbam, satis vero asperam et inaequalem ob adnexum musculum temporalem, nonnumquam etiam vestigia quaedam arteriae temporalis profundae exhibentem, donec tandem sensim sensimque deorsum et prorsum versus c) processus zygomaticus promineat, lato initio oriundus, mox tortus, ut superficies eius ab initio transversa sensim ad perpendicularum erigatur. Pars inferior basis processus zygomatici ad posteriora cavitationem oblongam, sive *cavitationem articulare* exhibet, fissura a meatu auditorio separatam, ad priora vero cum tubere transverso, *tubere articulare*, sub quo condylus maxillae inferioris ope cartilaginis intermediae movetur, coniunctam. Ad externa tuber nonnihil latius est, quam ad interna, extremum enim externum condyli maxillae inferioris, parti tuberis externae respondens, maiori circulo, quam internum, movetur. Fissuram praeter vasa, chor-

*) ARNEMANN über die Durchbohrung des processus mastoideus. Götting. 1792.

da tympani, tendo muscoli externi mallei permeant. — Processus zygomaticus socio processui ossis zygomatici obviam veniente, sibi que ope suturae dentatae iuncto, arcum effingit, cuius margo inferior brevior incisuram, deinde vero, quo loco ossi zygomatico iungitur, tuber effingit, locus vero, quo margines eorum superiores longiores, non nihil asperi et acutiores mutuo sibi iunguntur, laevissimus est. Ceterum superficies externa asperior est interna.

§. CXXVIII.

Interna ossis temporum *superficies* in parte squamosa marginem, ad externa ala ossis sphenobasilaris tectum, deinde limbo lato os bregmatis tegentem, et sat conspicua iuga cerebralia et vestigia arteriae mediae cerebri durae membranae exhibet. — Plana ossis temporum loca valde tenui sunt substantia.

Integrum partis squamosae ambitum interne subtilis, ad effetam vero usque aetatem conspicua *fissura*, habitum suturae squamasae fere referens, a pyramide separat.

§. CXXX.

Pyramis trigona, apice priora et interiora versus os sphenobasilare tangens, angulis, *superiori*, *interno* et *externo* in superficiem *anterior*em, *posterior*em et *inferior*em descripta, superficies, *anterior*em et *posterior*em, angulo superiori faciles ab invicem distinctu, in calvariae cavo sitas habet.

§. CXXXI.

Offert autem margo *superficie anterioris* in acutum vel tenue desinentis, praeter ea, quae ad formandum sulcum addit, quem sinus venosus durae membranae cerebri per os sphenobasilare descendens, occupat, a) *aperturam superiorem* canalis carotici, os sinuantem, et deficiente ligula ossis sphenobasilaris, undique solutum orbiculatum ossiculum exhibentem (§. CXX.) b) *mediam* vero et inferiorem partem versus, partem squamosam et pyramidem inter, partem tubae acusticae osseam, et involucrum muscoli tensoris mallei; c) *interiora* magis et superiora versus superiorem aperturae canalis carotici sulcum, simplicem vel duplicem, foramen tandem tangentem, quod praeter vasa quaedam minora, nervus petrosus superficialis primi rami quinti nervorum paris, nervo faciali iungendus, transit; d) *Eminentiam*, indicem latentis canalis semicircularis superioris labyrinthi. — Ceterum vero superficies anterior iuga cerebralia habet, angulus vero superior *vestigia sinus petrosi superioris* voluto interdum itinere posteriora tangentis, itidem a tergo vestigium sinus petrosi posterioris, a fronte vestigium sinus petrosi anterioris, et magis priora versus incisuram lunatam, pro excipiendo quinto pare nervorum.

§. CXXXII.

Superficies posterior pyramidis exhibet I. *Canalem* nervi facialis et acustici, oblique ad exteriora et posteriora vergentem, spinaque falciformi

in duas partes divisum; cuius partem inferiorem maiorem nervus acusticus ingreditur, partem vero superiorem minorem nervus facialis, inflexo itinere postmodum proprium canalem traiciens, donec foramine stilo mastoideo exeat: II. posteriora versus foveam, quam sinus lateralis durae cerebri membranae et cerebellum occupant.

Plerumque, vel in senectute effeta, mox supra hunc canalem sulcum sinus petrosi superioris versus, fissura vel exiguum foramen, index foraminis caeci conspicitur, quod aetate infantili dura cerebri membrana subter arcum canalis semicircularis superioris ingressa est. — Itidemque observatur tuber in adultis vix conspicuum, canalem semicircularem labyrinthi inferiorem indicans, et quo loco cum superiori iungitur, paullo infra, vel quantum ad canalem nervi facialis et acustici spectat, paullo ad posteriora apertura aquaeductus vestibuli, conoides complanatus parumper *) canalis, ossibus cranii non solutis, quod lamina ossea tegitur, minus, quam solutis ossibus, conspicuus, de quo sulcus ad foramen iugulare progreditur **). Tandem haec pyramidis superficies in magnam fossam, sigmoideam dictam, finem vestigii sinus lateralis durae cerebri membranae exit, et in, vel prope hanc fossam apertura canalium mastoideorum interna hiat. — Fossa priora ver-

*) CORVINI de aquaeductibus auris Tab. I. — MECKEL Diss. de labyrinthi auris contentis. Arg. 1777. fig. III. V.

**) In unica tantum calvaria hunc sulcum non invenio.

sus in arcuatum marginem, cuius limites interiores et inferiores incisura iugularis sistit, quique nonnumquam ad priora peculiarem exiguam incisuram, vel etiam foramen, sua sponte, vel adcedente parte ossis sphenobasilaris occipitali, totum fere clausum pro nervo vago sistit, abire solet.

§. CXXXIII.

Tertia vel *inferior pyramidis* superficies lamina osseam prodit, quae sursum versus convoluta syringam quasi format, e qua *meatus auditorius externus* oritur, et deorsum versus in marginem vel longiorem, vel breviorē, vel acutiorē, vel obtusiorē abit, pone quem e fovea, quae vaginam quasi margine interdum valde spinoso sistit, *stilus* sive *processus stiliformis* interiora et inferiora versus nunc brevior, nunc pollice longior, nunc procerior, nunc curvator, nunc plus, nunc minus tortus vel nodosus, nunc acutior, nunc obtusior, quin uno vel duobus ligamentis, vel et cartilagine interruptus, oritur. — Nonnumquam etiam in processu mastoideo, aut saepius marginem eius inter et partem ossis sphenobasilaris occipitalem, foramen maius, vel duo, quin tres, ratione formae, magnitudinis et numeri vagi, breves canales, mastoidei dicti, sanguinem externarum capitis partium in sinum durae cerebri membranae lateralem effundentes, quod directio, diameterque interna versus auctus docet, conspiciuntur. Dubio procul more aliorum

istiusmodi foraminum et canalium calvariae vasa etiam absorbentia emittunt. Processum mastoideum inter et stiliformem, sed huic propius *orificium canalis nervi facialis*, sive *foramen stilomastoideum* est, ante vero et iuxta processum stiloideum *fossa* bulbi venae iugularis, nervi glossopharyngei, nervi vagi, et nervi adcessorii, mox amplior et profundior, mox contractior et planior ponitur, incisura marginis, ultimam venae iugularis partem excipiente, desuper mox profundiore, mox planiore, et lamella ossea nonnumquam eo modo divisa, ut nervus vagus a reliquis partibus separetur. — Huic fossae *aditus canalis arteriae carotidis* et nervi sympathici, ope ligulae tantum a fossa separatus, proxime adiacet. — Fossae vero iugulari et canali carotico *apertura conoides* sic dicti *aquaeductus cochleae*, e qua sulcus ad foramen iugulare pergit, interponitur.

§. CXXXIII.

Substantia, examinato labyrintho, pyramide tecto, exactius describetur.

ORGANA AUDITUS OSSEA.

CASSEBOHM *Tractatus sex de Aure humana.* Halae 1735. —
 ALBINI *Annotat. acad! Lib. III.* — COTUNNI *de Aquae-*
ductibus auris humanae. Neapoli 1760. Recusum opus in
 SANDIFORT *Theaur. Dissert. Tom. I.* SANTORINI *Tab.*
posthuma quinta. Egregia MECKELII *Diss. de Labyrinthi*
auris contentis. Argent. 1777. — SCARPA *de fenestra ro-*
tunda. Mutinae 1772. *Et. Disquis. anatom. de auditu et*
olfactu. Ticini 1789. Opera perfectissima.

§. CXXXV.

Organum auditus I. *Parte externa*, cuius fines
 annulus tympani constituit, sive *meatu auditorio*,
 II. *Parte media*, sive *cavitate tympani*, III. *Parte*
interna, sive *labyrintho* constat.

Meatus auditorius.

§. CXXXVI.

Meatus auditorii, cuius externus ambitus
 convolutam ab imo admotam, valde asperam,
 retro crassam squamam sistit, oblique ab externis
 ad interna et parumper ad priora tendentis, in-
 terna versus aliquantum contracti, ratione orificiū
 oblongi ab externis interna versus complanati,
 sive diametro maiori oblique ad ima et postica
 directi terminos annulus oblique a superioribus
 ad inferiora, a posterioribus ad priora directus,
 membranam tympani in *sulcum*, supra haud mul-
 tum conspicuum excipiens; constituit.

In embryone *annulus* ovatus est, supra plus
 minusve hians, ambitu externo et interno den-
 tato, sulcoque, in quo membrana tympani exten-
 ditur, interne conspicuo. — Pars eius posterior

tenuior est et acutior priore parte, quae superne processum mallei spinosum sulco excipit. Sensim vero sensimque planus annulus, praesertim deorsum versus latescit, eiusque extrema superiora iamiam ante partum cum osse temporum coeunt. Progrediente aetate, priori, magis vero posteriori parti, sive cruri, massa ossea ab imo adponitur, donec mutuo sibi obviamvenientia crura sese attingant, et meatum quasi perforatum effingant, qui circa duodecimum annum in integrum clausus, pubertatis tempore absolvitur; quare annulus membranae tympani, nudus in calvaria embryonis, semper magis latescit, donec tandem in meatum auditorium vertatur.

Cavitas tympani.

Omne, quod pone tympanum in annulo extensum ponitur, *cavitas tympani* sive *tympanum* audit.

Hac in cavitate tympani irregulari, aspera, inaequali, hinc inde cellulari, in embryone aliquantum contracta, procedentibus vero annis ampliore, adulta aetate tandem adpositis cellulis processus mastoidei aucta, praeter tria auditus ossicula, sequentes partes positae sunt.

Fenestra ovalis, cui basis stapedis adnectitur, margine superiori elliptico, inferiori vero nonnihil ad directionem marginis superioris curvato, in medio fere tympani cavo posita est, fovea parum profunda eam excipiente.

Infra hanc fenestram *promontorium* eminet, index initii cochleae, infra quod *fenestra rotunda*, angulum cum membranae tympani directione in adultis effingens, sistitur.

Priora versus *sulcus osseae tubae acusticae* partem constituens.

Supra vero et iuxta hunc *alius sulcus*, cochlearis nonnumquam formae, et tensorem membranae tympani excipiens, conspicitur.

Pone fenestram ovalem, sed paullo magis externa versus finis *fistulae*, sive eminentiae *pyramidalis* prominet, in qua velut in vagina musculus stapedis ponitur, quae aperta forinam huius musculi spiralem offert, et canali nervi facialis iungitur; ulterius externa versus orificium canalis, canum nervi facialis ad ramum quinti paris lingualem, sive chordam tympani excipientis adest, supra quem canalem eminentia, index canalis *semicircularis* externi, posita est.

Hanc eminentiam pyramidalem, *promontorium* inter et fenestram ovalem sinus sat profundus adparet.

L a b y r i n t h u s.

§. CXXXVIII.

Labyrinthus, sive pyramidis cavitas, in embryone sex, septem, octo mensium, peculiari omnibus locis aequae crassa, subtili, fragili, intere et, quum in tempore, v. g. sexto mense examinatur, externe etiam laevi testâ constat. quae peculiari, spongiosa, fragili, in reliquam, crassio-

rem et tenaciorem massam pyramidis osseam desinente substantia circumcluditur. Hoc tempore labyrinthus integerrimus facile ob oculos poni potest, quod vero postea, reliquis partibus testa isto modo confusa, ut ne vestigium quidem olim separatae supersit, fieri nequit.

Vestibulum sive pars media, *cochlea*, sive pars prior, *canales semicirculares*, sive pars posterior, labyrinthum constituunt.

§. CXXXVIII.

Vestibulum, ad quod fenestra ovalis ducit, ellipticae prope figurae cavitas est, in qua duae foveolae conspiciuntur, altera *inferior et posterior hemisphaerica* *) altera vero *superior et externa semielliptica* **), quae orificium versus aquaeductus vestibuli evanescit.—Foveam *hemisphaericam* a *semielliptica* spina acuta separat, *pyramidem* tandem constituens, cuius apex in tubulatos denticulos abit. ***)

Hae foveolae sacculos membranaceos simul cum pulposa nervi acustici substantia excipiunt.

E vestibulo via est ad aperturas trium canalium semicircularium. quarum quinque, minime vero sex existunt, (iunctis quippe inter se canali superiori et posteriori) ad scalam superiorem cochleae, et ad aquaeductum vestibuli.

*) SCARPA Disq. Tab. VI. Fig. I. II. l. Fig. III. et IIII. a.

**) ID. l. c. Tab. VI. Fig. I. II. k. Fig. III. et IIII. d.

***) IB. Fig. I. II. i. Fig. III. IIII. c.

§. CXXXX.

Cochlea axi inferiora respicit et exteriora, et e dimidio cum duobus gyris constat; — dextra cochlea ad dextram, sinistra vero ad sinistram circum modiolum acta est, non vero statim ad originem, antea enim, quam modiolum cochleae amplectuntur, recta tendunt. Primum dimidium secundi gyri multo contractius est altero dimidio; et apex modioli iam iam circa secundum gyrum, verum tamen non in apicem sed in iugum desinit. *)

§. CXXXXI.

Lamina spiralis ossea cochleam in duos metus vel duas *scalas* dividit, in superiorem angustior, *scalam vestibuli*, in inferiorem ampliore *scalam tympani*. Ossea laminae spiralis pars totam cochleae altitudinem non metitur, sed rostri ad modum paullo infra dimidium secundi gyri desinit; **) in superiore igitur regione cavum infundibuliforme, apice modiolum, basi vero cochleae verticem respiciens, adest. ***) Ceterum vero laminam spiralem duo plana ossea, alterum *scalam vestibuli* spectans, hinc inde sulcatum, alterum vero laevius, constituunt. Nonnumquam lamina spiralis deorsum versus soluta non nisi mediam partem modiolo adnexam habet.

§. CXXXXII.

Aditus ad *scalam tympani* audit *fenestra ro-*

*) SCARPA l. c. Tab. VIII. Fig. 4. g g h.

**) Id. l. c. Tab. VIII. Fig. 4. i.

***) Id. l. c. Tab. VIII. Fig. 4. h. i.

tunda, sive *rotundo - triangularis*, membranula tenui, vel *tympano secundario* in recentibus cada-veribus clausa. Exactius e cavitatis tympani regione lustrata, brevi, trigono, tereti canali similior fenestra videtur, quam foramini. Apertura eius externa amplior est, quam interna, quae sulco pro recipiendo tympano secundario instructa est, quod a lamina spirali, eodem modo, quo tympanum a malleo interna versus tenditur, ut inde eorum referat.

§. CXXXIII.

Nonnumquam apex trianguli aperturae externae huius fenestrae non superiorem, sed lateralem partem respicit, itemque apertura interna trigona est, externae vero non parallela. Medias inter, sulcus e basi, quem utraque communem habet, oriundus, ad internam regionem contractus tendens, integrum marginis aperturae internae orbem cingens, et quo loco laminae spiralis origo est, interna apice hamato petens, observatur. — Haec in adulto triangularis fenestra in infante orbiculata est. — Pro aetatis ratione situs eius mutatur. In fetu trimestri parallela fere est tympano in quadrimestri, cuius cochlea iam iam in os mutata est, magis priora versus prope tympanum sita est, et ad posteriora vergere incipit. Sensim vero sensimque ad nonum usque mensem a tympano, trium linearum spatio, abscedit, praesertim propter processum mastoidei augmentum; quumque crescente corpore, tympanum magis magisque inclinatur, haec

haec fenestra pedetentim directo ei opponitur. — Progrediente vero aetate materies ossea huius fenestrae augetur, ut tandem canalem musculi stapedis respiciat, eaque de causa ad perpendiculum fere tympani situi adcommo- detur. In grandaevs contrahitur, et magis ad posteriora tendit. *)

§. CXXXXIII.

Cochleae basis externae sulcum spiralem, foraminulis pertusum, pedetentim decrescentem constituit **), quae foraminula eo subtiliora fiunt, quo propius ab huius sulci apice absunt, in apice vero simplex, maiusculum foramen, per quod iter est ad canalem cylindricum, in cochleae axi situm, adest. Hinc inde foveolae, pluribus foraminulis pertusae, vel orificia canalium, nervum auditorium ad laminam spiralem ducentium, conspiciuntur.

§. CXXXXV.

Alterum uniuscuiusque canalis semicircularis sive arcuati extremum, alterum amplitudine multum superat, neque figuram cylindricam, sed compressam, sive sectione verticali ad axin facta, ellipticam, dum pergit, repraesentat.

§. CXXXXVI.

Nimirum originem canalis semicircularis sive arcuati superioris sat ampla, elliptica ampulla, fo-

*) CORONNI §. LXXII. hanc fenestram totam quantum clausam, verum ossicula, praesertim stapedem, duplo maiora invenit.

**) Tractus spiralis foraminulentus. SCARPA. Tab. VII. Fig. 2. p. q.

ramine ovali superior, sistit *), inde canalis contractior, paullulumque volutus, in altero extremo canali inferiori iungitur. Longior est externo, cruraque eius oblique sita deorsum versus tendunt.

Iuxta et infra hunc canalem e simili, verum minus retusa ampulla *canalis exterior* oritur, ac infra foramen ovale desinit, ad superiorem canalem fere in planum porrigitur, utroque extremo angulum rectum constituyente; brevissimus idem est, sed amplissimus **). Tenuius extremum extremis canalis inferioris interponitur.

Canalis posterior, sive inferior ***) ex ampulla plurimum retusa, elliptica, infra fenestram cochleae rotundam oritur, ope alterius vel superioris extremi superiori canali iungitur, ratione longitudinis medius est, externum secatur, utpote ad perpendiculum fere positus.

§. CXXXXVII.

Canalem pyramidis recipiendis nervis destinatum spina falciformis in duo sulcos, in superiorem sulcum, pro recipiendo nervo faciali, in inferiorem sulcum, pro recipiendo nervo auditorio dividit.

§. CXXXXVIII.

Rami nervi auditorii canales ingredientis, in *maiore, minore, et mediae* amplitudinis foveolo,

*) SCARPA Tab. VI. Fig. II. d. a.

**) SCARPA Tab. V. Fig. II. e. c.

***) Ib. b.

quae aperturas sive ampullas canalium amplas, non vero contractas tangunt, ponuntur.

Minoris amplitudinis foveola, canali nervi facialis presse incumbens *), plura foraminula, ad canaliculos, ad pyramidem, ad superiorem et externum canalem semicircularem ducentia, exhibet.

Ab hac foveola nonnumquam *semicanalis*, non longe ab arcu fenestrae ovalis, cochleam respiciente, ortus, mediamque iunctarum superioris et inferioris canalis ampullarum partem tangens, et ex eodem, quo reliquus labyrinthus, tenui cortice semifistulae in modum constructus, abscedit **).

Una vel duae, mediae inter descriptas positae foveolae, vestibuli foveam rotundam haemisphaericam recta tangunt ***).

Maior ****) *fovea* maius foramen exhibet, quod nervus pervadit, ut ampullam *canalis posterioris* ellipticam intret *****).

§. CXXXXVIII.

Aquaeductus cochleae exiguo foramine *****) in scala vestibuli incipit, infundibuli in modum ampliatur, et cornu figuram fere refert, eiusque finis est, qui §. CXXXIII. describitur.

*) SCARPA Tab. VIII. Fig. I. h.

**) Quem canalem icone dignum, ego primus hic describo.

***) SCARPA Tab. VII. Fig. I. et II. n.

****) SCARPA Tab. VII. Fig. I. g.

*****) IBID. Tab. VI. Fig. II. r.

*****) МЕЧЕНОВ de Labyrinthi auris contentis. Fig. V. b.

Aquaeductus vestibuli *) infra communem canalis superioris et inferioris aperturam incipit, et, ut supra descriptum est, desinit.

§. CL.

Ossi temporum illigantur: musculus temporalis, m. masseter, m. sterno et cleido mastoideus, m. trachelomastoideus, m. splenius capitis, m. biventer maxillae, m. stylohyoideus, m. styloglossus, m. stylopharyngeus, m. constrictor pharyngis superior, m. tensor tympani, m. laxator tympani, m. externus mallei, m. stapedis, m. auriculam retrahentes.

Os temporum infantis magnopere ab osse temporum adulti differt; labyrinthi et ossiculorum auditus fabrica absoluta est; pars vero squamosa tota a pyramide seîuncta est, vices meatus auditorii annulus omni nexu solutus subit; — pars mastoidea exigua est; pyramis, tubera articularia, et foveae articulares confusa sunt; — Pyramis, minus perfecta, labyrinthum contentum clarius prôdit; canali superiori cavum, duram matrem excipiens, suppositum est, crescente vero corpore labyrinthus sensim magis occultatur.

*) *MECKEL de labyrinthi auris contentis. Fig. V. b.*

MALLEUS.

Nexum reliquis ossibus sistit *ALBINUS Icon. Oss. foetus. Tab. VI. vel Er. Annotat. acad. Libr. III. vel Tab. musculor. hominis Tab. XI. Fig. XVIII. XVIII.*

§. CL.

Malleus in *caput, collum, manubrium* et *processum* dividitur.

Caput prorsum versus globosum, externa versus vero inaequale, tum crenatum quasi, pone duas depressas superficies articulares marginibus repandis exhibet, quarum foveae superficies incudis excipiunt. Nexus reliquis ossiculis malleus supra tympanum ponitur.

Sub capite mallei contracto *collum* formatur.

Tunc denuo latior, sed planus, ab exterioribus ad interiora quasi compressus *manubrium*, sensim sensimque contractius, ad externa et priora leniter curvatum, laminis membranae tympani ita exceptum, ut margo eius tympano quasi innitatur, altera superficie ad priora, altera vero ad posteriora respiciente, ipsoque manubrio ultra dimidiam tympani partem demisso, exhibet.

Processus obtusus, summa in membranae tympani parte externa versus prominens, angulum obtusum repraesentat.

Processus spinosus, longus, tenuior, curvatus crena peculiari superficiei internae annuli exceptus prorsum versus tendit.

Supra processum obtusum ideoque in superficie externa, sat conspicuus, nonnumquam valde

profundus sulcus observatur, cuius ope margini annuli iungitur.

Processui spinoso illigatur m. mallei externus, processui obtuso m. tensor tympani, incisurae vero capitis m. laxator tympani.

I N C U S.

Nexam vide in *ALBINI Icon. oss. foetus Tab. VI. Er. Annot. academ. Lib. III. Tab. Muscul. XI.*

§. CLII.

Similis nonnihil denti molari, angulata, et pro excipiendo malleo excavata est, ideoque duas superficies articulares exhibet.

Crus anterius teretius, longius, sed contractius est posteriori, interna versus litterae S. in modum curvatum; e superficiei externae extremo semiglobosum aut ovatum, numquam vel rarissime penitus separatum capitulum ope colli tenuis eminet *), quod nexum incudem inter et stapedem sistit. Nexa reliquis ossiculis incus manubrii mallei directionem sequitur.

• *Crus posterius* brevius, verum crassius, cuneiforme, plano teres, directionem processus spinosi mallei sequitur, parte eius extrema superiore, eademque crassiore crus anterius super eminente.

Media inter crura incisura arcuata, parsque, quae utrumque crus iungit, et in externa et in interna parte aliquantum compressa conspicitur.

Nonnumquam exiguum ossiculum malleum inter et incudem observatur **).

*) Vel in infante recens nato hoc ossiculum cum incude coalitum invenitur. *CAMPER Verhandelingen te Haarlem 1767. Vol. VIIII. Part. II. p. 209.*

**) *САССЕВОН Tab. II. Fig. 6. g.*

STAPES.

ALBINUS, *ibidem*.

§. CLIII.

Minimum hocce totius corporis humani os, simillimum parti, cuius nomen habet, in *capitulum*, *crura* et *basin* dividitur.

Capitulum complanato globosum cavitate articulari capitulum incudis excipit, et nonnumquam prius, quam *crura* formantur, in collum abit, quod in posteriore parte leniter asperum ab insitione tendinis musculi stapedii redditur.

Ut plurimum *crurum* curvatorum crus anterie paullo brevius et contractius, interdum etiam paullo rectius posteriori conspicitur. Utrumque crus extrorsum gibbum, introrsum vero, ut membranulam recipiat, sulcatum, plerumque basin versus gracilius esse solet.

Inferior, seu margini basis recto respondens incisura crura inter maior est superiore, gibbo basis margini respondente.

Basis figura similis est figurae fenestrae ovalis, pars marginis superior elliptica est, inferior ut plurimum recta; ceterum vero eadem basis incisuram versus cava, margine repando crura amplectitur.

In planum fere in fenestra ovali, medius hanc inter et incudem porrectus, articulo iisdem iungitur.

Varietas.

Stapes, quum totus exiguus est, capitulum habet crassius, *collo fere deficiente*, crura vero crassiora et sulcatoria sunt, incisura interposita multo minore, margineque basis prominentiori. Nonnumquam in altero capitis latere tam exiguus est, ut ex uno, vel potius e duobus cruribus in unum conflatis constet. Fenestra ovalis hac in causa etiam minor esse solet,

O S E T H M O I D E U M.

sive *Os cribriforme.*Nexi reliquis ossibus icones dedit *ALBINUS* *Tabb. oss. I. III.**Id. V. soluti Tab. III. V. Egregiam iconem SCARPA An-*
*not. academ. Lib. II. Tab. 1. et 2.*Infantis. *ALBINUS* *Icon. oss. foetus Tab. II.*

§. CLIII.

Tenerrimum hoc capitis os in ossis frontis incisura ethmoidea in cranio situm formationem orbitae iuvat, et parte membranae organi olfactus superiore induitur.

Separatur I. Fissuris ab osse frontis in incisura ethmoidea, in orbitis et ad spinam nasalem; II. III. ab ossibus nasi; IIII. a parte ossis sphenobasilaris superiore in cavo cranii, et a rostro illius in cavitate narium; V. VI. ab ossibus maxillaribus in orbita et in cavitate narium, VII. VIII. ab ossibus palatinis in posteriore eiusdem cavitatis parte, VIIII. a vomere, X. XI. ab ossibus lacrimilibus, in orbita et in cavitate narium, XII. XIII. ab ossibus turbinatis inferioribus, interdum ossi ethmoideo iunctis.

§. CLV.

In partem *mediam* et in partes *laterales* dividi solet.

Media pars in summa cavi cerebri parte *cristam* exhibet, sursum versus margine iam acutiori, iam obtusiori, quin et dextrorsum vel sinistrorsum curvato, retrorsum sensim contractiori et depressiori, donec parte paullum robustiore, apophysinempe sphenoidali ossi sphenobasilari iungitur,

aeque eius parvae ad priora foveolis partis inferioris cristae ossis frontis internae excipiuntur, quibuscum nonnumquam canalem infundibiliformem, vulgo *foramen coecum* formant. Initium processus falciformis durae cerebri membranae cristae adnectitur. Plerumque substantia eius cellulis medullaribus instructa est, nonnumquam item cavo, sinibus frontalibus iuncto. Ab utroque etiam latere in cavo cerebri laminam oblongam foraminulis *) pertusam format, sive *cribrum* eclive, arcuatum, infra gibbum, ideoque osse frontis et osse sphenobasilari, quibus cingitur, depressius, incisura ossis frontis ethmoidea exceptum, quantum vero ad longitudinem, latitudinem, crassitudinem, positum et figuram valde mutabile, e quo partes laterales oriuntur, ut non magnum discrimen, soluto osse ethmoideo, amittuntur laminae cribrosae inter et partes laterales discernere liceat. Tandem vero *media pars*, tenuem, epius curvatam laminam in cavitatem narium inferioris superioribus nunc inferiorem, nunc superiorem, ad perpendicularum mittit, quae a priori laminae ossis frontis nasali, vel ipsis ossibus nasalis, spina ethmoidali ossium nasi sat prominente, infra vero margine crasso, quasi spongioso cartilagini nasali, septum narium formanti, innixa, una autem partim vomere excepta, partim rostro ossis sphenobasilaris adcumbens, superiorem septi narium partem format. Nonnumquam partibus

*) SCARPA Tab. I. Fig. II. a. a.

lateralibus pone iungitur, et cum iisdem cornua sphenoidalia format.

§. CLVI.

Plerumque haec *cornua* indissolubili nexu cum osse sphenobasilari iuncta, saepe vero et ossi sphenobasilari et ossi ethmoideo coalita sunt. Rarius vero omni nexu libera sunt ossicula sinum ossis sphenobasilaris infra claudentia. Rarissime vero solius ossis ethmoidei partes sunt, quod ab osse sphenobasilari divulgum sequuntur. *)

§. CLVII.

Partes laterales, labyrinthum vocant, in superiore et externa superficie cellulas, in interna vero a tergo consideratae duas demissas torsas *laminae*, sive *conchas* constituunt.

Cellulae superne, quantum ad numerum, positum, figuram, magnitudinem, aperturam differunt, propriis operculis osseis, inprimis vero osse frontis teguntur et occluduntur. Nonnumquam duae, quin et hinc inde tres cellularum series sibi invicem incumbere videntur. *Externa* in superficie partim peculiari lamina ossea internam orbitae superficiem constituyente, partim priora versus osse lacrimali, priore vero in superficie, qua plurimum hiant, partim osse frontis, partim osse lacrimali occluduntur, inde nexus eas inter et sinus frontales intercedit. *Posteriore* in superficie nonnumquam peculiari lamina ossea teguntur, numquam vero operculis, maxima vero ex parte

*) BOEHMER *Osteologia* Tab. III. Exacta icon.

armonia cum osse sphenobasilari, quin et cum osse palatino clauduntur. In inferiore et interna superficie maximam partem et in meatum narium superiorem et medium, priores in medium, posteriores vero in superiorem meatum hiant *).

A tergo quippe si spectetur os ethmoideum, lamina inde a media longitudinis parte retro descendens, margines aepius spongioso ad interna circumvolvitur, gibba superficie orbitam, cava vero septum spectante, **) quae lamina concha, osturmatum, sive os spongiosum superius audit.

Lamina vero duplo fere longior, ad priora et superiora conchae superiori iuncta, ad perpendiculum descendens, retracta, exactius e mediis cellulis orta, margine multo spongiosiori ad externa circumvolvitur, gibba superficie septum, cava vero orbitam spectante, et concha media, respectis conchis inferioribus, originem alii ossi non dependentibus, audit. Ad latus nonnumquam vesiculae formam repraesentat.

Ab inferiori superficie orbitalis margine tenuis lamina, processus minor aliis audit, prorsum versus hamae in modum curvata descendit.

Oppositam vero directionem lamina sequitur

s) Videsis exactissimas icones in HALLERI Iconum Fasc.III. Tab. narium internarum.

ss) Ita quidem conchae forma est, quamvis, quamdiu membrana cavitatis narium tegitur, eodem modo, quo concha media, circumvoluta videtur.

Recenti in cadavere membranae narium plica, quartam concham, supremam mentitur. SANTORINI Tab. posthum. III. F.

ad posteriora et exteriora curvata, contracta, tenuis, quin et foraminulis pertusa, concham mediam inter et parietem orbitalem ad maxillam superiorem vel concham inferiorem descendens, ut apice dentato iisdem iungatur, quin et quodam modo ossi lacrimali adponatur.

Superficies laminarum, cellulas et septum narium constituentium, absque quibusdam lenibus vasorum et nervorum vestigiis sat laeves sunt, verum superficies concharum cavitatem narium versus foraminulis et canaliculis, iunctis nonnullis vasorum vestigiis, abundat.

§. CLVIII.

Foramina ossis ethmoidei ab utroque latere in duas series, in internam et in externam seriem dividi possunt. *Externa* series ramos nervorum olfactoriorum ad partes laterales in canales superioris et mediae conchae ducit. *) *Interna* vero series latus cristae premens septem vel novem maiora foramina habet, per quae nervi ad septum narium perveniunt. **) Primum foramen, longitudine, qua fissurae simile evadit, prae ceteris plerumque eminet. Curatius explorata superne depressa sunt foramina, ideoque aperturas canaliculorum representant, qui in superficie laminae cribrosae inferiore distinctius adparent. Priora versus plurima parva foraminula has inter maiorum

*) Egregiam iconem vide apud SCARPA, Tab. II. Fig. I. Verum tamen hi canaliculi non in omnibus calvariis aequè exacte conspiciendi dantur.

**) Vid. SCARPA l. c.

eries inveniuntur. Quidam horum canaliculorum tanta sunt brevitate, ut eorum longitudo vix crassitudinem laminae superet, verum tamen obliqua ad maiores canales ducunt. Alii canales per laminae mediam pergunt, et quidem priores breviores oblique a posterioribus, ad priora tendunt, medii plerumque recto itinere descendunt, mediaeque sunt longitudine, posteriores vero obliqua a prioribus ad posteriora pergunt, et sensim longitudine augentur. — Nonnumquam autem unus vel alter canaliculus longitudine reliquos inter eminent. Canaliculi, e foraminulis exterioris seriei oriundi, non nisi in superficie, septum narium spectante, notari possunt, iam exigua longitudine sunt, iam vero tanta, ut marginem conchae mediae inferiorem tangant; plerumque etiam prioribus ad posteriora pergunt. — Praeterea in sulci transversa, surculos secundi rami quinti nervorum paris excipientes, in concha media inveniuntur. *)

Foramina communia in orbita et in superficie ossis frontis interna videsis in descriptione ossis frontis.

§. CLVIII.

In infante maturo formatio ossis ethmoidei nondum absoluta, et integra media pars cartilaginea est; verum tamen lamina cribrosa propter vasculum incumbens nervum olfactorium, reliquarum ossis ethmoidei partium, magna conspicitur.

*) SCARPA Tab. II. Fig. I. h. i.

MAXILLAE SUPERIORES.

sive *Ossa maxillae.*Nexum horum ossium cum reliquis sistit *ALBINUS Tab. oss. I — V.*Iconem maxillae superioris infantilis, *Id. Icon. oss. foetus Tab. V.*

§. CLX.

Maxillae superiores maxima faciei ossa, reliquis omnibus, excepta maxilla inferiore, tamquam basis inserviunt, multum ad formandas cavitates narium et orbitam, plurimumque ad formandas genas, et ad formandum palatum conferunt, et seriem dentium superiorum excipiunt.

Utramque maxillam superiorem sutura I. ab osse frontis; linea II. III. IIII. ab osse ethmoideo, osse lacrimali, osse nasi; lineae et suturae V. ab osse palatino; sutura VI. ab ossibus zygomaticis; sutura VII. a maxilla superiore alterius lateris; lineae VIII. a conchis inferioribus; harmonia VIII. a vomere separant.

§. CLXI.

Quare maxilla superior *) in corpus et in apophyses, nasalem, zygomaticam, alveolarem, palatinam dividitur.

§. CLXII.

Corpus quatuor facies vel latera offert: I. Ex-
ternam

s) Omnia faciei ossa ex unico tantum nucleo osseo (§. XXXIII et XXXV.) tantumque absoluto oriuntur, ut toti illius ambitui materies ossea adponatur, quod semel hic dictum satis est.

ternam faciem gibbam, sive *malarem*, II. superiorem, sive faciem *orbitalem*, III. inferiorem, sive faciem *palatinam*, IIII. internam, sive faciem *nasalem*.

Facies *externa* sive *malaris* omnium maxima est, margineque arcuato, tuberculis, imprimis ad priora, radices dentium prodente, sive limbo alveolari, adscendit, ad posteriora tuberositatem maxillarem dictam, praeter vestigia ac foramina vasorum et nervorum dentium posteriorum ex insitione musculi buccinatoris asperam, socioque *processu malari*, ob adhaerentem M. masseterem aspero, deinde lunato et in angulum obtusum inferiora versus abeunte, sinum, — denique vero ad priora plerumque fossam, maxillarem dictam, raro autem huius loco tuber effingit, infra quam fossam apertura externa canalis infraorbitalis, cernitur supra vero et ante eam sutura, continuatio fissurae canalis infraorbitalis, adparet. Interna versus dimidiam partem *aditus cordiformis* ad *cavum narium*, margine acuto, ad priora in *spinam* porrecto construit, supra vero os lacrimale inter et nasale, abit in processum nasalem, leniter cavum; et praeter vestigia et foramina vasorum, margine obtuso, vel angulato, quin infra retuso, ad formandam canalis lacrimalis fossam plus minusve concurrentem, raro totam construentem. — Figura, magnitudo, crassitudo huius processus vagae esse solent.

§. CLXIII.

Planum orbitale quodam modo trigonum, inferiora et exteriora versus in processum zygomaticum, partim dentatum, partim sinuatum et circumvolutum, ossique zygomatico iunctum porrigitur. Supra sulcus ad externa flexus abit in canalem, interna in superficie plani orbitalis fissum, non nihil descendente, et nervum infraorbitalem secundi rami quinti nervorum paris excipientem, Ex hoc canali nonnumquam sulci et canales nervos dentis canini et dentium incisorum excipientes, distincte exeunt. Ceterum vero planum orbitale laeve est, et maximam partem planum, externa vero et interna versus aliquatenus gibbum. Nonnumquam magis externa versus exigua incisura, in fissuram saepius versa, invenitur. Margo internus ossi lacrimali, ossi ethmoideo et palatino iungitur; prior planum orbitale a facie malari separat; posterior vero marginem priorem fissurae orbitalis inferioris constituit.

§. CLXIII.

Faciei palatinae sive inferioris, ambitus externus ellipticus alveolos radicum octo, rarissime novem dentium format; — alveolus primi dentis incisoris maior est, profundior et elatior, plerumque etiam teretior, alveolo secundi. — Alveolus tertius dentis canini omnium profundissimus est et acutissimus, plerumque complanatus, quasi in partes secedere vellet. Alveoli, quartus et quin-

us, dentis molaris primi et secundi complanati sunt, prorsum paullum ampliores, iamque unus vel alter alveolus duplicem cellam sistit. — *Sextus* dentis molaris tertii amplissimus est, et, velut *septimus*, triplex, raro quadruplex; utraque cellula minore externa, maiore vero interna. — *Octavus* omnium maxime variat, plerumque triplex est, interdum duplex, rarius simplex, interdum deficit. Ceterum alveoli posteriores eorumque septa multo spongiosiora sunt, prioribus. Reliquam faciei sursum versus plus minusve gibbum est, asperum, rimosum, nonnumquam, praesertim ad posteriora, adeo dentatum, ut anuli in modum vasa et nervos cingat. — Prorsum fissura, integrum processum palatinum interna versus secans, perque prius foramen palatinum oblique a prioribus ad posteriora descendens, observatur, quae viam dentem incisorem inter et caninum, raro hunc inter et molarem primum secuta, evanescit, qua fit, ut locus quodammodo si brutorum intermaxillari similis fiat *). In minoribus calvariis plerumque facilius, in adultis difficilior dignoscitur. — Raro ex hac fissura al-

*) Attamen os brutorum intermaxillare differt, quod in homine numquam vel minimum vestigium fissurae alveolos inter, multo minus in superficie externa vel priore maxillae superioris dentes incisores inter conspicitur. — Primum vestigium portionis in facie palatina hac fissura seiunctae coram video in foetu trimestri. — *GOETHE* ingeniosas circa hanc rem observationes instituit.

tera priora versus dentem incisorem primum inter et secundum *), vel huius loco altera posteriora versus pergens, vel utraque oritur. — Ad *internum* faciei palatinae *marginem* altera maxilla alteri iungitur. Incisura marginis posterioris os palatinum excipit.

§. CLXV.

Facies interna sive *nasalis* praeter sulcos et vestigia vasorum exhibet I. levem sinum, quo ad tegendas ossis ethmoidei cellulas anteriores conducit; II. ad priora marginem ossi nasali iunctum; III. deinde, verum non semper, lineam transversam asperam, origini hamuli et conchae mediae ossis ethmoidei communi sociatam; IIII. posteriora versus duos circumvolutos margines inter, sulcum mox planiorem, mox profundiozem, canali lacrimali expletum, inferiora versus latescentem, oblique reflexum, extrorsum versus quasi complanatum, nonnumquam tam profundum, ut margines circumvoluti mutuo se fere tanguant, ideoque canalis tantum non a sola maxilla superiore, sine conchae inferioris auxilio, formetur; — V. *lineam asperam*, conchae inferiori iunctam, nonnumquam tam elatam, ut finem sulci descripti repraesentet. — Posterior pars inaequalis aperturam sinus maxillaris magnam irregularem format. Nonnumquam aperturae margo orbitam versus sinus, qui cum osse ethmoideo communes cellulas consti-

*) *ALBIN. Annot. Acad. Lib. I. Tab. III. Fig. II. d.*

tuunt, exhibet *). Quo facto cava, et exceptis quibusdam vasorum vestigiis, laevis haec nasalis facies in fundum cavi narium vertitur, quod priora versus nonnihil contrahitur, et fissuram supra descriptam sistit, quae ad canalem pone dentes incisores pergit. Tandem superficies lamellato dentata, cuius ope firmum cum vomere nexum init, retro depressior, prorsum elatior, *cristam* nasalem constituit, quae priora versus in *spinam* ad inferiora curvatam desinit, cum crista alterius lateris sulcum prorsum latiore format, et parte posteriore maiore vomerem, parte vero priore minore cartilagine septi narium excipit.

§. CLXVI.

Sinus maxillaris, cuius primordia diu ante partum adparent, inter omnes ossium capitis sinus maximus est, et forma quam maxime vaga. Nonnumquam subter planum orbitale in sinu lineae prominentes, non raro verum septum constituentes **), et in fundo alveoli dentium molarium trium posteriorum, non raro radicibus sinum perforantium, plus, minusve vel ne tantillum quidem elati conspiciuntur. Nonnumquam prorsum versus sinus valde contractus, et facies interna externae adglutinata quasi adparet. — In interna facie nonnulli arteriarum et nervorum sulci inveniuntur. — In meatum narium medium orifi-

*) HALLER Icon. Fasc. III. Tab. narium internarum. Fig. II. o. o. Cellulae orbitariae.

**) van DOEVEREN observ. anatom. p. 197.

cium sinus, osse ethmoideo adiacenti, osse palatino, et conchis inferioribus valde angustatum hiat. Nonnumquam duplex orificium observatur *); ceterum vero valde gracili lamina ossea formatur, quae non nisi circa angulum e processu zygomatico oriundum, et circa limbum alveolarem crassior est. — Rarissime sinus deficit **).

§. CLXVII.

Substantia maxillae superioris, nonnisi in locis crassioribus, *cellulas medullares* exhibet, v. g. in radice processus nasalis, et prorsum infra aperturam cavi narium, processus quippe palatinus prorsum crassior est, ad posteriora vero sensim sensimque magis tenuatur.

§. CLXVIII.

In maxilla superiore observantur: — a) *Canalis infraorbitalis* nervum infraorbitalem emittens — b) *Canalis pone dentes incisores*, meatus surculi secundi rami quinti nervorum paris ***), quorundam vasorum, nexum vasa cavi narium inter et palati constituentium, qui canalis nunc amplus est, nunc contractus, nunc utraque maxilla socia superiorem eius tantum partem, vel totum canallem, vel quavis ad priora proprium, tum vel ad priora, vel posteriora, vel ad priora et posteriora simul medium quemdam communem constituyente, ita ut hoc loco in calvaria non dissecta infra qua-

*) MONRO *on the structure of the nervus system.*

**) MORGAGNI *Adv. anat. I. p. 38. Adv. VI. p. 116.*

***), SCARPA *Annot. Academ. L. II. Tab. I. Fig. I.*

tuor foramina conspiciantur. Nonnumquam, osse cute tecto, hoc loco apertus canalis conspicitur. — c) Canalis lacrimalis, cuius maximam partem constituit. — d) A tergo *canalis* pterygo palatinus exterior, surculos secundi rami quinti nervorum paris transmittens, socio osse palatino formatus. — e) Paullo superius maxillam superiorem inter et alam magnam ossis sphenobasilaris *fissura orbitalis inferior*.

§. CLXVIII.

Sphincter palpebrarum, M. obliquus bulbi inferior, pars M. temporalis, M. pterygoidei externi, M. buccinatoris pars, M. levator labii superioris et alae nasi, M. nasalis labii superioris, M. compressor et depressor alae nasi maxillae superiori illigantur.

§. CLXX.

In foetu maturo omnes quidem maxillae superioris partes adsunt; verum tamen in latitudinem magis, quam altitudinem maxilla superior extenditur; infra processum zygomaticum praecipue depressa, omnium vero maxime formatio plani orbitalis et processus nasalis absoluta est, quarum incrementum ea de causa minimum augetur. Quo loco canalis infraorbitalis incipit, eminentia recti-angula fere conspicitur, quae sub tertium aetatis annum retundi incipit. Alveolorum sex tantum, habita totius ossis ratione, sat magni, quamvis primordia tantum dentium incisorum, dentis canini, et duorum priorum dentium molarium con-

inentes, adsunt. Externa in superficie tuberculis globosis, inprimis in foetibus immaturis produntur, praesertim vero alveolus dentis canini, secundum dentem incisorem inter et primum dentem molarem elatus est.

Sinus maxillaris exiguus, neque infra orbitas fossa adest. Omnes margines minus dentati sunt. Canalis infraorbitalis magis patet, cavum vero narium planius est, ob dentes incisores prorsum gibbum, adeoque non, ut in adultis, cavum. Limbus vero alveolaris plurimum mutatur, (ut in doctrina de dentibus demonstrabitur,) qui vel elapso septimo aetatis anno non solum depressus, nec pone in planum porrectus, sed etiam retortus est, ut dentes retro, minime vero infra prodituri esse videantur.

O S S A P A L A T I .

Nexa reliquis ossibus sistunt *ALBINI Tabulae I. II. III. IIII. V.*
Infantis vero Et. Icon. ossium foetus Tab. V.

§. CLXXI.

Ossa palati, supplementa maxillarum superiorum posteriora, formationem palati, cavi narium, et orbitae adiuvant.

Separant ossa palati I. ab invicem sutura, II. III. a maxilla superiore, et ala inferiore ossis sphenobasilaris suturae et lineae; IIII. ab osse ethmoido suturae; V. a parte posteriore conchae inferioris lineae, quod et VI. de vomere valet.

Nexus varius et mutuus marginum ossis palati cum maxillae superioris marginibus impedit, quo minus a calvaria adulti os palatinum incolume sine magna difficultate separari possit.

§. CLXXII.

Os palatinum, quamvis eius forma inconcinna est, in *basin* seu *partem palatinam*, in *partem nasalem* adscendentem, et in *partem orbitalem* dividi potest.

Basis, fere quadrangularis, in planum porrecta, plano maxillae superioris palatino ea ratione iungitur, ut posteriora versus id quasi continuetur,

Superficies eius inferior, si summam spectes, recta est, verum tamen non adeo porosa, quam maxillae inferior superficies, eminente crista aspera, acuta, cui uvula adhaeret; superior superficies cava est et laevis. Ceterum vero media baseos pars tenuior est, lateralibus partibus crassioribus.

Margo posterior in incisuram lunatam acutam desinit, et quo loco os palati alteri iungitur, *spina palatina* porrigitur.

Margo internus rectus, sutura prorsum paulum elatiore, retro depressiore, ossa palati inter se iungens, sursum vel cavum narium versus in *cristam palatinam*, cuius ope ossa palati vomeri iunguntur, porrigitur, deorsum vero vel palatum versus margines interni coniuncti *lineam obtusiorē* constituunt.

Marginem anteriorem sutura, in cavo narium fissuram tantum repraesentans, maxillae superiori iungit.

§. CLXXIII.

Quo facto basis, extrorsum et sursum versus torta, latiore, verum tenuiorem *partem nasalem*, recta adscendentem, ab interioribus partibus superficiei maxillae superioris internae innixam, eaque de causa orificium sinus maxillaris retro valde contrahentem, plerumque prorsum et sursum versus in partem orbitalem, retrorsum vero in cornu mutatam, constituit.

Pars nasalis in superficie cavo narium respondente, linea aspera, paullum adscendente, et conchae inferiori nexa, in partem superiorem et inferiorem dividitur. Ceterum vero prior eius margo non solum superficiei maxillae internae, ut orificium sinus maxillaris contrahatur, vicinus, sed etiam laminis maxillae superioris, partem hu-

ius orificii inferiorem constituentibus, interpositus observatur.

Ad posteriora, exteriora et inferiora pars palatina et pars nasalis sociae *processum pyramidalem*, laminae alae inferioris ossis sphenobasilaris inter et maxillae superioris coactum, constituunt.

Sinus quippe oblongus, dentatus laminae internae alae inferioris ossis sphenobasilaris processum pyramidalem excipit, cui magis dentata, verum minus sinuata pars laminae externae sese adiungit, quo fit, ut utramque hanc partem inter processui pyramidalis iunctam trigonum, apice sursum versus spectans, oblique ab interioribus externa versus tortum, pone laeve, fissuram alae inferioris occludens planum conspiciatur.

Similis superficies processum pyramidalem tuberi maxillae superioris pone dentem molarem ultimum iungit.

Superficies cornu interna similem, breviorē lineam asperam, quacum concha media iungitur, radix vero partis orbitalis aliquantum etiam breviorē, conchae superiori nexam lineam, repraesentat.

Ad interiora et superiora cornu basi ossis, ad latus vero parti vomeris iungitur. — Externa partis nasalis superficies aspera, inaequalis eademque squamosa superficiei internae maxillae superioris adnectitur.

§. CLXXIII.

Pars orbitalis cava, plurimum, quantum ad

figuram, vaga, contracto et tenui initio oritur, mox tamen augetur, eiusdemque nunc maior, nunc vero minor, plerumque quadrata, nonnumquam vero trigona superficies externa superficiem orbitalem inferiorem absolvit. — Sutura marginem eius *priorem* maxillae superiori, *internum* ossi ethmoideo, *posteriorem* vero ossi sphenobasili iungit; margo *externus* laevis ad perficiendum marginem fissurae orbitalis inferioris priorem confert. — Cavum eius maius posterius cavo narium sociatur, nonnumquam etiam sinu a fronte aperto cellulam ossis ethmoidei claudit, quin et cellula maiore ad sinum sphenoidium occludendum confert; nonnumquam haec cellula clausa est, ut nonnisi apertura exigua in sinum sphenoidium hians supersit. — Nonnumquam pars orbitalis deest. — Nonnumquam processus maxillae superioris *) os ethmoideum versus cavus, eiusdemque cellulas claudens, vel pars ossis ethmoidei vices partis orbitalis subit **).

§. CLXXV.

Cornu inter ac partem orbitalem incisura, vasa et nervos in cavum narium ducens, remanet; nonnumquam vero foramen, sphenopalatinum vocant, adest. — Hoc ex loco *canalis pterygopalatinus*, totus fere, praesertim vero deorsum versus, in substantia ossis palatini positus, initio autem, plerumque socia maxilla superiore ex parte constitu-

*) *WALTER Knochenlehre, pag. 157.*

**) *MAYER Tom. II. p. 23.*

tus, descendit, qui interdum canaliculum, e solo osse palatino formatum, post se habet, vel ipse statim in maiorem et duos minores diducitur, ita ut aperturae eius tres vel quinque, maior semperque *prior*, et ab utroque latere compressa, una, duae vel tres *minores posteriores*, et *exterior*, plerumque, verum non semper, ossi palatino et maxillae superiori interiecta, nonnumquam autem in solo osse palati posita, interdum fissuram potius referens, interdum desiderata, in palato conspiciantur. Apertura posteriore ultra solitum magna, prior paullo minor est. Nonnumquam unica tantum apertura adest. Nervos palatinos secundi rami quinti nervorum paris sociis vasis sanguinem vehentibus transmittunt *). Nonnumquam ex his canalibus alius supra vel infra lineam asperam inferiorem, surculum nervi palatini ad concham inferiorem ducens, in cavum narium migrat.

§. CLXXVI.

Ossi palatino M. circumflexus palati, M. uvulae, pars M. pterygoidei interni et externi inseruntur.

§. CXXLVII.

Foetus maturi os palatinum ex unico quidem osse constat, verum multum a perfectione, velut maxilla superior, cui adiacet, abest; insignem vero perfectionis gradum pars orbitalis et processus pyramidalis iam iam tunc temporis tetigerunt.

*) Canales hosce apertos videsis in *SCARPA Annot. Acad. L. II. Tab. II. fig. I. I. L. M.*

OSSA IUGALIA, MALAE, ZYGOMATICA.

Iuncta sistit *ALBINUS* in *Tab. Oss. I. II. III.* Soluta *Tab. III.*
Infantis vero Id. in Icon. oss. foetus Tab. V.

§. CLXXVIII.

Ossa iugalia externam orbitarum partem claudunt, formam genarum, et nexum quorundam ossium calvariae, ossis frontis, ossis sphenobasilaris et ossis temporum cum maxilla superiore constituunt.

Utriusque lateris *os iugale* suturae I. a processu iugali ossis temporum, II. a processu iugali ossis frontis, III. ab ala magna ossis sphenobasilaris; superficies vero dentata IIII. a processu iugali maxillae superioris separant.

§. CLXXVIII.

In superficiem externam sive *facialem*, II. in superiorem sive *orbitalem*, III. in posteriorem sive *temporalem* optime dividitur.

§. CLXXX.

Facialis superficies rhombum nonnihil imitatur, in adultis prorsum versus leniter gibba, ad posteriora vero planior, margine *superiori* lunato et obtuso, partemque marginis orbitalis constituyente, *anteriori* vero per suturam maxillae superiori iuncto, *inferiori* prorsum crassiori, ad posteriora tenuiori, ob musculi masseteris insitionem valde aspero, *posteriori* plus minusve litterae S simili, sursum, quo loco ossi frontis nectitur, dentato, post multum obtuso, nonnumquam vero sursum versus in angulum sat prominentem porrecto, deor-

sum rursus dentato, processuique ossis temporum iugali iuncto. Huic superficiei aponeurosis musculi temporalis inseritur.

§. CLXXXI.

Orbitalis superficies cava, laevis, marginem externum inter et internum ponitur, eamque margo externus, quantum vero ad superficiem facialem, superior, iam iam descriptus, superficiei faciali iungit. Pars marginis posterioris superior initio quidem superficiem dentatam et cum osse frontis nexam sistit, ut hoc loco os frontis priorem locum occupet; reliqua superficiei dentatae pars cum ala magna ossis sphenoidi iungitur, et hic locorum prior est, quam pars laevis, fissurae orbitali inferiori propria, sequitur; ultima vero pars, eademque obliqua, maxillae superiori incumbit.

§. CLXXXII.

Temporalis superficies, excepta parte fere trigona valde aspera, cuius ope maxillae superiori sociatur, sat laevis est et cava, eiusque fines margo posterior superficiei orbitalis, margo anterior, margo inferior, margo posterior superficiei facialis constituunt.

§. CLXXXIII.

Substantia ossis, ubicumque locorum crassior est, cellulas medullares includit.

§. CLXXXIII.

Canaliculi et foramina ossis iugalis mire vagantur; interdum in superficie faciali maius foramen

vel plura minora conspiciuntur; — interdum etiam in superficie orbitali, et in superficie temporali, sat magnum adparet; horum ope praeter vasa inprimis tres rami quinti paris nervorum surculis invicem sociantur. Nonnumquam sutura, margini superficiei facialis inferiori fere parallela, a connexione cum maxilla superiore ad connexionem cum processu ossis temporum zygomatico porrecta invenitur *).

§. CXXXLV.

Ad os iugale M. zygomatici, maior et minor, M. sphincter palpebrarum, M. masseter, et M. temporalis adhaerent.

§. CLXXXVI.

In foetu maturo forma ossis iugalis imperfecta est, et a forma ossis adulti differt; superficies orbitalis iam iam multum conspicua est, superficies vero facialis et temporalis multo minores sunt; margo autem orbitalis acutior iam iam in infantibus paucorum aetatis annorum valde differt, externe enim iam multum sinuatus est, iam vero totus quantus multum gibbus.

OSSA

*) SANDIFORT *Obs. anatom. patholog. Libr. III. pag. 9. Fig. VI.* talem in Nigritiae scelecto adservo.

OSSA NASI, vel NASALIA.

Iuncta reliquis ossibus videsis in *ALBINI Tab. Oss. I. II. III.*

III. soluta Ib. Tab. III.

Infantis. Er. Icon. Oss. foetus, Tab. V.

§. CLXXXVII.

Ossa nasi lacunam os frontis inter et maxillam superiorem claudunt, dorsumque nasi ephippiforme, in longitudinem cavum, in transversum vero gibbum constituunt.

Sutura dentata ab osse frontis, II. III. sutura laeviore ab invicem et a maxilla superiore, nec non III. ab osse ethmoideo, quum id tangunt, separantur.

§. CLXXXVIII.

Soluta supra crassa sunt, infra vero tenuiora, sed latiora, et quadrata, in utroque igitur *superficies externa, et interna, et quatuor margines* conspiciuntur.

Externa superficies gibba, et praeter foramina quaedam ac lenia vasorum vestigia sat laevis adparet.

Interna superficies cava est, valde aspera, non-nihil spinosa, et profundis vasorum vestigiis conspicua.

Superior margo spinosus, spinis ossis frontis iungitur.

Internus margo, qui ambo ossa nasi inter se iungit, supra latior, deorsum versus sensim sensimque contrahitur. Interne sociati nonnumquam cristam formant, cui media pars ossis ethmoidei

innititur; tunc vero spina ossis frontis vel brevior est, vel deficit.

Externus margo maxillae superiori iunctus, longissimus est, nonnihil teres, sed asper.

Inferior margo solutus, prominens plures spinas nasales format. Iuncta inter se ossa nasi partem aperturæ nasalis superiorem constituunt.

§. CLXXXVIII.

Plerumque in media ossium nasi parte maius foramen vasorum conspicitur.

§. CLXXX.

Ossi nasi M. frontalis, et M. compressor nasi illigantur.

§. CLXXXI.

Nonnumquam superficies eius externa certo tenore deorsum versus latitudine augetur, nonnumquam vero media eius pars contrahitur. Nonnumquam vero iuncta ossa nasi trigonum, apice tenuissimo in altum porrectum formant *). Rarissime ad dextri formam sinistrum os nasale est constitutum.

§. CLXXXI.

In foetu maturo alia ossium nasi forma est, quam in adulto, iuncto nempe utroque sursum cum calvaria, ad reliqua ossa maiore, non potest non esse, quin extremum superius eadem ratione, quantum ad latitudinem, simile sit inferiori, inde totum os concinnae quadratae figurae, et cum reliquis faciei ossibus comparatum non exiguae est magnitudinis, quare extremum ossium nasi inferius plurimum augeatur, est necesse.

*) Id quidem in calvaria Nigritæ observo.

OSSA LACRIMALIA.

Nexa reliquis ossibus sistit *ALBINI Tab. Oss. I. IIII, soluta Tab. IIII. Fig. V.*

Infantis Et. Icon. oss. foetus Tab. V. Fig. XXXIIII, et XXXV.

§. CLXXXIII.

Ossa lacrimalia, minima faciei ossa, hiatum os frontis, os ethmoideum inter et maxillam superiorem, in externa calvariae superficie conspicuum, claudunt, formationem igitur cavi narium adiuvant, ad priora saccum lacrimalem excipiunt, et undique plerumque subtilibus fissuris, nec nisi supra tantum sutura exili ab his ossibus et concha inferiore disterminantur.

Utrumque os lacrimale lamina tenuis constituit, ideoque continuatio ossis ethmoidei esse videtur.

§. CLXXXIII.

Superficies eius externa sive *orbitaria* laevis, margine acuto, infra prominente, saepiusque in hamulum priora versus abeunte, in partem anteriorem et posteriorem dividitur.

Posterior pars, plerumque latior, semper brevior est planior et laevior.

Anterior pars, plerumque contractior, canallem format, qui saccum lacrimalem excipit, semper longior est, altiusque, saepius ad concham inferiorem in cavo narium descendit.

§. CLXXXV.

Superficies interna sive *nasalis*, quo loco in externa margo acutus observatur, cava est, quasi plica laminam ossis lacrimalis in duas partes divi-

deret, ceterum vero pars prior, inprimis deorsum versus multum, posterior vero leniter tantum cava est, hinc inde lineis acutis et vestigiis vasorum adparentibus. Plerumque superficies interna formationem cellularum ethmoidearum et orificii sinus frontalis adiuvat. — Margo eius anterior quasi ad priora curvatus, margo vero superior non nihil spinosus est, posteriori et inferiori plerumque acutis.

Plerumque pluribus locis, praesertim in parte priore valde subtilia foramina observantur.

§. CLXXXVI.

In foetu, respectis omnibus faciei ossibus, absolutissima sunt, fines enim faciei et calvariae constituunt, et oculi fabrica magnum iamiam perfectionis gradum tetigit.

§. CLXXXVII.

Plerumque os huius lateris ab osse alterius multum discrepat. — Nonnumquam pars prior latior est posteriore. — Nonnumquam margo acutus, fines partium, prioris et posterioris constituens, in medio maxime elatus est. — Nonnumquam e suprema ossis parte, — nonnumquam vero e media parte originem ducit. — Nonnumquam supra plenior est, quam infra. — Nonnumquam hamo caret, qui, si res sese sic habet, maxillae superioris particula videtur. — Nonnumquam plane abest, ita, ut partem priorem a posteriore nonnisi sulcus accurate expressus seiungat. — Nonnumquam ossa lacrimalia exiguae

sunt magnitudinis; quum vero plane absunt, sulcum sacci lacrimalis solus processus maxillae superioris hac in causa latior format *).

*) Exemplum huius rei in collectione mea adseruo Vid. etiam METZGER *Curationum chirurgicarum, quae ad fistulam lacrimalem pertinent, historia critica.* Monasterii 1772. p. 66.

OSSA SPONGIOSA, *sive* OSSA TURBINATA
INFERIORA,
sive CONCHAE INFERIORES.

Nexa cum reliquis ossibus vide in *ALBINI Tab. Oss. I. II. III. IIII. V.* soluta vero in *Er. Tab. IIII.* Nitidissimam iconem vide apud *SCARPA in Annot. anatom. Libr. II. Tab. II. Fig. I. II.*

Infantis ossa spongiosa inferiora in *ALBINI Icon. oss. foetus Tab. V. Fig. XXXVIII. XXXVIII.*

§. CLXXXVIII.

Conchae inferiores marginibus circumvolutis inferioribus libere in cavitate narium dependent, et membranam olfactoriam extensam seryant, orificia canalium lacrimalium tegunt, formationem orificii sinus maxillaris et canalis lacrimalis adiuvant, et fines meatum narium inferiorem inter et medium constituunt.

Utrumque os spongiosum inferius harmonia I. a maxilla superiore, II. ab osse palatino, III. ab osse lacrimali, sutura vero IIII. ab hamulo ossis ethmoidei disternatum est, et consertum maxillae superiori plerumque facile tolli potest.

§. CLXXXVIII.

In universum spongiosum, sat profunde sulcatum et interrupte canaliculatum in duas superficies, totidemque margines dispesci potest.

§. CC.

Superficies eius externa, septum narium spectans in media praesertim parte secundum longitudinem gibba, duo canales interruptos vel vasorum sulcos, priora petentes, exhibet *).

*) *SCARPA Tab. cit.*

§. CCI.

Margo inferior, libere dependens, longissimus est, plus minusve circumvolutus, deorsum versus curvatus, in medio crassissimus, ad posteriora vero valde tenuis.

§. CCII.

Prior marginis superioris pars, valde tenuis est, et subtilibus spinis instructa, oblique et lineae maxillae superioris asperae et ossi lacrimali innititur, quo socio canalem lacrimalem format.

Media marginis superioris pars brevissima, eademque spinosa, hamulo ossis ethmoidei iungitur, orificium sinus maxillaris contrahit, nonnumquam lamina per medium contractae aperturae adscendit, eamque in duas partes dividit *), et externa versus voluta squamam, sive tenuem, sat laevem laminam osseam, in incisuram maxillae superioris plerumque apte convenientem, ossaque spongiosa inferiora firmantem, formant, qua squama orificium sinus maxillaris clauditur, alias in meatum narium inferiorem hians, nisi ab alio osse squama suppleretur.

Posterior marginis superioris pars spinosa est, oblique descendit, lineae asperae ossis palatini iungitur, et in spinam acutiorem, quam pars prior, abit.

§. CCIII.

Interna superficies, maxillam superiorem spe-

*) In collectione mea, et apud ALBINUM Tab. III. Fig. XI.

ctans, cava et subtilius spongiosa est, quam externa superficies.

§. CCIII.

Ceterum vero prius ossis spongiosi inferioris extremum obtusius est, posterius vero acutius.

§. CCV.

In maturo foetu omnia quidem, quae hic descripta sunt, distinguì possunt, verum valde exilia sunt et imperfecta.

§. CCVI.

Saepissime vel vigente aetate penitus cum maxilla superiore concreta, et in foetibus immaturis in unum os cum osse ethmoideo coalita inveniuntur, nonnumquam spinosa magis sunt, quam spongiosa, nonnumquam valde, nonnumquam vero leniter gibba.

V O M E R.

exum sistunt *ALBINI Tab. oss. I. II. III. V.*

fantis *Er. Icon. oss. foetus Tab. VI.*

§. CCVII.

Vomer, lamina ad perpendicularum prorsum
versus descendens, magnam cavi narium partem
dextrum et sinistrum latus dividit, cartilaginem
narium excipit, et membranam olfactoriam ex-
tensam servat.

Commissura I. a basi et alis inferioribus ossis
phenobasilaris; II. a media ossis ethmoidei parte;
III. ab osse palatino; harmonia denique IV. ab
osse palatino et maxilla superiore vomer seiun-
gitur.

§. CCVIII.

Rhomboideum fere os quatuor margines, *su-
periores, anteriores, inferiores, posteriores*
habet.

§. CCVIII.

Superior margo, crassissima totius ossis pars,
in dextram et sinistram alam, rostrum ossis sphenobasilaris amplectentes, discedit.

Anterior margo, plerumque longissimus, ad
posteriora, quo loco laminae ossis ethmoidei me-
diae iungitur, acutus, deorsum versus, quo loco
septum narium cartilaginoso iungitur, latior est et
spongiosus. Rarissime in adultis e duabus laminis,
mediam ossis ethmoidei partem et septum narium
cartilaginosum excipientibus, componitur.

Inferior margo, prorsum non nihil obtuso
latus, pone vero planus, acutus, sulco, iunctis

maxillis superioribus et ossibus palatinis, formato immergitur.

Posterior margo solutus, supra duplex et obtusus, infra vero simplex, acutus, pone vero vel rectus vel lunatus conspicitur.

§. CCX.

Dextra et sinistra superficies sat laeves sunt, exceptis quibusdam vasorum vestigiis.

§. CCXI.

Substantia non, nisi quibus alarum in locis crassior est, cellulas medullares includit,

§. CCXII.

In maturo fetu supra et a fronte semper e duabus, per totam longitudinem profunde sulcatis, multum ab invicem distantibus, vel post aetatis annum duodecimum, donec tandem valde inconcinna ratione concrecant, conspicuis laminis constat. Saepissime vel sine morbo, una lamina vel ex parte, vel penitus, altera superstita, evanescere videtur. Quin et alia vomeris infantilis forma est, longitudine latitudinem superante, ideoque in unum versum depressa.

§. CCXIII.

Ceterum vero vomer raro ad regulas constructus est, vel ad perpendicularum adscendit, sed iam ad dextram, iam ad sinistram curvatur, vel formam vario modo inflexam, offert. — Nonnumquam septum narium cartilagosum non in media eius parte, sed potius ad latus descendit. — Nonnumquam lacuna est in vomere; inde vero non sequitur, ut in septo narium membranaceo et cartilaginoso similis inveniatur.

MANDIBULA, MAXILLA INFERIOR.

ALBINI Tab. oss. II. HUNTER Natural History of the human Teeth, Tab. I. sqq. *ALBINI Icon. Oss. foetus Tab. VI. Plene edentulam*
maxillam inferiorem virivid. in RUYSCHII Obs. anat. chirurg.
Obs. LXXXII. Feminae in HUNTERI Tab. cit. Tab. VII.
Verum Icon Ruyischiana e maxilla feminea, Hunteriana
vero e virili desumpta videtur.

§. CCXIII.

Utraque pars huius in adulto imparis, robustissimi, unicusque mobilis ossis facialis absque collo, processum coronoideum, externam internamque superficiem offert; sive in ramum horizontalem, partem priorem, et ramum adscendentem, partem lateralem maxilla inferior dividi posset.

§. CCXV.

Superior margo in utroque latere plerumque recto, interdum vero septem tantum vel sex, rarius novem alveolos exhibet. — *Primus* alveolus primi dentis incisoris omnium minimus est, et angustissimus. — *Secundus* secundi dentis incisoris paullum tantum maior est. — *Tertius* dentis canini plerumque omnium profundissimus est, plurimum prominens, et raro bilocularis. — *Quartus* et *quintus* primi et secundi dentis molaris nonnihil teretiores sunt praecedentibus, et plerumque unum tantum loculum formant. — *Sextus* plerumque omnium maximus est, ambituque quadratus et bilocularis. — *Septimus* nonnihil minor est, et bilocularis. — *Octavus* minor est septimo, triangularis, vel et quadratus, et unam tantum vel duas, vel tres cellulas sistit.

In universum arcus alveolaris maxillae infe-

rioris parabolicus est, rarius ellipticus, ambitusque paullum angustioris arcu maxillae superioris quo fit, ut maxillae superioris dentes undique super maxillae inferioris dentes promineant. — Ceterum eminentiae superficiei externae huius arcus dentes pone eas positos, imprimis incisores ac caninos, nonnumquam omnes dentes ad penultimum usque molarem indicant.

Similiter axes trium vel quatuor posteriorum dentium molarium nonnihil superiora et interna spectant.

§. CCXVI.

Inferior margo teres, ante obtusus, post contractior, angulum sphaericum, plus minusve obtusum, raro rectum, ad externa nonnihil tortum cum margine posteriori format.

Nonnumquam sulcus parumper profundus arteriae carotidis facialis, quae hunc marginem transgreditur, adest.

§. CCXVII.

Posterior margo infra asper et inaequalis est adscendendo vero magis magisque contrahitur ac laevigatur, donec tandem subito rursus extendatur, et in laevem condylum abeat.

§. CCXVIII.

Condylus, figura oblongo teres, a prioribus ad posteriora, et ab uno ad alterum extremum gibbus, longiorem axin transversam, verum tamen non nihil externa spectantem habet, ita, ut uterque condylus, non eandem rectam, vel mutuo

i parallelam directionem, sed lineas sequatur, ut si ad posteriora extenderentur, angulum gradum circiter CX. ad CXXXXVI. sisterent. Ad posteriora condylus sensim sensimque magis laegetur, ad priora vero non nihil curvatur, et obtusum marginem, finem superficiei cartilagineae exhibet, infra quam ad posteriora fovea aspera, superfacie externa tandem evanescens, tendimque musculi pterygoidei externi excipiens, conservatur. Gracilior condyli pars prorsum cava, antice vero gibba, collum audit.

§. CCXVIII.

Processus coronoideus a latere priori principio rete oritur, post vero acutum marginem format, cui figuram productae litterae romanae S sistit, et antice obliqua externa audit, cui musculus buccinator illigatur. Iam brevior est, et obtusior, iam angustior, et acutior, iam plus minusve reflexus, acuto margine, incisuram semilunarem formante, in angulum externum condyli abit.

§. CCXX.

Externa maxillae inferioris superficies eiusque media prior pars infra dentes incisores tuber maxillare, deorsum versus magis magisque diductum offert; ceterum vero e musculorum nexu eadem superficies aspera est et inaequalis, nempe in margine anteriori e M. depressore anguli oris, ad latera tuberis e M. levatore menti, praecipue vero in angulo e M. massetere, et in processu coronoideo e M. temporali.

§. CCXXI.

In *interna superficie* infra dentes incisores unum, duo, vel tria tubercula conspiciuntur, (spiritalis interna) quorum duo superiora M. genio-glossi, tertium vero inferius M. geniohyoidei occupant, infra hanc spinam vero exiguae foveolae quae M. biventricum maxillae excipiunt, magis interna versus, non procul ab hisce tuberculis, *linea* interdum *acutissima*, progrediendo in cristam mutata, et prope ultimum dentem molarem quintum subducta, cui, musculus mylohyoideus affigitur itemque *linea obtusior*, lineam obliquam internam vocant, pone dentem molarem quintum orta, processum coronoideum versus producta, cui musculus buccinator illigatur; in angulo autem *vestigium asperum* musculi pterygoidei interni, et condylo, statim infra laevem eius superficiem simile vestigium ex insitione musculi pterygoidei externi; — nec minus in eadem superficie plerumque pone spinam acutam orificium canalis maxillaris, sive foramen maxillare posticum, quod curvo tramite substantia ossis pererrata, in superficie priore foramen multo minus, foramen mentale seu maxillare anticum vocant, infra secundum dentem molarem quidem format, sed nihil minus substantiam ossis ulterius percurrit, et omnes dentium radices canaliculos, et facto iam foramine priori alios duo canaliculos, unum superiorem, alterum inferiorem emittit *).

*) Ex LANCII sententia, Diss. II. §. 12. in reticulari maxillae inferioris substantia evanescunt.

urimum ex aditu huius canalis, arteriam maxillarem inferiorem et nervum maxillarem inferiorem tertii rami quinti nervorum paris ramum includens, sulcus, nervum mylohyoideum excipiens, oritur.

§. CCXII.

M. depressor labii inferioris et anguli oris, M. levator menti, M. latissimus colli, M. buccinator, M. masseter, M. temporalis, M. pterygoideus externus et internus, M. biventer maxillae, M. mylohyoideus, M. geniohyoideus, M. genio-
glossus maxillae inferiori illigantur..

§. CCXIII.

In maturo foetu os valde imperfectum e duobus partibus constat *) valde depressum est, sed tumefactum quasi, angulo multo obtusiori, condylis retusioribus, crassioribus quasi, substantia rariore. Margo superior in infante septem annorum ad inferiorem sese habet, ut V. ad XXI, in adulto, ut VII. ad XXIII. — Verum tamen paucis post partum hebdomadibus in unum os coalescere incipit, canalis vero eiusque orificia iam iam eiusdem fere magnitudinis sunt, ac in adulto.

Paucorum ossium figura in senectute tantum mutatur, quantum maxillae inferioris. Non solum enim omnes alveoli evanescent, ut ne vestigium quidem eorum remaneat, verum, quum

**) Rarissime in maturo foetu unum tantummodo os est. *Ruyssch Catalog. Musei pag. 187.* vel inter ossis partes os supernumerarium observatur. *Ruyssch Thes. V. locul. magn.*

antea altitudo latitudinem superavit, nunc versa vice res agitur. Processus coronoideus non solum, ut integrum os, tenuatur, sed etiam magis acuminatur. — Pars eius mentalis non amplius a perpendicularum, sed oblique descendit.

Vel in infantibus septem annorum mentum in priore parte globosum est, — maxilla prorsum elatior, iuxta dentem molarem tertium depressior, ultimis dentibus molaribus nondum quippe emissis, et margo inferior eadem in regione cavus adparet.

De

DE DENTIBUS.

V. *ALBINI Annot. Academ. Lib. II. Tab. I. et II. — HUNTER the natural history of the human Teeth. London. 1771. 4. theodisce, Lips. 1780. 8. latine Bordaeraci 1773. M. GERRARDI Oratio de re anatomica. Parmae 1781. 8. Tab. I.*

§. CCXXIII.

Dentes peculiari substantia, figura, nexu, incremento, nutritione, mutatione, denique etiam usu, cum reliquis ossibus discrepant.

Firmiore, densiore, tenaciore quasi substantia quam reliqua ossa compositi, quo loco super gingivas eminent, peculiari crusta, substantia, ut aiunt, vitrea, teguntur.

SUBSTANTIA VITREA.

§. CCXXV.

Substantia vitrea, cochleis, quae *porcellaines* audiunt, similis massa, totius corporis durissima est materies, externe lacteo colore tincta, laevissima, laevigata quasi, diffracta languide splendens, semipellucida, fibrosa, quod poliendo substantiam vitream demonstratur, ceterum vero homogenea est, tantumque, quantum ad colorem et fabricam adtinet, a substantia, quam tegit, differt, ut, qua demum cumque directione corona dentis scindatur, acuta linea, limites utriusque substantiae notans, facillime cognosci possit.

Qua superficie dentes mutuo sese tangunt, haec substantia crassior est, gingivas versus tenuior: externa in superficie crassior, in interna tenuior, quod praecipue in dentibus incisoribus adparet.

Quo loco superiorem coronae partem substantia vitrea tegit, fibrae eius rectae sunt et radiatae, in centro axin dentis versus quasi coniungendae, propius vero gingivam sensim sensimque magis curvatae sunt, cincinnatae quasi *), quin et mutuo sese scindunt.

E mutuo substantiae vitreae et chalybis collisu scintillae evocantur, verum chalybs optima notae, et collisus validus sit, et superficiem substantiae vitreae fractam tangat, necesse est.

Cocta, vel nimium in manducatione acta, facile a substantia ossea recedit.

Usta ob admixtam gelatinam, verum tardius, quam ossea pars, nigrescit, post finditur, quin etiam defluit.

Substantia vitreae minima vis vitalis pars in nostro corpore inesse videtur, vasis enim, quantum quidem videre licet, et, quamvis limis tacta, vel destructa, vel rosa, vi sentiendi caret.

Destructa non renascitur, detructa enim vel delapsa pars non restituitur **).

Diluto acido nitri solvitur, ut reliquiae in floccos diductae et solutae abstergi possint, verum tamen non, velut ex parte ossea, massa cartilaginosa, formam servans, remaneat. — Nec minus aliis acidis, praesertim salis acido, vivo in

*) HUNTER Tab. XIII. Fig. XX. superficie adfiguram XXIII. versa.

**) KEMME Zweifel wider die Ernährung der festen Theile. Halle 1778. solidis et exactis argumentis hanc doctrinam fulcit.

homine, afficitur, ut dentes aliquamdiu pelluceant *).

Mororum vel myrtillorum esu ad aliquod tempus livescit, facile enim, ut quaevis alia terra calcarea tingentem materiam attrahit. — Sunt gentes, quae succis plantarum nigro colore dentes inficiunt **).

Rubia tinctorum substantiam vitream, quum demum ea absoluta est, non amplius intrinsecus, sed extrinsecus tingere videtur ***).

Atræ vero maculae, quae saepius deprehenduntur, nisi aliena crusta vel cortex sunt, nequaquam substantiae vitreae vitia, sed defectum eius hoc in loco, et corrosionem substantiae osseae innuunt, quae, velut quodvis aliud erosum, aërique expositum os, nigrescit.

Substantiam vitream terra calcarea glutine animali coniuncta, et acidis soluta vi ignis in calcem vivam mutabilis componit.

OSSEA PARS.

§. CCXXVI.

Reliqua et quidem maxima dentium pars, evidenter massa ossea est, cuius genuina forma in lo-

*) Succo canis gastrico dentium vitrea substantia eroditur. SPALLANZANI *Versuche über das Verdauungsgeschäfte des Menschen*. Leipzig 1785. p. 212. 213.

**) *Nachrichten von den Pelew-Inseln*, übersetzt von Georg FORSTER. Hamburg 1789. p. 4.

***) Auctore LOESEKE non solum substantiam vitream, sed et integrum catelli dentem rubia tam solide tinxit, ut vel quatuor annis post dentes rubri adparerent. *Obs. XXXXVI. et XXXXVII.* Intrinsecus sola ea pars, quae formatur, tingitur. HUNTER l. c. p. 38.

cis substantia vitrea tectis facillime soluta ea ope diluti acidi nitri, non aequè facile vero delapsa ea, nisi dens antea multum coquatur, conspici potest. — Ossea pars minus quidem dura et fragilis est substantia vitrea, verum durior, spissior et tenacior reliquis omnibus ossibus, quin ipsa substantia vitrea tenacior, et quo loco substantia vitrea tegitur, zeolitho similem faciem refert, cote vero laevigata attalici panni in modum splendet, quod quidem aperte in recens fracto, apertius vero in discisso et expolito dente adparet.

Facta hac encheiresi, statim sub substantia vitrea similes splendentes lineae transversae, undulatum percurrentes, et pellucidae ac opacae fibrae per totam longitudinem alternis vicibus sibi succedentes observantur *).

In eo quoque ossea dentis pars a reliquis ossibus differt, quod nusquam cellulas medullares includit, vel crassissimus sit dens, vel amplissima eius cavitas. Neque in squamas ventis, aëri, igni exposita abit, omnis etiam substantiae vitreae pars, quum adparet, iam iam perfectissima est, neque vasa adsunt, quae cera impleri possent **).

Nonnumquam dentes ad corruptionem vergentes, minime vero sani et incolumes, ab externa parte, praesertim apices radicum versus, tertiam, pellucidiorē, molliorem, badiam, vel cornu si-

*) Digna fabrica, cuius exacta icon prodeat.

**) Num emollitio dentium in infantibus, et tumores radicum dentium praesentiam vasorum adfirmare possunt?

milem substantiam nulla linea interiecta ab ossea parte separatam, conspiciendam praebent, quae ipsa substantia ossea, corrupta ac mollita esse videtur, ideoque ut alius ossis mollita substantia, vel ut ipsa dentium substantia ossea, acido nitri diluto soluta, cultro scindi potest *).

DIVISIO DENTIS.

§. CCXVII.

Omnes dentes in *coronam*, substantia vitrea, dentem obducente, determinatam, in *collum*, vel partem gingiva inclusam, in *radicem*, vel reliquam partem, alveolo inhaerentem, dividuntur.

In apice uniuscuiusque radice dentium foraminulum adest, quod ad cavum, diducto radice ambitu similiter auctum, minutaue imagine externae dentis faciei simulacrum, et quo loco radices externa in facie iunguntur, interne cum reliquarum radicum cavo in unum confluens, ducit.

Parietes cavi laeves sunt, et ipsum cavum fluido gelato plenum est, in quo vascula et nervorum surculi **) inveniuntur, qui nudati acriter dolent.

Externae radix dentium tenui periosteo, paululum supra alveolum elevato, posteaque gingivae iuncto obducitur. — Coctione vel putredine so-

*) KEMME l. c. p. 96. dentis gelatinam citius cogi ac firmiorem esse gelatina ossium reliquorum, autumat, quod ego quidem integras maxillas cum dentibus variis in acidis solvendo non observavi. Cave vero eligas infantum ossa.

**) MOXRO über das Nervensystem, Tab. X.

luto periosteo, dentes incisores et canini vacillare incipiunt et decidunt, quod et dentibus molaribus accideret, nisi divaricatis radicibus firmarentur.

CLASSES DENTIIUM.

§. CCXXVIII.

Dentes in *incisores*, *caninos*, et *molares* dividuntur.

Dentes *incisores*, (*tonici*, *primores*, *risorii*, *adversi*, *acuti*) octo numero sunt, quatuor in utraque maxilla, duo dextri, duo sinistri. Communia habent, quae sequuntur: *Coronae* caelitis figuram habent, latiores liberum marginem, contractiores radicem versus, prorsum leniter gibbae, pone vero leniter cavae, e transverso in margine vel limbo acuto contractissimae, in collo autem latiores, superficie posteriore trigona, aliquantumque contractiore, quam superficies anterior, substantia vitrea ad priora plenior, ad posteriora vero tenuior, tenuissima in lateribus, limbo substantiae vitreae in antica et postica parte, gingivam versus, elliptico. — Radices simplices sunt.

Dentes incisores maxillae superioris, sive *dentes incisores superiores*, inferioribus multo robustiores, crassiores, latiores sunt, et magis prominent, axibus eorum deorsum et prorsum versus, et ad se mutuo tendentibus, ut productae infra coniungerentur, quare etiam singula horum dentium paria trigonus, basi sursum directus hiatus separat. Horum medium sive interius par externo robustius

est et crassius, facileque forma dignoscitur; in perfectissimo enim statu exterior coronarum exterioris paris angulus obtusus est, et superficies interna non nihil longior, radix vero interioris paris teretior.

Dentes incisores maxillae inferioris, sive dentes incisores inferiores, superioribus multo minores sunt, interius vero, sive medium par externo minus, omnium igitur dentium minimum est et contractissimum. Neque axes horum dentium mutuo sibi respondent, posito enim interiori pari ad perpendicularum, exteriores axes sursum versus a se invicem recedunt.

Dentes canini (laniarii, cuspidati) quatuor sunt, duoque, dexter et sinister, in utraque maxilla, et proximi dentibus incisoribus. In perfectissimo statu similes inter se sunt: coronis, quarum superficies prior gibba, et duae posteriores laterales nonnihil inaequales, nonnunquam aliquantum cavae, quodammodo pyramidalibus, et in apicem, saepius super omnes reliquos dentes, praesertim maxillae inferioris eminentem, abeuntibus; radicibus longioribus et plenioribus, ab utroque latere compressis, plerumque simplicibus, raro autem in maxilla inferiore semiduplicibus, vel plane duplicibus, alveolis prominentioribus, ideoque integro habitu crassiori ac robustiori, dentium, quibus interponuntur, habitu. Substantia vitrea utrinque crassior est quam in dentibus incisoribus. — Superioris maxillae canini dentes robustio-

res inferioribus caninis dentibus, omniumque dentium longissimi esse solent. Passim quoque *ocularii dentes* audiunt, quod primordia eorum, antea quam erumpunt, sub orbitis latent.

Maxillae quum committuntur, dens caninus inferior prior est canino superiori, exteriorem superiorem incisorem dentem inter et caninum superiorem interpositus.

Dentium molarium, numero plerumque viginti, quinque paria utraque maxilla excipit; saepe autem nonnisi sexdecim, vel duo de viginti; rarissime vero duo, tres vel quatuor super viginti inveniuntur. Communia habent, quae sequuntur.

Coronae maiore latitudine sunt, quam altitudine, dentatae, crenatae. *Radices* utriusque prioris paris simplices, semiduplices, vel duplices, trium vero posteriorum parium duplices, triplices, vel quadruplices, raro quintuplices.

Dentes molares maxillae superioris, dentibus molaribus *maxillae inferioris* paullum tantum robustiores, nonnumquam eiusdem magnitudinis, quin et nonnihil minores sunt, ideoque rite structi sat adcurate mutuo se tangunt; verum tamen series dentium molarium superiorum magis retro acta est, et ante inferiorem non nihil externa versus prominet. Primus dens molaris superior primum et secundum inferiorem, secundus vero superior secundum et tertium inferiorem tangit.

Axes superiorum dentium molarium externa,

inferiorum vero, imprimis ultimi paris, interna spectant; nonnumquam vero perpendiculi directionem sequuntur.

Ceterum vero radices huius vel illius e tribus posterioribus dentibus molaribus, imprimis in maxilla superiore nunc plus nunc minus, nonnumquam vero ne quidquam divaricantur, nunc vario modo curvae, vel hami in modum flexae, nunc volutae, aut quasi contortae, nunc longiores, nunc breviores, nunc laeves, nunc nodosae adparent.

Substantia vitrea in antica et postica parte magis, quam in lateribus, plerumque descendit.

*Duo priores dentes molares (bicuspidēs) *)* maxillae superioris et inferioris, canino, quem sequuntur, minores, superiores vero inferioribus maiores esse solent. *Coronae* duos apices, alterum externum altiore, robustiorem, alterum internum depressiorem tenuiorem, imprimis in superioribus dentibus distinctos, in inferioribus sibi invicem iunctos, ut duae foveolae oriantur, habent. *Radices* simplices, vel semiduplices, vel penitus duplices observantur.

Tertius dens molaris plerumque robustissimus, *corona* eius quatuor, quinque, quin et pluribus apicibus, plerumque tribus externis, et duobus internis, instructa, omniumque latissima est, *radix* superioris triplex vel quadruplex, inferioris duplex tantum, non nihil vero crenata esse solet.

*) Quam denominationem MONRO carpit. v. JACKSON *Physiologia et pathologia dentium*. Edinb. 1772.

Superficies externa *coronae tertii et quarti* dentis molaris inferioris magis gibba est, quam superficies interna. Radices retroflexae breviores non nihil sunt radicibus duorum priorum.

Corona tertii et quarti dentis molaris superioris rhombum simulat, altero angulo acuto ad exteriora et priora, altero vero ad interiora et posteriora spectante. — *Radicum* duae exteriores, tenuiores, planiores sat accurate perpendiculum sequuntur, arcteque sibi invicem adcumbunt, tertia, robustissima, terete oblique interna versus inclinante.

Quartus dens molaris minor est tertio. In maxilla inferiore eius et quinti corona decussatim crenata, quatuor apices format; raro autem in maxilla superiore apices tam accurate dispertiuntur.

Quintus sive ultimus *dens molaris*, (*dens sapientiae, tardivus*, quod omnium tardissimus erumpit) minor est quarto, et axis eius omnium maxime ad interna tendit. *Corona* orbiculata, tribus saepe, vel quatuor apicibus instructa est, *radix* vero eius simplex, non numquam conoides, et in maxilla superiore, ubi plurimum vaga est, non numquam quadruplex invenitur *).

Non numquam inferior superiorem magnitudine superat.

ORDO DENTIIUM CONIUNCTORUM.

§. CCXXVIII.

Arcus, quem ordo dentium constituit, ut

*) HUNTER Tab. V. c. c.

urimum parabolicus, non numquam ellipticus, raro autem orbicularis, non numquam a fronte rectus, ab utroque vero latere angulatus, propter atiores et obliquius positos dentes incisores, maioris amplitudinis est in maxilla superiore, quam in maxilla inferiore, ideoque ante marginem ordinis dentium maxillae inferioris in antica parte insignite, in postica vero sensim sensimque minus prominet.

Lateralis etiam *margo*, ex ordine dentium natus, vel *lines* clausis dentibus adparens, undulatus est, in maxilla enim superiore linea marginis dentium externa a primo dente incisore ad secundum dentem molarem usque arcuatim descendit, retro autem arcuatim adscendit, inde dentes maxillae inferioris in priore et posteriore parte, ut maxillae superioris dentes attingant, altius siti sunt, quod praecipue in absolutis calvariis feminarum adparet *).

A primo dente incisore ad ultimum dentem molarem usque coronae dentium semper minus super gingivam eminent, attamen inde a primo dente incisore ad tertium dentem molarem dentes sensim magis pleniores, post vero non nihil tenuiores evadunt.

Superior ordinis dentium *margo* in antica parte simplex ab apice vero dentis canini posteriora versus duplex est, ita ut in internum et externum

*) Videatur egregia icon *Albiniana Tab. I. Fig. III. et Hunteriana Tab. III.*

marginem dividi possit. Dentium molarium *maxillae superioris* externus margo, dentium vero molarium *maxillae inferioris* internus margo acutior est. Hos inter margines posita, initio contracta, ad tertium dentem molarem latissima, post denuo nonnihil contractior superficies in maxilla superiore inferiora quidem, verum initio quidem interna, inde a dente molari tertio autem sensim magis magisque externa, in maxilla autem inferiore superiora quidem, initio tamen interna, ad dentem molarem tertium externa, tunc vero ad dentem molarem quartum et quintum denuo interna spectat, inde absoluto incremento, ordinis dentium nondum attenuatorum, eodem modo, quo margines ossium quorundam dentati, tortuosa quasi directione mutuo sese excipiunt, ita ut, quo loco apices dentium molarium *maxillae superioris* longiores sunt, dentes molares inferiores recessus exhibeant.

Radices dentium incisorum et duorum priorum dentium molarium eadem fere longitudine sunt, radice dentis canini omnium longissima, et longitudine radicum dentium molarium a primo ad ultimum sensim decrescente.

Alveoli dentium molarium *maxillae superioris* (§. CLXVIII. et CCXV.) forsitan propter sinum maxillarem tenuiores sunt alveolis dentium molarium *maxillae inferioris*, qua forsitan ex causa dentes molares superiores tribus radicibus, iisdem praesertim interioribus robustissimis, divaricatis, ne cavitatem sinus olim tangant, instructi sunt,

ade etiam uterque molaris dens deciduus superior infantis tres radices nonnumquam habere solet.

Hac ratione, absoluto ultimo dente molari, dentes illaesi, et nondum attenuati sese habent. — Verum tamen horum dentium primordia in infante maturo vix adparent, eorum enim vices dentes decidui subeunt, quorum *incrementum*, *formatio* et *decrementum* nunc iam indicabuntur.

INCREMENTUM DENTIIUM GENERATIM SPECTATUM.

§. CCXXX.

Nona et decima post conceptionem hebdomade cavum quidem in utraque maxilla, verum neque vestigium nuclei dentis, neque partitio alveoli, sed solummodo crassum, tegmine vasculoso inclusum simplex, idemque vasculosum gelatum observatur *). Circa quintum vero mensem hoc in gelato exiguae, simplices, tenaces, cavae particulae, vel testulae, primordia coronarum dentium, incisorum et caninorum nasciturorum, et plures angulosae particulae, rudimenta dentium molarium, adparent; quae rudimenta futuris coronis nonnihil similia, molliora vero, quam quum decursu temporis substantia vitrea obducuntur, membrana vasculosa, cuius ope fundo alveoli adhaerent, tegit, quae in infante recens nato valde

*) His quidem stabilitis dentes, velut reliqua ossa, antea cartilaginei fuisse quodammodo dici possunt. MOSER Praes. OETTINGER Diss. de dentium ortu. Erlang. 1770. §. 13.

crassa, in externam spongiosam, vasis carentem, coriaceam quasi *), et in internam, firmiorem, vasculosiorem laminam dividi potest.

Huic membranæ et dentis gelato mucosa quædam substantia interponitur, gelatum vero facile a parte ossea recens nata separatur; neque etiam e gelato vasa in os transeunt. Ea etiam gelati pars, quæ iam iam ossea materie tecta, plura vascula, parte quæ nondum tecta est, habet.

Quo facto rudimentorum ambitus et crassitudo sensim augentur. Primordia dentium molarium nasciturorum brevi coalescunt, et sensim sensimque radices nascuntur.

Rudimentum radicum tenue, flexile, corneum quasi, in modum novissimi crescentis cochleæ marginis, initio tot gelatina repletos tubulos, quot radices postea adesse solent, sistit. Dens tribus radicibus instructus, initio simplicem, verum latam aperturam exhibet, quæ adposito strato osseo sensim sensimque contracta in duplicem aperturam abit, cuius maior, quàm aperturâ sensim ulterius arctatur, denuo geminatur. Laminae novæ longiores ab interioribus adpositæ ulteriori radicis incremento operantur. Lamina externa, prima formata, brevissima est, quæ sequuntur laminae, sensim longitudine augentur **), ideoque, quum longitudo radicum augetur, earum crassitudo et cavum apicem versus minuuntur.

*) *HERISSANT Mémoires de l'Académie des sciences à Paris 1754. Tab. XVI. Fig. 3. et 1758.*

**) *HUNTER Tab. XII. Fig. VII.*

Hac ratione lamellas gradibus adponi, interdum tam in substantia vitrea, quam in ipsis radicibus et dentium deciduorum et permanentium, vel penitus absolutorum observari potest, quo tempore margines laminarum in longum mutuo sibi impositos, concentricos annulos sistunt. Eruptis dentibus radicum incrementum demum absolvi-
tur. Quo temporis spatio radices longitudine augentur, dentes sensim prorumpunt, et omni periosteo nudati gingivam, quam in lacinias exiguas quasi findunt, penetrant, quumque radices ulterius longitudine augentur, maxilla vero eodem quidem tempore, verum non eodem adcelerato gradu crescit, semper ulterius protruduntur, donec tandem integra corona super gingivam emineat.

Substantia vitrea ceu massa gelatinosa sensim secreta iam iam natae parti osseae coronarum imponitur, et quasi in crystallos formatur; eodem fere modo, quo calculi biliarii, renales vel vesicales oriuntur. Initio mollior videtur; superiore in superficie coronarum crassissima est, quod huic loco primo imponitur. Quibus locis periosteum denti adhaeret, substantia vitrea deficit.

DENTES DECIDUI,

sive Dentes infantiles, temporarii.

§. CCXXXI.

Dentes, qui ad annum aetatis secundum usque erumpunt, septimo autem anno decidunt, *dentes decidui*; qui vero sequuntur, eosque sup-

plent, *dentes fixi*, sive *permanentes*, *serotini*, *constantes*, audiunt.

Dentes decidui numero sunt viginti; octo incisores, quatuor canini, et octo molares, quamquam vel in immaturo foetu iam iam viginti quatuor alveoli, tertio dente molari quippe permanente, observantur *).

Non solum minores et contractiores permanentibus decidui sunt, sed et facile ab iisdem discernuntur, quum coronae cum radicibus non uno tenore iunctae sunt, sed antequam in radices abeunt, bulbum formant, quod discrimen dentes decidui molares omnium maxime praebent, ideoque radices ad coronas tenuiores, breviores, ideoque infirmiores sunt, quam in permanentibus. Corona *deciduorum dentium incisorum* crassiuscula est, ideoque brevior videtur, caninorum vero teretior est. *Primus deciduus dens molaris*, quantum ad coronae figuram, permanenti denti, qui postea erumpit, haud paullo similis, verum tamen ad reliquos dentes multo maior, et tribus radicibus in maxilla superiore, permanens vero, qui lapso hoc erumpit, una tantum radice instructus est. Quam plurimum in maxilla inferiore primus dens molaris, corona pluribus et acutioribus apicibus munita, et radice distincte duplici, differt.

Secundus dens molaris deciduus a permanente, qui sequitur, plane differt. Corona eius latior
quinque

*) Errant igitur, qui dentes deciduos viginti quatuor numerant, non enim, nisi viginti, decidunt.

quinque apices, in maxilla inferiore tres exteriores, et duo interiores facile notandas offert, radix in maxilla superiore triplex, in maxilla inferiore duplex observatur.

ORDO, QUO DENTES DECIDUI ERUMPUNT.

§. CCXXXII.

Ordo, quo dentes decidui erumpunt, plerumque sic sese habet:

Medium par dentium incisorum inferiorum primum adparet, quod sub finem sexti et initio septimi post partum mensis fieri solet.

Quod lapsis nonnullis hebdomadibus medium par dentium incisorum superiorum sequitur.

Quo facto post aliquot hebdomades exterius par dentium incisorum erumpit, interdum inferius primum, interdum vero superius;

Post, sub finem anni primi primum par dentium molarium, vel inferius vel superius adparet.

Hoc demum dentes canini excipiunt, ita, ut plerumque inferiores primi, deinde vero superiores circa secundum annum erumpant; rarissime enim eruptionem primi paris dentium molarium praecedunt.

Denique vero secundum par dentium molarium sub finem anni secundi, vel tertio demum anno erumpit.

Pedetentim septimo vel octavo aetatis anno tertius dens molaris erumpit, qui vero, quod inter dentes permanentes omnium primus emergit,

medium quasi dentem deciduum inter et permanentem tenet.

ORDO, QUO DENTES CADUNT ET RENASCUNTUR.

§. CCXXXIII.

Eodem tempore, quo incrementum radicum dentium deciduorum eruptorum ad finem perducitur, dentium permanentium forma absolvitur.

Auctis nempe maxillis, quarum alveolis dentes decidui non amplius conveniunt, quique et epiphysibus carent, ideoque in modum aliorum ossium non amplius augentur, circa septimum aetatis annum *dentes mutantur*.

Labefactis emollitione et absorptione radicum dentibus deciduis, septimo aetatis anno utrumque par dentium incisorum inferiorum, octavo superiorum, a decimo inde ad duodecimum annum usque dentes canini et molares decidunt. Septimo autem anno *dentes permanentes* emergunt, et horum quidem primum.

Medium par dentium incisorum superiorum *) et paullo post medium par inferiorum.

Post *reliqui dentes incisores* et superiores et inferiores in conspectum veniunt;

Quos *primum par dentium molarium*, primo superius, deinde inferius sequitur.

Quo facto *secundum par dentium molarium*, primo superius, deinde inferius, adparet.

*) Auctore HUNTER p. 82. dentes permanentes tempestivius in maxilla inferiore erumpunt, quam in maxilla superiore.

Tum demum plerumque *dentes canini*, vel superiores primi, vel inferiores, ut plurimum etiam in hoc latere maturius, quam in illo emergunt.

Tertium par dentium molarium iam iam adfuit. (§. CCXXXII.)

Deinde *quartum par dentium molarium*, sexto et septimo aetatis anno in os mutatum, decimo octavo anno erumpit;

Tandem vero *quintum par dentium molarium*, decimo octavo, vicesimo, trigesimo aetatis anno, plerumque superius par primum erumpit, nonnumquam vero inferius par antecedit.

Ex his prolatis tempus, quo dentes cadunt et renascuntur, serius in homine, quam in quovis alio animali adesse, patet *).

MODUS, QUO DENTIIUM PERMANENTIUM FORMATIO ABSOLVITUR.

§. CCXXXIII.

In embryonibus tenerioribus rudimenta dentium permanentium a dentibus deciduis nullum septum osseum separat. Sub finem septimi, vel inter initia octavi mensis gelatina dentium permanentium incisorum, caninorum et molarium adparèt. In maturo foetu haec primordia in eodem fere plano, quo dentes decidui, posita sunt, et quinto vel sexto post partum mense in os mutantur.

*) BLUMENBACH *Knochenlehre*, p. 258.

Rudimenta dentium *incisorum* permanentium retro posita, in maxilla inferiore dentibus deciduis subiecta, in maxilla superiore iis imposita, cavo osseo undique clauso ab iisdem separantur; quumque eorum cava, alveolis dentium deciduorum, maiora sunt, minime ad unguem pone eos, sed non nihil ad latus posita sunt, inde rudimento dentis canini permanentis non sat amplum spatium pone dentem caninum deciduum nacto situs rudimenta inter secundi dentis incisoris permanentis et primi dentis molaris permanentis, in maxilla superiore altior, in inferiore depressior, quam quibus dentibus interpositum est, conceditur, ita vero, ut rudimentum magis ad radicem primi dentis molaris respiciat.

Rudimenta primi et secundi dentis molaris permanentis in utraque maxilla radicibus dentium molarium deciduorum interiecta, non nihil oblique ad posticam partem vergunt.

Radix nempe dentis decidui, ut exacta disquisitio docet, tamdiu emollitur et absorbetur *), donec dens semper magis magisque labefactus, plurimum vel penitus fere absunta radice, decidat, vel tamquam demortuum, ideoque peregrinum corpus eiiciatur.

*) Verba: „*Carie absumi dentium radices*” *UNGEBAUER Diss. „de dentitione secunda iuniorum; in HALLERI select. Diss. Vol. VII. p. 392. vel BOUDET: „ab acrimonia dentes rodii. RECHERCHES et Observations sur toutes les parties de l'Art du dentiste, Paris 1787. pag. 51. idem dubio procul indicant.*

Plerumque dentes decidui, quo loco a permanentibus tanguntur, plurimum decrescunt, inde, dentem permanentem ad atterendum deciduum facere, probare conati sunt. Verum tamen haec causa adesse nequit; primo enim, radices dentis decidui molliuntur et evanescent etiam, quibus locis dens permanens eas tangere omnino nequit, qui initio non solum cavo osseo undique clauso a dente deciduo separatur, sed nonnunquam, vel lapso deciduo dente, membrana sua vasculosa per aliquod tempus adhuc tegitur.

Neque dens permanens alveolum decidui ingreditur, sed lapso hoc, magna pars huius alveoli evanescit, et peculiaris novus recens formatus alveolus dentem permanentem includere incipit. Deinde in ipsis maxillis iam iam foraminula, quo loco dens erumpet, conspiciuntur, quae rudimentum dentis secuturi propter latitudinem suam nullo modo attingere potest. Quin nonnunquam dentium deciduorum radices absumuntur, nullo dente insequente *). Denique alveolus ipso rudimento amplior est.

Verum tamen vim aliquam dentis permanentis in deciduum esse, minime negatur, nonnumquam enim vicibus dentis decidui a permanente non suppletis, dens deciduus longius tempus persistit.

Eodem modo septa, dentes deciduos ab invicem separantia, prorsum versus molliuntur et ab-

*) HUNTER p. 99.

sorbentur, secuturo dente iusto latiori, quam ut alveolo pristino excipi possit.

Dens igitur novus ea ratione cavo dentis decidui excipitur, ut partim alveolum huius dentis, partim proprium suum novum impleat, magnus enim alveolos inter et dentes nexus est, adeo, ut affecto altero, alter simul afficiatur.

Foraminula, quae diu ante eruptionem dentium in maxillis adparent, pari modo, ac dentes, maiora sunt in maxilla superiore, quam in inferiore. Foraminula primi paris dentium incisorum pone dentes deciduos non nihil ad latus et extrorsum versus, reliquorum vero dentium incisorum directe pone dentes incisores deciduos posita sunt, foraminula vero dentium caninorum, minora praecedentibus, tantum non in proximo pone dentes caninos deciduos sita, in maxilla tantum superiore, erumpente quippe maxillae inferioris dente canino permanente recta sub dente canino deciduo, observantur.

Dens molaris primus et secundus nulla in maxillae margine foramina exhibent, sed recto itinere dentes molares deciduos urgent, ita, ut circumclusi maxilla alveolum pristinorum dentium occupent, dentesque deciduos arcte ab alveolo amplexos protrudant; in maxilla vero superiore, canales, per quos in sinum maxillae radices penetrant, inveniuntur. Quartus et quintus dens molaris irregulare foramen, quin interdum plura offerunt.

Priusquam vero dentes permanentes erumpunt, situm mutant, septimo enim aetatis anno rudimenta coronae priorem maxillae partem, radicis vero posteriorem respiciunt, sensim vero, quo tempore formatio maxillae superioris absolvitur, corona deorsum, radix vero sursum versus dirigitur.

Eodem igitur tempore, quo dentes decidui, permanentes crescunt, tardius tamen absolvuntur, ideoque forsan maiorem firmitatem nanciscuntur. Formatio dentium incisorum et caninorum sex vel septem, primi et secundi dentis molaris septem vel octo, reliquorum verò dentium molarium duodecim vel duorum de viginti, quin et plurium annorum spatio demum absolvitur.

Margo dentium incisorum, qui nunc iam eruperunt, minime rectus, sed quasi crenatus sive clivosus, sive serratus, ideoque forsan aptior est, ut sensim dentes erumpant.

Dentes permanentes paullo ante eruptionem crassiores et teretiores, quam post eruptionem, videntur.

MUTATIO DENTIIUM PROGREDIENTE AETATE.

§. CCXXXV.

Qua ratione progrediente aetate dentes detriti et mollii excidunt, supra iam expositum est *).

Detrita ad cayum usque corona dentis, ulte-

*) *PROCHASKA Annot. Academic. Lib. I. p. 5. Obs. de decremento ossium. Tab. I.*

riorem mali progressum natura nonnumquam arcet, quum massa quadam, plerumque fuscior, molliore tamen, quam reliqua dentis pars ossea est, cavum claudit.

Quin antequam dens, nonnisi gingivae adhuc adhaerens, efficiatur, nonnumquam integer alveolus evanuit, et maxilla laevigata est *).

Plures mutationes a victu dentes subire videntur, esus enim radicum tenacium, et q. s. s. dentes incisores non solum ab invicem amovere, sed etiam citius absumere videtur **).

VARIETATES DENTIIUM.

§. CCXXXVI.

Saepius natura, minime iacturam aut morbis, ultimum par dentium molarium, vel superioris vel inferioris, vel utriusque maxillae deficit.

Nonnumquam dentium molarium anteriorum unus ***), ut plurimum ordine secundus deficit.

Rare exterius par dentium incisorum desideratur, quod si vero ita est, medium par tantum

*) *RUYSCH Obs. anat. chir. Obs. XXXXII. fig. LXVI.*

Icones edentularum maxillarum superiorum et inferiorum videsis apud *RUYSCH l. c. Obs. LXXXII. Fig. LXV.* et apud *HUNTER Tab. VII.*

**) *BLUMENBACH in Göttingischen Magazin, erster Jahrgang, erstes Stück, p. 110. Idem in varusto mumiæ capite observo, et in lithophago ISENFLAMM (praktische Bemerkungen über die Knochen, p. 78.) observavit.*

***) *HUNTER pag. 60.*

extenditur, ut integrum spatium dentes caninos inter occupet *).

Raro autem versa vice duo, tres, quatuor supernumerarii dentes molares, computu itaque facto, triginta sex dentes numero observantur **).

Rarius dens incisor supernumerarius adest ***).

Nonnumquam ante partum dentes erumpunt ****) vel versa vice unus et alter dens deciduus vel post trigesimum aetatis annum persistit.

Nonnumquam dens aliquis tardissime erumpit *****).

Nonnumquam unus dens vel alter tertia vice erumpit, v. c. par medium dentium incisorum *****), par dentium incisorum inferiorum

*) *PALFYN* Cap. VIII. — *ALBINUS* de ossibus, Cap. ult. p. 127. *ANDRÉE* Diss. de prima puerorum dentitione, Lips. 1790. pag. 6.

**) Vide tractatum meum von der Verschiedenheit des Negers vom Europaeer §. 30.

***) *PLoucquet* quinque dentes incisores in maxilla inferiore sese habere, narrat. Diss. aetates humanas, earumque iura sistens. Tub. 1778. pag. 8. *Iavani* Calvaria in *Camperiana* collectione, et *Europaei* in mea collectione, quinque dentes incisores habet.

****) Notum est exemplum *Ludovici XVI.* Galliarum regis. Ipse ego exemplum observavi. • Plura vide apud *HALLERUM* Elem. Phys. Tom. VI. p. 19. superius par dentium incisorum; *GIRARDI* l. c. p. 27. not. c. *BAUDELOCQUE* Entbindungskunst, ed. secund. p. 222.

*****) *Cel. STRACK* aetate LXXVII. ultimum dentem molarem sinistrum in maxilla inferiore erumpere vidi.

*****) *ALBINUS* Annotat. acad. Lib. I. Tab. III. Fig. III. Dentem caninum superiorem trigesimo aetatis anno erumpere vidi; tunc demum temporis dente canino deciduo defluente. Duo exempla narrat *GEHLER* Progr. de dentitione tertia. Lips. 1786.

rum *), vel dens molaris **), rarissime vero omnes tertia vice erumpunt ***).

An observationes, dentitionis quater repetitae fidem merentur ****)?

Versa vero vice omnium dentium per totam vitam defectus narratur *****).

Aberratio dentium, quantum ad *positum, formam et magnitudinem* infinita est.

Interdum tam oblique positi sunt, ut duplex series esse videatur.

Generatim, quo contractior maxilla, eo peior dentium positus, quo latior vero maxilla, eo concinnior positus dentium solitae magnitudinis. Contractae enim maxillae non satis loci dentibus praebent.

Non raro in locis insolitis erumpunt.

Dentes incisores superiores in palato, corona

*) HUNTER pag. 85.

**) V. GEHLERI Icon. Verum tamen utrum dens caninus, icone tertia delineatus, tertia vice renatus sit, an potius restiterit, dubius haereo.

***) UNGEBAUER l. c. in puero decem annorum duodecim dentes tertia vice succrescere vidit, ita ut secundi eodem modo; quo primi absumti caderent. Plura exempla sistit HALLERUS Elem. Phys. Tom. VIII. p. 22. Feminae annorum LXXXVI. quatuor annorum spatio viginti quatuor novi dentes nati sunt. DACHS in den Verhandlingen te Haarlem Tom. XVI. Deel 2. p. 327.

****) HALLER l. c. Tom. VIII. p. 29. duo exempla, verum suspecta, citat.

*****) BORELL Obs. Cent. II. p. 41. „Mulier nata sine ullo dente, sic per sexaginta annos remansit, nec umquam ullum dentem habuit. DANZ in STARK Archiv für die Geburtshülfe, III. B. III. St. p. 684.

priora versus *), quid quod, posteriora versus spectante, observantur **).

Nonnumquam dentes peculiaris figurae, ut corona formam calycis tantum non referat; in palato observantur ***).

Dens incisor superior e. c. transversus nonnumquam est ****), vel sursuum versus hami in modum curvatur *****), vel plane inverso situ, corona sursum, radice deorsum spectante ponitur *****) , vel magis posteriora versus erumpit, dente incisore altero et primo dente molari iusto propius sibi invicem contiguus *****).

Eodem modo dentes molares aberrant. Nonnumquam unus super alterum e maxilla erumpit *****) vel v. c. corona secundi in maxilla superiore sursum spectat *****)).

Nonnumquam ultimus dens molaris repigratus quasi in penitus fere edentula maxilla inferiore absconditur *****) , vel uterque prior dens molaris in plane edentula maxilla inferiore situ, in planum porrecto, latet *****)).

*) Coronam prorsum versus directam in femina vivavidi. —

ALBIN. *Annot. Acad. Lib. I. Tab. III. fig. 2.*

**) ALBINUS l. c. fig. 3.

***). *In collectione mea.*

****). *Ibid.*

*****). *Ibid.*

*****). ALBIN. *Annot. Acad. Lib. I. Tab. III. Fig. I.*

*****). *In vivo ipse vidi. Idem HUNTER p. 116.*

*****). *Ipsé vidi.*

*****). SANDIFORT *Observ. anat. pathol. Lib. III. Tab. X. fig. I.*

*****). SANDIFORT, l. c. *Fig. V. VI.*

*****). *In collectione mea.*

Duplex *) dentium series, quin triplex **), dummodo fides observationibus habenda esset, visa dicitur.

Nonnumquam priorum molarium dentium unus, ad posterioris modum, latus est.

Nonnumquam coronae duorum vel plurium ***), quid, quod, si credere fas esset, omnium in unam coalitae sunt ****),

Vel dens molaris alterum quasi penetravit*****).

Nonnumquam radicem dentis incisoris vel canini superioris *****), quin inferioris, distincte duplicem *****) , rarius triplicem *****) obser-
varunt.

Nonnumquam radices coronis crassiores*****), vel hami in modum curvatae — vel serpentino vel undulato modo flexae sunt, vel corona duplex alterius simplicem alterius hami in modum curvatam excipit — vel ambae dentis radices curvatae

*) *PLINIUS Hist. natur. Lib. XI. Cap. XXXVII. REALDUS COLUMBUS de re anatomica, Lib. XV. p. 67. in proprio filio observavit.*

**) *Lud. COELIUS Rhodiginus Lect. antiquar. Lib. II. cap. XXXIII. p. 78. ed. Basil. 1517.*

***) *HALLER Elem. Physiol. Tom. VI. p. 29. Duos dentes coronis coalitis ipse possideo.*

****) *Valer. MAXIMUS. L. I. C. VIII. PLUTARCH. in vita PYRRI. — Plura exempla in ANTON. v. d. LINDEN Medic. Physiol. Cap. XIII. art. 3. BARTHOL. Hist. anat. rar. C. I. p. 49. Et Anat. reform. L. III. C. II. Lugd. 1677. p. 729. SCHENK Obs. med. Cap. de dentibus.*

*****) *CHESELDEN Osteography Tab. VII. Fig. VII. c.*

*****) *FAUCHARD Zahnarzt Tab. XXVII. Fig. XII.*

*****) *In collectione mea.*

*****) *FAUCHARD l. c. Fig. XIII.*

*****) *In collectione mea.*

ea ratione sibi invicem oppositae sunt, ut repagulum quasi e substantia maxillae ortum includant *).

Nonnumquam radix dentis canini tanta est longitudine, ut in sinum maxillae superioris penetret **).

Versa vice vero medium par dentium incisorum superiorum radicibus et alveolis destitutum gingiva penitus tectum visum est ***).

Nonnumquam dens ulterius non nihil provehitur, quum socius alterius maxillae, quo retentus quasi non nihil videtur, perditur, curtis vero limitibus id adstrictum est, neque corona augetur.

Nonnumquam minores quasi dentes radici maioris, (dens proliferus) nonnumquam vero una, vel plures molecule substantiae vitreae adhaerent, nonnumquam molecule massae vitreae, radícula conspicua instructae radici maioris adnectuntur ****).

Nonnumquam in ovariis morboris praeter crines, nil fere, nisi coronae dentium inveniuntur *****).

*) *Eadem in mea collectione.*

**) *BERTIN Osteologie Tom. II. p. 309.*

**) *HUNTER pag. 8.*

****) *In CAMPERI et mea collectione.*

*****) *BLUMENBACH Obs. nuperae de nisu formativo et generationis negotio. Goetting. 1787. 4. In atheromatis virilis corporis dentes inventos esse, praeter RUVSCH testatur MOEHSEN Beschreib. einer Berlin'schen Medaillen-Sammlung I. Th. p. 423. Post fata infantibus dentitione difficili enectis, dentes ulterius crescere, fabulam redolet. Vid. N. ZACHIAS in Quaest. med. legalibus, 1650. p. 365. Detumuerunt enim gingivae.*

USUS DENTIIUM.

§. CCXXXVII.

Dentes incisores caestriiformes demordent, derodunt, et forficis in modum cibos dividunt, quum inferiores incisores, adacta maxilla inferiore, pone superiores locantur, ideoque quasi exaquantur.

Dentes canini continendo, discerpendo, et frangendis nucleis potius, quam manducando, inserviunt.

Dentes molares cibos manducant.

Acies dentium debilium, incisorum nempe et caninorum, tantum restituit, quantum distantia ab hypomochlio dedit.

Dentes, quod laeves sunt, moti neque linguam, neque labia, neque buccas laedere possunt.

Maxilla inferior, quum manducationis tempore non solum prorsum et deorsum versus, sed etiam alternis vicibus oblique ad latera movetur, dentes molares ad axes agunt, quae in dentibus superioribus ad externa, in inferioribus vero ad interna directae sunt, quare etiam robustissima superiorum molarium dentium radix ad internum latus posita est, ideoque etiam margo internus dentium superiorum, et externus inferiorum primus deteritur.

Dentes molares, latiores externum inter et internum marginem, quam priorem inter et posteriorem, eo magis resistunt, quum hac in directione

vim exserunt, et ab utroque latere unus alterum iuvat.

Praeter usum divisionis, comminutionis et contritionis ciborum, e regno vegetabili et animali, aliarumque rerum, distinctae elocutioni litterarum C. F. I. K. L. R. S. T. X. Z. inserviunt, deficientibus enim dentibus *blaesa lingua* est.

Ad capitis ossa, quum e. c. chorda dentibus continetur, sonum propagari, notum est *).

*) Io. Henric. WINCKLER de ratione audiendi per dentes.
Lips. 1759.

OSSA LINGUALIA.

vulgo *Os hyoides* *).

ALBIN. Tab. Oss. VI.

Infantis. Er. Icon. Oss. foetus Tab. XVI.

§. CCXXXVIII.

Ossium lingualium quinque: *medium* nempe maius, *duo lateralia*, vel *plana*, dextrum et sinistrum, *duo superiora* vel *pisiformia*, dextrum et sinistrum numerantur.

Cartilagini scutiformi, carne linguae, quam extensam servant, tecta, incumbunt, et ad motum inter se composita sunt.

Mutuo inter se ligamentorum ope, reliquis vero sceleti ossibus intervenientibus aliis retinaculis iunguntur.

§. CCXXXVIII.

Lateralia ossa lingualia, *medio* ossi iuncta, arcum ad interna apertum, posteriora et superiora spectantem, plano ad exteriora declivem, media in parte latissimum, circa extremas vero partes contractiorem formant. Loco, quo lateralia ossa medio iunguntur, superiora pisiformia, motu facillima ossicula incumbunt.

§. CCXXXIX.

Medium os linguale, maximum est et latissimum, quadratum, in universum in
exteriore

*) Errant, qui ossa lingualia unum continuum os esse, perhibent, quum non solum sine vi illata, sola putredine, in quinque ossa abscedunt, sed etiam medium os utriusque laterali plano ossi ligamenta capsularia iungunt.

exteriore superficie gibbum, et valde asperum. — Plerumque externam superficiem linea transversa in partem superiorem et inferiorem dividit, e cuius media parte apex, foveolis ab utroque latere, pristinas musculorum insitiones nonnumquam distincte exhibentibus instructus erigitur. — Interior superficies cava est et laevis. — Margo inferior superiori maior est et asperior. Margo lateralis superficiem cartilagine obductam et leniter gibbam sistit.

§. CCXXXI.

Lateralialia ossa, sive cornua, plana ad extremas partes laevi cartilagine obductas et parumper sinuatas, quarum ope medio iunguntur, non nihil robustiora et latiora, tunc paullo contractiora in complanatum cartilagine obductum capitulum desinunt. Margo internus acutior et laevior, nonnumquam etiam falciformis, sursum versus curvatur.

§. CCXXXII.

Superiora pisiformia ossicula lingualia, quo loco cum praecedentibus cohaerent, crassiora sunt et rotunda, sursum versus vero sensim in tenuem apicem desinunt. Nonnumquam cylindrica sunt et longiora.

§. CCXXXIII.

Substantia horum ossium cellularis medullam includit.

§. CCXXXIII.

Medio ossi linguali illigantur in parte inferiore:

M. sterno hyoideus, M. hyothyreoideus, M. omohyoideus, — in parte vero superiore M. mylohyoideus, M. geniohyoideus, M. stylohyoideus, pars M. biventris maxillae inferioris una cum M. hyoglosso, et parte constrictoris medii pharyngis. Ossi *superiori et laterali* pars constrictoris medii pharyngis, et pars M. hyoglossi, quorum musculorum ope ossa lingualia cum in situ servantur, tum multis modis moventur.

§. CCXXXV.

Foetus maturi ossa lingualia eadem quidem forma sunt, qua adulti hominis, attamen tria maiora ossa lingualia ex parte, pisiformia vero integra adhuc cartilaginis naturam referunt. Primum ossificationis vestigium in ossibus lateralibus apparet, post annum vero vigesimum habitus omnium absolutus est.

§. CCXXXVI.

Nonnumquam ossi orbiculari aliud longum imponitur *), nonnumquam plura usque ad processum styloideum inveniuntur, nonnumquam etiam cornibus cartilaginis thyreoideae et ossibus lateralibus lingualibus ossiculum interponitur. Nonnumquam alterum cornu altero longius est et magis curvum. — Saepissime cornua et basis, rarius autem haec et ossa pisiformia in unum continuum os coalescunt.

*) *IANUS PLANCUS de monstris Tab. III. Fig. V. Programma meum vom Neger. §. XXXI.*

OSSIUM CAPITIS , seu CRANII GENERALIS NOTIO.

ALBIN. Tab. Oss. I. II.

§. CCXXXVII.

Haec hucusque sigillatim descripta LVIII, vel, in duas partes diviso osse frontis, LX. ossa, calvariam ea ratione componunt, ut maxilla inferiore, et forsant dentibus incisoribus et nonnullis reliquorum dentium exceptis, reliqua omnia ossa, putredine partibus mollibus absumtis, nexa maneant, eoque minus vivente homine motum inter se concedant.

§. CCXXXVIII.

Firmissimum nexum suturae constituunt, (§. LV.) quarum, quae fines ossium bregmatis constituunt, peculiaribus nominibus donantur. — *Sutura coronalis*, terminos ossa bregmatis inter et os frontis; *sutura sagittalis*, quae ad perpendicularum mediam prioris suturae partem tangens, nonnumquam *suturam frontalem* format, terminos utrumque os bregmatis inter; *sutura lambdoidea* terminos ossa bregmatis inter et partem occipitalem ossis sphenobasilaris constituit. *Suturae squamosae* ossa bregmatis praecipue ab ossibus temporum disterminant.

§. CCXXXVIII.

Quibus locis ossa tenuia contermina sunt, ibi suturae os ad perpendicularum transeunt, quibus vero locis ossium substantia crassior est, non solum obliquo itinere suturae transeunt, verum

etiam superficies ea ratione plerumque convertunt, ut pars marginis ossei contiguum marginem tegat, alia vero eiusdem pars sensim ab illo tegatur. Qua ratione suturae coronalis, squamosae etc. compages magis firmatur.

Semper vero suturae, etsi in superficie externa crispae, in interna multo simpliciores sunt, et harmoniae similiores.

§. CCL.

Usus horum sic sese habentium terminorum ossa cranii inter bene liquet *).

Incrementum ambitus calvariae levant, ni enim inter ossa capitis mox post partum suturae interponerentur, haec crescere non possent, nisi alia ratione natura rem institueret. Tali igitur modo incrementum calvariae cum incremento re-

- *) Ulteriore fortuitarum externa vi illatarum fissurarum progressum in adulto inlibere nequeunt, quod experientia super homine vivo et mortuo capta docet; recenti enim in statu ossa suturis tam valido nexu iunguntur, ut fissura ex uno osse, non obstantibus hisce terminis, in alterum extendatur. Re etiam vel leviter lustrata, non satis aptae huic consilio suturae videntur. In sicca calvaria, neque semper in hac, terminos fissuris constituunt, verum etiam hic suturae praeter naturam hiant. — Neque vasis transmittendis destituta sunt, ad hoc enim officium positus earum non satis aptus est, neque maioribus vel copiosioribus vasis permeatae observantur, quid, quod nonnumquam transitum vasorum potius impediunt. Dura vero cerebri membrana, et pericranium suturis firmitus adhaerent, quam reliquis ossis locis.

Strosch Diss. Resonitus experientia comprobatus. Arg. 1722. Adiectis egregiis iconibus.

liquorum ossium convenit; initio enim suturis, vel potius lineis cartilaginis ossa iis locis conglutinantur, verum tamen non nisi in embryonibus ad fonticulos, ut aiunt, haec linea notabili latitudine observatur. Ossibus enim capitis hic locorum cerebro crescente placide quasi diductis, cartilago augetur, latior evasura, nisi pristina pars simul in os mutaretur, inde, ossa calvariae, eodem modo, quo ossa longa, diductis epiphysibus, vel quod unum idemque est, marginibus crescere, liquet, etsi in ossibus longis sutura epiphyses inter et diaphysin non crispetur.

Quo iunior igitur infans, eo minus crispa et implexa sutura, vel ut rectius loquar, linea cartilaginosa angusta, ossa iungens, observatur. Quum vero aucta aetate ossa, crescente cerebro, diducuntur, eorumque crassitudo, adposita cum internae, tum externae potissimum tabulae, (internae enim incrementum citius absolutum videtur) massa ossea, augetur, non potest non esse, quin haec crispa suturae forma, quum quidem nasci coepit, externa in superficie tandiu augeatur, donec tandem ipsa ea quam maxime impediat, quominus cerebrum calvariam ulterius diducere possit, quod pubertatis tempore accidit. Rarissime haec ossificatio ad aetatem virilem usque detinetur *).

*) *ROSEN et SIDREN Diss. de ossibus calvariae. Upsal. 1748.*

Nonnumquam aucta aetate, nonnumquam etiam iam iam in iunioribus sutura evanescit, ut ne vestigium quidem eius remaneat. Saepissime iam iam in infantibus sutura, partem ossis temporum mastoideam cum parte occipitali ossis sphenobasilaris coniungens, oblitterata invenitur, quod non potest non esse, quin magnam vim in futuram calvariae formationem habeat; etenim, oblitterata sutura, ideoque loco amplius cedere nescio, reliquis tamen calvariae partibus circum haec loca iugiter auctis, calvaria deformis fiat necesse est. Hic deformitatum tam numerosarum occipitii fons esse videtur *).

§. CCLI.

Versa vero vice nonnumquam veris suturis vel harmoniis, iam parva, iam magna ossicula, sive ossa, ut audiunt, *triquetra*, vel in uno, vel symmetrica ratione in utroque latere a reliquis ossibus disterminantur. Ubique quidem in calvaria observantur, praecipue vero in sutura lambdoidea, quae hac ex causa nonnumquam duplex vel triplex esse solet, rarius vero sutura sagittalis vel squamosa duplicatur. Quin et in alis ossis sphenobasilaris, quid quod in ipsis faciei ossibus, e. c. in processu nasali maxillae superioris eiusmodi insolitae suturae observantur.

Fonticulum, ut audit, quadragésimo anno nondum in os mutatum viderunt.

*) Exemplum oblitteratae suturae coronalis et sagittalis *Kweek-school 2 Deel. p. 44. fig. I. — III.*

Quum vero positus, numerus, figura, magnitudo, quin et praesentia horum ossiculorum plurimum variant, neque ipsa ossicula ad solitam et concinnam ossium calvariae structuram pertinent, ossibus calvariae non adnumerantur, sed insolita separata pars illius ossis calvariae, ad quod, quantum ad positum vel maximam partem, vel penitus, si ad naturam res esset, pertinerent, pronuntiantur *).

In maturo foetu fontanellae, ut aiunt, considerandae veniunt. Maior, *quadrangularis anterior* fontanella ossibus frontis et ossibus bregmatis in sutura sagittali interposita, rhomboidea fere est, ut angulus acutissimus ossibus frontis, obtusissimus ossibus bregmatis excipiat.

Ambae *posteriores* fontanellae, dextra et sinistra, ossa bregmatis inter et partem occipitalem ossis sphenobasilaris positae, trigonae fere esse solent.

Fontanella maior nonnumquam in infante

*) Super insolitis suturis videantur *van DOEVEREN Obs. academ. Cap. XIII. p. 184. sq.* et *SANDIFORT Obs. anat. pathol. Lib. III. Tab. VIII.* ubi optimae icones inveniuntur. *DAV. MAUCHART Eph. N. C. Dec. III. ann. III. p. 147.* in uno eodemque capite suturam frontalem, sagittalem et lambdoideam duplices observavit. Litteraturam obiecti videsis apud *BOSE Progr. de suturarum cranii humani fabricatione et usu. Lips. 1763.* Non datur fere sutura, cui ossa triquetra interposita coram non viderem, nec ullam varietatem in collectione mea non adservatam novi.

mature proprium rhomboideum os triquetrum habet *).

§. CCLII.

Centrum gravitatis totius calvariae humanae iuncta maxilla inferiore, medium circiter locum ante processus condyloideos occipitis, et quidem in omni aetate tangit, quum vero v. c. maxilla inferior Nigritiae propter amplitudinem suam ponderosior est, maxilla Europaei, calvaria, abiecta maxilla inferiore, tabulae horizontali imposita, reclinetur, est necesse.

§. CCLIII.

Septem, vel diviso osse frontis, octo ossa capitis I. Os frontis; II. III. Ossa bregmatis; IIII. Os sphenobasilare; V. VI. Ossa temporum; VII. Os ethmoideum, excepto igitur osse ethmoideo, validissima et maxima capitis ossa proprie *cranium*, reliqua vero tredecim *faciem* constituunt.

§. CCLIII.

Calvaria ad faciei ossium rationem maior in homine est, quam in ullo alio nobis noto mammali. Quo iunior foetus, eo globosior non solum calvaria est, sed etiam tanta, ut ossa faciei epiphysis eius esse videantur.

§. CCVL.

Forma externae faciei calvariae *catagraphica*, ad priora, superiora et posteriora, ideoque ultra dimidiam partem, sat concinne elliptica est, ita

*) F. G. VOIGTEL *Fragmenta semiologiae obstetriciae*. Halae 1792. Tab. II.

ut minor circulus prior sit, maior vero posterior. Ratio radii circuli minoris ad radium maioris in infante sese habet, ut III. ad IIII. vel II. ad III. in adulto autem, ut XXX. ad XXXI. quod alia ratione sese habere videtur, pars enim calvariae prior multo maius incrementum, quantum ad ambitum, quam pars posterior, aucta corporis magnitudine, capere solet.

Nec minus maximus horizontalis ambitus elliptica figura est, ita ut minor circulus prior sit, maior autem posterior.

Maxima diameter superficiei externae calvariae; *coniugata*, id est, diameter os frontis inter et partem occipitalem ossis sphenobasilaris longitudinem sex circiter cum dimidia unciarum parisiensium aequat, maxima autem diameter *transversa* quinque cum dimidia unciarum, posterior *perpendicularis* mediam partem foraminis occipitalis inter et verticem quinque unciarum.

Inde, a calvariis maturi incrementi, quae ab ossibus concinne ad se invicem congruere visis sistuntur, verum tamen has diametros multo maiores habent, non ad staturam giganteam, sed ad morbos conclusio valet.

Pars calvariae temporalis in infantibus globosa, in adultis vero complanata adparet *).

§. CCLVI.

Externa calvariae superficies superne, ab utroque latere, et a tergo, exceptis eminentiis, lineis.

*) Actio musculorum temporalium causa est, autore MONRO.

et sulcis in osse frontis, ossibus bregmatis et osse sphenoccipitali descriptis, sat laevis, et, exceptis quibusdam foraminulis, clausa est vel solida, basis vero valde inaequalis, interrupta et foraminibus pertusa; in antica enim parte basis ad formandam orbitam ab imo sinuatur, deinde ad constituendum narium cavum multis locis, partim orbitas inter, partim ad palatum descendit, post ad sistendum arcum zygomaticum prominet, in processum mastoideum demittitur, et ad condylos articulares in laevem superficiem abit.

Externa calvariae superficies in universum ad strictiores symmetriae regulas constructa est, quam interna.

§. CCLVII.

Cavum calvariae, excepto fundo, in universum sphaerae figuram sat bene imitatur, verum antica eius facies angustior est, postica latior.

Idem cavum satis *symmetricum* est, exceptis rarioribus casibus, in quibus dextra vel sinistra dimidia calvariae pars, sine morbo, magnitudine alteram partem superat.

In canalem columnae vertebralis transit.

Fundum cavi, non nihil planius, margine alarum superiorum ossis sphenobasilaris acuto in duas partes, elatiorem, et depressiorem, lobum priorem et posteriorem cerebri ab invicem separantes, dividitur, pyramis vero ossis temporum et linea transversa interna partis occipitalis ossis

sphenobasilaris cavum cerebelli, foramen vero occipitale cavum medullae spinalis constituit.

Inde duae quasi *foveae*, maior, prior, superior fovea cerebri, ex osse frontis, osse ethmoideo, corpore, alis superioribus et mediis ossis sphenobasilaris, parte squamosa et superficie priore pyramidis ossis temporum, minor vero posterior et inferior, fovea cerebelli, praeter superficies pyramidis posteriores maximam partem ex osse sphenobasilaris natae sistuntur, ita ut angulus priorem inter et posteriorem pyramidis superficiem ambas foveas ab invicem disiungat.

Fovea cerebri ephippio ossis sphenobasilaris, crista ossis ethmoidei, linea et sulco ossis frontis, sulco ossa bregmatis inter, et vestigio sinus falci-formis in parte occipitali ossis sphenobasilaris in *dextram* et *sinistram* partem dividitur.

Fundus foveae cerebri pro excipienda parte loborum priorum, superficiebus orbitalibus ex osse frontis et utraque ala superiore ossis sphenobasilaris natis incumbentium, *gibbus* est, pro excipienda vero parte loborum posteriorum, alis mediis ossis sphenobasilaris et superficiei pyramidis priori incumbentium, sinuatur.

Foveam cerebelli, retro medias inter cerebri loborum foveas positam, spina interna partis occipitalis ossis sphenobasilaris in *dextram* et *sinistram* partem dividit.

Medius ossis sphenobasilaris sinus initium medullae spinalis excipit.

§. CCLVIII.

Calvariae loca varia sunt *crassitudine*, maxima est superior fornix, minima, exceptis parte ossis ethmoidei cribrosa et superficie orbitae superiore, regio temporum, et pars inferior occipitis, quae tamen validis musculis muniuntur. In universum in superiore parte crassior est calvaria, in inferiore vero tenuior. Ceterum vero quorundam hominum calvaria ubique crassior est, inde a magno capite, vel externo calvariae habitu ad cerebri magnitudinem conclusio non semper valet. Multa magna, quin plerumque fere magna cerebra tenuiora calvaria, ratione ad alias calvarias habita, teguntur, quam minora cerebra. Quo loco calvaria crassior est, e duabus tabulis, externa et interna, diploën includentibus, constat.

In osse frontis hae tabulae tantum ab invicem recedunt, ut cava, sinus vocant, formentur.

§. CCLVIII.

Interna tabula, forsitan ob maiorem laevitatem, non nihil fragilior externa, indeque *vitrea* vocata, multisque locis externa tenuior, praeter diversae altitudinis vestigia, sulcos vel etiam canales ramorum maiorum arteriarum et venarum durae cerebri membranae, periostei vices simul subeuntis, et foveolas pro excipiendis sic dictis glandulis, praesertim ea parte, quae basin cerebri excipit, multos clivos, impressiones vel foveas, rudia gyrorum cerebri ectypa, offert. Plerumque natura os ad cerebri formam, rarius cerebrum ad ossis formam constituit.

Pondus cerebri ectyporum in calvariae fundo causa esse nequit, dubio procul enim durae cerebri membranae, quae fundum versus tenuatur, tribuenda sunt; inde etiam in, ut audiunt, dimetopis, vel, quum maxima ossis frontis pars, quae alioquin orbitas constituit, prorsum versus ad perpendiculum fere adscendit, ideoque ponderi cerebri non patet, distincta gyrorum cerebri ectypa inveniuntur.

Superiore in superficie calvariae forma cerebri minus distincte patet, ibi enim dura cerebri membrana crassior est, et sulci cerebri a venis et arteriis aequantur.

§. CCLX.

Nec minus ipsa ossium calvariae substantia sine morbi suspitione, quibusdam eiusdem aetatis et sexus, firmior, solidior, durior, laevior, planior, quibusdam vero non nihil fragilior, spongiosior, mollior, asperior observatur, quae diversitas haud dubie e vitae genere oritur. Verum tamen pyramis inter omnia calvariae ossa duritie eminet.

En igitur magnas ossium calvariae, cum ad celeton, tum ad se invicem relatorum, varietates, diversa eorum figura est, diversus numerus, ossibus triquetris pro peculiaribus ossibus habitis. Nonnumquam, ratione vero quamvis incognita, parva et tenuia sunt ossa, nonnumquam parva et crassa. Nonnumquam calvaria mirum in modum elata, nonnumquam depressa, iam contracta, vel

ab utroque latere compressa, iam eleganter globosa, iam bulbosa vel gibba est, nonnumquam suturae elatae, nonnumquam vero depressae observantur.

§. CCLXI.

Linea facialis, vel linea, tuber ossis frontis, naso superpositum, et plurimum prominentem maxillae superioris partem tangens, cum linea horizontali, per meatum auditorium et fundum cavi narium ducta ad summum C. graduum, in Nigritta LXX. graduum, in simia, homini similima, LVIII. graduum angulum *) sistit, neque adhuc dum animal, maiori angulo maxillari, quam homo, instructum novimus.

Perfectissimum igitur formae exemplar quam maximam calvariam, sive, quod eodem redit, quam maximum pro recipiendo cerebro spatium, et quam minima, recipiendis sensuum, masticationis et deglutitionis organis dicata ossa refert, ideoque frons rectam cum naso lineam efficit, et in verticem adcuratissime globosum abit, qui in adcurate globosum occipitium subducitur, maxillis quam minimis, et quasi retractis.

Omnis aberratio ab hac regula, quo maior, eo similiorem hominis calvariam bruti calvariae efficit **).

*) CAMPER *Verhandeling over den Orang-Outang*. Amst. 1782. Tab. II. Fig. II. *Es. über die Gesichtszüge*, Berlin 1792.

**) Quanti momenti cognitio calvariae in physiognomia sit, solide LAVATER *Tom. II. p. 128.* docuit.

Mentum, sive pars media maxillae inferioris in homine magis, quam in ullo alio animali, prominet.

§. CCLXII.

Nullo nobis noto animali, excepta simia, externa orbitae superficies, quemadmodum in homine, clauditur.

§. CCLXIII.

Foramen magnum ossis occipitis, in homine mediae parti fundi calvariae vicinius est, et fere horizontale, reliquis vero omnibus animalibus ad posteriora et oblique ponitur, vel eius situs ad perpendicularum adcedit *).

*) DAUBENTON *Mém. de l'Acad. des Sciences*, Paris 1764. p. 568.

O R B I T A E.

ALBIN. Tab. Oss. I. III. V.

§. CCLXIII.

Organis visus excipiendis dicatae *orbitae*, cavarum ab invicem disternatae, proxime calvariae supponuntur.

Cuneiformes nonnihil, vel pyramidales, apice posteriorem et internam faciem, vel foramen opticum, basi vero priorem et externam faciem spectantes in ambitu basis orbiculato quadrato *superiorem, inferiorem, externum et internum* marginem sistunt, qui iuncti angulum frontalem, temporalem, malarem et lacrimalem formant.

Nonnumquam ambitus rhombum fere imitatur, et angulo frontali sursum, angulo vero malarum deorsum versus tendit.

Quatuor etiam superficies, *superior*, plerumque in planum horizontale porrecta et sinuata, *inferior*, paullo planior, ad externa et inferiora declivis, *interna*, leniter gibba, *externa* planior, omnes vero laeves, et angulorum orbiculatorum ope invicem iunctae, notantur.

Ambitus marginis non nihil angustior est ambitu cavitatis mox subsequenter.

Internis dextrae et sinistrae orbitae superficiebus sat bene mutuo sibi parallelis, *axes* orbitarum in posteriore et interna regione prope ephippium angulum invicem constituunt, inde oculis
maius

maius spatium patet, quam si axes parallelo situ sisterentur *).

Externa superficies non nihil elatior *interna* est, minus tamen prominet.

§. CCLXV.

Orbitas septem ossa, *superficiem* quidem *superiorem* solum os frontis, *internam* os lacrimale et os ethmoideum, *inferiorem* maxilla superior et pars ossis palatini et ossis zygomatici; *externam* os zygomaticum et ala magna ossis sphenobasilaris, constituunt.

§. CCLXVI.

Ceterum orbitae nonnumquam contractae sunt et retractae, nonnumquam minores, planae et valde apertae, nonnumquam amplissimae, nonnumquam circulares, nonnumquam vero quadratae magis, nonnumquam protensae sive a summis deorsum versus compressae.

Raro altera orbita alteram amplitudine multum superat.

Foramina orbitarum vide §. CCLXXV.

*) CAMPER in HALLERI Select. Diss Vol. III. Tab. V. fig. I. II. III. IIII.

CAVUM NASALE *).

ALBIN. Tab. oss. I. II. III. IIII. V.

§. CCLXVII.

Ossea, recipiendae extendendae membranae olfactoriae dicata cava, inter orbitas et sub iis ponuntur.

Quatuordecim ossa, os frontis, ossa nasi, maxilla superior, ossa palatina, conchae inferiores, ossa lacrimalia, os ethmoideum, os sphenobasilare et vomer ea constituunt.

§. CCLXVIII.

Septum, a lamina ossis ethmoidei perpendiculari, vomere, crista ossis frontis, crista ossium nasi, crista ossis ethmoidei, crista maxillae superioris et ossium palati formatum, cavum nasale in *dextram* et *sinistram* partem dividit.

Septo plerumque non ad perpendicularum, sed oblique posito, alterius partis amplitudo tanto augetur, quanto alterius minuitur.

§. CCLXVIII.

Aditus ab ossibus nasi et maxillis superioribus formatus, quantum ad osseam compagem ambabus cavi narium partibus communis et cordiformis, ad priora marginem acutum constituit, qui ad inferiora et media apice deorsum curvato prominet.

§. CCLXX.

Exitus autem, ab alis ossis sphenobasilaris in-

*) AURIVILLIUS de Naribus internis in SANDIFORT Thesaur. Vol. I.

ferioribus, osse palatino, et vomere formatus minime communis, sed unicuique sinui proprius, maiore altitudine quam latitudine, ovatus, ab utroque tamen latere compressus, supra rectus, infra orbiculatus, et oblique prorsum versus tendens, observatur.

Fundum *sinuatum* maxillae superiores et ossa palati formant.

Internam superficiem in perfecto statu laevem, planam et perpendicularem interna septi narium superficies constituit.

Externa superficies a maxilla superiore, osse palati, osse lacrimali, osse ethnoideo, osse sphenobasilaris oritur, plurimum inaequalis est, ita, ut tres conchae ad interna prominentes, et quasi convolutae, *tres vel quatuor canales narium*, vel deorsum versus hiantes *meatus* *), *inferiorem maximum meatum narium*, fundum inter et concham inferiorem, *medium*, concham inferiorem inter et mediam, *superiorem brevior*, concham mediam inter et superiorem sistant. Plerumque vero supra exiguus conchiformis gyrus adest, cui et parti priori ossis sphenobasilaris *supremus brevissimus meatus narium* interponitur **).

Superior et supremus meatus in antica parte clausi sunt, in postica vero hiantes, *medius* vero et *inferior* in utraque parte hiant.

*) HALLER Icon. Fasc. III. SCARPA Annot. Acad. Tab. II Fig. I.

**) SANTORINI Tab. posth. III. litteras F. inter et G.

Superiorem superficiem omnium minimam lamina ossis ethmoidi cribrosa efficit.

In meatum utriusque partis cavi nasalis *superiorem*, et quidem in mediam eius partem cellulae ethmoidales (§. LXXXXV.) in posticam partem sinus sphenoidales (§. LXXXVIII.) cellulae maxillae superioris vagae (§. LXXXXVI.) cellula conchae mediae (§. LXXXXV.) et cellula ossis palatini (§. LXXXVII.) hiant.

In *meatum medium* sinus frontalis et sinus maxillaris hiant. (§. LXXXVII. LXXXXVI.)

In *meatum inferiorem* canalis lacrimalis hiat.

§. CCLXXIII.

Hi sinus non solum capitis pondus minuunt, verum etiam humores adservant, qui, quicumque demum capitis situs sit, ex uno vel altero sinu libere in cavum nasale stillare possunt.

F O R N I X P A L A T I N U S.

ALBIN. Tab. oss. I. II. III. IIII. V.

§. CCLXXIII.

Fornice osseo, ex ossibus palatinis, maxillis superioribus, interna superiorum et inferiorum dentium, et limbi alveolaris maxillae inferioris superficie nato, lingua includitur.

In postica parte latior et planior, in antica contractior, magisque gibbus, linguae formam quodam modo imitatur, et in marginem orbiculatum abit. Posteriores dentium incisorum superficies fornicem, interrupto autem margine, continuant.

Pars fornicis, limbo alveolari interposita, palatum stabile audit.

CONSPECTUS FORAMINUM, HIATUUM, APERTURARUM, CANALIUM IN NON DISSUTA CALVARIA.

ALBIN. Tab. Oss. I. II.

§. CCLXXV.

In *externa calvariae superficie*, et quidem

In *vertice* conspiciuntur

Foramina parietalia, arterias et venas emittentia. (§. CV.)

In *orbita*.

Foramina supraorbitalia pro nervo et arteria frontali. (§. CXXIII.)

Foramina infraorbitalia, sive aperturae canalium infraorbitalium pro nervo infraorbitali. (§. CLXVIII.)

Fissurae eorundem canalium. (§. CLXVIII.)

Aperturae superiores canalium lacrimonas. (§. CLXVIII. et CLXXXIII.)

Foramina orbitalia interiora, surculos rami quinti nervorum paris emittentia. (§. LXXXV.)

Foramina optica. (§. CXXIII.)

Fissurae orbitales superiores, tertium, quartum et sextum par nervorum, et primum ramum quinti nervorum paris et venam ophthalmicam emittentes. (§. CXXIII.)

Fissurae sphenopalatinae, ad quas secundus ramus quinti nervorum paris dividitur.

Fissurae orbitales inferiores, pro emitten-

dis nonnullis surculis secundi et tertii rami quinti nervorum paris. (§. CLXVIII.)

Foramina rotunda, (verum non in omnibus externe conspicua) secundum ramum quinti nervorum paris excipientia. (§. CXXIII.)

In palato.

Foramina, vel foramen commune ponedentes incisores, pro surculis secundi rami quinti nervorum paris. (§. CXXIII.)

Priora, posteriora et externa foramina ossium palati, pro nervis palatinis secundi rami quinti nervorum paris. (§. CLXXV.)

In aure.

Aperturæ meatum auditoriorum. (§. CXXXV.)

Fissuræ pro tympano et musculis mallei externis. (§. CXXVIII.)

In basi calvariae.

Foramina stilomastoidea pro nervo faciali et arteria et vena stilomastoidea. (§. CXXXIII.)

Foramina ovalia pro tertio ramo quinti nervorum paris. (§. CXXIII.)

Aperturæ canalium pterygoideorum, surculos rami secundi quinti nervorum paris excipientium. (§. CLXXV.)

Foramina spinosa pro arteria durae membranae media. (§. CXXIII.)

Aditus ad canales caroticos. (§. CXXXIII.)

Fossae et foramina pro venis iugularibus, (§. CXVII.) nervo glossopharyngeo, vago, et ad par vagum adaccessorio.

Foramina condyloidea anteriora pro nervo linguali medio. (§. CXVII.)

Foramina condyloidea posteriora, venas excipientia, vaga. (§. CXVII.)

Foramina mastoidea, venas excipientia, (§. CXVII.) vaga.

Foramen occipitale magnum. (§. CXVII.)

In maxilla inferiore.

Foramina maxillaria posteriora, vasa et nervos tertii rami quinti paris nervorum transmittentia. (§. CCXXI.)

Foramina mentalia. (§. CCXXI.)

In interna calvariae superficie. (ALBIN, Tab. oss. III.)

In vertice.

Foramina parietalia, v. supra.

In fundo calvariae.

Foramen coecum, vasa et duram cerebri membranam excipiens. (§. LXXXXV.)

Foramina laminae cribrosae pro nervis olfactoriis. (§. CLVIII.)

Foramina optica. (§. CXXIII.)

Fissurae orbitales superiores; v. supra.

Foramina rotunda, v. supra.

Foramina ovalia, v. supra.

Foramina spinosa, v. supra.

Exitus canalium caroticorum. (§. CXXXI.)

Sulci et foraminula surculi nervi facialis ad secundum ramum quinti paris nervorum. (§. CXXXI.)

Canales nervi facialis et nervi auditorii.

(§. CXXXII.)

Exitus aquaeductuum vestibulorum,

(§. CXXXIII.)

Exitus aquaeductuum cochlearum.

(§. CXXXII.)

Foramina iugularia, v. supra.

Foramina condyloidea anteriora, v. supra.

Foramina condyloidea posteriora, v. supra.

Foramina mastoidea, v. supra.

Foramen occipitale magnum, v. supra.

REGIONES CALVARIAE.

§. CCLXXVI.

Superne regionem frontis regio sincipitis, hanc regio verticis, hanc vero regio occipitis, in regionem nuchae desinens, excipit.

Ab utroque latere *regio frontis* abit in *regiones temporum*, quae in *regiones aurium* mutantur. Prorsum versus *regio frontis* a media parte in *regionem nasi*, et ab utroque latere in *regiones oculorum* abit, quas externa versus *regiones malarum*, post *regiones buccarum*, in *regione oris et menti* invicem iunctae excipiunt.

ATLAS sive PRIMA COLLI VERTEBRA.

Atlas sceleti virilis videatur apud *ALBINUM* Tab. X. — *Icon. Oss. foetus* Tab. VIII.

Atlas vero sceleti feminei apud *BIDLOO* Tab. LXXXIII. Fig. I. et II.

§. CCLXXVII.

Prima vertebra colli hisce signis dignoscitur :

In universum annuli figuram refert, processus eius transversi super reliquos omnes utrimque eminent, ipsaque capiti et secundae vertebrae colli iungitur.

§. CCLXXVIII.

Pars, quae in reliquis vertebrais corpus constituit, heic nonnisi *arcum priorem* format, *tubere* obtuso e musculi longi colli nexu, pone vero *fovea orbiculari*, cui processus epistrophei, sive vertebrae secundae, capite in orbem acto, atteritur, instructum. Inferior tuberis pars e ligamenti nexu exasperatur.

§. CCLXXVIII.

Post utrumque in crassam *partem lateralem*, superne *sinus articulares*, oblongos, sinuatos, in antica parte mutuo sibi propiores, in postica ab invicem remotiores, et oblique interna versus descendendo mutuo sibi ad internum marginem viciniore, quam ad superiorem, et superficiebus capitis articularibus iunctos exhibentem, abit. Pone sinus articulares *sulcus profundus*, arteriam vertebralem, quae per processum transversum ascendit, excipiens, observatur.

Interna versus *tubercula* aspera, et *foveola*, cui ligamentum transversum atlantis illigatur, conspiciuntur.

Infra *sinus articulares*, leniter tantum sinuati, ambitu orbiculares, obliqui, superficiebus epistrophei articularibus respondentes, locantur.

Utraque haec articularis superficies processuum obliquorum vices subit.

§. CCLXXX.

Processus transversi atlantis, omnium robustissimi, duplici quasi radice, priore graciliore, posteriore longiore et robustiore, oriuntur, foramen, quod arteria, vertebralis pervadit, maius, quam reliquae vertebrae, sistunt, et in apicem plus minusve capitulatum desinunt.

Posterior arcus, priore maior, initio transversus, supra pro arteria vertebrali et primo nervorum cervicalium pare, infra pro secundo nervorum cervicalium pare excipiendo, reliquis vertebris sinuatiore, media in parte orbiculatio et crassior, superficie interna laevi, vel obliqua, vel perpendiculari instructus, retro in *apicem obtusum*, tuberculum posterius vocant, processibus reliquarum vertebrarum spinosis analogi quid exhibentem, cui M. rectus capitis posterior minor illigatur, desinit.

§. CCLXXXI.

Foramen vertebrale hac in vertebra, maius, quam in reliquis omnibus vertebris, tuberculis prominentibus in priorem partem, pro processu

odontoide epistrophei et in posteriorem partem, pro medulla spinali, dividitur.

§. CCLXXXII.

Atlanti, et quidem tuberculo arcus prioris M. longus colli, M. rectus capitis internus minor; Processui transverso M. rectus lateralis, M. obliquus superior et inferior, M. levator anguli scapulae, M. transversus, anterior et posterior, M. scalenus anterior, nonnunquam etiam M. transversus colli; Arcui posteriori M. rectus posticus minor illigantur.

§. CCLXXXIII.

In maturo fetu nonnisi duae partes osseae dantur, sive radices arcus posterioris in os versas interiecta pars cartilaginosa iungit; Tertia vero pars ossea in corporibus reliquarum vertebrarum observatur.

Varietates.

§. CCLXXXIII.

Nulla fere est vertebra, excepta vertebra lumborum ultima, quae tot figurae et magnitudinis vicissitudinibus subiecta sit, quot atlas, quin atlas raro symmetriam servat, vel dextra pars sinistrae similis observatur. Nonnumquam *superficies articularis superior* quasi divisa est, nonnumquam distincte duplex, nonnumquam ad priora, nonnumquam ad posteriora latior, iam planior, iam sinuatio, nonnumquam priores superficierum articularium partes mutuo sibi propiores, nonnumquam vero ab invicem remotio-

res sunt, extremae igitur posteriores in prima causa magis ab invicem distant, quam in secunda; iam plus, iam minus ad interna inclinantur.

Posteriore superficiei articularis parte ad posteriora multum vergente, dimidius nonnumquam, quin integer arcus in posteriorem arcum demittitur, ita ut arteria vertebralis undique ossibus cingatur, nonnumquam hicce arcus adventitius exiguum foramen insuper exhibet.

Nonnumquam foramen *processus transversi*, radice posteriore solito crassiore, a fronte apertum, nonnumquam vero duplex, nonnumquam hoc in latere multo minus est, quam in illo; nonnumquam *processus transversi capitulati* multum ad latera prominent, nonnumquam multo debiliores ac breviores, parum a *processu transverso epistrophei* differunt.

Nonnumquam arcus prior tantum contractus est, ut superficies articulares superiores superficiem articulare, cui *processus epistrophei odontoides* iungitur, premant.

Nonnumquam media arcus posterioris pars deficit.

EPISTROPHEUS

sive

SECUNDA COLLI VERTEBRA.

Virilis sceleti epistropheum sistit *ALBIN. Tab. X. — Icon oss. foetus. Tab. VII.*

Feminei vero *BIDLOO Tab. LXXXXIII. Fig. II. III.*

§. CCLXXXV.

Secunda vertebra colli inter omnes reliquas processu odontoide, et inter primam, tertiam, quartam, quintam robore, et magnitudine sinuum articularium superiorum eminet.

§. CCLXXXVI.

Vices superficiei articularis superioris *corporis* processus odontoides, in antica parte nonnihil gibbus, in postica vero cavam superiorem articulare exhibens, et in asperum, inaequalem apicem, cui ligamenta adnectuntur, desinens, subit. Circum processum odontoidem prima colli vertebra et caput aguntur. — Prior corporis superficies ab utroque latere cava est, cuius in media parte linea, deorsum versus latior, erigitur. Posterior superficies aspera et foraminulis pertusa est. Inferior superficies prorsum versus declivis superficie articulari tertiae vertebrae excipitur.

§. CCLXXXVII.

Prope corpus arcus superficies articulares superiores nonnihil gibbas, quibus inferiores superficies atlantis articulares iunguntur, sistit.

Hisce superficiebus subiecti et e duplici radice orti *processus transversi* in utroque latere

ea ratione prominent, ut superficiebus articularibus superioribus quasi tegantur; reliquarum vero vertebrarum processus transversi longiores, canaliculi, prorsum versus sub superficiebus articularibus superioribus ponuntur. *Superficies articulares inferiores*, pone processus transversos magis positae, quam iisdem subiectae, ambitu superioribus minores, planiores, oblique ad priora spectant, reliquarum vero vertebrarum superficies articulares inferiores magis recto tramite superioribus subiiciuntur. Antica processus transversi vertebrae secundi radix teres est, quatuor vero vertebrarum, quae sequuntur, radices anticae planae in angulum superiorem desinunt. Foramen processus transversi, sive canalis brevis longae directione pergit, foramine vertebrarum subiectarum, et pro excipienda arteria vertebrali, non ad perpendiculum, sed oblique extrorsum versus adscendente, angulum format.

§. CCLXXXVIII.

Processus spinosus in margine superiori crassior, latior et longior tribus sequentibus processibus spinosis, in margine inferiori asper, et oblique posteriora versus in duplicem, ab imo fissum, divaricatum, sursum coniunctum, plerumque curvatum angulum desinit. Quo loco radices iunguntur, omnium vertebrarum colli latissimus est, et robustissimus.

§. CCLXXXVIII.

Foramene medullae spinalis huius vertebrae

nonnihil maius, orbiculatius, vel magis cordiforme, quam in reliquis vertebrais, adparet.

§. CCLXXXX.

Capiti, atlanti, et vertebrae colli tertiae epistropheus iungitur.

§. CCLXXXXI.

Epistropheo, et quidem eius processui transverso M. splenius capitis, M. levator anguli scapulae, M. scalenus, M. transversus cervicis, M. longus colli, M. intertransversalis secundus anterior et posterior; Processui spinoso M. rectus capitis posterior maior, M. obliquus inferior, M. spinalis cervicis, M. interspinalis cervicis et M. multifidus spinae adhaerent.

§. CCLXXXXII.

In inaturo fetu quatuor osseos nucleos, duos in partibus lateralibus, unum in corpore, unum in processu odontoide, maximam partem iam iam osseo, offert. Corpus et processus odontoides quum serra dividuntur, nonnumquam processus odontoides intra altius descendere, et corpori insitus quasi videtur. *)

VERTE

*) MAUCHART de capitis articulatione cum prima et secunda colli vertebra. Tubing. 1747. p. 9.

VERTEBRAE INFERIORES COLLI,

sive

TERTIA, QUARTA, QUINTA, SEXTA, SEPTIMA VERTEBRA COLLI.

Virilis sceleti vide apud *ALBIN. Tab. Oss. X. — Icon. oss. foetus. Tab. VII.*

Feminei vero apud *BIDLOO Tab. LXXXXIII. Fig. V. VI.*

§. CCLXXXXIII.

Tertia, quarta, quinta vertebra tanta formae similitudine sunt, ut vix, nisi ex magnitudine singularum, discrimen notari possit. Quarta enim vertebra maior tertia, et quinta maior quarta esse solet.

§. CCLXXXXIII.

In universum corpora earum prona, et mutuo sibi imbricatim incumbunt, et longiora in transversum, quam in latum, altitudine gradatim deorsum versus augentur. — Antica superficies nonnihil gibba utrimque foveolas exhibet. — Posterior superficies leniter sinuatur. — Superior superficies sinuata inferiorem incumbentis vertebrae corporis superficiem excipit, maiorem ideo, quam inferior, ambitum nacta.

§. CCLXXXXV.

Processus transversi e corpore radice longiore et tenuiore, ex arcu vero radice brevioris orti, obliqui, nonnihil torti, canaliculati, declives, ad anticam et superiorem partem in clivum, ad inferiorem vero et posteriorem partem in orbiculum desinunt. Foramina, processibus trans-

versis et arcui interposita arterias vertebrales excipiunt. Sulcum, in vertebra inferioribus iugiter altiore et latiore, nervi cervicales occupant.

§. CCLXXXVI.

Uterque, superior et inferior *processus obliquus* satis planas, sibi invicem parallelas fere superficies articulares, superiores minores, posteriora, inferiores vero maiores, priora spectantes, sistit. Margo acutus ad externa dirigitur.

§. CCLXXXVII.

Reliqua arcus pars in *processum spinosum*, e duplici, declivi radice ortum, et ut plurimum duplici, divaricato, breviori, nonnihil tantum declivi apice, velut in septima vertebra, terminatum, et deorsum sinuatum, abit. *Processus spinosi* longitudine ad inferiora sensim etiam augentur. Nonnumquam apex *processus spinosi* sextae vertebrae obscure tantum duplex est, idemque etiam in rectum porrigitur, nec declivis est, ut reliquarum vertebrarum *processus spinosi*.

§. CCLXXXVIII.

Superior ambitus foraminis medullae spinalis trigoni angustior, inferior vero, qui inferiorem vertebra quasi amplectitur, latior observatur.

§. CCLXXXVIII.

Septima vertebra, ultima, (sive *prominens*, ob longiorem *processum spinosum*) non solum

robustior est, superioribus vertebrais, sed etiam aliam formam prae se fert.

Corpus minus declive in margine inferiori superficiem articulare[m] habet, cui capitula primi paris costarum iunguntur.

Anticae processuum transversorum radices, quae in prima vertebra dorsi iam iam desinunt, exiguae sunt, posticae vero eo robustiores, neque processuum transversorum sulcus tantus, quantum in reliquis colli vertebrais esse solet.

Processus obliqui superiores vix uotari possunt, nec nisi pars processus transversi, *inferiores* vero pars radicis processus spinosi esse videntur.

Processus spinosus robustior, longior et magis recta, quam reliquarum colli vertebrarum processus spinosi, porrectus, in apicem simplicem, capitulatum desinit.

Haec igitur transitus est a vertebrais colli ad vertebrais dorsi.

§. CCC.

Vertebrais colli abhaerent: M. interspinales cervicis, M. intertransversales anteriores et posteriores colli, M. rectus anticus maior, M. longus colli, M. scalenus anterior, medius, posterior, M. cervicalis descendens, M. transversus colli, M. spinalis dorsi, M. lumbocostalis, M. serratus posticus superior, M. rhomboideus minor, M. cucullaris, M. splenius capitis, et pars M. rhomboidei maioris.

§. CCCI.

In maturo fetu quaevis vertebra nonnisi tres nucleos osseos duos in arcu, et unum in corpore exhibet.

§. CCCII.

Quinque inferiorum colli vertebrarum ultima maxime in alias atque alias forma subinde vertitur. Immutato quippe in tertia, quarta, quinta, sexta vertebra praecipue foramine processus transversi, iam in semiduplex, iamque in legitime duplex verso, apicibusque processuum spinosorum raro symmetricis, verum plus minusve ad latera inclinatis, ultima vertebra colli lucidioribus signis, quod costa prima ipsi illigatur, medium quid vertebrae colli inter et dorsi sistit.

Varietates.

Nonnumquam foramen arteriae vertebralis in ultima colli vertebra deest.

Nonnumquam nil ad articulationem cum costa prima confert.

Octo *) et versa vice sex **) vertebrae colli observatae narrantur.

*) B. EUSTACHIUS *Ossium Examen* p. 210.

**) Realdus COLUMBUS *de re anatomica*. p. 263.

VERTEBRAE DORSI

sive

THORACIS.

Viriles vide apud *ALBIN.* *Tab. oss. VIII.* — *Icon oss. foetus.*
Tab. VII. VIII. Fig. LVII. LVIII. LVIII.

Femineas apud *BIDLOO* *Tab. LXXXIII.*

§. CCCIII.

Numerum vertebrarum dorsi costae adhaerentes constituunt; inde plerumque duodecim numero sunt, raro undecim, saepius vero tredicem, quae si adsunt, plerumque quatuor tantum vertebrae lumborum inveniuntur.

§. CCCIII.

Corpora vertebrarum dorsi, quo inferiores vertebrae loco, eo altiora, latiora, longiora, patentiora et orbiculatiora evadunt, inde corpus primae vertebrae dorsi minimum, duodecimae vero maximum est, quin singularum vertebrarum inferior corporis superficies superiore patentior esse solet.

Attamen discrimen vertebrae inter figura superficierum notat. Corpus primae, quin et secundae vertebrae in antica parte, ceu colli vertebrae corpus, planum est; verum nonnumquam iamiam secundae corpus, plerumque vero tertiae, quartae, quintae, sextae orbiculato - angulatum, superficies vero cartilaginosa cordiformis, corpora vero septimae, octavae, nonae, decimae, undecimae et duodecimae usque orbiculatiora conspiciuntur.

Plerumque vertebra tertia et quarta omnium sunt contractissimae.

Duae supremae, et duae vel tres infimae a fronte ad tergum breviori, in transversum vero longiori sunt diametro, in reliquis vero versa vice res agitur.

Posterior superioris et inferioris marginis pars deorsum versus superficies articulares exiguas, quibus capitula costarum, binis semper vertebriis interposita, iunguntur, offert, quae superficies articulares in prima, undecima, duodecima vertebra dorsi ad earum marginem superiorem, vel mediam corporis partem tantum saepius inveniuntur. Plerumque inferior superficies articularis superiore minor est, atque etiam partim ex arcus radice originem ducit, nonnumquam vero integra superficies articularis non in margine, sed in corpore ipso potius posita est.

Antica corporis vertebrarum superficies mediam partem versus sinuata conspicitur.

§. CCCV.

Processus vertebrarum dorsi transversi a prima ad tertiam vertebra nonnihil contrahuntur, tunc ad nonam usque aequali fere magnitudine persistent, donec a decima ad duodecimam raptim per gradus decrescunt. Primae vertebrae processus transversus recta porrigitur, reliquarum processibus transversis nonnihil sursum versus actis.

Nec minus ad decimam vel undecimam usque sensim sensimque resupinantur, ut transversos inter ac spinosos processus sulcus nascatur.

A prima ad decimam vertebra apices processuum transversorum capitulati leniter excavatas superficies articulares, quibus tubercula costarum articularia iunguntur, in hac vertebra elatiores, in illa vero depressiores offerunt, quarum superiores oblique deorsum, inferiores sursum versus diriguntur. Superiores tres in margine processus transversus superiori, quarta et quinta in media eius parte, reliquae vero sensim magis inferiorem marginem versus ponuntur. Duodecimae vertebrae processus transversus duplicem apicem obtusum habet.

§. CCCVI.

Quatuor processuum obliquorum superiores minus, quam in lumborum vertebrae, verum tamen distinctius, quam in vertebrae colli, discrepant. Superiorum processuum obliquorum superficies articulares erectae aversa, inferiorum vero adversa spectant, excepta superficie articulari inferiore duodecimae vertebrae, quae, ut ad vertebrae lumborum adcedat, ad externa verti incipit. Singulae inferiores sive priores superficies articulares superiori sive posteriori superficiei articulari processus obliqui proxime subiectae vertebrae iunguntur.

§. CCCVII.

Processus spinosus pyramidalis primae verte-

brae crassus, in planum fere ad posteriora porrectus vel parum declivis, capitulatus desinit.

In secunda, magis vero in tertia vertebra processus transversus declivior, eiusque radix latior, margo superior acutior, extremum longius et acutius cernitur.

Omnia haec in quarta, quinta, sexta, septima, quin et in octava vertebra dorsi augentur, praesertim processus spinosi tantum declivantur, ut ceu imbrices mutuo fere sese tegant, apicibus primae, secundae et tertiae, nonae, decimae, undecimae, duodecimae ab invicem magis distantibus.

Haec causa est, cur columna vertebralis hac in regione magis prorsum versus, minus vero, quam in regione aliquantum inferiore posteriora versus inflecti possit.

In quinque inferioribus dorsi vertebrae latitudo radicis processuum spinosorum quidem augetur, verum longitudo apicum gradatim minuitur, et processus directio rursus ad lineam horizontalem adcedere incipit, ideoque, si opus fuerit, hac in regione columna vertebralis magis, quam in regione quintae, sextae et septimae vertebrae, reclinari potest. Ceterum vero processus spinosi raro eandem lineam perpendicularem servant, verum saepius ille ad dextrum, ille ad sinistrum, tertius rursus ad dextrum spectat.

§. CCCVIII.

Duodecima sive ultima vertebra dorsi ad vertebrae lumborum, figura quippe corporis orbi-

culata, superficiebus articularibus processuum obli-
quorum superiorum, et inferiorum, oppositam
directionem servantibus, superioribus lenitur ca-
vis, inferioribus vero leniter gibbis, adcedit.

§. CCCVIII.

Foraminis medullae spinalis figura in supe-
rioribus dorsi vertebrae magis ad orbiculum adce-
dit, quam in vertebrae colli et lumborum.

§. CCCX.

Vertebrae dorsi: M. splenius capitis et colli,
M. trachelomastoideus, M. biventricus cervicis,
M. complexus, M. longus colli, M. transversus
colli, M. spinalis colli, M. semispinalis dorsi,
M. multifidus spinae, interior pars M. lumbo-
costalis, M. levatores costarum longi et breves,
lamina interna tendinis musculi obliqui interni et
transversi abdominis, M. latissimus dorsi, M.
rhomboideus maior; M. cucullaris, M. serratus
posticus superior et inferior illigantur.

§. CCCXI.

In *matureo fetu* tres nucleos osseos, unum
in corpore, duo in arcu habent; reliqua pars
vertebrarum cartilaginosa est.

§. CCCXII.

Varietates vertebrae dorsi non ita conspi-
cuae sunt, ac vertebrae colli, et data occasio-
ne iam iam notatae sunt.

C O S T A E.

Virilis sceleti apud *ALBIN.* *Tab. oss. XI. XII. XIII.* — *Icon. oss. foetus, Tab. XIII.*

Feminei apud *BIDLOO* *Tab. LXXXVIII.*

§. CCCXIII.

Costae plerumque duodecim in utroque latere inveniuntur, verum tamen non raro vel in superiore vel inferiore thoracis parte una ultra duodecim observatur, quae si in parte thoracis superiore est, primae costae quidem plus minusve similis *) et cartilaginis, vel ligamenti **) tantum ope ossi sterni superiori iuncta est, verum tamen omnibus numeris absoluta similitudo non intercedit, quod si enim hac ratione res sese haberet, haec costa supernumeraria prima vera costa haberetur, non nisi sex vertebrae colli adessent, et inferius oblongum, vertebri iunctum os decima tertia costa audiret. Plerumque vero haec costa media quasi est primam costam veram inter, et processum transversum vertebrae colli septimae, verum tamen hac in causa prima vera costa, ossi sterni iuncta longior, sed tenuior solito, adeoque spatium falcem costae inter, corpus vertebrae, et os sterni

*) *E. c. HUNAU*LD *Memoir. de l'Acad. royale des sciences* 1741. parum similem costam supernumerariam costae primae verae, *LEVELING* *obs. anat. rariores.* *Ingolst.* 1786. magis similem describunt, in mea collectione costa supernumeraria costae primae verae omnium maxime similis adservatur, attamen costa supernumeraria ad manus est, minor, quam in *HUNAU*LD observatione, costae primae similis, ultima enim colli vertebra multum longa, contracta, divisa sistitur.

**) *ALBIN.* *Annot. Acad. Lib. II. Cap. XVII. p. 72.*

multo amplius est, quod, os adventitium vices costae subire, et ad maius thoracis spatium efficiendum conferre, aperte indicat.

In parte thoracis inferiore vero quum costa decima tertia ponitur, saepius tanta similitudo eam inter ac solitam duodecimam intercedit, ut eiusdem sit roboris et longitudinis; verum tamen duodecima solito maior est et longior.

Non numquam os oblongum planum in spina dorsi infra duodecimam dorsi vertebra, costae supernumerariae superioris in modum medium quasi decimam tertiam costam inter et processum primae vertebrae lumborum transversum tenens, vel transitum a costa ad processum transversum instituens, invenitur.

Quin et quindecim costae in homine inventae dicuntur *).

Nonnumquam non nisi undecim costae inveniuntur, verum tamen omnes costae, nulla excepta, ultra solitum latae et robustiores, quam in thorace eiusdem ambitus, duodecim costis instructo, observantur.

§. CCCXIII.

Horum duodecim costarum parium plerumque septem paria per gradus deorsum versus longitudine aucta, ope cartilaginum ossibus sterni iunguntur, ideoque verae, genuinae costae audiunt, reliqua quinque paria quae nothae, sive spuriae costae audiunt, versa vice deorsum versus gradatim con-

*) BERTIN Osteol. pag. 142.

trahuntur, ita tamen, ut octava costa cartilaginis ope cum septima, nona vero cum octava iungatur, decimae, undecimae, duodecimae vero costae cartilagine minime sese invicem tangant. Non rarae autem sunt *octo* costae, ossibus sterni iunctae, et quatuor tantum spuriae.

§. CCCXV.

Primam costam *veram* plerumque brevissimam, latissimam, in superficie superiore asperri-
mam, et ratione exiguae longitudinis robustissi-
mam, longissimo, tenuissimo collo instructam,
directione quam minime obliqua, cartilago bre-
vissima, durissima, verum tamen ad extremum
costale, et praesertim ad extremum sternale la-
tissima immobili nexu cum ossi sterni superiori
iungit.

§. CCCXVI.

Secunda, tertia, quarta, quinta, sexta et
septima costa, quo inferiores, eo magis per gra-
dus longitudine, et omnium partium robore
augentur, obliquius descendunt, cartilagine, quae
in primo costarum pare descendunt, in secundo
pare in planum horizontale porriguntur, a ter-
tio pare inde magis magisque deorsum versus
spectare incipiunt, longiores fiunt et crassiores,
sursum vero versus denuo contrahuntur, in api-
cem leniter capitulum vel angulatum desinunt,
ipsique ossi sterni medio articuli ope iunguntur.

§. CCCXVII.

Plerumque etiam cartilagine quintae, sextae,

septimae et octavae costae peculiari processu, qui a superiore cartilagine descendit, invicem committuntur, v. c. sexta costa huius modi processu cum quinta iungitur.

Nonnumquam non nisi cartilagines sextae, septimae, octavae, verum tamen nonnumquam cartilagines sextae, septimae, octavae et nonae costae hac ratione invicem iunguntur. Nonnumquam tres quatuorve cartilagines hac in regione in unam, dissolvi nesciam, cartilaginem quasi concrescunt.

§. CCCXVIII.

Octava costa brevior quidem septima, quod vero ad osseam partem attinet, omnium longissima, verum tamen non robustissima, (extremum enim sternale non nihil iterum tenuatur,) obliquiorem quam septima costa, directionem habet. Cartilago tenuior et minor cartilagine septimae costae in apicem tenuem excurrit, verum tamen processu cartilaginis septimae costae cum ea iungitur.

Nona costa multo brevior, et per omnes partes tenuior est octava. Cartilago in apicem tenuiorem desinit, et nonnumquam processu octavae costae cum octava iungitur.

Decima et undecima costarum breviores, et quantum ad osseam et cartilagosam partem, plane tenuiores, obliquiusque nona positae, cum cartilagine minus in acutum desinente nectuntur.

Duodecima costa omnium costarum spuriarum tenuissima, planissima, brevissima, obtusissima, quin nonnumquam vix conspicuae cartilagini iungitur. Nonnumquam directio eius minus obliqua est directione undecimae, praesertim, quum solito brevior observatur.

§. CCCXVIII.

Quaevīs costa in posteriori extremo orbiculatum vel angulatum *capitulum* habet, prout, ceu prima, undecima et duodecima costa, vel uni tantum vertebrae iungitur, vel binis vertebri interponitur. Uni tantum vertebrae iunctum capitulum, orbiculatum, binis vero vertebri interpositum, angulatum esse solet, verum tamen maior eius pars inferiori iunctarum vertebrarum incumbit.

Quo facto teres, non nihil contracta costa pergit, eaque ratione, exceptis undecima et duodecima costa, locum constituit, qui cervix sive collum audit, quod collum in tuberculum articulare, cum superficie articulari processus transversī subiectae vertebrae iunctum, abit. Presse supra hanc articularem superficiem plerumque tuberculum, aut tantum asperum vestigium, cui ligamentum transversum illigatur, cernitur. Tum sensim costa crassitudine et robore augetur, quin et quadratam figuram nanciscitur, retro ex adherente musculo sacrolumbali oblique descendentem *lineam asperam*, qua nonnullae costae anguli speciem monstrant, et marginem inferio-

rem hac in regione fere acutissimum offert, donec ad latera et ad priorem partem denuo complanato teres, ad septimam costam usque priora versus non nihil latior et teretior, a septima vero ad duodecimam usque contractior et planior, vel in apicem orbiculatum excurrens, cum cartilagine, quantum ad figuram et crassitudinem hic locorum costae perquam simillima, ut continuata costa videatur, minime tamen, etsi in nonnullis costis longissima, longitudinem partis osseae costae adnexae nacta, iungitur.

§. CCCXX.

Integralis interna costae superficies, prout et maxima pars superficiei externae, laevis est et plana.

§. CCCXXI.

Margo superior costarum retro obtusus, prorsum versus sensim acutior, ceterum ob adhaerentes musculos intercostales asper, reliqua vero sat planus, vel multo minus undulatus inferiori esse solet.

§. CCCXXII.

Margo inferior acutior, retro sinuatus, in regione tuberculi acutissimus est, ad latera vero, et ad priorem partem sensim retunditur, et praesertim in hominibus robustis undulatus videtur.

§. CCCXXIII.

Externa primi costarum verarum paris superficies foveam et lineam asperam habet, quibus *M. scaleni* et *M. serratus major* illigantur.

§. CCCXXXIII.

In inferiori superficiei internae costarum margine, quo loco a posteriore parte ad latus flectuntur, *sulcus*, progrediendo evanescens nervosque intercostales et vasa, verum non semper pari adcurato modo excipiens, ponitur. Nonnumquam *sulcus* in prima et ultima vertebra vix conspicitur.

§. CCCXXV.

Peculiaris ellipticus aut falciformis costarum flexus, in universum, quantum ad partem osseam attinet, sic sese habet, ut maximus sit in costa *prima*, sensim sensimque vero in reliquis ad ultimam usque decrescat, in *ultima* vero multum, vel penitus evanescat.

Flexus *partis osseae* costarum, praesertim superiorum e duabus partibus distincte compositus videtur, posterior costae pars segmentum minoris circuli, prior vero pars segmentum multo maioris circuli refert. Flexus *partis cartilagosae* primae, secundae, undecimae et duodecimae costae directionem arcus prioris partis osseae servat, reliquarum vero octo costarum cartilagines denuo multum flectuntur, et recto fere itinere ad anticum pectoris latus adscendunt.

§. CCCXXVI.

Ceterum vero externa et interna costarum superficies non ubique hunc flexum sequuntur, sed proprium quemdam habent, ita, ut margo
earum

earum superiorum prorsum versus magis magisque acutus, ad priora descendendo, in costis veris sensim ad interiora non nihil exactius, quam margo inferior multo acutior, spectet. Flexus superficierum lateralium costarum spuriarum non nihil ab hoc differt.

§. CCCXXVII.

Spatium inter utramque superficiem articulare costarum, quo loco nimirum capituli ope corporibus vertebrarum et tuberculi ope processui transverso vertebrae subiectae iunguntur, ad tertiam usque costam contrahitur, in sequentibus costis parum, vel nil mutatur; ab octava vero costa inde in reliquis per gradus tantum minuitur, ut in undecima superficies articularis cum processu transverso unjatur.

§. CCCXXVIII.

Verum tamen *spatium lineam asperam obliquam inter et tuberculum sensim sensimque in omnibus costis usque ad nonam et decimam augetur, iunctis inter se eodem loco in prima costa tuberculo et linea aspera.*

§. CCCXXVIII.

Inter omnia ossa solae costae, quod cuique, si thoracem proprium premit, satis constabit, magnam *elasticitatem*, vel mortuo, homine superstitem, habent, quae potissimum arcuatae et flexae figurae, et exiguae crassitudinem inter et longitudinem proportioni deberi videtur.

Verum tamen substantia costarum nil peculiare habet, reliquorum enim ossium more, cellulis medullam includit.

§. CCCXXX.

Cartilago extremi prioris partis osseae fovea excipitur, eoque loco substantia ossis spongiosa observatur.

§. CCCXXXI.

M. levatores costarum longi et breves, M. intercostales externi et interni, M. sternocostalis, diaphragma, M. quadratus lumborum, M. sternothyreoideus, M. sternohyoideus, M. splenii, capitis et cervicis, M. pectoralis maior et minor, M. latissimus dorsi, M. subclavius, M. serrati omnes (maior, posticus superior, posticus inferior), M. omnes abdominales, (obliquus externus, obliquus internus, transversus, et rectus), pars externa et interna, M. lumbocostalis, cum cervicali descendente, costis adnectuntur.

§. CCCXXXII.

Quantum ad sceleti compagem attinet, septem verae costae ex una parte vertebrae dorsi, nonnumquam suprema costa septimae vertebrae colli, ex altera parte cartilaginum ope ossibus sterni, et ex parte processuum cartilaginum ope quinta, sexta, septima, octava costa mutuo sibi iunguntur; quinque spuriae costae vero in sceletto ossa sterni non attingunt. — Plurimum costae ad formandum thoracem, et magna ex parte ad cavum abdominis faciunt.

§. CCCXXXIII.

Costae iis ossibus ad numerandae sunt, quae maturo tempore ad iustum incrementum perveniunt, non enim, exceptis ossibus organo auditorio dicatis, iam iam tam perfecta pro suo modo ossa in fetu maturo inveniuntur. — Verum tamen tum demum, quum incrementum omnium ossium perficitur, capitula cum reliqua costarum parte concrescunt.

Varietates costarum.

§. CCCXXXIII.

Praeter numerum (§. CCCXIII.) multis modis costae aberrant, ut raro costa dextri lateris sociae sinistri lateris ad symmetriae regulas similis inveniatur.

Nonnumquam omnes dextri lateris costae sinistri lateris costis longiores, latiores et crassiores sunt; nonnumquam vero versa vice res sese habet.

Praesertim vero quatuor inferiorum costarum longitudo et magnitudo multum aberrat, plurimis vero vicissitudinibus ultima subiecta est, quae, etsi brevissima, costam sociam alterius lateris longitudine pollicis saepius superat.

Nonnumquam costa huius lateris sine ulla proportionem latior est socia illius lateris.

Quin nonnumquam media costae pars admodum lata foramine patet.

Quin diffinditur, et duarum cartilaginum ope cum osse sterni iungitur. *)

Vel versa vice duas costas in uno tantum latere communis cartilago cum osse sterni nectit. **)

Nonnumquam imperfecta costarum cartilago, supplementum quasi, extremo obtuso sternum, extremo vero acuto alteram cartilaginem tangit. ***)

Nonnumquam flexus costae huius lateris longe alius est, flexu costae illius lateris.

Nonnumquam cartilago costae huius lateris multo longior, crassior, longeque aliter flexa, quam cartilago socia illius lateris, observatur.

Nonnumquam in uno tantum latere cartilago huius costae cum cartilagine illius costae, cui alioquin non iungitur ****) concrescit; nonnumquam plures cartilagines concrescunt. Rarius cartilagines sterno iunctae e diametro sibi oppositae sunt; plerumque vel elatiorem vel humiliorem locum cartilagines huius lateris, quam sociae illius lateris occupant.

Nonnumquam cartilago costae septimae huius lateris sternum non attingit, sed tantum cartilagini costae septimae illius lateris iungitur.

*) *Hist. de la Soc. de Med. à Paris 1779. Planche III. Fig. V.*

**) *ALBIN. Annot. Academ. Lib. II. Tab. VII. Fig. VIII.*
CHESELDEN Tab. XVII. Fig. II.

***) *CHESELDEN Tab. XVII. Fig. II.*

****) *V. Egregia prima Albiniana tabula sceleti.*

Inde spatium triangulare cartilagineas ultimae costae verae, et trium vel quatuor costarum spuriarum inter, raro symmetricum observatur.

Quin articuli costovertebrales huius lateris longe aliter sese habent, quam illius lateris; nonnumquam omnia dextri lateris costarum capita maiorem sinum corporibus vertebrarum imprimunt, quam capita costarum sinistri lateris.

Vel, quum articulus capituli costae binis vertebrae interponitur, nonnumquam in dextro latere superior, in sinistro autem inferior vertebra plura ad eum confert.

Nonnumquam capitulum dextrae costae magis prorsum versus situm est capitulo sociae sinistrae.

Nonnumquam duas, quin plures costas pars intermedia ossea inter se iungit.

Connexionem *quartae* et *quintae* costae ad capitulum articulare ope processuum, et ossiculum illis interpositum observarunt. *)

*) *LEVELING Obs. anat. rar. fasc. I. p. 152. Tab. V. Fig. VI.*

OSSA STERNI.

Virilia. ALBIN. Tab. XIII. — *Icones oss. foetus. Tab. VIII.*

Feminea. BIDLOO Tab. LXXXV — TRENDLENBURG Diss.
de sterni costarumque motu, Goetting. 1779. Tab. I.

§. CCCXXXV.

Tria ossa sterni mediam et priorem thoracis partem claudunt, et exilibus laminis cartilagineis firme sibi invicem nectuntur, ita tamen, ut aliquis motus supersit. Superius os sterni octogonum, medium longius, infra obtusum est, tertium inferius minimum et tenuissimum in apicem cartilagosum desinens, *processus audit ensiformis*. Verum tamen iamiam virili aetate, sine ullo in reliquis cartilaginibus ossificationis vestigio, inferius et medium os sterni concreta observantur, quod si ita est, duo tantum ossa sterni, superius et inferius, numerantur. Raro tertii ossis vices, vel in teneris infantibus, mera cartilago subit.

§. CCCXXXVI.

Superius os sterni, crassius, robustius, latius inferiori, praeter claviculam primum par costarum cum cartilaginibus immobili nexu excipit.

Quo loco superius et medium os sterni invicem iunguntur, articulus cartilaginis secundi costarum paris angulatae ponitur, quem deinceps reliquarum costarum cartilaginum extrema sternalia angulata, ad septimum usque costarum par, extremo corporis sterni, et initio *processus*

ensiformis interpositum, iis ossium sterni locis, quibus in fetu olim partes seiunctae fuerunt, adnexa sequuntur. Ceterum cartilagine primae costarum paris plerumque maximam spatium ab invicem separat.

Spatium vero tria vel quatuor ultima costarum verarum paria inter et in transversum et in longum magis magisque contrahitur, ita ut cartilagine septimi costarum paris saepissime mutuo sese attingant. (§. CCCXXXIII.) Tertium vero, vel inferius os sterni semper magis introrsum versus ponitur, ita, ut iunctae ultimi verarum costarum paris cartilagine ad priora id ex parte tegant.

Nonnumquam omnium cartilaginum costalium positus concinno fere modo sic sese habet, ut spatium cartilaginem primae costae inter, et sinum articulare, qui cartilaginem secundae costae excipit, maximum; spatium vero hunc sinum inter et eum, qui tertiae costae cartilaginem recipit, minus sit; sensimque spatium adeo contrahatur, ut spatium cartilagine inter sextae et septimae costae minimum sit. Hos sinus inter margines laterales lunati sunt, ideoque margines ossis sterni medii laterales undulati conspiciuntur. Quo, nexum ossium sterni in sceletto eum esse, sequitur, ut a cartilaginibus costarum excepta et sustenta, alternis vicibus costas excipiant et sustineant.

§. CCCXXXVII.

Superior margo superioris ossis sterni, pone quem trachea ponitur, sinuatus est, obtusus, et laevis. Uterque margo superior lateralis partem claviculae thoracicam, medius autem margo cartilagineum primi costarum paris excipit, inferiores vero margines laterales acutissimi sunt. *Inferiorem* marginem et medium os sterni fibrae tendineae coniungunt.

Nonnumquam os sterni medium magno, plerumque vero asymmetro foramine pertunditur.

Nec minus, nonnumquam vero dumtaxat in hominibus aetate provecata, apex vel inferius sterni os a medio commissura cartilaginosa, vel alio signo determinatur.

Plerumque ossa sterni ea ratione curvantur, ut gibba arcus superficies ad interna spectet.

§. CCCXXXVIII.

Ossa sterni lata sunt ossa, quorum crassitudo sensim, dum descendunt, minuitur, inde superius os, cui claviculae incumbunt, crassissimum est, inferius vero tenuissimum, quid quod margo superior ossis superioris margine eiusdem ossis inferiore crassior observatur.

§. CCCXXXVIII.

Medium sterni os, ad inferiorem usque marginem fere, eandem crassitudinem satis bene servat, verum inferioris ossis crassitudo eo celerius deorsum versus minuitur.

§. CCCXXXX.

Interna omnium sterni ossium superficies laevis est, nonnumquam dumtaxat leniter cava, externam vero superficiem ligamenta adhaerentia asperam reddunt.

Ceterum vero levia sunt, rara et spongiosa ossa.

§. CCCXXXXI.

Superiori sterni ossi: M. pectoralis maior, M. sterno mastoideus, M. sterno hyoideus, M. sterno thyreoideus; medio, et quidem priori eius parti; M. pectoralis maior; internae superficiei; M. sternocostalis; inferiori, M. rectus abdominis et diaphragma adnectuntur.

§. CCCXXXXII.

In maturo fetu superius os sterni unicum tantum nucleum osseum, medium plerumque quatuor, inferius unicum offert. — Saepius vero in medio sterni osse duplex nucleorum osseorum ordo conspicitur.

Varietates.

§. CCCXXXXIII.

Ossium sterni in universum et inter se multa est aberratio. Nonnumquam superioris longitudo latitudinem superat, nonnumquam versa vice res sese habet, plerumque autem medio latius est, nonnumquam vero in margine inferiori contractius. Medium et superius quum concalescunt, morboſi quid innuere videtur.

Medium os sterni longum et contractum, iam brevius et latius, iam in utroque extremo, praesertim in superiori contractius, in media parte latius, iam ubique eiusdem fere latitudinis, iam ovatum, iam quadratum magis, iam in margine inferiori divisum observatur.

Maxime vero os sterni inferius, eiusque extrema cartilaginosa, praecipue quantum ad magnitudinem, *) figuram, crassitudinem, longitudinem, nexum, curvaturam mutantur; nonnumquam bifurcum est, nonnumquam foramine pertunditur, interdum pars ossea, interdum pars cartilaginosa maior est. Tertium sterni os non raro deest.

*) *HILDEBRANDT* p. 350. os sterni inferius tres pollices longum adservat.

VERTEBRAE LUMBORUM.

Virilis sceleti. *ALBIN. Tab. oss. VIII. — Icon. oss. foetus
Tab. VII.*

Feminei. *BIDLOO. Tab. LXXXXIII.*

§. CCCXXXIII.

Vertebrae lumborum plerumque quinque, raro sex, rarius quatuor numerantur.

§. CCCXXXV.

Vertebris colli et dorsi, et quo inferiores, eo per gradus robustiores, crassissimarum cartilaginum ope invicem iunguntur, qua causa et magno processus inter spinosos hiatu plurimum omnium moveri possunt.

§. CCCXXXVI.

Habitu septem processuum, quos arcus earum exhibent, facile a vertebrae colli et dorsi discernuntur.

Superiores tres figura multum inter se similes, vix, nisi magnitudinis discrimine, dignosci possunt.

§. CCCXXXVII.

Inferior et superior corporum superficies in tribus superioribus nonnihil reniformes et orbiculatiores quam in inferioribus sunt, et inferior superficies superiori satis parallela patet; quarta et quinta vero vertebra ante elatiores, pone nonnihil depressiores sunt, quod potissimum in quinta, quae cum osse sacro promontorium format, notatur.

§. CCCXXXVIII.

Processus transversi plani, superiori et inferiori margine acutis, nonnihil reflectuntur. *Processus secundae vertebrae transversus* processu primae longior, brevior tamen est processu tertiae; quartae plerumque brevior, processu secundae; quintae brevis est, sed crassus et teres.

Non raro processum primae vertebrae dorsi transversum verus articulus vertebrae corpori iungit, ut medium quid decimam tertiam costam inter et processum transversum videatur.

§. CCCXXXVIII.

Nonnumquam duo processus adaccessorii processui transverso et articulari superiori interpositi inveniuntur. *)

§. CCCL.

Processuum articularium sive obliquorum, separata tubera sistantium superficies articulares superiores sinuatae, et quod processus obliquos inferiores vertebrae superioris excipiunt, inferioribus, vel planioribus, vel leniter gibbis, divaricatis ampliores sunt. Superiores interiora et posteriora, inferiores vero exteriora et priora spectant. Vertebrae vero lumborum ultimae superiores eodem modo, quo processus obliqui superiores vertebrarum dorsi ad posteriora, inferiores ad priora spectant.

*) Non nisi primae vertebrae lumborum processibus obliquis vel in virilibus vel femineis corporibus, M. lumbocostalis illigatam invenio partem.

§. CCCLI.

Processus spinosi sat bene in planum horizontale porrecti, ad processus obliquos comparati breves, margine acuto instructi, in apicem parum capitulatum, infra crassiorem desinunt. Ultimae vertebrae processus spinosus brevissimus, et ab imo inspectus latior est, ut crista acuta in eo erigatur.

§. CCCLII.

Foramen medullae spinalis trigonum est, praesertim in vertebrae inferioribus.

§. CCCLIII.

M. spinalis dorsi, *M. multifidus spinae*, *M. quadratus lumborum*, *M. obliqui interni et transversi abdominis lamina interna*, et huius lamina externa, *M. lumbo costalis pars externa et interna*, *M. latissimus dorsi*, *M. serratus posticus inferior*, diaphragma, *M. maior et minor psoas* vertebrae lumborum adnectuntur.

§. CCCLIIII.

In *fetu maturo* eodem modo, quo vertebrae dorsi, sese habent.

OS SACRUM, sive OS LATUM, CLUNIMUM.

Virile apud ALBIN. Tab. oss. VII.

Femineum apud BIDLOO Tab. LXXXVIII.

§. CCCLV.

Os sacrum, maximum columnae spinalis os, eam sustinet, ossibus coxarum cunei in modum retro inseritur, quibuscum eodem modo, quo basis eius cum ultima vertebra dorsi, iungitur, apici vero eius os coccygis primum illigatur.

§. CCCLVI.

Nexum vicinis ossibus non ad perpendicularium, sed reflexum sistitur, et cum vertebriis lumborum angulum, *promontorium* vocant, format.

§. CCCLVII.

Figura eius trigona vel cuneiformis, superficies prior cava, multumque laevis, posterior gibba et clivosa cernitur.

§. CCCLVIII.

Quinque, deorsum versus celeriter altitudine, latitudine, crassitudine decrescentes, coalitae, nonnumquam ad decimum quartum usque annum, quin diutius, cartilaginibus intermediis separatae, ultimo tandem nonnisi prorsum in media parte vestigium pristinae separationis, et faciem corporum et processuum transversorum in unam massam coalitorum et utrimque in longum distentorum exhibentes vertebrae os sacrum componunt.

§. CCCLVIII.

Basis ossis sacri *superficiem articulare*, cuius ope ultimae vertebrae lumborum, et *apex*

exiguam gibbam superficiem articulare, cuius ope primo coccygis ossi iungitur, monstrat. — Reliqua basis pars in utrumque latus aliformis, plerumque vero nonnihil sinuata extenditur. — Marginē orbiculato, qui pelvim maiorem a minore disternit, basis in superficiem priorem abit, pro excipiendo ultimo nervorum lumbarium pare incisa.

§. CCCLX.

Media et prior pars, quae corpus et processus transversos repraesentat, cava, et lineis transversis elatis in partes descripta, ad formanda foramina, nervos excipientia, superius et inferius, initio contractior deinde vero repente crassior evadit, et ad latus patescit. Laterales partes, quae processus transversos coalitos repraesentant, celerius, quam media pars, corporis partes suscipiens, contrahuntur. Ea pars ossis sacri, quae loco primae vertebrae adest, a fronte magis gibba est, et vertebrae lumborum similior, reliquis planioribus, vel etiam sinuatis.

• Nonnisi in prima parte pars, processui alius vertebrae transverso nonnihil similis, dignosci potest.

§. CCCLXI.

Superficies ossis sacri lateralis multum inaequalis, in universum cuneiformis, supra lata, et contracta est, ibique superficiem articulare cartilagine obductam, / cuius ope ossi coxarum

iungitur, infra vero marginem asperum, cui ligamentum sacro ischiadicum adnectitur, offert. Partim elata, partim depressa figuram auriculae humanae, vel litterae romanae S nonnihil repraesentat, deinde vero inaequalis, aspera, clivosa, subinde supra et infra pro excipiendis ligamentis articularibus in utroque latere cava in superficiem posteriorem abit.

§. CCCLXII.

Processuum obliquorum soli superiores, cavi, marginibus acutis in altum prominentes dignosci possunt. Inferiores in superficie foraminum posteriorum nervos excipientium externa seriem tuberculorum formant.

§. CCCLXIII.

In posteriore superficie tres superiores vertebrae radices processuum spinosorum coalitorum, deorsum versus decrescantium, et ad tertiam vertebrae in unum, vel et in duo apices abeuntium distincte exhibent. Quarta utrimque nonnisi initium radiceis processus transversi, quinta vix duo tubercula vel apicula, plerumque cum cornibus primae ossis coccygis vertebrae articulo iuncta, offert, inde canalis nervorum medullae spinalis a quarta vertebra patescit.

§. CCCLXIII.

Canalis nervorum medullae spinalis in osse sacro initio trigonus, subito deinde contractus, oblongo teres, compressus, iam iam ad ultimam et penultimam a tergo patet.

§. CCCLXV.

§. CCCLXV.

Foraminum pro nervis et vasis a fronte et a tergo quinque paria, quo inferiora eo angustiora sunt. E media foraminis parte linea divisionis, vel fissura partium vertebraliū egressa, et prorsum versus tendens, mediam foraminis oppositi partem tangit, inde foramina iunctis duabus vertebrais formantur. Priora quatuor foraminum paria maiora et orbiculatiora sunt, posterioribus, et oblique ad latus in sulcos multum canaliculatos, ambos superiores transversos fere, inferiores vero adscendentes abeunt. — Posteriora foramina angustiora minusque adcurato ambitu ex parte in leves sulcos excurrunt.

§. CCCLXVI.

Substantia eadem est, quae vertebrae maioris; partis, quae processum transversum sistit, plurimum spongiosa, partis vero, quae corpus repraesentat, minus spongiosa est, partis vero, quae loco arcus adest, firmior.

§. CCCLXVII.

Ossi sacro M. multifidus spinae, M. lumbocostalis externa et interna pars, M. gluteus maximus, M. pyriformis, M. serratus posticus inferior, M. latissimus dorsi, M. obliquus internus abdominis adnectuntur.

§. CCCXVIII.

In maturo fetu os sacrum distincte unum cum viginti nucleis osseis, quinque scilicet in singulis tribus superioribus partibus, tres in qua-

libet duarum partium inferiorum exhibet. Separatio quinque portionum vertebraliū cartilaginosa vel ad pubertatis tempus usque notari potest. Partes laterales primae, pars vero media et prior ultimae concreſcunt.

Varietates.

§. CCCLXVIII.

Multa est ossis ſacri varietas. Saepius e sex, rarius e quatuor *) partibus componitur. — Plurimum vero vertebra superior mutatur. Interdum vix cum ultima lumborum vertebra discrepat, interdum dimidia vertebrae pars in altero latere lumborum vertebrae ad unguem similis est, in altero autem ſolitum habitum offert; interdum haec dimidia pars paullo minus, interdum etiam nunc minus similis vertebrae lumborum occurrit; interdum habitus eius medius quasi est vertebra lumborum inter et partem ossis ſacri; nonnumquam superior ossis ſacri vertebra ad latera declivis est, nonnumquam vero ſinuata, nonnumquam multum curva, nonnumquam vero ſuperficie priore ad amuſſim facta et

*) *van DOEVEREN* Obs. anat. cap. XIII. p. 207. e quatuor vertebriſ.

LEVELING Obs. rarior. p. 151. caſum bis vidi. Ipſe ego quinque exemplaria poſſideo, ſaepiusque vidi.

WAGLER in fetu octo menſium. *Verhandelingen te Haarlem*, XVIII. Deel. S. *ALBERTUS* Hiſtor. Part. C. H. p. 134. *P. PAAW* de oſſibus p. 102. aliquoties ſeptem ossis ſacri vertebraſ ſeſe vidisse adfirmat. Recentiore aetate nemo vidit, inde os ſacrum cum oſſibus coccygis coalitum fuiſſe, cuius ſpecimina poſſideo, vere ſimile videtur.

ubique plana, nonnumquam maiore latitudine, quam altitudine, nonnumquam vero maiore altitudine; nonnumquam supra satis recta, verum subito hamæ instar curvata. Interdum canalis medullae spinalis sursum versus ad mediam usque partem, interdum totus apertus est, vel omnes processus spinosi desunt; interdum autem processus spinosi valde prominentem validam cristam formant, interdum processus spinosus superior bifurcatus est; interdum ambitus foraminum enormis est, interdum contractus. Saepius ultima ossis sacri vertebra, quum sex vertebrae adsunt, medium quasi ultimam vertebrae ossis sacri inter et primum os coccygis tenet. Generatim quidem superior pars saepius et distinctius inferiore a symmetriae regulis secedit *).

*) Carl Casp. CREVE vom Baue des weiblichen Beckens. Leipz. 1794. Tab. II. Fig. 1. 2.

OSSA COCCYGIS.

Virilia. Vid. *ALBIN.* Tab. VII.Feminea. *BIDLOO* Tab. LXXXVIII. *CREVE* Tab. II. Fig. 3. 4.

§. CCCLXX.

Ossium coccygis quatuor sunt numero. Cito decrescunt, cartilaginibus ligamentosis ea ratione iunguntur, ut positum naturalem, curvaturam ossis sacri prorsum versus continent, et intestinum rectum sustineant. Nonnumquam primum cum osse sacro vel in iunioribus concrescit. *) Nonnumquam in iunioribus utrumque ultimum immobili nexu invicem iungitur. Nonnumquam ex ordine non nisi tria, raro autem quinque adsunt. Quinque mulieribus praesertim esse videntur **).

§. CCCLXXI.

Primum os coccygis maximum est; secundum multo minus, tertium secundo minus; quartum tertio iam minus, iam maius. Omnia magis lata sunt, quam longa, superficiebus articularibus prorsum versus declivibus. In latere exiguum tuber, processui vertebrae transverso non nihil simile, offerunt.

§. CCCLXXII.

Primum, sive supremum os coccygis utrumque planum et aliforme superficiem priorem habet leniter sinuatam, posteriorem non nihil gibbam, quae duo sursum versus vergentia cornua,

*) Equitatio causa dicitur. *BLUMENBACH.* p. 311.

**) *Casp. BAUHIN* *Theatr. anat.* Tab. XXXVIII. Fig. VIII.
BIDLOO. l. c. — *HALLERI* *Icon. Fasc. III.* Tab. III.
SMELLII. Tab. I. II. et mea collectio, et *CREVE* loco citato.

superiores processus vertebrae obliquos repraesentantia, similibusque deorsum versus vergentibus ossis sacri cornibus articuli ope iuncta exhibet. Non semper tamen cornua mutuo sese tangunt, sed nonnumquam multum ab invicem distant, et ligamentis tantum inter se iunguntur. Haec cornua inter canalis medullae spinalis in clausum apicem in recenti corpore desinit.

§. CCCLXXIII.

Secundum os coccygis magis orbiculatum est, nonnumquam exiguis processibus transversis instructum.

Tertium os coccygis secundo magis orbiculatum, supra tamen non nihil latius est, quam infra.

Quartum, os coccygis speciem capituli angulati refert.

Quintum si adest, minimum maxime orbiculatum.

§. CCCLXXIII.

Substantia ossium coccygis plerumque non solum spongiosa, sed etiam mollior, quam omnium reliquorum ossium substantia esse solet.

§. CCCLXXV.

M. gluteus maximus, M. curvator coccygis, M. levator ani, M. sphincter ani externus ossibus coccygis adnectuntur.

§. CCCLXXVI.

In maturo fetu mere cartilaginosa sunt, facile tamen ab invicem discernuntur. Tardius osse sacro in os vertuntur.

SPINA, SPINA DORSI.

sive

COLUMNA SPINALIS, VERTEBRALIS.

Perfectissima eius icon videatur apud *ALBIN. Tab. sceleti. I*
II. III.

§. CCCLXXVII.

Spinam dorsi viginti novem ope cartilaginum iuncta ossa, septem nimirum vertebrae colli, duodecim vertebrae dorsi, quinque vertebrae lumborum, os sacrum et quatuor ossa coccygis constituunt. Excepta prima vertebra colli omnia spinae dorsi ossa cartilaginibus intermediis ligamentosis inter se iunguntur.

§. CCCLXXVIII.

Spina dorsi, robusta, in partes distributa, et mobilis columna, sustinendo capiti, recipiendo reliquo massae cerebri, adfigendo trunco, et adnectendis artubus superioribus inservit. Spina ipsa ossibus coxarum, os sacrum excipientibus, sustinetur et, fulcitur.

§. CCCLXXVIII.

Generatim vertebrae spinae, a tertia inde colli vertebra ad os sacrum usque, quo inferiores sunt, eò maiores ambitu fiunt, quo fit, ut tertia colli, dorsi, lumborum vertebra multo maior sit, prima colli, dorsi, lumborum vertebra; verum ab osse sacro inde magnitudo vertebrarum cito decrescit. Re exactius explorata, prima et secunda colli vertebra capitulum quasi sistunt. Quo facto, a tertia colli vertebra ad

septimam usque magis magisque spina diducitur, ad tertiam vertebra[m] dorsi usque rursus contrahitur, tum certo tenore ad os sacrum usque denuo diducitur. E transverso corpora a tertia colli vertebra ad quintam dorsi vertebra[m] diducuntur, dorsi autem et lumborum vertebrae eandem fere latitudinem servant, vel deorsum versus parum tantum latitudine augentur. Itidem vertebrarum altitudo augetur; inferiores vero colli vertebrae aequali altitudine esse solent.

§. CCCLXXX.

Interstitia vertebrarum, cartilaginibus ligamentosis expleta, ad tertiam dorsi vertebra[m] usque eadem sunt magnitudine, tum vero deorsum versus sensim augentur. Quodlibet interstitium a fronte eiusdem fere est altitudinis, quam a tergo, exceptis locis, in quibus columna magis flectitur, inde spatium tertiam, quartam, quintam et sextam vertebra[m] dorsi inter ante minus, pone maius, quartam et quintam vertebra[m] lumborum, hanc et os sacrum inter a fronte maius quam a tergo observatur.

§. CCCLXXXI.

A fronte et a tergo integra spina dorsi directa est, et linea perpendiculari in dextram et sinistram partem secari potest.

Pars spinae dorsi, quam colli vertebrae componunt, leniter ad priora gibba est, vel non nihil ad priora prominet, pars vero, quam vertebrae dorsi componunt, ad posteriora gibba est,

ita ut fornix huius arcus posteriora spectet, et maxima eius altitudo inferiori ossi sterni fere opponatur; sensim vero flexus, parte spinæ dorsi, quam lumborum vertebrae sistunt, prorsum versus gibba, denuo invertitur, donec tandem os sacrum et ossa coccygis quam maxime posteriora versus gibba promineant, inde spina dorsi, ex adverso inspecta, lineam eleganter undulatam, quatuor sinuum, totidemque fornicum, sistit. Maxima altitudo, sive media summi sive *primi* fornicis pars, regionem quartæ colli vertebrae, media *secundi* fornicis pars regionem septimæ et octavæ dorsi vertebrae, media *tertiæ* pars regionem connexionis ultimæ vertebrae lumborum cum osse sacro, *quarta* vero locum mediæ ossis sacri regioni subiectum occupat. Corpora vertebrarum dorsi, corporibus vertebrarum lumborum comparata, magis in thoracem, quam lumborum vertebrae in abdominis cavum prominent.

Nonnumquam, verum non semper, spina dorsi in tertia, quarta, quinta dorsi vertebra ad dextram non nihil sinuatur, tum vero processus spinosi a tergo plerumque de directa linea secedunt. Num forsitan aorta descendens causa est?

Sinum vertebrarum colli musculi cervicis, sinum vertebrarum lumborum musculi lumborum occupant.

§. CCCLXXXII.

In universum spina dorsi ad os sacrum usque non nihil cuneiformis, firma, ac satis robusta est,

ut pondus capitis, thoracis et artuum superiorum non solum facile susstineat, sed etiam motus necessarios ad priora, posteriora, ad latera, levemque rotationem admittat, quin et subitum ac gravem ictum, e. c. saliendo inflictum, sine omni periculo sustineat.

§. CCCLXXXIII.

Ambarum superiorum vertebrarum ope caput non solum in primum dari et reflecti, sed etiam quasi circum cardinem agi potest.

§. CCCLXXXIII.

Mobilitas spinæ vero in collo et lumbis maior est, quam in dorso præsertim in collo, processibus spinosis multum ab invicem distantibus, maior in posticum, quam in primum flexus datur, illa in causa ligamentis processuum spinosorum laxatis, hac vero in causa iisdem resistentibus. Minimus motus in dorso datur, dubio procul, ne aorta, vena azyga et ductus thoracicus torqueantur, vel pulmones laedantur.

Spina dorsi flexa arcus in modum sponte resilit.

In collo, ob parvitatem vertebrarum, crassitudinem cartilaginum intermediarum, positum ligamentorum, obliquam articulorum directionem, breviter, et laxum processuum spinosorum mediarum colli vertebrarum nexum *maximus* motus datur. — In dorso, ob costas ob tenues intermedias cartilagineas, ligamenta tensa, directiores articulos, et processus longos spinosos in-

bricatim mutuo sibi incumbentes *minor motus* conceditur. — In *lumbis* vero, ob crassiores cartilagines intervertebrales, ideoque non solum longiora ligamenta, sed etiam latius ab invicem distantes superficies articulares, et directos breves processus spinosos *maior*, quam in dorso *motus* datur.

Facillime ossa coccygis, processibus non coërcita, moventur.

Resectis omnibus arcubus mobilitas spinæ dorsi augetur, inde mobilitas ab iis coërcetur, valida enim ligamenta subflava magnum in primum dandum flexum spinæ dorsi cohibent.

§. CCCLXXXV.

Quævis igitur vertebra, a secunda colli inde ad os sacrum usque *corpus* ab *arcu* satis distinctum offert. Superiores et inferiores corporum superficies omnium fere vertebrarum in universum parallelæ inter se sunt, mediæ verum partes nonnihil depressa ambitus vero marginis elatus et reliqua parte nonnihil laevior est. Arcui et corpori vertebrarum foramen pro medulla spinali, aut eius nervis interponitur. Arcus, terete radice e corpore vertebrae ortus, *duos processus transversos*, dextrum et sinistram, *quatuor vero obliquos*, dextrum et sinistram superiorem, dextrum et sinistram inferiorem, et processum *spinosum* habet. Hæ vertebrarum partes positum sociarum partium alterius vertebrae sat

bene sequuntur, corpora ad corpora, processus obliqui ad processus obliquos quadrant; quid, quod inter processus transversos, spinosos et foramina quidam nexus intercedit.

Ultima colli vertebra transitum facit ad primam dorsi vertebra, ultima dorsi vertebra ad primam lumborum vertebra, ultima lumborum vertebra plus minusve ad os sacrum, et ultima ossis sacri pars ad primum os coccygis.

Colli vertebrae, praeter primam, forma annulari, et secundam, processu odontoideo sat notatas, a dorsi et lumborum vertebra hisce differunt: I. *Corpora* ratione ad arcum a) minora sunt; b) non prominentia, sed in transversum diducta, ideoque prorsum planiora; c) oblique mutuo sibi incumbentia, ideoque superficies superior cava, et eadem, qua inferior, longitudine esse solet, in reliquis vero omnibus versa vice res sese habet, superficies enim inferior superiore bene longior est; d) prior superficies circa mediam altitudinis partem non sinuatur. II. *Processus transversi* a) breviores sunt, b) foramine pertusi, vel e duplice radice porrecti, ita, ut una radix e corpore oriatur; c) sulcum formant. — III. *Processus obliqui* pro arcus ratione a) maximi sunt ambitus; b) obliquo, non perpendiculari situ ponuntur; c) plani sunt, non sinuati. — III. *Processus spinosi* a) breviores sunt, b) plurimique extremo bifurcato.

Dorsi vertebrae a colli et lumborum vertebra hisce discrepant. a) Superiores et inferiores superficies *corporum* secundae, tertiae, quartae, quintae, sextae, septimae, octavae, nonae, cordiformes sunt, b) foramen *medullae* spinalis orbiculatum est, non trigonum. — *Processus transversi* a) capitulati sunt, b) superficiebus articularibus instructi. — *Processus spinosi* a) pyramidales sunt, b) maiore longitudine quam crassitudine. Incisurae laterales, quae nervos intercostales excipiunt, sunt angustiores.

Quatuor superiores *vertebrae lumborum* a vertebra dorsi et colli satis differunt a) *corporibus*, in margine fovea articulari carentibus; b) processibus transversis tenuibus; c) processibus obliquis magis distinctis; d) ultimae lumborum vertebrae corpore, a fronte altiori, a tergo depressiori.

§. CCCLXXXVI.

Canalis medullae spinalis in colli vertebrae satis amplius, in dorsi vertebrae supra amplior, quam infra, in sextae, septimae, octavae, nonae vertebrae regione angustissimus, in undecimae et duodecimae vertebrae regione denovo nonnihil amplior, in lumborum vertebrae amplissimus, in osse sacro subito contrahitur, et nonnumquam nonnisi ad os coccygis primum descendit. Transverse sectus figuram trigonam angulis sphaericis, et tres superficies, priorem et dextram et sinistram lateralem exhibet.

Triginta foramina lateralia canalis medullae spinalis, e sulco radicum arcuum binarum, in collo, et praesertim in ultima colli vertebra, in omnibus vero lumborum et dorsi vertebis, praecipuae e sulco superioris binarum coniunctarum vertebrarum orta, ampla inter colli vertebrae, ampliora inter dorsi vertebrae, amplissima inter lumborum vertebrae, in osse sacro, quo inferiora, eo contractiora inveniuntur. Nervos et vasa emittunt. Finis canalis hiatum repraesentat.

Hiatum posteriorum, inter vertebrarum arcus interiectorum hiatus caput inter et atlantem maximus est, reliqui in collo et in superiore dorsi parte vix notari possunt, in inferiore dorsi parte et in lumbis vero sensim magnitudine augentur.

Medulla spinalis in canali laxè adstringitur, ideoque multiplex spinae dorsi motus medullam spinalem non tangit.

§. CCCLXXXVII.

Substantia corporum vertebrarum interne perforata, spongiosa et fibrosa, verum tamen, ut in lumborum vertebrae optime cernere licet, nonnihil radiata, recens vero sanguine et medulla plena est. Inferioris et superioris superficiei ambitus laevior est, media vero eius pars asperior et spongiosa.

Substantia arcuum vertebrarum densior, firmior, laevior est substantia corporis, nec, nisi

quibus locis crassior est, interne cellulas medullares exhibet.

§. CCCLXXXVIII.

Foramina vasorum in ea corporis superficie, quae canalem medullae spinalis spectat maiora sunt.

Varietates vertebrarum.

§. CCCLXXXVIII.

Saepissimae superioris corporis vertebrae margo inferiori minime parallelus, sed dextra corporis vertebrarum dimidia pars sinistra dimidia parte bene elatior offenditur. Ea de causa plerumque, nisi morbus causa sit, eadem dimidia proximae, vel superioris vel inferioris vertebrae pars depressior esse solet, v. c. dextra tertiae vertebrae lumborum dimidia parte elatiore et sinistra depressiore, dextra, vel secundae vel quartae vertebrae lumborum pars depressior est, et sinistra dimidia pars elatior. Quo vitium singularum vertebrarum ita emendatur, et positus spinae dorsi perpendicularis inde non corrumpatur. — Aliarum varietatum mentio data occasione in singularum vertebrae partium descriptione facta est.

OSSEUM THORACIS CAVUM.

Vide elegantissimas icones thoracis virilis in *ALBINI Tab. sceleti I. II. III.*

Thoracem femineum vide apud *TRENDELENBURG Diss de sterni costarumque in respiratione motu. Goetting. 1779.*

§. CCCLXXX.

E triginta novem ossibus et nonnullis cartilaginibus compositus *thorax*, *externe* cuneiformis, vel in dolii modum formatus, ut apex declivi prorsum versus directione sectus superiora, basis vero inferiora spectet, *in utroque latere* ovatus, *a fronte* planior, *a tergo* non solum latissimus est, sed etiam in media parte duobus integram dorsi longitudinem percurrentibus, profundis sulcis, quos inter processuum spinosorum vertebrarum dorsi series surgit, describitur.

§. CCCLXXXI.

Interne cavum, in summo angustissimum, ob auctam vero costarum longitudinem, retrorsum gibbam spinam dorsi, arcum ossium sterni, maiorem marginis inferioris ossis sterni inferioris, quam superioris, a spina dorsi distantiam, deorsum versus sensim ampliatus, ulterius autem deorsum versus ob decrecentem costarum spuriarum longitudinem prominentia, crassiora vertebrarum corpora, flexum partis inferioris ossium sterni sensim sensimque angustatus, semper tamen capacius quam in summo ideoque plerumque magis cuneiforme, quam doliforme, thorax circumcludit.

§. CCCLXXXII.

Parietes undique laeves sunt.

Spina dorsi, costis nexa, thoracem intrando, cavum in dextram et sinistram partem dividit.

§. CCCLXXXIII.

Costae priora versus planae, praesertim vero earum cartilagines, et latum os sterni cavum thoracis in fronte nonnihil planius sive *complanatum* reddunt. *Laterales vero partes* maximum ellipticum arcum ostendunt.

Posterior pars externe quidem planior, partibus lateralibus, videtur, verum tamen interne cavum in utroque latere plurimum sinuatum observatur.

§. CCCLXXXIII.

Omnes quidem costae, excepta forsitan ultima, quo inferiores, eo *devexiores* sunt, ut posterior pars priore elatior sit, hinc inde tamen hunc positum nonnihil mutant.

Pone autem omnes costae cum spina dorsi eundem fere angulum formant.

§. CCCLXXXV.

Costae *parallelo positu* non sistuntur, non solum enim *a)* a tergo earum capitula multo viciniora mutuo sibi sunt, quam partes sternales, verum *b)* etiam prorsum cartilagines quinque inferiorum costarum verarum adscendendo tantum mutuo sibi adpropinquantur, ut quinque vel sex quam proxime sibi invicem adcumbant, *c)* costae etiam non eadem ubique sunt latitudine, *d)* mobilitas earum diversa

diversa esse debuit; e) superficies laterales modo, supra descripto, flectuntur; inde spatia costas inter parallela inter se esse non potuerunt.

Plerumque enim spatium *costam primam* inter et *secundam* ubique magna est latitudine, maxima vero secundam inter et tertiam. Reliquorum spatiorum latitudo in universum, praeter duo tres inferiores costas inter spatia quodammodo quidem spatiis a tertia costa inde ad nonam usque latiora minuitur. *)

Spatium binas inter costas in costis veris ossa sterni versus latius est, quam ad latera, vel posteriorem partem. Latissimum spatium septimae et octavae costae interponitur.

§. CCCLXXXVI.

Aucta longitudo, declivior costae, acclivior cartilaginis directio, magnum spatium, et modus articuli prioris et posterioris costam secundam mobiliorem reddunt prima, tertiam secunda, quartam tertia, ideoque, quo inferiores costae, eo, ad undecimam vel duodecimam costam usque mobiliiores sunt.

Prima vera costa, etsi genuino articulo pone instructa, propter cartilaginem immobili nexu cum sterno iunctum, sine sterno moveri nequit.

Ultima costa, vel reliquis nexa, vel soluta, ob breve adstrictum ligamentum transversum,

*) Haec momenta ad siccum sceletum, eius enim cartilaginee marcidiae sunt, diiudicari nequeunt.

maiores angulum, quem cum spina dorsi constituit, et musculus quadratus lumborum, omnium minime moveri potest, et ad immobiles primae vertebrae lumborum processus transversos adcedit.

§. CCCLXXXVII.

Ossa sterni ea ratione inter se nexa sunt, ut ex adverso conspecta ad *priora gibbum*, ad *posteriora cavum*, planum arcum constituent.

A fronte et a tergo partem deorsum versus magis magisque acutiorem, plerumque vero articulos inter quarti et quinti costarum paris non-nihil latiore, subito autem denuo contractiorem nexa constituunt.

§. CCCLXXXVIII.

Aucta per gradus cartilaginum costarum verarum, ossa sterni excipientium, longitudo causa est, cur in inspirando spatium inferiorem ossis medii sternalis partem inter et spinam dorsi plus simplici vice, quam spatium spinam dorsi inter et os sterni superius augeatur.

§. CCCLXXXVIII.

Incisura, in antica thoracis parte cartilaginibus ultimi verarum costarum paris et trium vel quatuor superiorum spuriarum costarum parium interiecta, in cuius media parte apex ossis sterni inferioris demittitur, quaeque nonnisi cute et carne expletur, trigona est, verum tamen varia altitudine et latitudine.

§. CCCC.

Ad aream horizontalem secti coni *maximum planum* septimae circiter vel octavae costae regionem priorem tangeret, ideoque distenta vel compressa haec regio, plurimum quantum vel ad diducendum vel ad contrahendum spatium attinet, mutetur, necesse est.

§. CCCCI.

Spatium thoracis mutatur, quum costae sursum trahuntur, ita ut prima paullum tantum adscendat, secunda sequatur, tertia mobilior facilius secundae, quam secunda primae adpropinquetur, eoque modo reliquae ad duodecimam usque semper facilius attrahantur.

Eodem temporis momento ossa sterni elevantur, et a spina dorsi removentur, verum tamen inferior eorum margo, magis, quam superior, recedit, locus, quo ambo ossa inter se iunguntur in angulum flectitur, eoque impedit, quo minus locus, quem cor occupat, amplius diducatur; — versa vero vice costae os sterni sursum tractum sequuntur.

Haec thoracis dilatio et contractio actui, quo aura folle et accipitur et redditur, quodam modo comparari potest.

§. CCCCH.

Aliae validae vires thoracem *vivi* hominis nonnumquam, plerumque vero magno et veloci impetu, in minus spatium, eo, quod in mortuis vel inspiratione placida adest, contrahunt. Co-

stae, v. c. in sternuendo spasmodice quasi depelluntur.

§. CCCCEIII.

Verum tamen, quum costarum articuli posteriores parum tantum mobiles sunt, partes vero earum priores una cum sterno multum elevantur, et a spina dorsi magis removentur, vel deducti vel contracti thoracis mutatio in antica parte multo maior est quam in postica.

§. CCCCEIII.

Cartilagines intervertebrales (*Syndesmologia* §. XXIII.) aliquatenus causa sunt, cur satis longum tempus erecto homine thorax et reliqua spinæ dorsi pars contrahantur, satis longum vero tempus cubante pristinam longitudinem recuperent.

Singulis enim hisce cartilaginibus pondere, quod erecto corpore spinam dorsi gravat, compressis, vel succo earum nonnihil expresso, altitudo integræ spinæ dorsi multum, inprimis in iunioribus succi plenis, minuitur, reclinato vero corpore succus et elastica vis cartilaginum tantum restituuntur, quantum erecto corpore diminuebantur, ideoque spinæ altitudo in pristinum statum redigitur. Ex quo cavum thoracis hac in causa longius, in illa vero brevius fieri, patet.

§. CCCCEV.

Nec minus officio cartilaginum intervertebraliū spinæ dorsi facilis flexus in adversum, in aversum, idemque verum tamen minor in

latus, sive dextrum, sive sinistrum, et in omnes hisce quatuor praecipuis regionibus interpositas directiones obliquas datur.

Saepius enim spina dorsi a directo positu deflectere debet, ut libramentum corporis restituatur; stante enim homine in hoc magis, quam in illo pede, corporeque superne ad alterum latus inclinato, spinae dorsi inflexae gibbae pars oppositum latus spectat. *)

Eodem tempore costae lateris, cuius pede corpus solo fere innititur, nonnihil conseruntur, alterius fere lateris ab invicem removentur.

Ideoque thorax, quo in latere costae mutuo sibi adpropinquantur, contrahitur, quo vero in latere ab invicem removentur, dilatatur. **)

§. CCCCLVI.

Praeterea mutabilitas cavi, verso, inclinato, reclinato, et in dextrum vel sinistrum latus flexo thorace, quatenus cartilagine intervertebrales, directio processuum obliquorum, et positus costarum eam constituunt, maior infra est, quam supra.

Inclinato, reclinato, in dextrum et sinistrum latus flexo thorace praecipue ob crescentem cartilaginum intervertebraliū crassitudinem; reclinato thorace, quod praeterea exiguum impedimentum processus spinosi sibi invicem obiciunt, verso thorace, quod costae non amplius sibi ob-

*) ALBIN. de sceletō p. 87. et egregia Tab. I. et II.

**) ALBIN. de sceletō pag. 113.

stant, quae arietum instar mutuo sibi oppositae sunt, quo loco sola spina dorsi verti potest.

§. CCCCVII.

In universum thoracis cavum ad *symmetriae regulas bene constructum*, ideoque dextra eius pars sinistrae similis videtur, verum tamen saepe hoc cavi thoracis dimidium altero robustius, nonnihil amplius, interdum etiam nonnihil aliter compositum v. c. gibbius, planius invenimus, etsi neque insita, neque e morbis nata deformitate harum varietatum legitima causa, natura enim hasce aberrationes levibus in altero latere mutationibus vel tegit, vel plane innoxias reddit.

Quare spatium cavi thoracis ad exactum calculum vocari nequit.

§. CCCCVIII.

Hac in thoracis compage, cuius interstitia musculi et fibrae tendinosae vario modo explent, quaeque intus membrana firma obducitur, et extus super inducta cute in genuinum cavum formatur, homini *cor*; trunci omnium *arteriarum* et *venarum*; ambo trunci omnium *vasorum absorbentium*, una cum variis adnexis *glandulis*; *varii nervi*; *dexter* et *sinister pulmo*, qui omnium maximum spatium occupant; *trachea*; *oesophagus*; *thymus*; nonnumquam etiam *pinguedo*, pulvini instar costis periosteum inter et pleuram, imposita, vel cordem ambiens, vel a mediastinis excepta, ponuntur.

§. CCCCVIII.)

Infra, praeter *diaphragma*, quod fornicis instar illi adnectitur, *hepar*, *ventriculum*, *lienem*, *renes*, et varias *canalis intestinalis* partes thorax excipit.

Ideoque nexu cum musculis abdominis et lumborum, continuo tegminum thoracis ad abdomen transitu, thorax cavi abdominis formationem multum iuvat, maximamque vim in canalem intestinorum, omniaque vasa in abdominis cavo contenta habet.

§. CCCCX.

Quumque cavum abdominis a cavo pelvis, partibusque genitalibus et vesica urinaria in eo positis nullo septo disternatur, vero eodem peritoneo obducitur, mutato spatio cavi thoracis eodem tempore simul et abdominis et pelvis cavi spatium, et versa vice, mutato spatio cavi abdominis et pelvis eodem tempore simul et cavi thoracis spatium mutari, patet.

§. CCCCXI.

Denique, patente, qui inter arterias et venas thoracis, abdominis et capitis intercedit, nexu, non potest non esse, quin magna cavi thoracis et abdominis mutatio in capitis cavum simul vim habeat.

§. CCCCXII.

Infantum thorax cum adultorum thorace comparatus magis conoides, magis gibbus et amplior observatur. *)

*) Infantilis thoracis probae icones desiderantur.

OSSA COXARUM

sive

INNOMINATA, ANONYMA.

Os coxarum virile apud *ALBIN. Tab. Oss. XIII. — Icon. oss. foetus, Tab. X.*

Femineum apud *BIDLOO Tab. LXXXXVIII. CREVE l. c. Tab. 1. 2. 3.*

§. CCCCXIII.

Ossa coxarum, maxima omnium ossium latiorum, supra lata, in media parte crassa, ante gracilia maximam pelvis partem constituunt.

Ligamento cartilaginoso inter se, et cum osse sacro, media inter ea impacto, et enarthrosi cum ossibus femorum coniunguntur.

§. CCCCXIII.

Ad annos pubertatis usque laminis cartilaginosis interpositis in tres partes quodvis os coxarum separatur, ideoque effluxo hoc tempore in tria ossa, *os ilium*, *os pubis* et *os ischii*, licet non tamquam separata ossa describenda, apte dividi potest.

Os ilium, sive *pars iliaca ossis coxae*.

§. CCCCXV.

Os ilium reliquis magnitudine praecellit.

Pars prior maxima *superficie interna* laevis et leniter sinuata, margine arcuato, pelvim superiorem ab inferiore separante (linea arcuata) in internam, minimam partem, incisura ischiadica terminatam, abit. Partem posteriorem a fronte cartilagine obductum, valde inaequale, forma auri-

culae humanae simile, priora versus patentius, posteriora versus incisum planum articulare, cuius prope ossi sacro adnectitur, a tergo autem multa tubera, foveas et clivos ex ligamentorum nexu exhibentem margo multum acutus a priore parte separatur. Retro haec ossis ilium pars super os sacrum eminent. Extrorsum et deorsum versus, ad locum usque, quo prope acetabulum desinit, sulcum tortuosum format, per quem musculus iliaco psoas descendit.

§. CCCCXVI.

Externa superficies nonnihil asperior, descendente initio lata, tum vero contractiore linea arcuata in duas leniter sinuatas partes dividitur. Vestigium nexus M. glutei minimi in torosis corporibus huic lineae e transverso superpositum, magis vero posteriora versus breviorē lineam arcuatam e nexu M. glutei medii, ad finem vero huius lineae arcuatae et ad initium incisurae ischiadicae locum, e nexu musculi pyriformis asperum observare licet. Haec superficies in marginem acetabuli prominentem, cui pars tendinis musculi recti femoris illigatur, abit.

§. CCCCXVII.

Margo superior, (crista), in universum quidem arcuatus, asper, litterae romanae S. in modum, parte nempe posteriore ad interna, priore vero ad externa, flexus, contracto initio ortus, mox in tuber adsurgens, iterum deinde contractus,

et quo e loco ligamentum ad vertebam lumborum abit, ad interna angulatus, sensim deinde diductus, et ad externa angulatus, lineamque supra descriptam ad superficiem externam demittens, post sensim sensimque ad interna non nihil flexus, spina obtusa (superiore) formata in marginem priorem abit.

§. CCCCXVIII.

Prior hicce margo initio incisus, deinde vero spina oblongo terete (inferiore) super acetabuli marginem eminens, sinu extrorsum et deorsum versus directo terminatur.

*Os pubis, sive pars pudendalis
ossis coxae.*

§. CCCCXVIII.

Os pubis, ossis coxae pars minima, e duobus ramis, ramo angulato horizontali, et ramo descendente conflatur.

§. CCCCXX.

Rami horizontalis, sive transversi sive superioris, maxima pars continuatio ossis ilii est, minor vero pars continuatio ossis ischii. Supra continuatos terminos superiorem inter et inferiorem pelvim, cristam nempe, extrorsum circumvolutam, in tuberculum spinosum abeuntem, exhibet, eaque ratione internam superficiem ab externa determinat.

§. CCCCXXI.

Externa superficies, quo loco acetabulum subicitur, gibba, deinde descendendo, eo loco, cui unculus spermaticus, vel in sexu sequiori ligamentum teres incumbit, leniter sinuata, lato initio prope acetabuli marginem oritur, tandemque tuberculum spinosum versus in cristam obtusam, sensim sensimque contractionem, abit. Externa rami descendens superficies supra lata, deinde sensim contrahitur, superficiei externae rami ascendens ossis ischii iungitur.

§. CCCCXXII.

Interna superficies laevior, quam externa, supra non nihil extrorsum versus retusa, ad ramum horizontalem leniter sinuata, ad ramum descendentem leniter gibba est.

§. CCCCXXIII.

Cartilaginosa superficies, cuius ope os pubis socio iungitur, plerumque introrsum crista prominet, spatio maiori inter utramque a fronte, quam a tergo.

§. CCCCXXIV.

Substantia in margine, ad foramen ovale directo, tenuior est, inde vero reliquas partes versus sensim plenior evadit.

*Os ischii sive pars ischiadica
ossis coxae.*

§. CCCCXXV.

E duobus ramis priori minori, posteriori maiori componitur.

§. CCCCXXVI.

Prior ramus, ab eo inde loco, quo descendens ossis pubis ramus in eum abit, sensim latior, crassior evadit, ramoque posteriori adscendendo iungitur. Prior eius superficies aspera est, posterior laevis, margo superior acutus, inferior latus.

§. CCCCXXVII.

Rami posterioris externa superficies cristam obtusam, in prominentem acetabuli marginem mutatam, et posteriora versus *tuber ischii* cartilagine crustatum, initio contracto ortum, sensimque ductum, ovali ambitu terminatum, et ad externa et posteriora circumvolutum exhibet. Acetabulo et tuberi ossis ischii sulcus, tendinem M. obturatoris externi excipiens, interponitur. Post ad constituendam acetabuli posteriorem partem fornicatur, in duas incisuras abit, in *inferiorem minorem*, sive incisuram ischiadicam inferiorem, quae M. obturatorem internum excipit, et in *superiorem maiorem*, *ellipticam*, sive incisuram ischiadicam superiorem, sive potius iliacam, minimam partem ab osse ischii, maximam vero ab osse ilium constitutam, in qua nervus ischiadicus, arteria et

vena ischiadica et glutea ponuntur. *Spina promi-*
nens, ischiadica vocata, incisuris interponitur.

§. CCCCXXVIII.

Acetabulum tres ossis coxarum partes consti-
tuunt, maximam vero partem pars ischiadica, sive
os ischii confert. Oblique ad externa et inferiora
dirigitur. Margo eius undulatus, tubere ad os
pubis ortus, deinde incisus, post pedetentim, quo
loco pars iliaca crassissima est, elatior, tum deor-
sum versus sinuatus, ad os ischii multum, quin
plurimum fere prominens, foramen ovale versus
incisura profunda, vasa excipiente, abrumpitur.
Summa et infima marginis pars acutissima est, plu-
rimumque prominet. Cavum acetabuli hemisphae-
ricum non ubique cartilagine obducitur, sed ad
tertiam fere partem nudum conspicitur, ideoque
pars, cartilaginosa tegmine obducta, lunatam figu-
ram refert. Mediae huius regionis parti impres-
sio aspera imponitur, quae ligamentum, quod
caput ossis femoris devincit, excipit. Reliquam
cavi acetabuli partem, cartilagine nudam, tenuem,
non nihil planiorem pinguedo explet.

Is est acetabuli modus, ut ossi coxarum mo-
tus super femore plurimus in pronum, minor in
latus, minimus vero in posticum dari possit.

Erecto homine truncus in ea acetabuli parte,
quam os ilium format, praecipue innititur.

§. CCCCXXVIII.

Foramen ovale, thyreoideum, os pubis inter
et os ischii, plus minusve trigonum, angulis sphae-

ricis, membrana tendinosa clauditur, ita tamen, ut nonnulla foramina, nervum et arteriam emit-tentia, remaneant. Longissimum latus ab osse ischii, brevius a ramo descendente ossi pubis, brevissimum a ramo horizontali ossis pubis constitui-tur. Margo foraminis ceterum inaequalis est. Angulus superior oblique ad interna et superiora in incisuram vel semicanalem abit, quam mem-brana tendinosa non tangit.

§. CCCCXXX.

Substantia ossis coxarum, quo loco ossi fe-moris innitur, hoc est, ea in parte ossis ilium, quae acetabulum constituit, crassissima est, tenuis-sima in media parte ossis ilium et acetabuli. Lo-ca crassiora cellulas medullares continent. Cete-rum superficies externa ossis coxarum plura fora-mina vasorum, quam superficies interna, offert, verum tamen in interna superficie magnum fora-men prope synchondrosin sacro iliacam semper offenditur.

§. CCCCXXXI.

Ossi coxarum, et quidem ossi ilium M. obli-quus externus et internus, et transversus abdomi-nis, M. quadratus lumborum, M. tres glutei, M. pyriformis, M. iliacus internus, M. lumbocosta-lis; spinae ossis ilium superiori: M. tensor fa-sciae, M. sartorius; ossi pubis: Pars M. obliqui externi et interni abdominis, M. pyramidalis, M. rectus abdominis, M. gracilis, M. adductor lon-gus et brevis, M. pectineus, M. obturator exter-

nus et internus; Ossi ischii. M. obliquus externus et internus abdominis, M. gemini, M. quadratus femoris, M. semimembranosus, M. semitendinosus, M. biceps femoris, M. coccygeus, M. adductor magnus, pars M. recti femoris, et transversus perinaei, in sexu potiori M. erector penis, et in sequiori M. erector clitoridis adnectuntur.

§. CCCCXXXII.

Os ilium primum nucleum osseum, alterum vero os ischii exhibet.

In maturo fetu nonnisi tres nuclei ossei trium partium ossis coxarum conspiciuntur. Cartilago, ramos priores ossis pubis et ossis ischii coniungens, prima iam ante duodecimum annum abit, rarissime absoluta ossis coxarum fabrica cartilago has partes inter remanet. Deinde pubertatis tempore tres ossis coxarum partes in acetabulo conferruminantur. Causam §. XXVIII. explicat. Progredientibus pubertatis annis epiphyses tuberculi ossis ischii, spinæ inferioris ossis ilium, et ultima tandem linea, quæ cristam format, evanescunt.

Foramen ovale infantibus ellipticum est, adultis vero trigonum.

Varietates.

§. CCCCXXXIII.

Nonnumquam ossa pubis multum ab invicem distant. *) Nonnumquam in acetabuli fundo foramen observatur.

*) J. G. WALTER, von Spaltung der Schaambeine. Berlin 1782. 4. — Egregia icon.

PELVIS OSSEA.

§. CCCCXXXIII.

Os sacrum, ossa coccygis, ossa coxarum, septem itaque diversa ossa pelvim, *) supra apertum, infra interruptum, et excepta parte, quam ossa coccygis formant, immutabile fere cavum, constituunt. Partem intestinorum tenuium, intestinum rectum, vesicam urinariam, partes genitales internas, nervos et vasa sanguifera artuum inferiorum, multaque vasa absorbentia, et eorum glandulas excipit.

§. CCCCXXXV.

Externe pelvis arcuata, supra latior, infra contractior, pone propter os sacrum arcuata, utrimque propter tubera ossis ischii longissima est, et stante homine crassissimae ossis ilium parti, sedente vero tuberibus ossis ischii innititur.

§. CCCCXXXVI.

Quo loco vertebri lumborum, et femoribus pelvis iungitur, *motum admittit*; Inde os coxarum in ambulando surgit, et quidem os coxarum illius lateris, quod praecipue femori innititur, descendit vero, et cum eo truncus altero in latere, cuius pes profertur.

§. CCCCXXXVII.

Tria maxima pelvis ossa, os sacrum nempe et ossa coxarum parum tantum, cartilaginibus ligamen-

*) STEINS Geburtshülfe, Cassel 1783. — SANDIFORT Thef. Diss. T. I. p. 169. — CREVE. l. c.

gamentosis articulos valde adstringentibus, moveri inter se possunt, excepto graviditatis et partus tempore, quo articuli laxantur.

§. CCCCXXXVIII.

Linea, quae e promontorio ossis sacri obtuso initio orta, super ossa coxarum acutior extenditur, et in symphysi ossium pubis sociae miscetur, bene constitutis terminis *pelvim superiorem*, sive *maio-rem*, ab *inferiore*, sive *minore*, sive *vera pelvi* separat, marginemque pelvis minoris superiorem constituit.

§. CCCCXXXVIII.

Pelvim superiorem duae leniter sinuatae lances, quas inter inferiores vertebrae lumborum prominent, et a quibus pelvis minor descendit, repraesentant. Intestina igitur, a pelvi superiore fulta, reliqua pelvis viscera directo premere nequeunt.

§. CCCCXXX.

Ambitus marginis superioris, sive *apertura superior pelvis minoris* rite constitutae tres varietates offert; vel enim ovatam, vel magis annularem, quin trigonam figuram habet.

§. CCCCXXXI.

Cavi pelvis superficies planae, laevigatae, hinc inde carne teguntur. Superficiem posteriorem os sacrum constituit, superficies laterales os ilium et os ischii, superficiem vero priorem ossa pubis utriusque ossis coxarum formant.

§. CCCCXXXII.

*Superior apertura oblique directa in superiora et priora tendit, inferior vero ad inferiora et posteriora spectat. Promontorium synchondrosi ossium pubis altius sistitur. *)*

Erecto homine ultimum coccygis os longitudine pollicis et promontorium longitudine ossis sacri et ossium coccygis altius, quam inferior commissurae ossium pubis margo sistuntur.

Commissura ossium pubis oblique in posteriora tendit, margine superiori magis in priora, inferiori magis in posteriora verso.

§. CCCCXXXIII.

Ambitus aperturae inferioris aegre cum mathematica figura comparari potest. Ab ultimo coccygis osse ortus, ligamento sacro ischiadico, ramo ossis ischii adscendente, et ramo ossis pubis descendente tactis, ad commissuram ossium pubis extenditur.

§. CCCCXXXIV.

Servatis ligamentis, magna ossi sacro et ossi coxarum interiecta incisura ischiadica foramen trigonum, angulis sphaericis, foramine ossis coxarum ovali maius constituit. Nervus ischiadicus, arteria et vena ischiadica, musculus pyriformis transmittuntur.

§. CCCCXXXV.

Vera apertura pelvis inferior recens in oblon-

*) Egrege propositum in CAMPERS Betrachtungen über die Geburtshülfe. Leipzig 1777. 8. in figura adiecta.

gum orbiculata est, diametro longiori transverso tubera ossis ischii inter. Siccatis ossibus et corrugatis ligamentis apertura inferior cordiformis offenditur.

§. CCCCXXXVI.

Aperturis cavum pelvis interiicitur, hisce diametris instructum. *)

	in corpore virili.	in corpore femineo.
In bene formatis mediae staturae hominibus diametro pelvis superioris, sive distantia spinas inter superiores ossium coxarum — —	VIII. pollic.	XI. poll.
Diametro magna ambitus superioris pelvis minoris, sive spatio ossa ilium inter — — —	III. poll. VI.	V. poll. VI. linear.
Diametro minore, sive coniugata eiusdem aperturae, hoc est, ab osse sacro ad os pubis — —	III. ad V. poll.	III. poll. VIII. linear.
Utraque diametro obliqua, a com-		

*) Cf. J. C. F. KOEPPE, praef. KRAUSE de pelvi feminea metiendi. Lips. 1781. 4.

	in corpore virili.	in corpore femineo.
missura ossis sacri et coxae ad ossa pubis	III. pollic. II.	V. pollic.
Diametro tubera ossis ischii inter —	linear. III. poll. II.	III. pollic.
Diametro apicem ultimi ossis coccygis inter et os pubis —	linear. III. pollic.	III. poll. VI. linear.
Altitudine pelvis, sive linea tuber ossis ischii inter et margi- nem pelvis minoris superiorem — —	III. poll. X.	III. poll. VI.
Altitudine com- missurae ossium pu- bis — — —	linear. I. pollic. X.	linear. I. poll. VI. li- near. raro II.
Distantia apicis ultimi ossis coccygis ab ossis sacri mar- gine — — —	linear. III. poll. X.	pollic. V. pollic.
Angulo ossium pubis — — —	linear. LX. ad LXXX. grad.	LXXXX. grad.

§. CCCCXXXVII.

Altitudo mutatur, pelvis enim ad corporis ha-
bitum angustae altitudo maior, amplae vero minor
esse solet.

Infantum pelvis tam angusta est, ut ne vesica quidem urinaria in ea collocari possit; nondum etiam in pelvi discrimen ratione sexuum invenitur.

§. CCCCXXXVIII.

Ambitus adultae virilis pelvis plerumque magis orbiculatus est, quam femineae pelvis.

§. CCCCXXXVIII.

Linea ex ultimi ossis coccygis apice ad centrum pelvis minoris ducta, *axis pelvis* audit, lineam propensionis recto fere angulo secans, in priori nempe latere angulo LXXV. in posteriori autem latere angulo CV. graduum *).

Media linea, a nonnullis *axis pelvis minoris* vocata, linea est arcuata **).

§. CCCCL.

Osseae pelvis posterior pars triplo, lateralis duplo longior est priore parte.

§. CCCCLI.

Sinus ossis sacri plerumque sex, octo, raro autem duodecim lineis conficitur.

*) Icones huc pertinentes apud CAMPER l. c.

**) SOMMER, von der Axe des weiblichen Beckens. Braun-
schweig 1791. 8.

CLAVICULA *)

sive

CLAVIS, LIGULA, FURCULA, OS IUGULI.

Virilem apud *ALBIN. Tab. XV. — Icon. oss. foetus Tab. XIII.*
 Femineam apud *BIDLOO Tab. LXXXXV.*

§. CCCCLII.

Claviculae, retinacula quasi, non nihil oblique primo costarum pari impositae sterno et acromio scapulae interponuntur, cui et primae costae ligamentorum ope iunguntur.

§. CCCCLIII.

Inde clavicula in partem *sternalem*, partem *mediam*, et partem *acromialem* dividitur.

Pars *sternalis* non nihil orbiculata, tribusque marginibus distincta, superficiem cartilagine tectam, ad interna directam, inaequalem, leniter sinuatam, oblique prorsum versus non nihil excurrentem, et in universum ad pectus tendentem offert.

§. CCCCLIIII.

Pars *media* litterae *S.* productae in modum curvatur. Prior curvatura, non nihil ultra dimidiam longitudinis partem excurrentem, in priora dirigitur, fornicemque thoracis, a quo tamen distat, quasi tegit; altera curvatura huic opposita, citius quasi oritur, et superficies eius superior in longum leniter gibba, inferior vero leniter sinuata est. — Ad partem sternalem crassissima, sen-

*) Egregia *HAASE Diss. Comparatio claviculae animantium brutorum cum humanis.* Lips. 1766.

sim teretior, tenuior, laevior evadit, ut aptius acromio complanato adplicetur. — *Prior curvatura* pone laevis, ante autem valde aspera et inaequalis e musculi pectoralis maioris nexu, supra vestigium adhaesionis: musculi cleidomastoidei offert. — *Altera curvatura* pone laeve adnexi musculi cucullaris vestigium, infra foveolam pro ligamento rhomboideo, prorsum valde aspera iam foveam, iam tuberculum, e nexu musculi deltoidei exhibet. Intègra media pars infra pro excipiendo musculo subclavio sinuatur. Partem acromialem versus valde aspera est e ligamentorum nexu, quae ad scapulae processum coracoideum extenduntur.

§. CCCCLV.

Partis acromialis transversam, ovatam, cartilagine obductam, ad externa directam superficiem ligamenta arcto nexu cum acromio iungunt. Ceterum vero pars acromialis aspera est et inaequalis.

§. CCCCLVI.

Substantia claviculae, velut omnium ossium cylindricorum in epiphysibus spongiosa est, in diaphysi vero densior, cellulisque medullaribus instructa.

In media marginis posterioris parte aperturae canalium obliquorum, vasa excipientium, observantur.

§. CCCCLVII.

In maturo fetu ad utramque extremam par-

tem cartilaginosa est clavicula, et inter omnia artuum superiorum ossa quodam modo perfectissima et robusta, ut a compage thoracis iamiam multum perfecti scapulas rite arceat. Pars sternalis diu, ad tempus usque, quo fabrica sceleti absolvitur, epiphysis manet, nihilo minus tamen claviculae in os mutatio omnium prima accidere solet.

Varietates.

§. CCCCLVIII.

Pars *sternalis*, quae iam crassior, iam planior est, plurimum mutatur. Integra vero clavicula iam magis curvata, iam vero magis recta protenditur.

SCAPULA sive SCOPTULA, OMOPLATA.

Virilis videatur apud *ALBIN. Tab. XVI.*

Feminea apud *BIDLOO Tab. LXXXXV.*

Infantis apud *ALBIN. Icon. oss. foetus, Tab. XIII.*

§. CCCCLVIII.

Scapulae ad utrumque spinae dorsi latus superiori posteriori thoracis parti, cui excavatae nonnihil aptantur, incumbunt, laxe musculorum ope capiti, spinae dorsi, et costis, articuli autem ope claviculae et humero iunctae.

§. CCCCLX.

Scapula trigona *margines, angulos, superficies, partem articulare, acromion, processum coracoideum* offert.

§. CCCCLXI.

Superior margo, brevissimus, acutissimus, parum curvus, ad radicem processus coracoidei incisura, vasa et nervos excipiente, instructus est; *posterior margo*, basis audiens, longissimus est, et arcuatus; *externus margo* crassissimus, e duobus labiis componitur, leniterque sinuatur. Collo vestigium asperum e nexu capitis longi musculi tricipitis presse subiectum conspicitur.

§. CCCCLXII.

Superior angulus truncatus quasi est — *inferior* autem acutior est, ambitu sphaerico; — *Vices anguli externi pars articularis*, brevis, crassa, in orbem aspera, inaequalis, ante et pone prominens, ut sinuata pars pone articulare hanc

partem colli figuram sistat, subit. *Superficies* eius *articularis*, cartilaginoso tegmine obducta, leniter excavata, forma auriculae humanae similis, apice orbiculato, cui tendo capitis longi M. bicipitis adnectitur, sursum spectante, margine posteriori gibbo, priori sinuato, ad exteriora, et quodam modo ad superiora et priora dirigitur.

§. CCCCLXIII.

Processus coracoideus (cuniformis, ancoralis, rostriformis) e collo ortus, et superficiem articulare transcens, initio latissimus, ad priorem colli superficiem laevis, et ad excipiendum M. supraspinati tendinem sinuatus, superne, et ad apicem obtusum, ob nexum M. pectoralis minoris, M. bicipitis et M. coracobrachialis asper et gibbus, latitudine crassitudinem ubi-vis superante, deorsum versus ad externa et priora porrigitur, et priorem articuli partem, posteriorem vero et superiorem acromion tegit.

§. CCCCLXIII.

Posterior, sive externa, scapulae superficies dorsalis gibba est, marginibus plerumque reflexis, parte *supraspinata* laevi, et ad excipiendum M. supraspinatum sinuata; *infraspinata* vero, pro M. infraspinato satis sinuata est, verum inaequalis, et quo loco superficies prior sinuatur, elata, versa vero vice, quo loco superficies prior elata est, sinuata.

§. CCCCLXV.

In posteriore superficie e basi ad collum us-

que *spina* surgit, quae e transverso posita sensim altior et latior evadit, pone collum in orbem inuatur ac laevigatur, arcuatim articulum transcendens incisurâ quasi pro M. infraspinati tendine multum protenditur, et in *angulum* obtusum, sive *acromion*, abit. Initio quidem spina sursum et deorsum sinuata est, tum vero superficies superior vertitur, ut oblique deorsum collum versus spectet, eaque de causa inferior superficies procedendo fornicatur, et adscendendo versa sensim posterior, et tandem superior evadit. Ceterum vero superficies infraspinata per aliquod spatium limbosa est, ita, ut integra spina tres quasi limbos referat. Ideoque huic limbo undulato, et margini superficiei superioris spinae interposita, e nexu tendinis M. cucullaris valde aspera pars, initio, quo loco spina parum erecta est, lata, deinde contractissima, post deorsum versus latior, tum denuo contractior est, donec latescens in *acromion* abeat, sive superficies spinae in margines acromii, et margines spinae in superficies acromii abeunt.

Acromion recta magis protenditur, et in margine posteriori superficiem cartilagine obductam, ovatam, transversam habet. — Inferiorem marginem nexus M. deltoidei exasperat.

§. CCCCLXVI.

In *marginē priori* vestigium planum conspicitur, cui M. teres minor, et in angulo inferiori vestigium asperum, cui M. teres maior inseritur.

§. CCCCLXVII.

Prior, interna superficies, quae costas spectat, pro excipiendo M. subscapulari, ut plurimum vero, quo loco in superficie posteriore spina surgit, sinuata, tres, quatuor, quinque, quin et plures radiatas, ad collum invicem tantas lineas asperas, quibus partes musculi tendinosae illigantur, interiectis lenibus sinibus, exhibet. Utraque inferior linea aspera prope collum in obtusam crassam lineam abit. Aspera, nonnumquam admodum prominens linea e M. serrati antici maioris insitione, descendendo totam basis longitudinem tegit.

§. CCCCLXVIII.

Substantia scapulae ad mediam ossis partem tenuissima est, post crassitudine augetur, ut margines, acromion, processus coracoideus, collum ex ordine maiore crassitudine donata sese excipiant. Ubique, praesertim vero in locis crassioribus aperturae canalium vasorum conspiciuntur, nonnumquam etiam pars infraspinata satis profundum sulcum arteriarum offert.

§. CCCCLXVIII.

Praeter M. cucullarem, M. supraspinatum, M. infraspinatum, M. teretem maiorem et minorem, M. subscapularem, M. pectoralem minorem, M. serratum anticum maiorem, M. bicipitem, caput longum M. tricipitis, M. deltoidem, quorum adhaesiones iam iam descriptae sunt, angulo superiori M. levator anguli scapulae, mar-

gini superiori M. omohyoideus, basi M. rhomboideus maior et minor, nonnumquam vestigiis conspicuis illigantur.

§. CCCCLXX.

In *mature fetu* scapula multum a perfecto statu abest, processu coracoideo, acromio, et basi non, nisi epiphysibus cartilaginosis. Scapula quidem prima in os mutari incipit, verum tamen haec mutatio tardissime absolvitur.

Varietates.

§. CCCCLXXI.

Nonnumquam posterior scapulae margo magis gibbus est, nonnumquam magis directus, ut integra scapula iam magis arcuata, iam magis oblonga evadat. Nonnumquam acromion separatam, cartilaginis ope cum spina coniunctam, vel latiore, vel contractiore, iam plus minusve curvatam, iam magis angulatam, iam magis tere-tem partem sistit.

HUMERUS sive OS BRACHII.

Virilem humerum vide apud ALBIN. Tab. XVII. — *Icon. oss. foetus*, Tab. XIII.

Femineum apud BIDLOO Tab. LXXXVI.

§. CCCCLXXII.

Humeri, longissima et robustissima artuum superiorum ossa, de scapulis suspenduntur, et in articulo cubiti ossibus antibrachii iunguntur.

§. CCCCLXXIII.

In *extremam partem superiorem, inferiorem*, et in *partem mediam humerus* dividitur.

Superior extrema pars capite eminet cartilagine obducto, laevi, tertiam circiter globi partem ambitu aequante, oblique ad posteriora, interna et superiora directo, quod super superficie articulari triplo vel quadruplo minore motum laxissimum totius corporis humani articulum format. Ambitum capitis asperum ligamentum capsulare cingit. Prorsum versus duo tubercula, *sulco* separata, conspiciuntur. *Tuberculum externum, maius*, capiti oppositum, vestigia insitionis trium musculorum, in summo M. supraspinati, in medio M. infraspinati, in imo M. teretis minoris offert. *Tuberculo minori interno* M. subscapularis illigatur.

Sulcus tubercula inter tendinem M. bicipitis longum excipiens inferne leni initio oritur et tubercula inter plurimum profundus est.

Pars humeri capiti subiecta subito contrahitur, ut collum, in partem mediam deinde versum, formetur.

§. CCCCLXXIII.

Media pars superne aliquamdiu eiusdem fere crassitudinis ac figuræ cylindricæ a media longitudinis parte sensim et magis magisque tenuatur, attamen in latum diducitur. Prorsum et introrsum versus torta videtur.

In imo pars media trigona evadit, superficie *externa* maximam partem gibba, deorsum vero versus planiore, a capite ad cartilaginem articulare usque porrecta; superficie *prior*e plurimum elata, nonnisi deorsum versus sinuata, a tuberculo maiori condylum priorem versus, ad superficiem articularem radialem usque producta; *posteriore* varie elata, a tuberculo minori ad condylum posteriorem usque prolata; marginibus obtusis, *priori* tamen et *posteriori* in imo acutis et sinuatis, *interno* plurimum directo, crassissimo, nonnihil reflexo.

Asperæ marginis interni parti infra tuberculum maius M. pectoralis maior et M. latissimus dorsi, et magis deorsum versus M. deltoideus, asperæ marginis prioris parti insuper inhaerens, inseruntur. Prior margo vestigia insitionis capitis brevis M. tricipitis, nonnumquam etiam vestigium vasorum et nervi radialis, et ulterius deorsum versus vestigium insitionis M. supinatoris longi, et radialis longi externi exhibet. In marginis posterioris superiore parte infra tuberculum minus vestigium insitionis M. teretis maioris, in media circiter parte vestigium insitio-

nis M. coracobrachialis, et ulterius deorsum versus maior vel duae minores canalium vasa excipientium aperturae conspiciuntur.

§. CCCCLXXV.

In *extrema inferiore parte condyli*, condylus *externus*, sive *prior*, asper, parum prominens, M. carpi extensores adnexos habens, condylus *posterior*, sive *internus*, itidem asper, verum magis prominens, M. carpi flexores adnexos habens, pone ad excipiendum nervum ulnarem leniter sulcatus, et superficies laeves, cartilagine obductae, articulum cum ulna et radio sistentes locantur.

Superficies articularis ulnaris in medio fere *extremae inferioris partis*, nonnihil oblique exteriora et inferiora, magisque etiam priora versus posita, trochleae in modum sinuatur. Interna eius pars altius descendit, et ex adverso conspecta dimidiam circuli partem superat; externa pars exilior ante et pone altius adscendit.

Superficies articularis radialis ulnari iuncta, sphaeroides, deorsum versus longior, in transversum vero brevior, nonnisi interno latere conspicienda datur.

Supra mediam superficiei articularis ulnaris partem duae *fossae*, prior minor, posterior vero maior, quae processus ulnae excipiunt, positae sunt. Priorem processus coronoideus ulnae, flexo

flexo antibrachio, posteriorem olecranon, sive tuber ulnae, extenso antibrachio, intrat.

Similis, verum tamen minor *fossa capitulum radii*, quam maxime flexo antibrachio, excipiens, supra superficiem articulare radialem observatur. Ambitum fossarum nexus ligamenti capsularis exasperat.

§. CCCCLXXVI.

Praeter M. deltoideum, M. supraspinatum, M. infraspinatum, M. teretes, maiorem et minorem, M. subscapularem, M. latissimum dorsi, M. pectoralem, M. tricipitem brachii, M. coracobrachialem, M. supinatore longum, M. radialem externum longum, quorum insitionis loca iam iam indicata sunt, priori et posteriori humeri superficiei M. brachialis internus; condylo priori M. anconeus, et M. supinator brevis, M. radialis externus brevis, M. ulnaris externus, et M. extensor communis digitorum; condylo posteriori M. pronator teres, M. radialis internus, M. palmaris longus, M. sublimis, et M. ulnaris internus illigantur.

§. CCCCLXXVII.

Substantia partium humeri extremarum spongiosa est, mediae vero partis solida et firma, supra aspera, infra laevior, et magnum medullae cavum continet.

§. CCCCLXXVIII.

In *matureo fetu* extremae partes, ut plurimorum fere ossium cylindricorum, cartilagineae sunt. In superiore extrema parte deinde unus tantum nucleus, in inferiore vero duo nuclei, quod condylus posterior e proprio nucleo nascitur, gignuntur. Ad tempus, quo pubertatis annis ossium fabrica absolvitur, epiphyses cum diaphysi coalescunt, inferior vero extrema pars citius, quam superior pars, cum diaphysi conferruminatur.

CUBITUS.

sive

FOCILE MAIUS, CANNA MAIOR, ULNA.

radialis apud ALBIN. Tab. XVIII. — Ei. Icon. oss. foetus, Tab. XIII.

eminens apud BIDLOO Tab. LXXXVI.

§. CCCCLXXVIII.

Cubiti, praecipua antibrachiorum ossa, supra radiis et humeris, infra vero radiis et cartilagineo ope ossibus triquetris iunguntur, et posteriora versus ponuntur. Ratio eorum ad humeros sese habet ut VII. ad VIII.

§. CCCCLXXX.

In crassiores *partes extremas*, et in *partem mediam* cubitus dividitur.

In superiore extrema parte *processus anconaeus*, sive *olecranon*, externa superficie e M. *capitis* insitione valde aspera, et deorsum versus acuta, interna superficie cartilaginosa tegmine abducta, laevi, trochleae ossis humeri aptata, ideoque lunata, lineaque prominente in parte divisae, eminet. Nec minus in eadem parte *processus coronoideus*, supra instructus plano articulari, cartilagineo obducto, a superficie interna *processus anconaei* ope vestigii contracti asperum parato, verum tamen aliqua ex parte illi iuncto, et in tria latera, *internum*, maximum, latissimum, et in *medium*, minimum, trochleae humeri iuncta, *externum* interno minus, ambobus capituli radii excipiens, cavitationem sigmoidicam vocant, ante contractius, pone latius.

diviso locatur. Ceterum margo processus anconeus asper est et angulatus.

Processus anconeus et coronioideus ea ratione trochleam complectuntur, ut ginglymi in modum sinibus et tuberculis mutuo sese excipiant; iunctum enim processus incisuram lunarem, linea prominente, et vestigio aspero in quatuor foveolas divisam sistunt, quarum superiores foveolae, extento antibrachio, inferiores vero, flexo antibrachio, humeri trochleae admoventur.

§. CCCCLXXXI.

Media cubiti pars, vix e parte superiore ortho contrahitur, deinde vero lente gracilescit, donec prope extremam inferiorem partem denuo non nihil diducatur.

In universum media pars, a tergo conspecta, a processus anconeus apice ad processus stiliformis apicem productae literae S in modum flexa est, supra enim radium versus gibba, in medio satis recta, infra vero radium versus cava, adparet.

Media pars ad extremam inferiorem partem usque tres superficies, posteriorem, priorem, internam offert.

Posterior superficies a processu anconeus et coronioideo ad processum stiliformem usque producta, usque ad mediam sui partem sinuatur, ipsa vero media parte fornicatur. Res longitudo M. perforante superne tegitur.

Prior superficies itidem a processu anconeus

leo, et parumper tantum a processu coronoi-
leo ad processum stiliformem usque producta,
omnium maxime aspera est, et inaequalis, tota
quanta fere plana, vel leniter sinuata, infra
vero non nihil gibba. Vestigio superiori obliquo
aspero M. abductor longus pollicis, inferiori
vero magis directe descendentem M. extensor com-
munis digitorum, et M. extensor proprius di-
giti indicis adhaerent. Extrema inferior pars
ulnæ pro excipiendo M. ulnaris, externi ten-
line offert.

Interna superficies supra sinuata, infra ma-
gis gibba, a processu coronoiideo ad extremam
inferiorem partem usque producitur.

Supra, haud longo intervallo a processu co-
ronoiideo, magis posteriorem superficiem versus
pro M. brachiali interno adnectendo asperam fo-
ream vel eminentiam habet. Ad finem circiter
primae tertiae longitudinis partis foramen vaso-
rum conspicitur. Sinum infra hunc locum M.
perforans aequat.

Prior margo a superficie articulari radiali
incipiens, omnium acutissimus, clivoso tramite
pergens, deorsum versus sensim evanescit. Mem-
branam interosseam adnexam habet.

Supra vestigio marginis aspero M. supinator
brevis inseritur.

Externus margo a processu anconeæ lato
initio oritur, deinde retusus, sensim deorsum
versus subducitur.

Posterior margo, omnium maxime obtusus, superne vero nonnihil acutior, a processu coronoideo ortus, ad posteriorem processus stiliformis partem sensim sensimque evanescit. Superne M. perforantem et M. pronatorem quadratum adnexus habet.

§. CCCCLXXXII.

Inferior extrema pars oblongum, prominens, cartilagine tectum capitulum, cuius ope radio iungitur, et brevem, obtusum, nonnihil curvatum conum, sive *processum stiliformem* sistit. Capitulo et processui incisura, quae ligamentum, radium cubito iungens, excipit, interponitur: Nonnumquam processus distincte duabus superficiebus, quarum lateralis radio iungitur, inferior vero nonnihil excavatur, instructus.

§. CCCCLXXXIII.

Locis cubiti iam iam notatis M. brachialis internus, M. triceps brachii, M. pronator quadratus, M. supinator brevis, M. perforans, M. extensor communis digitorum, M. extensor digiti indicis propius inseruntur. Supra vero superficiei priori: M. anconeus; margini externo M. ulnaris externus, saltem per aponeurosin. Margini priori et superficiei priori: M. abductor longus, M. extensor longus et brevis pollicis; vestigio aspero infra superficiem articulare radialem M. flexor longus pollicis adnectuntur.

§. CCCCLXXXIII.

Substantia, sicut omnium ossium cylindricorum, in diaphysi firmior est, quam in epiphysibus. — In infante utraque extrema pars epiphyses cartilaginosas sistit.

Varietates.

§. CCCCLXXXV.

Os sesamoideum processui anconeae impositum, *) vel in apice processus coronoidei **) observarunt.

*) CHENAL *Obs. botan. med.* Basil. 1765. 4. §. XXVIII.

**) In collectione mea.

R A D I U S

sive

FOCILE MINUS, CANNA MINOR, ADDI-
TAMENTUM ULNAE.Virilis apud *ALBIN.* Tab. XVIII. — *Icon. oss. foet. Tab.*
*XIII.*Femineus apud *BIDLOO* Tab. LXXXVI.

§. CCCCLXXXVI.

Radi, olecrani longitudine ulnâ minorus, verum tamen infra crassior est, quam supra, quod maximam connexionis cum carpo partem constituit. Iuxta, verum tamen nonnihil priora versus positus, supra ulnae et humeros, infra ossi naviculari, lunato, et triquetro iungitur. Ratio longitudinis ad ulnam sese habet ut XI. ad XII.

§. CCCCLXXXVII.

Extrema superior pars orbiculatam, cartilagine tectam, cavam, capitulo humeri aptatam superficiem articulare, et marginis ambitum cartilagine obductum, latissimum ulnam versus, contractissimum in externa superficie, sistit, circum axin ea de causa versatilis.

Infra extremam inferiorem partem radius contractior collum constituit fere cylindricum, quod ad ulnam directum, *tubere*, partim aspero, partim cartilaginosa crusta tecto, desinit, cuius asperae priori parti tendo musculi bicipitis brachii inseritur, laevi vero, cartilagine obductae, priorⁱ parti tendo in pronatione incumbit.

§. CCCCLXXXVIII.

Media vero pars, ultra mediam longitudinis partem magis magisque ab ulna secedit; donec deorsum versus illi denuo adpropinquetur, ideoque superficies radii ulnaris a collo inde cava est, altera vero gibba.

Internam et externam superficiem inter a collo inde non nihil latior est, verum planior, tum aliquatenus contractior, donec tandem subito latissima fiat.

Paullo ante, quam in extremam inferiorem partem desinit, prismaticam figuram media pars induit.

Superficies ulnam spectans in marginem acutum, supra et infra vero obtusiolem, desinit, reliquis superficiebus in obtusum marginem abeuntibus.

Hunc inter marginem acutum et priorem ulnae membrana interossea posita est. Per integram eius longitudinem ad interna sinus longior et latior pro M. flexore pollicis longo, ad externa sinus brevior et contractior pro M. abductore pollicis longo observantur.

Deorsum versus margo, ut in incisuram ulnarum abeat, diducitur.

Supra media pars in priore, externa et interna superficie aspera est, ex insitione M. supinatoris brevis, et M. flexoris digitorum sublimis. Media longitudinis pars, quo loco maxime gibba est, vestigium valde asperum tendinis M. pronatoris teretis exhibet.

Infra in interna superficie vestigium asperum M. pronatoris quadrati conspicitur.

§. CCCCLXXXVIII.

In *extrema* inferiore *parte*, maioris latitudinis, quam crassitudinis, quodam modo figurae trigonae, transversa, reclinata, laevis, cartilaginoso tegmine obducta, capitulo ulnae aptata, et in opposito latere in *processum* obtusum, *stiliformem* desinens incisura conspicitur.

Infra magna, cartilaginosa tegmine obducta, obliqua, sinuata, obtuso initio orta, ulnam versus sensim diducta, ad supra descriptam incisuram terminata, quodam modo in duas partes, priorem trigonam, longiorem, ossi naviculari iunctam, et in posteriorem, quadratam, contractiorem, ossi lunato iunctam divisa superficies articularis locatur.

Inferioris extremae partis superficies in dorsum manus desinens quatuor sulcos laeves, tendinibus excipiendis destinatos, exhibet: a) obliquum interna versus excurrentem sulcum pro M. abductore longo, et M. extensore brevi pollicis. Supra hunc sulcum vestigium asperum est, cui tendo M. supinatoris longi illigatur; b) sulcum latiore, in duas quasi partes divisum pro M. radiali longo et brevi externo; c) sulcum contractiorem, sed profundior pro M. extensore pollicis longo; d) sulcum latiore, supra contractiorem pro tendinibus M. extensoris digitorum communis, et M. extensoris digiti indicis proprii.

Margo superficiei, in volam abeuntis, e nexu ligamentorum articularium asper est, verum tamen ad connexionem cum ulna nonnihil contrahitur.

§. CCCCLXXX.

M. supinator longus et brevis, M. pronator teres et quadratus, M. sublimis, M. flexor pollicis proprius, M. abductor longus pollicis locis radii iam iam notatis adnectuntur.

§. CCCCLXXXI.

Substantia in extremis partibus non nihil spongiosa est. Cavum medullam continens supra amplius est, quam infra. Foramen vasorum, quae os nutriunt, iam altius, iam depressius, iam in hoc, iam in illo marginis acuti latere situm est.

§. CCCCLXXXII.

In *matureo fetu* extremae radii partes cartilagineosae sunt. Inferior extrema pars citius, quam superior, perficitur.

OS NAVICULARE

sive

OS SCAPHOIDEUM, COTYLOIDES.

Virile sistit *ALBINI* Tab. oss. XX. Fig. I. II. III. IIII.Nexum reliquis ossibus Tab. XXXIII. Ei. *Histor. musculorum*
*Icon. III. IIII.*Femineum *BIDLOO* Tab. LXXXXVII.

§. CCCCLXXXIII.

Os naviculare, multum irregulare, oblique deorsum versus, dorso manus propius, radio nexum, ponitur.

Pars superior gibba duas cartilagine tectas superficies, sulco aspero, ad inferiora apicem obtusum versus subducto, ab invicem separatas habet.

Superficies *superior*, sive brachialis, cartilaginosa tegmine obducta, oblique sursum et prorsum versus spectans, orbiculato trigona, apicem versus terminata, priori dimidia parti superficiei radii articularis, cartilagine tectae, iungitur.

Superficies *antica*, sive radialis, oblique deorsum et prorsum versus spectans, oblongo trigona, superficiei superiori, quantum ad positum opposita, apice sursum versus, basi deorsum versus spectante, ossis multanguli maioris et minoris sinu excipitur, ut nonnumquam linea nonnihil prominente divisa esse videatur.

Superficies inferior, multum sinuata, tota cartilaginosa tegmine obducta, ovata, oblique inferiora et posteriora spectans, anticam capitis ossis capitati partem excipit.

Partem superiorem et inferiorem inter plerumque parva, *lunata* cornibus deorsum versus spectans et cartilaginoso tegmine obducta superficies, *ulnaris* dicta, invenitur, cuius cartilago utraque parte, praecipue vero in superficiem partis inferioris cartilagosam abit, ossique lunato, apice obtuso ad inferiora et interna spectante, iungitur. Vestigiis asperis superficies cartilagine obductas inter, sive superficiei *externae* et *internae* ligamenta articularum adnectuntur.

OS LUNATUM sive OS SEMILUNARE.

Virile sistit *ALBINI Tab. XX. Fig. V. VI. VII. VIII. VIII.*
 Nexum reliquis ossibus *Tab. XXXIII. Hist. musculorum, Icon.*
III. et III.
 Feminum *BIDLOO Tab. LXXXVII.*

§. CCCCLXXXIII.

Os lunatum plerumque lunae falcatae comparatur, ossi naviculari et triquetro transverso situ interponitur, altero cornu ad dorsum manus, altero vero ad volam manus, gibba parte sursum versus spectante. A vola ad dorsum manus non nihil contrahitur.

Quatuor superficies articulares cartilagine tectas, et duas superficies asperas exhibet.

Superficies superior articularis, sive brachialis, trigona, dorsum manus versus gibba, parte posteriore superficiei articularis radii excipitur.

Superficies antica articularis navicularis (sive radialis, quod in superficie radiali posita est,) minima omnium, et planissima, lunata, ossi naviculari iungitur.

Superficies posterior articularis, triquetralis, sive ulnaris, maior, plerumque plana, aut leniter gibba, lunata vel sphaerico trigona, ossi triquetro iungitur. Cartilago tam in superficiem superiorem, quam in inferiorem extenditur.

Superficies inferior articularis, digitalis, maxime lunata, ossi nomen imposuit. Linea prominente dividitur in partem longiorem, et in partem latiore, quae partem ossis hamati excipit.

Superficies aspera dorsalis, magnis foraminibus, vasa excipientibus, scatet.

Superficies aspera palmaris, sive *volaris*, gibba, inaequalis e nexu ligamentorum validorum semicartilaginosa quasi oblique ad priora spectat.

OS TRIQUETRUM

sive

OS TRIANGULARE, CUNEIFORME.

Virilis skeleti vide apud *ALBIN.* Tab. Oss. XX. Fig. X. XI.

XII. XIII. Reliquis ossibus nexum Tab. XXIII. Ei. Hist.

muscul. Icon. III. IIII.

Feminei skeleti apud *BIDLOO* Tab. LXXXVII.

§. CCCCLXXXV.

Os triquetrum, osse lunato minus, oblongum, quodam modo pyramidale, oblique infra extremam ulnae inferiorem partem positum, basi ad os lunatum, apice obtuso deorsum versus spectat, *quatuorque* superficies habet.

Superficies antica radialis, sive *basis*, trigona, leniter sinuata, ossi lunato iungitur.

Superficies superior, brachialis, gibba, prope basin tubere, cartilagine obducto, orbiculato, trigono, vel quadrato, ligamenti ope ulnae iuncto, eminet. Reliqua pars aspera est, foraminulis pertusa, et tendinibus tecta.

Superficies inferior, sive digitalis, maximam, partem, excepto exiguo, in vola manus ad os orbiculare directo vestigio (*superficies externa* audit) cartilagine obducta, dorso eminente divisa, partim cava, partim gibba, parti gibbae et cavae ossis unificiformis articuli ope iungitur.

Superficies interna, ulnaris, volaris, partim aspera, partim cartilaginosa tegmine obducta est; pars aspera ad basin ossi lunato, pars vero cartilagine tecta articuli ope ossi orbiculari iungitur.

OS

OS ORBICULARE

sive

OS SUBROTUNDUM, LENTIFORME,
PISIFORME.Virile sistit *ALBINI* Tab. oss. X. Fig. XXIII. XXV. XXVI.XXVII. Nexum reliquis ossibus *Historia musculorum* Icon.

III. et IIII.

Femineum *BIDLOO* Tab. LXXXVII.

§. CCCCLXXXVI.

Os orbiculare minimum ossium carpi, *superficie articulari*, vel leniter gibba, vel cava, vel plurimum plana cartilaginoso tegmine obducta, oblique superficiei ossis triquetri internae iungitur.

Reliqua pars fere ovata vel sphaerica, verum tamen aspera est, quod tendine M. ulnaris interni, velut os sesamoideum, excipitur, eique ligamenta carpi adnectuntur.

Praeterea M. abductor digiti minimi ossi orbiculari inseritur.

OS MULTANGULUM MAIUS

sive

OS TRAPEZOIDES, RHOMBOIDES, TRAPEZIUM.

Virile apud ALBIN. Tab. oss. XX. Fig. XVIII. XVIII. XX.

XXI.

Nexum reliquis ossibus Tab. XXXIII. Ei. Hist. muscul. Icon.

III. III.

Femineum apud BIDLOO Tab. LXXXVII.

§. CCCCLXXXVII.

Ossi naviculari, ossi multangulo minori, et ossibus metacarpi pollicis et digiti? indicis interponitur.

Tres superficies articulares cartilagine tectas, et tres superficies asperas offert.

Superficies superior, navicularis, brachialis, orbiculato trigona, leniter sinuata, inferiori ossis navicularis superficiei iungitur.

Superficies interna, sive angulata ad os multangulum minus et os metacarpi digiti indicis spectans, sive ulnaris, angulo dividitur. Maior pars rhomboidea, leniter cava, ossi multangulo minori, altera vero pars, nonnumquam valde exigua, nonnumquam vero amplior, ossi metacarpi digiti indicis iungitur.

Superficies inferior, sive digitalis, ephippiformis, maxima, orbiculato trigona, vel cordiformis, leniter gibba, sinu ossis metacarpi pollicis excipitur.

Superficies dorsalis aspera est, torta quasi, cava, foraminulis pertusa.

Superficies antica, sive radialis aspera est, quodam modo quadrata et leniter sinuata.

Superficies volaris aspera plerumque sulcum effingit, qui trochleae in modum tendinem M. radialis interni excipit. Reliqua eius pars multis foraminibus pro excipiendis vasis pertunditur.

Pars M. flexoris brevis, opponens et abductoris pollicis ossi multangulo maiori illigatur.

OS MULTANGULUM MINUS

sive

OS TRAPEZIUM PYRAMIDALE.

Virile apud ALBIN. Tab. Oss. XX. Fig. XXII. XXIII. XXIII.
XXV. XXVI.

Nexum reliquis ossibus Tab. XXXIII. Ei. Hist. muscul. Icon.
III. III.

Femineum apud BIDLOO Tab. LXXXXVII.

§. CCCCLXXXVIII.

Os multangulum minus os multangulum maius inter et partem inferiorem ossis capitati adactum quasi est. Crassior pars ad dorsum manus, minor vero ad volam manus spectat.

Quatuor superficies articulares cartilagine obductas, et duas superficies asperas exhibet.

Superficies superior, sive *brachialis*, quadrata, non nihil curvata, leniter sinuata inferiori ossis navicularis superficiei iungitur.

Superficies inferior, *digitalis*, maxima, ephippiformis, partim gibba, partim cava, orbiculato trigona, apice ad volam manus spectante, sinu ossis metacarpi digiti indicis excipitur.

Superficies radialis, trigona, torta, leniter gibba ossi multangulo maiori iungitur.

Superficies ulnaris hinc inde aspera, vel distincte duplex ossi capitato innititur.

Haec quatuor superficies cartilagine tectae inter se coeunt.

Superficies dorsalis aspera, basin cunei sistit, inaequalis, foraminibus pertusa, leniter gibba,

oblique deorsum versus directa ad dorsum manus spectat.

Superficies volaris, aspera, multo minor, obliquum quasi apicis cunei segmentum, vagae figurae, plerumque vero rhomboideae, vel pentagonae, ad volam manus spectat. — Nonnumquam superficiem radialem et digitalem inter leniter continuatur, quintam ideoque articularem superficiem sistere videtur. *)

Pars M. flexoris brevis pollicis ossi multangulo minori adnectitur.

*) ALBINUS p. 417.

OS CAPITATUM sive OS MAGNUM.

Virile apud *ALBIN*. Tab. oss. XX. Fig. XXVII. XXVIII. XXVIII. XXX. XXXI.

Nexum reliquis ossibus Tab. XXXIII. Ei. Hist. muscul. Icon. III. IIII.

Femineum apud *RIDLOO* Tab. LXXXVII.

§. CCCCLXXXVIII.

Hocce crassissimum et maximum omnium ossium carpi, medio in carpo inter os multangulum minus, os naviculare, os lunatum, os unciforme, et ossa metacarpi digiti indicis, medii et annularis ponitur.

Caput articulare, superficies brachialis audit, sursum versus directum, cartilagine obductum, gibbum, ambitu quadratum, angulo in partem, ossi naviculari, et in partem, ossi lunato iunctam, dividitur. Totum fere capitis orbem sulcus, sive collum, cingit.

Superficies posterior, sive superficies ad os hamatum spectans, sive *ulnaris*, omnium maxima, in universum trigona, a capite ad medium usque partem tota, tum vero nonnisi dorsum manus versus tegmine cartilaginoso obducta, leniter sinuata, articuli ope cum osse hamato cohaeret. Reliqua pars valde aspera est, inaequalis et foraminibus pertusa.

Superficies antica, ad os multangulum minus spectans, sive *superficies radialis*, omnium minima, deorsum versus sensim latior, iam simplici verum inaequali, iam duplici tegmine cartilaginoso obducta superficie notatur, cuius ope ossi mult-

angulo minori iungitur. Reliqua pars aspera est, foraminibus pertusa et sinuata.

Angulus, qui priorem et posteriorem superficiem in vola manus invicem iungit, *superficies volaris* audit, asper est, crassus et inaequalis.

Superficies dorsalis aspera prope caput articulare cava est, tum vero non nihil gibba, valde inaequalis, et foraminibus pertusa.

Basis, sive *superficies articularis inferior*, sive *digitalis*, cartilagine obducitur, et tria latera litterae romanae S. in modum flexa, latus ulnare, latus radiale et latus volare exhibet. Linea aspera hanc superficiem in partem contractam, leniter sinuatam, ossi metacarpi digiti indicis iunctam, et in partem maiorem, trigonam, sinuatam, cum osse metacarpi digiti medii coniunctam dividit.

Praeterea in latere ulnari huius superficiei, vel maius, vel minus, articuli ope cum osse metacarpi digiti annularis coniunctum tuberculum eminet.

OS HAMATUM

sive

OS UNCIFORME, CUNEIFORME.

Virile sistit *ALBINI* Tab. oss. XX. Fig. XXXII. XXXIII. XXXIII. XXXV. XXXVI. Nexum reliquis ossibus Tab. XXXIV. *Ei. Hist. museul. Icon. III. IIII.*

Femineum *BIDLOO* Tab. LXXXXVII.

§. D.

Os hamatum, digito minimo adcumbens, ossi capitato, lunato, triquetro et ossibus metacarpi digiti annularis et auricularis cunei in modum, basi ad ossa metacarpi, apice vero obtuso ad os triquetrum spectante, interponitur.

Superficies antica, sive *radialis*, leniter gibba, supra et dorsum manus versus cartilaginoso tegmine obducta, ossi capitato iungitur. Reliqua eius pars aspera est.

Superficies superior, sive *brachialis*, excepta parte aspera, in hamum abeunte, cartilaginoso tegmine obducitur, in summo, continuata quasi e capite articulari ossis capitati, gibba, deorsum versus sinuata est, et angulo in partem minorem superiorem ossi lunato, et in partem maiorem superiorem ossi triquetro iunctam, dividitur.

Superficiem inferiorem, sive *digitalem*, totam quantam cartilagine tectam, orbiculato quadratam, marginibus vel sibi invicem longitudine fere paribus, vel transversis marginibus longioribus, angulus in duas partes sinuatas, alteram ossi metacarpi digiti minimi iunctam, alteram vero cum osse metacarpi digiti annularis nexam, dividit.

Superficies articulares , superior et inferior ,
plerumque marginem acutum invicem iunctae ef-
fingunt.

Superficies aspera dorsalis, quadrata est, le-
niter gibba, ceterum inaequalis et foraminibus
pertusa.

Superficies volaris aspera, dorsali minor, ha-
mo vel plus, vel minus curvato, maioris latitudi-
nis quam crassitudinis, ad pollicem spectante, ini-
tio plerumque contractiori, deinde crassiori, ulti-
mo tandem fere capitulato eminet. Superficies
eius gibba aspera est, cava vero laevior.

Hamo pars M. abductoris et flexoris brevis di-
giti minimi adnectitur.

OSSA METACARPI.

Virilia apud *ALBIN.* Tab. Oss. XXI. Sibi invicem nexa
Tab. XXXIII.

Reliquis vero ossibus iuncta in *Historia muscul. Icon.*
III. III.

Teminea apud *BIDLOO* Tab. LXXXVII.

§. DI.

Ossium metacarpi quinque, multum inter se forma similia, numerantur.

Os metacarpi digiti indicis eadem fere longitudine est, qua *os metacarpi digiti medii*, vel aliquantum maiore; *os vero metacarpi digiti annularis* minore, *os metacarpi digiti minimi* iterum minore, *os metacarpi vero pollicis* omnium minima donatur.

Crassitudo digitum minimum versus minuitur, inde *os metacarpi pollicis* crassissimum est, *os vero metacarpi digiti minimi* tenuissimum.

Prorsum versus recta sunt, superficies vero superior, sive dorsalis, leniter gibba est, inferior vero, sive volaris, multum sinuatur.

§. DII.

In universum quidem teretia sunt, verum tamen dorsum versus planiora, et ex insitione musculorum vel acutiores vel obtusiores angulos exhibent. — Nonnumquam adeo manifeste trigona sunt, ut apte tres superficies, dorsalis, radialis, ulnaris, constitui possint.

In extremam partem superiorem et inferio-

rem, et in partem mediam, in infante ope cartilaginis inter se iunctas dividuntur.

Pars superior, angulata, inaequalis, et ex parte cartilaginoso tegmine crustata, ossa metacarpi ossibus carpi et mutuo sibi iungit.

§. DIII.

Pars media, a parte superiore medium versus nonnihil tenuior est, partem vero inferiorem, sive digitalem versus, multum denuo diducitur.

§. DIII.

Pars extrema inferior, sive digitalis, gibbum, ab utroque latere compressum capitulum articulare constituit, quod cartilagine tectum, volam manus versus nonnihil ambitu auctum in duo apices acutos, iisque interiectam arcuatam incisuram desinit.

Super partibus digitalibus primae phalanges digitorum, a quibus nomen habent, moventur.

Superficies dorsalis capitulorum utrimque tubercula habet, quibus ligamenta lateralia, os metacarpi et primam digitorum phalangem inter se iungentia, inseruntur.

Integer utriusque extremae partis ambitus e nexu ligamentorum articularium exasperatur.

§. DV.

Substantia solida est, et in extremis tantum partibus nonnihil spongiosa.

§. DVI.

In maturo fetu utraque extrema pars mera est cartilago. Media pars, iam iam tertio post

conceptionem mense in os verti incipiens, sensim magis magisque osseam naturam induit, donec circa pubertatis annos cum extremis partibus, verum maturius cum parte superiore, serius cum digitali concrescit.

Notae, quibus ab invicem discernuntur, iam indicandae veniunt.

Os metacarpi pollicis.

§. DVII.

Ossis metacarpi pollicis omnium brevissimi, obliquiori situ ad ossa carpi positi, omniumque mobilissimi superficies dorsalis simul ad externa, superficies vero volaris nonnihil ad digitum indicem spectat.

Superficies ad digitum indicem directa, sive *ulnaris*, longior est et sinuata, *superficies* vero *radialis* directior.

Reliquis ossibus metacarpi comparato, mediam partem versus non eadem ratione, qua reliquis, crassitudo decrescit.

Extrema superior pars superficiem cartilagine obductam, ephippiformem constituit, quae transverso positu superficiei ossis multanguli maioris ephippiformi iungitur, ita ut os metacarpi pollicis flecti et extendi, digito indici adpropinquari, et ab eo removeri, quin nonnihil rotari possit. Tuberculo superficiei radialis M. abductor pollicis longus adnectitur.

Media ossis metacarpi pollicis *pars* in transversum leniter gibba est. Vestigiis superficiei ulnaris asperis M. interosseus primus, vestigiis vero superficiei radialis M. opponens inseritur.

Extrema pars digitalis quadrata minus gibba est, quam in reliquis metacarpi ossibus. Inter-
nus, ad digitum indicem spectans apex superficiei cartilagosae latior est altero, et utrimque tuberculo eminet, cui ambo ossa sesamoidea adnectuntur.

Os metacarpi digiti indicis.

§. DVIII.

Extrema pars superior trigona, superficie cartilaginosa valde inaequali, angulisque prominentibus, superficiem ulnarem et radialem versus sinuata, nonnumquam quadrata, simulque medium versus nonnihil elata, immobili fere nexu cum osse multangulo minori, ope plani exigui trigoni cum osse multangulo maiori, ad superficiem ulnarem ope plani exigui oblongi, nonnumquam fusiformis cum osse capitato, et ope plani nonnihil latioris, longioris, leniter gibbi, nonnumquam quasi divisi cum osse metacarpi digiti medii iungitur. Cartilagines trium posteriorum planorum inter se coeunt. Vestigium asperum superficiei volaris tendinem M. radialis interni, et tuberculum acutum marginis ad pollicem spectantis, tendinem M. radialis longi externi excipit.

Media pars e nexu M. interosseorum aspera *) duas acutas lineas, lineam dorsalem digitos versus, lineam vero volarem ossa carpi versus latiore exhibet.

Capitulum ad superficiem radialem omni nexu solutum in superficie ulnari ligamento cum osse metacarpi digiti medii coniungitur.

Os metacarpi digiti medii.

§. DVIII.

Extrema pars superior oblongo quadrata, ab utroque latere, quasi compressa, obliquo situ ponitur.

Superficies articularis cartilaginoso tegmine obducta, ossi multangulo minori et capitato iuncta, dorsum manus versus latior et cava, volam vero manus versus contractior, leniterque gibba, ideoque, quantum ad sinus directionem, ossi metacarpi digiti indicis opposita, angulo, in dorso manus os capitatum inter et os multangulum minus interposito, elatiori, et impressione, a tendine M. radialis externi minoris illata, notatur, et ope plani articularis minoris, radialis, cartilagine obducti, nonnumquam in duas partes divisi, cum osse metacarpi digiti indicis, et ope unius plani, vel duorum minorum, ad se invicem inclinatorum planorum cum superficie ulnari ossis metacarpi digiti an-

*) Optimam delineationem invenies in ALBIN. Hist. Muscul. Icon. VII. III.

nularis coit. Cartilagines planorum articularium inter se confluunt.

Mediae partis eadem ratio est, quae ossis metacarpi digiti indicis.

Non raro robore os metacarpi digiti indicis superat.

M. opponens pollicis illi adnectitur.

Os metacarpi digiti annularis.

§. DX.

Extrema superior pars trigona est, vel quadrata, superficies eius articularis, ossi hamato iuncta, obliqua est, ad superficiem radialem initio cava, deinde vero gibba. *Superficies radialis* duo plana articularia, leniter gibba, paris vel imparis magnitudinis, ossi metacarpi digiti medii coniuncta, plerumque etiam hisce interpositum exiguum, ossi capitato commissum, *superficies vero ulnaris* oblongum, sinuatum ossi metacarpi digiti minimi commissum planum articulare offert. Cartilagines planorum confluunt.

Os metacarpi digiti minimi.

§. DXI.

Extrema pars superior trigona fere apicem ad volam manus dirigit.

Superficies eius articularis cartilaginosa tegmine obducta, ossi hamato contigua, in transversum gibba, in longum cava est.

In *superficie radiali* planum minus, articulare, cum praecedente cohaerens, cum osse metacarpi digiti annularis committitur.

Superficies ulnaris, quo loco M. abductor digiti minimi, et tendo M. ulnaris interni, ab osse orbiculari protensus, adhaerent, gibba est et inaequalis.

PHALAN-

PHALANGES DIGITORUM GENERATIM SPECTATAE.

ALBINI Hist. musculorum Icon. III. et IIII.

§. DXII.

Quinque digitorum *medius* longissimus est, *index* brevior, quem *annularis*, à *minimo* exceptus, sequitur, brevissimus vero *pollex*.

§. DXIII.

Maxima crassitudo pollicis contigit, quem ex ordine digitus *medius*, deinde *annularis*, post *index* sequuntur, tenuissimus vero est digitus *minimus*.

§. DXIII.

Pollex nonnisi duas phalanges, media phalange destitutus habet, reliqui vero quatuor digiti tres phalanges, *posteriolem*, *mediam* et *priorem* offerunt.

§. DXV.

Posterior phalanx longissima est et plenissima, — media brevior et tenuior, — prior brevissima et tenuissima.

§. DXVI.

Quatuordecim hae phalanges extremis partibus spongiosis, prope extremam partem brachialem exiliori, alteram vero extremam partem versus robustiori habitu, verum tamen hac extrema parte exiliori altera brachiali, superficie ulnari, et superficie radiali sinuatis, posteriori et media phalange, in fetu, ad modum omnium ossium cylin-

dricorum, pone et ante epiphysi cartilaginosa instructis, priore vero phalange pone quidem cartilaginosa, ante vero primum in os versa, superficie dorsali in transversum, posterioris vero et mediae phalangis superficie dorsali in longum etiam gibba, superficie vero volari sinuata, notantur.

PHALANGES PRIMAE,

sive

POSTERIORES DIGITORUM.

ALBIN. Tab. Oss. XXII. Nexas sistunt Icon. III. IIII. Hist. muscul.

Femineas vide apud BIDLOO Tab. LXXXVII.

§. DXVII.

Excepta magnitudine quinque posteriores digitorum phalanges parum inter se differunt.

§. DXVIII.

In partem *mediam*, et in *extremam* partem *posteriorem* et *priorem*, in infante cartilagine intermedia invicem iunctas dividuntur.

§. DXVIII.

Extremae partes *posteriores* sive *bases*, quadratae, angulis obtusis, in transversum longiores, ambitu inaequales, supra superficiebus cartilagine obductis, sinuatis, ovatis, capitulis ossium metacarpi articularibus iunctis, ita, ut phalanx non modo flecti et extendi, verum etiam non nihil rotari possit, notantur. Non nisi basis primae phalangis pollicis ambitum magis orbiculatum, et superficiem articulare planiorem habet, minusque rotari potest. Utrunque vestigia aspera sunt, quibus ligamenta lateralia illigantur, et in superficie ulnari phalangis primae digiti indicis tuberculum adest pro M. interosseo, in phalange prima digiti minimi tuberculum pro M. abductore digiti minimi, in phalange priore pollicis tubercula inveniuntur pro ligamen-

tis, quae ab ossibus sesamoideis tendinis M. flexoris brevis, et a tendine M. adductoris, et M. abductoris brevis pollicis porriguntur.

§. DXX.

Media pars plerumque utrimque lineis asperis, quibus ligamenta tendinum M. flexorum digitorum adhaerent, est instructa.

Verum pollicis prima phalanx earum vice vestigia aspera offert. Quodsi M. extensor brevis pollicis huic phalangi inseritur, in superficie dorsali eminentia parva prope extremam partem posteriorem, cernitur.

§. DXXI.

Extremae priores partes, nonnisi in superficie volari prominentes superficiem cartilagine obductam, transverse trochlearem, in superficie dorsali initio contracto ortam, tunc vero diductam, et prope superficiem volarem duo tubercula exhibentem habent. Quo propius plano volari descendunt, eo profundior sinus trochlearis observatur. Priores partes quatuor digitorum mediis phalangibus ginglymi ope iunguntur, extrema vero prior pars pollicis priori phalangi ginglymi ope iungitur, ut utrimque foveolae asperae, in pollice vero tubercula e nexu ligamentorum lateralium oriantur.

Reliqua generalis notio docuit.

PHALANGES MEDIAE

sive

SECUNDAE.

Viriles. ALBIN. Tab. Oss. XXII. Nexas sistunt. Hist. muscul.

Icones III. IIII.

Femineas BIDLOO Tab. LXXXXVII.

§. DXXII.

Hac phalange pollex distuitur. Hae quatuor phalanges, excepta magnitudine, de qua iam iam generalis notio exposuit, non solum plurimum inter se, sed etiam multum, excepta superficie articulari superiore, cum phalangibus posterioribus conveniunt.

Extremae superioris partis superficies articularis, cartilagine tecta, lineaque prominente in duas foveas divisa, superficie articulari phalangis posterioris ginglymi ope iungitur. Margo dorsalis mediam partem versus in apicem obtusum abit, cui tendo M. extensoris inseritur.

Ceterum ab utroque latere vestigia aspera habet, quibus ligamenta tendinum adnectuntur.

Media pars nonnunquam plenior quam media phalangis posterioris pars, et ad superficiem volarem aspera est ex insitione tendinis M. flexoris perforati, et tenaculi ligamentosi M. flexoris perforantis.

Extremae partes priores, non nisi in vola manus, ut eadem partes phalangum posteriorum, prominent, et superficiem articulare, cartilagine tectam, trochlearem, in transversum sinua-

tam, in superficie dorsali initio contracto ortam, sensim magis magisque diductam, et prope superficiem volarem duo tubercula exhibentem offerunt. Quo propius ad superficiem volarem haec articularis superficies descendit, eo maior fit sulcus. Extremae priores partes phalangi priori ginglymi ope iunguntur, et utrimque foveolas asperas ex insitione ligamentorum lateralium habent.

PHALANGES PRIORES

sive

PHALANGES UNGUIUM.

Viriles sistit *ALBIN. Tab. Oss. XXII.* Nexas repraesentant.

Hist. muscul. Icon. III. IIII.

Femineas *BIDLOO Tab. LXXXVII.*

§. DXXIII.

Praeterea, quae iam notata sunt, indicanda veniunt, quae sequuntur:

Extremae superiores partes, sive bases, ut in praecedentibus phalangibus sese habent, cartilagine nempe teguntur, linea obtusa in duos sinus dividuntur, et ginglymi ope superficiei trochleari phalangum mediarum, in pollice vero phalangis posterioris iunguntur. Margo asper dorsalis in media superficiei dorsalis parte in apicem obtusum abit, cui tendo M. extensoris adnectitur, et utrimque tuberculo pro adnectendis ligamentis lateralibus insignitur.

Media pars raptim contracta, in capitulum in superficie volari asperum, fere dentatum, in superficie dorsali vero elatum paullo orbiculatum desinit.

Media superficiei volaris pars vestigium asperum ex insito M. perforantis digitorum tendine, et in pollice ex insito M. flexore longo offert.

OSSA SESAMOIDEA DIGITORUM MANUS.

ALBIN. Tab. XXII. Genuino situ posita vide in *Hist. muse.*
Icon. I. II. III.

§. DXXIII.

Numero sunt plerumque quinque ossa sesamoidea digitorum manus.

Duo maxima ad primum pollicis articulum ponuntur, et extremae parti digitali ossis metacarpi iunguntur; oblonga sunt, ovata aut orbiculata, externe gibba vel aspera, interne leniter cava, et cartilagine obducta. Nonnumquam alterum altero maius est. In tendine M. flexoris brevis, qui ea de causa primam phalangem facilius movere potest, latent. Tendo M. flexoris longi pollicis iis interponitur.

Tertium minus in altero pollicis articulo ponitur, et super id tendo M. flexoris longi pollicis pergit, eoque aptius phalangi priori pollicis iungitur. Plerumque latitudo eius crassitudinem superat.

Quartum eiusdem fere, ac tertium, magnitudinis, in primo digiti indicis articulo positum, orbiculatum est, aut ovatum.

Quintum minimum in primo digiti minimi articulo ponitur.

Aequae rara, quin rarior eorum in aliis digitorum phalangibus praesentia *) est,

*) MORGAGNI *Adversar. anat. II. animad. XXX. p. 64.* in omnibus quatuor digitis vidit. Eiusmodi praeparatum MAYER servat v. Tom. I. p. 307.

ac rarus unius, vel alterius descriptorum defectus. *)

In infantibus cartilaginosa sunt, et sceleti habitu nondum perfecto, in os versa inveniuntur.

*) Ego quidem semper quinque ossa sesamoidea inveni, et ALBINUS tam in *Hist. muscul.* quam in *Tab. sceleti* ubique quinque delineavit.

COMPAGES OSSIUM ARTUUM SUPERIORUM.

ALBINI *Tab. scelet. I. II. III. Ob manum Ei. Tab. oss. ultim. V. et egregiae icones in Historia musculorum.*

§. DXXV.

Superiores igitur artus e septuaginta duobus ossibus, super thoracem ita collocatis, componuntur, ut anguli scapulas inter et claviculas, a quibus brachia, velut in aequilibrio, dependent, superiorem thoracis partem cingant et tegant.

Claviculis et scapulis cum capite, collo, spina dorsi nexis, pondus artuum superiorum thoracem minus gravat.

§. DXXVI.

Ea sunt artus superiores longitudine, ut manus quancunque corporis partem, quin flexo corpore, vel levato pede, ipsas plantas commode tangere possint. Flexo corpore ipsam terram attingunt. Fere in media eorum parte articulus sistitur, cuius ope manus manum commode tangit, eamque fulcit.

§. DXXVII.

Claviculae tam vicino nexu in osse sterni superiori mutuo sibi adponuntur, ut ligamentum eas inter se, et firmus articulus cum osse sterni superiori coniungat.

Scapulas ab articulis ossis sterni superioris retinent, et distantiam constituunt, ideoque figura clavicularum pro varia thoracis forma in utroque

sexu varia esse solet. (§. LXI.) Thoracem et humeros diducunt, scapulas continent, attamen tolli eas vel deprimi patiuntur, et prorsum mobiliores efficiunt, ut scapulae magis prorsum, quam retrorsum versus moveri possint, quod et in manuum usu notatur. Centrum in osse sterni superiori ponitur. Adscendendo et descendendo angulum XXXX. graduum, prorsum vel retrorsum versus motae angulum XXV. graduum formant.

§. DXXVIII.

Scapulae, musculis obductae, parte cava gibbae thoracis, itidem musculis obducti parti impositae, margineque superiori sinuato curvaturam claviculae excipientes, basin oblique sitam, thoraci adpressam, verum tamen deorsum versus non nihil ab eo distantem in naturali nexu habent. Ceterum in latus, et non nihil prorsum versus diriguntur, ita ut integra pars articularis, quo facilius brachium moveri possit, a thorace distet, margo superior ad externa declivetur, et externus posteriora versus recedat. Angulus superior truncatus prominere nequit. Laxe reliquis partibus nexae facile, in orbem fere, primam et nonam costam inter sursum et deorsum, et processus spinae dorsii spinosos inter et arcum costarum introrsum et non nihil extrorsum, et ad omnes hisce interpositas obliquas directiones moventur. Ad thoracem prorsum non nihil urgeri, verum etiam non nihil ab eo removeri possunt, alternis vero vicibus vel artus superiores ad thoracem admoventur, vel ver-

sa vice, thorax, verum minus distincte, artubus superioribus adpropinquatur.

Hac scapulae mobilitate brachium longius reddi, humerus in maiori spatio moveri, manuumque functiones facilius augeri possunt.

Scapula retracta ac firmata, M. serratus anticus maior inspirationem iuvare potest, quod in omnibus validis inspirationibus accidit, v. g. quum partus editur, vel alvus deponitur. Nostrum corpus quum inspirationis tempore fluctuat, scapulae mobilitate sua libramentum eius, praesertim stantis, fulciunt. Nec minus, quum vel pedes elabuntur, vel corpus fluctuat, vel curvatur, vel corruit, vel quum choreae aguntur, pondere artuum libramentum corporis restituere conantur. Tanta vi retrahi et firmari scapulae possunt, ut quidam, fune scapulas inter arrepto, in altum trahi potuerint. Truncus, scapularum actione, prout res postulat, vel diducitur, vel contrahitur; e. g. quum turbam penetrare, vel per angustum spatium repere homo conatur. — Cubitum in latus, gestationem in humeris iuvant. — Glandulas axillares tutantur. — Denique mobilitate earum fetus facilius in globum colligitur. *)

§. DXXVIII.

Articulus humeri superior, quod magnam sphaericam superficiem parva cavitas excipit, in-

*) WINSLOW in Mem. de l'Acad. des sciences de Paris, 1723. et 1726. ADOLPHI Diss. de commodis ex scapularum mobilitate homini oriundis. Halae 1759. 4.

ter omnes totius corporis articulos facillime ad quamcunque directionem moveri potest.

Acromion et processus coracoideus scapulae superne articulum non solum cingunt, et defendunt, sed etiam nisui brachiorum subnixorum opponuntur.

§. DXXX.

Antibrachii articulum connexio humeri cum extrema superiore ulnae parte *potissimum* constituit. *Ginglymus* hunc articulum valde adstringit; ad angulum usque XXXX. graduum, vel donec apex processus coronoidei ulnae foveola humeri antica excipiat, articulus flecti potest. — Itemque olecranon obstat, quo minus extensus articulus lineam rectam sistat, qui ideo angulum valde obtusum tantum format. In inferiori vero articulo, sive articulo carpi inferior extrema radii pars validior *potissimum* nexum init, ideoque manus radii motum, vel extensi, vel flexi, sequatur est necesse. Ulna vero et radius mutuo extremas alterius exiliores partes excipiunt. Extrema ulnae exilior pars extrema radii crassiore parte, et extrema radii exilior pars extrema ulnae crassiore parte excipitur.

Flexo cubiti articulo radius ulnam sequitur, minus tamen extenso, prorsum enim magis subsistit.

§. DXXXI.

Quietis artubus superioribus, ossa *antibrachii* in eodem fere horizontali plano sibi adcumbunt,

versus vero radius tantum non ulnam secat; vel manus libere dependentis dorsum ad externa, vola ad interna, pollex ad priora, digitus minimus ad posteriora spectat. Radius quum ea ratione vertitur, ut dorsum manus ad posteriora spectet, motus audit *supinatio*: quum vero vertitur, ut dorsum manus ad priora spectet, motus audit *pronatio*.

In pronatione radius supra ad interna circum axin, infra vero super ulnam vertitur.

In supinatione radius supra ad externa, verum tamen non eadem facilitate, ac in pronatione, circum axin, infra vero super ulnam vertitur.

Verum tamen in pronatione et supinatione extrema superior ulnae pars aliquantulum, distinctius vero eius inferior pars, praesertim flexo cubiti articulo, vertitur. *)

Hiatum ulnam inter et radium membrana tendinosa claudit, quaiusto maior supinatio inhihetur.

Pronationem, praecipue vero supinationem, rotatione brachii in articulo humeri plerumque iuvamus.

§. DXXXII.

Ossea manus pars minore latitudine, quam longitudine, maiore tamen latitudine, quam antibrachium, maiore itidem in parte digitali, quam brachiali, prope carpum eadem fere latitudine et

*) *Fieq d'Azys Hist. de la société de Med. Paris 1777. 1778. p. 268.*

crassitudine est, qua carpus, sensim vero in metacarpo latitudine augetur.

§. DXXXIII.

Pollex eiusque os metacarpi minorem partem, reliqui vero digiti cum metacarpi ossibus maximam manus partem sistunt.

§. DXXXIII.

Octo carpi ossa duas series componunt, quarum altera alteri imponitur; *superiorem seriem* os naviculare, lunatum, triquetrum, et orbiculare, *inferiorem* vero os multangulum maius, et minus, os capitatum, et unciforme constituunt. Iuncta ossa lunatam figuram sistunt, cornibus obtusis, et sinu ipsis interposito ad volam spectante, gibba vero superficie dorsum manus formante.

Apex arcus *radialis* ab osse multangulo maiori, *apex* vero *ulnaris* ab hamo ossis hamati, et ab osse orbiculari constituitur. Tendines M. flexorum digitorum, trunci vasorum et nervorum digitorum hoc arcu excipiuntur. In universum carpi dorsalis et volaris superficies inaequales sunt, hanc vero ligamenta aequant et laevigant. Os multangulum maius et minus, os naviculare in dorso manus fovea ab invicem distinentur.

Ossis navicularis, semilunaris et triquetri partes superiores cartilaginoso tegmine obductae, communem, oblongam, gibbam superficiem articulem, radio et cartilagine triangulari iunctam formant, partes vero earum inferiores, cartilagine

tectae, articuli ope cum ossibus inferioris seriei coniunguntur.

Superficies superior et inferior seriei inferioris inaequales sunt, ita, ut supra ossa seriei superioris, infra ossa metacarpi et eas excipiant, et ab iis excipiantur.

§. DXXXV.

Articulo radium inter et primam ossium carpi seriem satis laxo, manus superficiem dorsalem, praecipue autem volarem versus flecti, non nihil etiam ad radium, multo magis autem ad ulnam inclinari potest.

Idem motus, verum tamen minus distinctus et liber, ossa superioris seriei inter et inferioris esse videtur.

Inter se non nisi tria superioris seriei, vix vero reliqua carpi ossa moveri possunt, excepto osse orbiculari, quod loco moveri potest, quum non nisi os sesamoideum, carpo impositum, repraesentat.

§. DXXXVI.

Ossium metacarpi brevissimum est os metacarpi pollicis, reliqua vero metacarpi ossa progrediendo latiora et pleniora fiunt.

Metacarpus in priore et posteriore parte eadem fere latitudine, in dorso in transversum et in longum gibbus, in palma vero manus in longum et transversum cavus est, eoque magis, quum series ossium carpi prior, et cum ea coniunctae ossium

sium metacarpi partes manus volam versus contrahuntur.

Margo *prior*, sive *digitalis* quatuor digitorum, excepto pollice, arcum digitos versus gibbum, osse metacarpi digiti medii omnium maxime, osse vero metacarpi digiti auricularis minimum prominente, constituunt.

Quatuor ossium metacarpi extremae superiores et inferiores partes arcte sibi invicem adcum-bunt, et adstrictis vinculis cum ossibus carpi iunguntur, quibuscum palmam manus, mediis ossibus metacarpi depressioribus, formant.

Extremae carpi et metacarpi partes mutuo sese excipiunt, omnium vero maxime os metacarpi pollicis excurrit. Quantum ad mobilitatem ossium metacarpi in extremis partibus superioribus, os metacarpi digiti auricularis omnium maxime moveri potest, quod ordine os metacarpi digiti annularis, deinde digiti medii, post digiti indicis, quod minimum moveri potest, sequuntur. Extremae vero partes digitales, praecipue ossium metacarpi digiti annularis et auricularis, propius ad invicem adcedere, et ab invicem recedere, ideoque ea ratione moveri possunt, ut latitudo manus contrahatur, eiusque sinus augeatur, vel versa vice latitudo manus augeatur, sinus vero minuatur.

Pollex ob nexum ossis metacarpi cum carpo omnium maxime moveri potest. In latere manus positus reliquam manus partem non impedit, sed attrahi, adduci, et abduci, et, ad quemcumque

fere modum velis, digitis opponi potest, eaque de causa et volae et palmae manus augendae inservit.

§. DXXXVII.

Ossa sesamoidea in interno primae phalangis latere posita, angulum augment, quem tendines, ossi inserendi, neque motum, loco cedentia, impediunt.

§. DXXXVIII.

Quae generatim digitos spectant, ex parte iam iam dicta sunt.

Generatim dorsum quatuor digitorum, excepto pollice, in longum, magis vero in transversum leniter gibbum est, prior superficies vero in longum cava, vel digiti ipsi non nihil curvantur, ambituque magis magisque contractioni pergunt, ita ut manus, iunctis digitis, apicem digiti medii versus sensim contrahatur. Pollex reliquis digitis directior, vel dorsum versus recurvatus, internam superficiem oblique ad internam quatuor digitorum dirigit, neque apicem versus tantum, quantum reliqui digiti, contrahitur.

§. DXXXVIII.

Prima phalanx expeditissime quoque versus, facillime vero volam manus versus, minimum vero plerumque in adultis dorsum manus versus moveri potest, pollex vero saepe liberiores motum dorsum, quam volam manus versus, exiguum vero latera versus admittit.

Secunda et tertia phalanx non aequè facile, plerumque non, nisi volam manus versus, moveri

possunt, pollicis vero ultima phalanx non nihil reflecti potest.

§. DXXXX.

Digiti, pluribus phalangibus compositi, aptius, tribus vero tantum phalangibus compositi, efficacius, et in acutum desinentes, subtilius adprehendunt. Curvantur, donec ossa metacarpi attingant, pollice obviam illis veniente. Haec structura causa est, cur maiora vel minora cuiuscunque figurae corpora tangere, comprimere, palpare, amplecti, continere, fluida haurire et continere, multaque alia diversissima perficere manus possit.

Pollex et reliqui digiti, vel omnes, vel nonnulli tantum, corpus prehensuri, mutuo sibi obviam veniunt, et pollex, etsi brevis, parumque tantum in secunda phalange curvatus, reliquorum vero digitorum arcu eo maiori, muneri suo satisfacit, ideoque cum quolibet digito anulum formare, eiusque superficies interna internam omnium reliquorum digitorum superficiem tangere potest.

Compresso pugno digitus minimus ita complicatur, ut spatium nullum remaneat, reliqui vero tres digiti ordine semper maius spatium, pollice, velut operculo, tandem clausum, relinquunt.

Comparatio artuum superiorum cum inferioribus videatur in descriptione artuum inferiorum.

Manibus quum deambulatur, artus superiores vices pedum subeunt.

§. D XXXXI.

In embryonibus ossa artuum superiorum exigua quidem, verum tamen, cum inferiorum artuum ossibus comparata, robustiora hisce sunt, praesertim in superiore parte, quod thoraci iam iam multum perfecto adfiguntur, ideoque claviculae, proxime thoraci adcumbentes, tunc temporis iam iam magnum incrementum ceperunt. (CLVII.)

Post partum quaedam artuum superiorum ossa, tardius, quam artus inferiores perficiuntur, cuius rei exemplum scapula praebet, ut supra §. XXXVI. dictum fuit.

OSSA FEMORUM.

Virilium iconem sistunt *ALBINI Tab. XXIII. et XXV. —*

Icon. oss. foet. Tab. X.

Femineorum *BIDLOO Tab. CIII.*

§. DXXXXII.

Ossa femorum longissima, robustissima ac ponderosissima skeleti ossa cum ossibus coxarum, tibiis et patella coniunguntur.

§. DXXXXIII.

Non sine ratione in *caput, collum, trochanteres, corpus, condylos* dividuntur, omnes enim hae partes aetate puerili ab invicem separatae observantur.

§. DXXXXIII.

Caput cartilagine obductum, hemisphaerio non nihil maius, ambitum undulatum habet, ita, ut in superiore et posteriore parte in angulum porrigatur, ideoque ambitui acetabuli respondeat. In media fere capitis parte, non nihil tamen inferiora et interiora versus, aspera, cartilaginosa tegmine nudata *fovea*, ligamentum teres excipiens, ponitur. Media hemisphaerii pars axin colli tangit.

§. DXXXXV.

Collo, quod angulo obtuso internam, superiorem et anticam partem versus a corpore secedit, eoque aptius truncum fulcit, corpus ab osse coxarum satis removetur, ut mutuus motus femoris ad pelvim, et pelvis ad femur expeditius agatur. Pars colli, capiti adnexa, tenuior est, reliqua vero pars trigona fere, angulis sphaericis. In priore parte

collum planius est, in posteriore vero superficiem superiorem et inferiorem habet.

Collum, illaeso cum corpore nexu, in antica parte sinuatum adparet.

§. DXXXXVI.

Trochanter maior, ad quem collum externe desinit, super collum eminent, et in posticam partem vertitur. Externe gibbus est, et e nexu tendinum validorum valde asper, interne vero cavus, ita ut posteriora versus tuberculum orbiculatum emittat, foveamque formet.

Trochanter minor, orbiculatum, ad internam et inferiorem partem spectans, trochantere maiori inferius, posticam finium colli partem occupans tuberculum format.

In antica et postica parte trochanteribus linea, ex insitione ligamentorum articularium aspera, intertrochantericam vocant, interponitur, quae retro, quo loco a trochantere maiori oritur, valida est, cristam format, foraminulis pertunditur, et praeter ligamenta muscolum quadratum femoris excipit.

§. DXXXXVII.

Corpus femoris in universum ante leniter gibbum est, pone vero leniter sinuatum, eiusque inferior pars non nihil ad externa spectat.

Corpus initio latius, deinde non nihil exilius, tum per aliquod spatium eiusdem crassitudinis est, et condylos versus subito maximum latitudinis ac crassitudinis gradum attingit. A fronte inspectum

teres videtur, proprie vero tribus superficiebus, superficie *priore*, et duabus superficiebus laterali-
bus, *externa* et *interna*, retro coniunctis, gaudet.

Superficies prior infra collum a trochantere maiori orta, supra teretior, interne planior, angulo externo obtusiori, angulo interno acutiori, ad marginem condylorum usque extenditur, quo loco non nihil sinuata est, ut extenso genu patellam excipit.

Externa superficies a trochantere maiori orta, satis teres, non nisi in medio longitudinis parum sulcata, ad condylum externum usque producitur.

Interna superficies non nihil planior, infra collum oritur, et contracta ad condylum internum profertur.

Linea posterior, aspera, quam *interna* et *externa* superficies coniunctae formant, duplici initio paullo infra trochanteres oritur, simplici tunc tractu pergit, et condylos versus infra mediam femoris partem subducitur. Mox elatior est, mox depressior, mox acutior, mox obtusior. Sursum et deorsum diducta corpus habitu fere quadrato donat, ideoque *labium externum* validius, et *internum* debilius offert.

Supra lineam asperam eminentia longitudinalis locatur, cui *M. vastus femoris internus* inseritur.

§. DXXXXVIII.

Ambo condyli, *externus* et *internus*, a fronte

simplices, ex insitione tendinum clivosi, prominentes et ab invicem distantes ad posteriora flectuntur. *Externus* directior, in antica parte magis, quam *internus*, prominet; *internus* magis orbiculatus, et longior, in posteriore parte magis gibbus, altius descendit. Superficies cartilagine obductae a fronte coniunctae, pro excipienda patella ad condylum externum elatiores, media in parte trochleae in modum sinuatae, retro incisura profunda aspera, ligamenta cruciata, arteriam popliteam, venas et nervos excipiente, ab invicem separantur. Infima condylorum pars, quae tibiae innititur, magis in planum extenditur.

Os femoris, *condylo interno* capitis directioni non opposito, infra ad externa tortum videtur.

§. DXXXXVIII.

Substantia in media ossis femoris parte, firma et solida, amplum cavum, medullam continens, includit. Extremarum partium, praesertim vero inferioris extremae partis, substantia spongiosior adparet.

In extremis ossis femoris partibus multa et magna vasorum foramina, in media vero parte ad lineam asperam duo magna foramina, arterias ad os transmittentia, et ubique sulci exiles, vasorum vestigia, ponuntur.

§. DL.

Ossi femoris, et quidem fossae trochantericae M. obdurator internus et M. gemini; loco fossae

statim subiecto M. obturator externus; internae apicis trochanteris maioris parti M. pyramidalis; externae apicis parti M. gluteus medius; fossae eius priora et inferiora versus M. gluteus minimus; lineae intertrochantericae M. quadratus femoris; lineae asperae posteriori a trochanterè protensae, et quidem summae parti alterius lateris M. gluteus maximus, alterius vero M. pectineus, itidem M. vasti, M. triceps, et caput breve M. bicipitis; trochanteri minori M. iliacus internus; prorsum statim infra trochanterem maiorem M. vastus externus, infra lineam intertrochantericam M. cruralis; tuberculo condyli interni tendo capitis maximi M. tricipitis; tuberculo condyli externi caput externum M. gemelli; fossae magis in inferiori M. popliteus; parti posteriori condyli externi M. semitendinosus adnectuntur.

§. DLI.

In maturo fetu os femoris reliquis ossibus minus perfectum est. Non nisi corpus eius in os mutatum est. Itidem rectum est, nec adhuc curvatum.

§. DLII.

Os femoris inter omnia artuum inferiorum ossa plurimis *varietatibus* subiectum videtur. Nonnumquam valde longum est, *) sed tenue;

*) MERCK Hessische Beiträge II. Stück. Longius os femoris ego adseruo.

nonnumquam vero longum et plenum simul.
Rarissime fovea ligamenti teretis abest. *)

- *) *GENGA Anatom. chir. Romae 1687. SALZMANN Decas Obs. anat. Arg. 1725. 4. recus. in HALLERI Diss. select. T. VI. p. 694. In femoribus arthritide tactis, non raro ligamentum teres, eiusque vestigium in osse perditur, ut saepius observavi. cfr. BLUMENBACH medicinische Bibliothek, 3. Band.*

TIBIA

sive

FOCILE MAIUS CRURIS.

Iconem virilis tibiae vide apud *ALBINUM* Tab. Oss. XXVI.
 XXVII. — *Icon. Oss. foetus* Tab. XI.
 Femineae apud *BIDLOO* Tab. CIII.

§. DLIII.

Tibiae, maxima cruris ossa, integrum corporis pondus, articulo genuum impositi, nullo osse adiutae, sustinent. Ossibus femorum quidem breviores, sociis tamen iis omnia reliqua sceleti ossa magnitudine superant, et ad articulum cum ossibus femorum crassiores, quam ad articulum cum tarsis, figura plerumque trigona per totam longitudinem conspiciuntur.

Supra cum ossibus femoris, patellis et fibulis, infra vero cum fibulis et astragalidis articuli ope cohaerent.

§. DLIIII.

In corpus, extrema, latera et angulos tibia dividitur.

Extremi superioris planum fere ellipticum, posteriora versus declive, ad posteriora incisum, utrimque *foveas* cartilagine obductas, oblongas, ovatas fere, ad posteriora et ad latera declives, et foveolis cartilagine non obductis, inque medio positis ab invicem separatas ostendit. *Interna fovea* longior et profundior, *externa* vero latior, altiusque sita conspicitur. In antica parte minor, in postica vero parte maior incisura,

quibus cartilagine lunatae ligamentorum ope adnectuntur, iis interponitur. Foveae breviores sunt et magis orbiculatae, planis condylorum ossis femoris, cartilagine obductis, quae ope cartilaginum lunatarum iisdem adcommendantur. *Tuberculis intermediis* dorso oblique mutuo sibi oppositis ligamenta cartilaginum lunatarum illigantur. *Tuberculum externum* nonnihil magis priora versus interno ponitur. Anticum extremi superioris latus tuber versus, cui tendo extensorum genu adfigitur, aliquantum inclinatur. Ad externa et posteriora ambitus extremi superioris asper cartilagine obductum, orbiculatum, elatum, deorsum versus spectans *planum* cum fibula *articulo* iunctum exhibet. Internam extremi superioris partem linea transversa cingit, cui M. semimembranosus adnectitur.

§. DLV.

Corpus tibiae supra nonnihil ad interna curvatur, internum latus gibbum, externum cavum, ideoque verticem ad externa declivem habet. Infra magis recta porrigitur. — Statim, quum ab extremo superiori secedit, ab uno ad alterum latus, et pedetentim ab antica ad posticam partem contrahitur, extremum vero inferius versus sensim denuo diducitur.

Tres corporis superficies, interna, externa, posterior audiunt.

Interna superficies ab extremo superiori ad condylum usque producta, maxima, latissima,

plerumque omnium gibba, nusquam musculis tegitur, verum tamen posteriora et nonnihil inferiora versus prope tuberculum tendinis M. extensorum genu vestigium asperum ex insitione tendinum M. sartorii, M. gracilis et M. semitendinosi inter se iunctorum angulum internum versus vestigium asperum, verum tamen non adeo insigne, ex insitione ligamenti lateralis articuli genu conspicitur.

Externa superficies supra satis directa, infra mediam partem ad priora et interna vertitur, et diducta cum interna superficie confluit. Sursum contractior est, quam in media parte, et leniter sinuata, ut M. extensorem pollicis longum, M. extensorem digitorum longum, M. peroneum tertium, et M. tibiale anticum excipiat. Infra vero gibba est.

Posterior superficies supra sinuata est, et linea longitudinali, per medium decurrente, secatur, ceterum vero extremis latioribus, media parte contractiore conspicitur. Hanc lineam altera linea ex insitione M. solei aspera, et ad internam partem directa, oblique transcendit. Supra hanc lineam ad interna M. popliteus, infra eam vero ad externa M. flexor longus digitorum pedis ponitur, externo autem eius lateri M. tibialis posticus illigatur. In inferiore parte fovea acuto initio orta, deinde vero diducta, et extremi inferioris foveae, cui ligamenta fibulae inseruntur, tandem mixta conspicitur, ideoque tibiae facies hoc loco quadrata redditur.

Angulus anticus, (crista audit,) iunctis superficie interna et externa ortus, supra interna versus, infra vero externa versus leniter sinuatus, in externa tuberculi tendinum M. extensorum genu parte oblique descendit, et malleolum versus fine obtuso terminatur.

Angulus externus, supra obtusus, infra mediam partem nonnihil acutior, supra sinuatus, deinde prominens, post iterum sinuatus, tum iterum prominens, denique infra denuo sinuatus a superiore parte ad partem usque malleoli posteriorem descendit.

Angulo externo per totam longitudinem acuto supra et infra leniter sinuato, in media parte elato, membrana tendinosa, tibiae et fibulae interposita, adnectitur.

§. DLVI.

Extremum tibiae inferius, ambitu aspero, latere externo sinuato, priori et posteriori vero e nexu ligamentorum, quorum ope extremo fibulae inferiori iungitur, asperis in imo incisura cartilaginosa tegmine obducta, externa versus directa, fibulamque excipiente, interna versus in malleolum abit.

Planum articulare inferius, cartilagine tectum, quadratum, malleolum versus contractius, a priori ad posterius sinuatum, in medio elatum in externo latere leniter, in interno autem multum sinuatum, per malleolum descendit, ut cum superficie astragali trochleari coniungatur. Obli-

que positum est, superficie priore in externam, externa in posticam, postica in internam, interna in anticam partem directis, quo fit, ut digiti pedis externa spectent.

Malleolus internus haud adeo longus, verum tamen latus; sensim magis magisque contractus interna versus descendit. Superficies eius externa gibba est et aspera. Posterior malleoli pars sulcum trochlearem habet, qui tendinem *M. tibialis postici* excipit; magis etiam posteriora versus sulcus minus notabilis pro tendine *M. flexoris longi pollicis*, et in ima malleoli parte posteriora versus fovea pro ligamento deltoideo offenditur.

Tibia igitur ea ratione torta est, ut malleolus internus magis prorsum locetur, quam si recta infra partem extremi superioris articulata positus esset.

§. DLVII.

Substantia tibiae in medio solidior, cavum medullam continens includit. In extremis vero spongiosior offenditur.

Maximum foramen, quod orificium est canalis descendentis, vasaque excipientis, in posteriore superficie haud procul infra lineam transversam cernitur, cui *M. soleus* adfigitur.

§. DLVIII.

Tibiae, et quidem partibus eius iam iam descriptis: *M. extensor communis genu* ope patellae, *M. sartorius*, *M. gracilis*, *M. semiten-*

dinosus, M. semimembranosus, M. popliteus, M. gemelli, M. tibialis anticus et posticus, M. flexor longus digitorum pedis, M. flexor longus pollicis, et M. soleus inseruntur.

§. DLVIII.

In maturo fetu corpus osseum et extrema cartilaginosa tibia constituant.

PATELLA

PATELLA sive ROTULA, MOLA.

Virilem patellam exhibet *ALBINI Tab. XXVII. — Icon. oss. foetus Tab. X.*
 Femineam *BIDLOO Tab. CIII.*

Seriem egregiarum iconum, quae modum, quo patella sensim sensimque in os vertitur, ob oculos ponunt, vide sis in *WALTERI Abhandlung von den trocknen Knochen.*

§. DLX.

Patella, maximum os sesamoideum, vel appendix tibiae mobilis olecrano nonnihil analoga videtur. Margo eius superior tendinibus *M. extensoris genu communis* circumcluditur, inferior vero per ligamentum peculiare validam tendinis *M. extensorum genu* continuationem, tibiae adnectitur.

Ambitum orbiculato trigonum, latitudinem, crassitudine maiorem, externam superficiem elatior, partem superiorem, crassior, sive basin, inferiorem magis magisque tenuiorem, sive obtusum apicem patella exhibet.

Superficies antica gibba, aspera, striata quasi, insignibus vasorum foraminibus pertunditur. Summa eius pars ob nexum tendinum *M. extensorum genu* sulcata est et inaequalis. Similis, verum profundior sulcus marginem externum occupat.

Superficies posterior tota, apice inferius et posterius sulcato, et exigua marginis externi parte exceptis, cartilagine tegitur, et cristam obtusam, per longum descendentem format, cuius ope cartilaginibus trochlearibus condylorum ossis femo-

ris melius adcommodatur. Superficies ad utrumque cristae latus positae nonnihil sinuantur, interna vero minor est, et planior, externa maior et nonnihil profundior.

Substantia patellae externe solida est, interne vero spongiosa.

In *maturo fetu* patella mera cartilago est, et tarde, nonnisi circa annum sextum ad decimum usque puncta ossea prima vice inveniuntur.

Integra patellae figura vel magis orbiculata est, vel magis trigona, vel magis gibba, vel magis plana, plurimas vero varietates interna superficies subit, mox enim fere gibba, mox distincte plana adparet.

FIBULA

sive

PERONE, FOCILE MINUS CRURIS.

Virilem delineatam vide in *ALBINI Tab. Oss. XXVIII.* —*Icon. Oss. foetus Tab. XI.*Femineam in *BIDLOO Tab. CIII.*

§. DLXI.

Fibula, gracillimum os, ad externum tibiae latus locatur, et cum ea in utroque extremo, praesertim vero in inferiori, ibique etiam cum astragalo per ligamenta nectitur. Hiatus tibiae inter et fibulam membrana tendinosa occludit.

Fibula nonnihil brevior, multoque tenuior quam tibia, in media longitudinis parte trigona fere, infra eam quadrata, in utroque extremo crassior conspicitur.

§. DLXII.

Extremum fibulae superius trigonum fere, inaequale, in summo obtusum, internam superficiem devexam, exigua parte cartilagine obductam habet, cuius ope tibiae adnectitur, ut parum per tantum in adversum et aversum dari possit. Externa quoque eius pars, cui *M. biceps femoris* inseritur, declivis est et aspera.

§. DLXIII.

Infra extremum superius subito plurimum fibula contrahitur, ut tamen sensim denuo diducatur. Initio per duas tertias partes directo itinere descendit, quo facto tibiae magis magisque

adpropinquatur, deinde vero directioni tramite iterum descendit.

Quatuor superficies, externam, internam, posteriorem, priorem, angulis, priori, externo et interno ab invicem determinatas habet.

Superficies externae supra sinuatae, deinde sulcatae, post gibbae, et ad posteriora tortae, denique infra iterum sinuatae M. peroneus longus et brevis inseruntur, quorum causa, quod circum malleolum externum ducuntur, fibula hoc modo flectitur. Infra in superficiem malleoli externam, musculis nudatam, trigonam abit.

Superficies posterior simul cum externa ea ratione flectitur, ut deorsum versus in internam superficiem, externa vero in posteriorem mutetur. Supra malleolum ex ligamentorum insitione magis ad superiora ex insitione M. solei et flexoris longi digitorum pedis valde aspera ostenditur.

Superficies interna infra mediam partem, quo loco superficies posterior et prior inter se iunguntur, in acutum desinit, et sinu M. tibiale posticum excipit.

Superficies prior ab angulo priori contracta oriunda in superficie malleoli priore denuo contractioni fine subducitur.

Angulus prior, sive crista, superficiem internam ab externa superat et in superficiem priorem abit. M. extensor pollicis, M. extensor longus digitorum pedis, M. soleus et deorsum versus membrana interossea illi adnectuntur.

Angulus externus, supra obtusus, quum vértitur, acutior evadit, et in internam malleoli superficiem abit.

Angulus internus, supra obtusus, deinde acutissimus, cum angulo priori confluit. Membrana interossea illi adnectitur.

§. DLXIII.

Extremum inferius malleolum externum, crassio- rem, interno longiorem, et magis posteriora versus positum format. Supra fibula crassior est, infra vero in apicem obtusum abit. Trigonus fere malleolus superficiem externam elatam, posteriorem minorem et planiorem, internam cartilagine obductam, et tibiae et incisurae astragali ope ligamenti validi alligatam offert. Dorsum malleoli sulcatum M. peroneos excipit.

Locis iam iam descriptis fibulae M. peroneus longus et brevis, M. extensor pollicis, M. extensor digitorum pedis communis, M. soleus, M. flexor longus pollicis, M. tibialis posticus inseruntur.

§. DLXV.

Substantia fibulae, exceptis extremis spongiosis, externe solida est, interne vero cellulas, medulla repletas, ostendit.

Supra mediam longitudinis superficiei posterioris partem aditus ad canalem vasorum descendentem cernitur.

§. DLXVI.

In maturo fetu ambo extrema merae sunt cartilagines.

A S T R A G A L U S

sive

TALUS, OS TESSERAE, TETROROS.

Virilem astragalum vide in *ALBINI Tab. Oss. XXVIII. Fig. VII. — IX.* Cum reliquis tarsi ossibus coniunctum *Tab. XXXII. XXXIII. XXXIII.* — *Icones Oss. foetus Tab. XII. Fig. LXXXIII. LXXXIII.*

Femineum in *BIDLOO Tab. ult.*

§. DLXVII.

Astragalus, supra cum tibia et fibula laxo articulo, prorsum cum osse naviculari, infra cum calcaneo adstrictiori articulo coniunctus proxime per crura pondus reliqui corporis sustinet.

In *caput*, *collum* et *corpus* astragalus describi solet.

§. DLXVIII.

Corpus quinque superficies offert. — *Superficies superior* trochleae in modum sinuata et cartilaginosa tegmine obducta, priora versus latior in collum vertitur, et utrinque reflectitur, ut superior superficiei pars incisurae tibiae, latera malleolis adcommoventur, et absque motu ginglymoideo motus lateralis, praesertim extenso pede institui possit. — *Superficies interna* partim cartilagine tegitur, partim valde aspera est et inaequalis. Pars cartilagine obducta vel minima ad priora orbiculata est, ad posteriora vero acuta et leniter sinuata. Pars altera maior est, et e ligamentorum nexu valde aspera. *Superficies externa* tota fere, excepto sulco profundo,

ligamentum excipiente, cartilagine tegitur, socio-que hoc sulco arcum efficit, deorsum versus contrahitur, in apicem sinuatum exiens. — *Superficies posterior* omnium minima, laevem, obliquam incisuram, in qua tendo M. flexoris longi pollicis ponitur, ostendit. — In *superficie inferiore* ad posteriora et exteriora incisura multum sinuata, transversa, cartilagine tecta offenditur, quae calcaneo nectitur, ut articulus non-nihil in latus, verum tamen magis in interna flecti possit.

§. DLXVIII.

Collum valde asperum, inaequale, foraminibus pertusum, sinuata figura in caput abit, tortumque videtur. Externa eius superficies longissima est, interna vero et inferior brevissima, quo loco magnus sinus, qui socio simili, verum tamen non adeo profundo, calcanei magnum ligamentis expletum hiatus format.

§. DLXX.

Caput duae cartilagine obductae superficies, prior et inferior, formant. — *Prior* maxima, multum gibba ossi naviculari iungitur. Nonnumquam e nexu ligamenti cartilaginosi, quod astragalum cum osse naviculari iungit, angulum quodam modo refert. — *Inferior* minor oblonga sustentaculo calcanei innititur.

Raro alia exigua cartilaginoso tegmine obducta superficies, quae astragalum cum osse cuboideo nectit, invenitur.

§. DLXXI.

In maturo fetu astragalus iam iam nucleum osseum continet.

CALCANEUS sive OS CALCIS.

Virilem exhibet *ALBINI Tab. XXVIII. Fig. I. — VI. Nexum*
reliquis tarsi ossibus offerunt Tab. XXXII. XXXIII. XXXIII.
— Icones ossi foetus Tab. XII. Fig. LXXXI. LXXXII.

Femineum *BIDLOO Tab. ult.*

§. DLXXII.

Calcaneus, crassissimum pedis os, fundamentum reliquorum tarsi ossium constituit, et adstricto articulo cum astragalo et osse cuboideo iungitur.

§. DLXXIII.

Extremum calcanei posterius in oblongum, valde asperum, oblique ad interna descendens *tuber* porrigitur, cui tendo *M. suralis* ea ratione adnectitur, ut superior tuberis margo laevigatus, quem tendo, quum pes flectitur, tangit, liber tendinis nexu maneat.

§. DLXXIII.

Corporis calcanei, quod maiore altitudine est, quam crassitudine, pars superior in *superficiem articulare* gibbam, cartilagine obductam, oblique prorsum versus directam, ovatam fere, supra et infra contractiorem, astragalum sustententem abit; inferior pars ad priora porrigitur.

§. DLXXV.

Interiora versus calcaneus sustentaculum, quo collum astragali excipitur, format, quod supra *superficiem articulare*, cartilagine tectam, con-

tractiorem, minus descendentem et sinuatam, infra vero sulcum pro tendine M. flexoris longi pollicis excipiendo offert. Pars prominens, quam ligamentum ossi naviculari alligat - hanc superficiem articulare inter et sulcum, leniter, saepius vel tantillum pro excipiendo tendine M. extensoris longi digitorum pedis sulcatur.

Supra hunc sulcum, magis ad priora, minor incisura, cartilaginosa tegmine obducta, nonnumquam sulco M. extensoris longi digitorum pedis coniuncta, nonnumquam ab illo separata, *) partemque astragali excipiens invenitur.

Superficiem articulare gibbam inter et superficiem sustentaculi articulare fovea inaequalis conspicitur, quae ligamenta, calcaneum et astragalum nectentia, excipit. Pone apicem priorem in margine externo tuber eminent, cui M. extensor brevis digitorum pedis inseritur.

§. DLXXVI.

Pars prior cartilagine tecta, cum osse cuboi-

*) CAMPER über den besten Schuh Fig. V. Continuationis harum partium calceos causam esse autumat, quod vix probari potest. — Vid. BLUMENBACH p. 445. Anne forsitan index est calcanei feminei? CAMPER enim in figura manuscripti sui super ossibus, et §. III. et BIDLOO Tab. cit. omnesque feminei calcanei in collectione mea hanc continuationem confirmant. — In infantibus autem utriusque sexus distincte ab invicem separatas has partes esse video.

Forsan sensim confluunt, quod pondus corporis in feminis minus quam in viris interno calcanei latere, artubus inferioribus angulum acutiorem formantibus, innititur.

leo coniuncta, supra leniter sinuata est, infra leniter gibba, ambitu fere trigono, et ad priora et nonnihil ad inferiora spectat.

§. DLXXVII.

*Superficies calcanei externa sive longissima inaequalis, aspera partem tarsi lateralem format. Nonnumquam in ea duo tubercula, tendinem M. peronei longi excipientia, offenduntur. *)*

Superficies interna laevior, magno sinu, quem sustentaculum auget, quique tendines, vasa, nervos excipit, distinguitur.

Superficiem posteriorem et inferiorem in extremi posterioris vicinia asperum tuber, cui M. abductor digiti minimi pedis, et aponeurosis plantaris illigantur, ab invicem separat.

In superficie inferiore aspero vestigio, in quod tuber extremi posterioris abit, tendo M. flexoris brevis digitorum pedis inseritur, magisque ad priora tuberculum oblongum, et in latere externo vestigium asperum adest, quod ligamenta cum osse cuboideo coniungunt.

§. DLXXVIII.

Substantia calcanei externae solida est, interne reticularis et spongiosa.

§. DLXXVIII.

Calcaneo M. suralis, M. extensor longus di-

*) Quae tubercula in *ALBINI* icone, minus distincte vèro in ipso calcaneo observo.

gitorum pedis, M. abductor digiti minimi pedis, M. flexor brevis digitorum pedis, M. abductoris pollicis caput longum, et pars tendinis M. tibialis postici inseruntur.

§. DLXXX.

In *matureo fetu* pars calcanei in os iam iam mutata invenitur.

OS NAVICULARE TARSI

sive

OS SCAPHOIDEUM TARSI.

Virile apud *ALBIN*. *Tab. oss. XXVIII. Fig. XII. — XVII.*

Nexum cum reliquis tarsi ossibus *Tab. XXXII. et XXXIII.*

— *Icorres oss. foetus Tab. XII. Fig. LXXXV. LXXXVI.*

Femineum apud *BIDLOP Tab. ult.*

§. DLXXXI.

Os naviculare positu transverso et declivi, astragalum, tria ossa cuneiformia et os cuboideum inter, in interno tarsi latere, inter ambas ossium tarsi series interponitur.

Maxima pars *superficie posterioris* cartilagine tecta, sinuata, ovata, ad interna tamen acuminata astragalo nectitur. Minor vero pars aspera et inaequalis interna versus in tuberositatem abit, cui tendo *M. tibialis postici* inseritur.

Superficies prior ad tuberositatem usque mox descriptam, cartilagine legitur, et gibba in tres superficies articulares, spinis duabus prominentibus, dividitur. *Interior* maxima, trigona, apice sursum spectante, ossi cuneiformi magno adnectitur. *Media* trigona minor, apice sursum spectante, ossi cuneiformi secundo iungitur. *Exterior* quadrata fere, ossi cuneiformi tertio innititur.

Superficies superior aspera, inaequalis, foraminibus pertusa ad dorsum tarsi spectat.

Superficies inferior in interno latere instructa est tuberculo parvo, plano, cartilagine obducto, quod raro deficit, et cuius ope os navi-

culare ossi cuboideo iungitur. Ceterum vero eadem inaequalis, et clivosa ad plantam pedis spectat. Tuberculo sulcus pro tendine M. tibialis postici inferior locatur.

Substantia eadem est ut in reliquis tarsi ossibus.

Pars tendinis M. tibialis postici ossi naviculari inseritur,

In maturo fetu mera est cartilago.

OSSA CUNEIFORMIA GENERATIM CONSIDERATA.

Virilia apud *ALBINUM* Tab. oss. XXVIII. Fig. XVIII -- XXII.
 Nexa reliquis tarsi ossibus Tab. XXXII et XXXIII. ---
Icones oss. foetus Tab. XII. Fig. LXXXVIII. et LXXXIX.
 Feminea apud *BIDLOO* Tabula *ultima*.

§. DLXXXIII.

Tria ossa cuneiformia ossi naviculari, quatuor ossibus metatarsi et ossi cuboideo interponuntur; tertium os cuneiforme ossi cuboideo insuper adiacet.

Maximum os cuneiforme ad interna, *medium* ad externa ponitur, *minimum* locum inter utrumque tenet.

Minimum, et *medium* cunei figuram satis bene habent, non aequè bene *maximum*. Illa etiam cunei in modum adacta sunt, maximi vero superficies interna nulli ossi adiacet.

Substantia eorum eadem est, quae ossis navicularis.

In *matureto fetu* merae sunt cartilaginee.

Ambitus partium cartilagine tectarum multum subinde mutatur.

OS CUNEIFORME PRIMUM

sive

OS CUNEIFORME MAIUS sive INTERNUM.

§. DLXXXIII.

Os cuneiforme primum maiore est longitudine, quam latitudine, extremum crassum deorsum versus dirigit, superficiem gibbam et cavam sistit.

In *posteriore parte* superficiem articulem, cartilagine tectam, trigonam, sinuatam, cum osse naviculari coniunctam, in *priore parte* similem, cartilagine obductam, multo longiorem, reniformem, tortam, media parte sinuatam, cum osse metatarsi pollicis pedis coniunctam refert.

Superficies interna ex insitione ligamentorum validorum, si superficiem articulem cartilagine obductam, angulatam, quantum ad maximam partem, ossi cuneiformi medio, quantum ad minimam vero, ossi metatarsi secundo coniunctam excipias, aspera est et inaequalis.

Superficies gibba, multum aspera, inaequalis, foraminibus pertusa, partim ad dorsum pedis, partim ad plantam eius spectat. Angulus eius prior et inferior superficie sat laevi instructus est, cui tendo M. tibialis antici, mox vestigio aspero vicino inserendus incumbit, infra vero tuberculum conspicitur, cui tendo M. tibialis postici illigatur.

M. peroneus longus, pars M. peronei brevis, et caput breve M. abductoris pollicis pedis ossi cuneiformi primo adnectuntur.

OS CUNEIFORME SECUNDUM

sive

OS CUNEIFORME MINUS, sive MEDIUM.

Virilis iconem dat *ALBINI Tab. oss. XXVIII. Fig. XXIII. --**XXVII. --- Nexi reliquis tarsi ossibus sistunt Tab. XXII.**XXIII. --- Icones oss. foetus Tab. XII. Fig. LXXXXI.**LXXXII.*Feminei *BIDLOO Tab. ultima.*

§. DLXXXIII.

Iure ambo nomina huic ossi cuneiformi imponuntur, quod os cuneiforme primum, os cuneiforme tertium, os metatarsi secundum et os naviculare includunt.

Superficies eius superior, sive basis, quadrata, maioris tamen longitudinis quam latitudinis, aspera, foraminibus pertusa, ad dorsum pedis spectat.

Superficies laterales, externa et interna, eadem quadratae, marginem superiorem inter et inferiorem longiores, quam priorem inter et posteriorem, in margine superiori et posteriori superficies cartilagine obductas, angulatas exhibent. Reliquae partes asperae, sinuatae, deorsum versus marginem obtusum coniunctae formant. Interna superficies, ossi cuneiformi maiori iungenda, gibba, externa vero, ossi cuneiformi tertio iungenda, cava est.

Superficies prior et posterior, triangulares, sursum lata, deorsum acuminatae, cartilagine obducuntur, prior autem contractior, verum

tamen longior est posteriore, quae non ad imam usque partem cartilagine tegitur. Superficies prior, ossi metatarsi secundo iungenda, leniter gibba est, posterior vero, quae cum osse naviculari coniungitur, leniter sinuata offenditur.

Ossi cuneiformi minori tendines M. flexoris brevis pollicis pedis inseruntur.

OS CUNEIFORME EXTERNUM

sive

OS CUNEIFORME MEDIUM sive TERTIUM.

Virile apud *ALBINUM* Tab. Oss. XXVIII. Fig. XXVIII. —
 XXXII. Nexum reliquis ossibus Tab. XXXII. XXXIII. —
Icones ossium foetus Tab. XII. Fig. LXXXXIII. LXXXXIII.
 Feminineum *BIDLOO* Tab. ultima.

§. DLXXXV.

Os cuneiforme externum, quantum ad magnitudinem mediam os cuneiforme primum et secundum inter, in cuneum desinens, deorsum et prorsum versus sex ossa inter, os metatarsi secundum, tertium, quartum, os cuneiforme secundum, os naviculare, os cuboideum locatur.

Superficies superior, ad dorsum pedis spectans, aspera, inaequalis, maioris longitudinis quam latitudinis, nonnumquam hexagona est, plerumque vero, quod contractis spatiis os cuneiforme externum cum osse metatarsi secundo et quarto coniungitur, pentagona.

Superficies laterales, interna et externa plerumque quadratae, deorsum versus marginem obtusum coniunctae formant.

Interna in angulo superiori et priori, sive per totam marginis prioris longitudinem deorsum versus *vestigium exiguum*, cartilagine tectum, cuius ope ossi metatarsi secundo iungitur, in angulo autem superiori et posteriori *vestigium maius* prominens, cartilagine tectum, angulatum, nonnumquam oblongum, ossi cuneiformi secundo in-

nixum, ostendit. Reliqua pars sinuata est et inaequalis.

Superficies externa ad posteriora et superiora vestigio aspero, cartilagine tecto, non nihil inaequali, cuius ope cum osse cuboideo iungitur; ad priora vero et superiora minori, vago, cartilagine obducto, quod nexum cum osse metatarsi quarto instituit, instructa est. Reliqua pars inaequalior est, reliqua parte superficiei internae.

Superficies posterior quadrata, non nihil sinuata, plerumque tota quanta cartilagine tegitur, obliqua directione ad interiora et posteriora dirigitur, et ossi naviculari iungitur.

Superficies prior triangularis, ad superiora et inferiora leniter sinuata, tota quanta cartilagine obducitur, ossique metatarsi tertio iungitur.

Apicem marginis inferioris obtusi M. adductor longus pollicis pedis, et pars M. tibialis posteriori occupant.

OS CUBOIDEUM sive OS CUBIFORME.

Virile videatur apud *ALBINUM* Tab. oss. XXVIII. Fig. XXXIII. --
 XXXVII. Nexum reliquis ossibus Tab. XXXII. XXXIII. —
Icon, oss, foetus Tab. XII. Fig., LXXXVII. LXXXVIII.
 Feminum apud *BINZOO* Tab. ultim.

§. DLXXXVI.

Os cuboideum nomini non exacte respondet, superficies enim interna externam longitudine superat, alterum autem os tarsi a calcaneo ratione magnitudinis, ossi naviculari, ossi cuneiformi tertio, ossi metatarsi quarto et quinto interponitur.

Superficies superior, ad dorsum pedis spectans, aspera est, inaequalis, et aliquatenus quadrata.

Superficies posterior, cum calcaneo coniuncta, cartilagine tegitur, cordiformis fere, supra sinuata est, et in apice, deorsum spectante, elata.

Superficies interna, sursum versus in media sui parte vestigium singulare cartilagine obductum exhibet, cuius pars maior et prior ossi cuneiformi tertio, posterior et minor ossi naviculari innititur. Nonnumquam, verum tamen non semper, in apice locus minor, cartilagine tectus, et cum astragalo coniunctus offenditur. Reliqua pars valde aspera est, inaequalis et clivosa.

Superficies externa parva est, et tendinem M. peronei longi sulco excipit.

Superficies inferior linea prominente, obliqua, quam ligamentum validum cum calcaneo copulat, in partem priorem, minorem, profunde pro tendine M. peronei longi excipiendo, sulca-

tam, et in partem posteriorem, maiorem, asperam, pro excipiendis ligamentis sulcatam dividitur. Ipsam lineam prominentem ad superficiem internam, quo loco tendo M. peronei ossi cuboideo arcte circumponitur, cartilago obducit.

Superficies prior tota cartilagine tegitur, duoque plana extrorsum spectantia offert, quorum internum longius cum osse metatarsi quarto, externum vero latius cum osse metatarsi quinto coniungitur.

Substantia ossis cuboidei eadem est, quae reliquorum tarsi ossium.

M. adductor, nonnumquam etiam M. flexor brevis pollicis pedis, pars tendinis M. peronei longi ossi cuboideo adnectuntur.

OSSA METATARSI.

Virilia videantur apud *ALBINUM* Tab. oss. XXX. Nexa reliquis ossibus Tab. XXXII. XXXIII. *Icones ossium foetus* Tab. XII. Fig. LXXXV. -- CII.

Feminea apud *BIDLOO* Tab. ultima.

§. DLXXXVII.

Quinque ossa metatarsi, quibus *digiti pedum* alligantur, iuxta se invicem *tarsum* inter et *digitos pedum* posita sunt.

Oblonga sunt, in media parte tenuiora, in extremis partibus crassiora. *Extremum prius gibbum est, posterius angulatum.*

Substantia eorum in extremis quadam tenus spongiosa est, in media vero parte solidior.

In *mature fetu* e tribus partibus componuntur.

§. DLXXXVIII.

Os metatarsi pollicis pedis multo crassius, sed non nihil brevius est, reliquis metatarsi ossibus.

Extremum posterius ambitum reniformem et positum obliquum referens, qua superficie nulli ossi innititur, orbiculatius, qua vero superficie ad os metatarsi secundum spectat, sinuatum est, cetera vero undique asperum et impressum.

Superficies posterior tota plerumque cartilaginosa tegmine obducta, leniterque sinuata, et in duas quasi *foveolas*, *superiorem maiorem, inferiorem minorem* divisa, ossi cuneiformi primo iungitur. *Superficies interna* tuberculum e nexu *M. tibialis antici*, apex vero, ad *plantam pedis* spe-

ctans, foveolam asperam ex insitione M. peronei longi offert. Nonnumquam in media superficiei internae extremi posterioris parte planum cartilagine obductum invenitur, quod cum osse metatarsi secundo coniungitur.

Extremum anticum, sive *capitulum* ambitu magis orbiculatum, inaequale, priora versus cartilagine tegitur, infra vero, quo loco cum ossibus sesamoideis nexum init, linea prominente in duas superficies trochleares dividitur, Utrumque vestigia aspera ex insitione ligamentorum lateralium inveniuntur.

Media ossis metatarsi pollicis pedis pars contractior est, inter omnia metatarsi ossa plurimum triangularis, *superficie superiore* gibba, *inferiore* leniter cava, *externa*, ad os metatarsi secundum spectante itidem, verum tamen minus sinuata, *marginem superiore* parum, *interno* paullo magis, *inferiori* vero maxime sinuato.

§. DLXXXVIII.

Quatuor reliqua metatarsi ossa.

Posterius eorum *extremum* crassius est priori, et superficiem cartilagine obductam, cuius ope ossibus tarsi iungitur, et vestigia aspera e ligamentorum lateralium insitione offert.

Media eorum pars trigona fere priora versus contrahitur, quum vero in extremum prius abit, crassitudine sensim augetur.

Tres superficies, superior, externa, et interna detortae quasi videntur.

Superior superficies leniter gibba est, *inferior* vero distinctius sinuata.

Prius extremum, sive *capitulum*, prorsum versus gibbum, utrimque vero compressum est, et quod superficiem articulare[m] sistit, cartilagine tegitur; ambitus superficiei articularis, quo loco primam phalangem tangit, elatus, infra autem, quo loco ligamenta inseruntur, incisus est, ita ut posteriora versus in duplex quasi tuberculum designat. Haec secundi ossis metatarsi tubercula in eadem linea posita sunt, reliquorum vero trium metatarsi ossium externum maius tuberculum magis ad posteriora, quam internum, situm est.

Supra, statim pone superficiem articulare[m], sulcus, et utrimque tuberculum et foveola aspera pro excipiendis ligamentis lateralibus inveniuntur.

Superficies articularis posterior cartilagine tecta oblique sita est, ut externa eius pars maior, et, excepta hac ossis quarti metatarsi superficie, trigona inveniatur.

Ceterum magnitudo quatuor metatarsi ossium ultimum versus gradatim decrescit, ideoque os metatarsi secundum longissimum est, ultimum vero brevissimum, verum tamen non semper, nonnumquam enim quartum brevius est quinto.

§. DLXXXX.

Os metatarsi secundum.

Longissimum est, plurimumque omnium retro positum, *superficie articulari extremi posterioris* cartilagine obducta, leniter sinuata, et cum osse

cuneiformi minori nexa, eodemque extremo posteriori ad latus internum exigua articulari superficie, ossi cuneiformi maximo iuncta, ad latus externum duabus superficiebus, superiore maiore, et inferiore minore, plerumque incisura ab invicem separatis, nonnumquam tamen confluentibus, et maximam quidem partem os metatarsi tertium, minorem vero partem os cuneiforme tertium tangentibus, instructo.

Mediae partis superficies, ad os metatarsi primum spectans, pro M. interosseo primo externo digiti secundi pedis excipiendo supra et infra multum sinuatur, minus vero eiusdem mediae partis superficies ad os metatarsi tertium spectans, pro excipiendo M. interosseo secundo externo digiti secundi pedis cavatur.

§. DLXXXI.

Os metatarsi tertium, sive medium.

Superficies posterior articularis cartilagine tecta, supra et infra gibba, in medio sinuata, os cuneiforme tertium tangit. Interna extremi posterioris pars duas cartilagine tectas superficies articulares, superiorem maiorem et inferiorem minorem, os metatarsi secundum tangentes, nonnumquam posteriora versus inter se coniunctas offert. Superficies partis externae cartilagine obducta maior, leniter sinuata, cum osse metatarsi quarto connectitur.

Media pars utrimque, magis vero in interno latere pro excipiendis M. interosseis sinuatur.

Tuberculo extremi posterioris M. adductor pollicis pedis inseritur.

§. DLXXXII.

Os metatarsi quartum.

Superficies articularis extremi posterioris quadrata, vel ovata, in medio elata, cum osse cuboideo connectitur. Superficierum articularium lateralium interna minor est, magis tamen producta, quam externa, nonnumquam etiam in minores superficies divisa, ut pars posterior os cuneiforme tertium tangat.

Externa superficies magis orbiculata, nonnihil gibba, cum osse metatarsi quinto connectitur.

Prius extremum ad externa quasi tortum videtur.

Latus internum M. interosseus secundus internus: externum M. interosseus ultimus externus, tuberculum extremi posterioris M. adductor pollicis pedis occupat.

Ceterum ambitus eius posteriora versus maior nonnihil est, quam ossis metatarsi tertii.

§. DLXXXIII.

Os metatarsi quintum.

Extremum posterius posteriora versus trigonam, cartilagine tectam, apice sursum directam, leniter gibbam, ossi cuboideo adnexam superficiem articulare, et ad externa spectans tuberculum, cui tendo M. peronei brevis inseritur, cuique pes innititur, et orbiculatam, cartilagine te-

ctam, leniter sinuatam, ossi metatarsi quarto coniunctam superficiem articulare[m] exhibet.

Media pars pro insitione M. interossei tertii interni os metatarsi quartum versus supra leniter gibba, infra sulcata est, et vestigium, e nexu M. flexoris brevis digiti pedis minimi asperum, offert. Externa eius superficies sinuata est. Pone extremam priorem partem M. transversus plantae inseritur. — Ceterum omnium minime trigona est, sed deorsum versus quasi complanata.

PHALANGES DIGITORUM PEDIS.

sive
INTERNODIA, OSSA PRIMA, SECUNDA ET
TERTIA DIGITORUM PEDIS.

§. DLXXXIII.

Pollex pedis duas tantum phalanges habet, reliqui vero quatuor pedis digiti tribus phalangibus instructi sunt, *posteriore, medio et priore*, sive phalange unguium; pollex nempe phalange media caret.

Phalanges pollicis crassissimae et longissimae sunt, reliquorum vero pedis digitorum phalanges ordine gradatim attenuantur et contrahuntur.

Substantia mediae phalangum partis solidior est, quam extremarum partium.

Phalanges primae sive posteriores.

Viriles apud ALBINUM Tab. Oss. XXXI. — Nexas vide Tab. XXXII. XXXIII. — Icon. oss. foetus Tab. XII. Femineas apud BRIDGES Tab. ultima.

§. DLXXXV.

Phalanges posteriores sive primae extremum posterius priori crassius habent, et ope superficiei articularis trigono sphaericae, cavae, cartilagine tectae, cum superficie articulari maiore capituli ossium metatarsi connectuntur. Idemque posterius extremum, undique e nexu ligamentorum articularium asperum, duobus tuberculis notatur. Phalangis pollicis pedis tuberculo maiori interno M. abductor, minori externo M.

adductor pollicis, phalangibus trium mediorum digitorum pedis M. interossei, et phalangi digiti minimi pedis M. flexor proprius brevis et M. abductor digiti minimi pedis inseruntur.

Media phalangum *pars* supra angulato teres, infra planior, priora versus leniter sinuata, ad posteriora latissima, deinde contractior, post denuo diducta in extremum prius mutatur.

Extremi prioris, sive *capituli* trochlearis, cartilagine obducta, supra gibba, infra sinuata superficies articularis in pollice cum phalange unguium, in reliquis vero quatuor pedis digitis cum phalange media connectitur.

Amborum tuberculorum, quae sinus extremi prioris gignit, in pollice pedis externum maius est, in reliquis vero digitis internum. Ceterum vero hoc extremum undique asperum utrinque tuberculis e ligamentorum lateralium nexu oriundis notatur.

Prima pollicis pedis *phalanx* minore, relatis extremis partibus ad mediam partem, proceritate, capitulo minus orbiculato, tuberculo supra nonnumquam conspicuo, superficie articulari posteriore minus orbiculata, decremento priora versus non aequè cito, minori sinus inferioris ambitu, positu superficiei articularis prioris interna versus obliquo, qui in tertia, quarta et quinta, oppositam directionem servat, a prima reliquorum pedis digitorum phalange differt; superficies

etiam eius inferior laevior est, reliquorum vero pedis digitorum superficies inferior ex insitione vaginarum M. flexorum utrimque linea aspera notantur.

In maturo fetu e tribus partibus, extremis cartilaginosis et media ossea parte componuntur.

Phalanges mediae.

ALBINI Tab. XXXI. -- Nexas vide Tab. XXXII. et XXXIII.
Icones Oss. foetus, Tab. XII. BIDLOO Tab. ultima.

§. DLXXXVI.

Quatuor minores pedis digiti mediam phalangem habent, qua pollex caret.

Media phalanx posteriore, quin, verum tamen, pede minus perfecte constituto, nonnumquam etiam priore phalange brevior est. Per gradus, quantum digiti pedis decrescunt, digitum minimum versus contrahuntur, ideoque media digiti secundi phalanx maxima, quinti vero digiti brevissima est, quae saepius veluti tertia et quarta media phalanx, maiore latitudine quam longitudine notatur.

Extremum posterius undique asperum in superficie inferiore sinuatum, infra duo tubercula pro inserendis cornibus tendinis M. flexoris brevis digitorum, supra vero eminentiam, cui pars tendinis M. extensoris longi digitorum pedis illigatur, utrimque vero vestigia aspera pro ligamentis, quae hanc phalangem cum posteriore phalange iungunt, ad posteriora autem superficiem

articularem, cartilagine obductam, linea eminente in duas foveas divisam, superficiei phalangis posterioris trochleari innititur, ostendit.

Media pars initio latior, deinde quadam tenus tenuior, dum denuo crassior, superficiem superiorem gibbam, inferiorem vero leniter cavam habet, cum posteriore phalange comparata latior est, verum tamen figuram eius nonnihil refert.

Extremum prius, posteriori minus, ope superficiei cartilagine obductae, trochlearis, sinuatae cum phalange priore coniungitur. Utrunque vestigio aspero notatur, cui ligamenta lateralia, quae hanc phalangem cum priore coniungunt, illigantur.

Substantia extremarum partium spongiosa est, mediae vero partis solidior.

In maturo fetu trium phalangum ambae extremae partes cartilaginosae sunt, mediam vero partem substantia ossea constituit. Digiti vero minimi media phalanx e mera cartilagine componitur.

Phalanges unguium sive priores.

ALBINI Tab. Oss. XXXI. — Nexas exhibet Tab. XXXII. XXXIII.

Icones oss. foetus Tab. XII. — BIDLOO Tab. ultima.

§. DLXXXVII.

Quinque phalangibus unguium, excepta magnitudine, quae a pollice pedis ad digitum minimum decrescit, quae sequuntur, communia sunt.

Non-

Nonnumquam quarti digiti pedis phalanx prior eadem longitudine est, qua phalanx media, cui connectitur, quinti digiti pedis phalanx prior nonnumquam mediam longitudine superat. Saepius calceorum forsan pressione quinti digiti pedis phalanx prior et media in adolescentibus iam iam inter se coalitae inveniuntur.

Extrema posterior pars latissima totius phalangis pars, nonnumquam extremam ossis partem, cui connectitur, latitudine superat, ambituque aspero, inverso quasi, praesertim infra, notatur. Tuberculo superiori ambitus asperi tendo M. extensoris brevis digitorum pedis (excepta phalange digiti pedis minimi) inseritur. Retro articulare, cartilagine tectum, linea leniter prominente in duas vix conspicuas foveolas divisum, sive orbiculare planum, in pollice pedis cum superficie phalangis posterioris trochleari connexum conspicitur. Tuberculis lateralibus ligamenta lateralialia inseruntur.

Corpus a lateralibus partibus plurimum contractum, superficie superiore laeviore et magis gibba, inferiore asperiore et planiore, nonnumquam in pollice pedis sinuata, notatum, in capitulum infra asperum, et foraminibus pertusum, supra vero dentatum, inversum quasi marginem referens abit.

Prior pollicis pedis phalanx, praeter magnitudinem, insitione tendinis M. flexoris longi ad tuberculum inferius valde asperum, et ambitu

maiore interioris foveae superficiei articularis a phalangibus reliquorum digitorum pedis prioribus differt.

Substantia posterioris partis nonnihil spongiosa est, reliquae vero solidior.

In *matureo fetu* e duabus partibus, extremo posteriori cartilagineo, et reliqua parte ossea haec phalanx constat.

OSSA DIGITORUM PEDIS SESAMOIDEA.

Duo posteriora vide apud *ALBINUM* Tab. XXXI.
Prius os sesamoideum nondum est delineatum.

§. DLXXXXVIII.

Plerumque tria *) ossa sesamoidea in pollice pedis, duo maiora ad articulum ossis metatarsi et primae phalangis, minus vero ad articulum primae phalangis cum secunda inveniuntur.

Posteriora duo, externum et internum, semiovata, infra gibba, supra quo loco extremo trochleari priori ossis metatarsi connectuntur, cartilagine teguntur, eodemque modo, quo patella tibiae, primae phalangi illigantur, ut tendines musculorum, qui primam phalangem flectunt, *M. flexor brevis* utrique, *M. adductor* vero pollicis pedis externo ossi sesamoideo inseratur, qui muscoli hac structura tutantur, ne stante corpore vel premantur, vel capitulo ossi metatarsi atterantur.

Haec, ut tertium, minime e tendine in os verso oriuntur, quae tendinis in os mutatio raro contingit, sed verum e cartilagine natum os sistunt.

In *matureo fetu* adsunt quidem cartilaginosa, sed difficiliter cognoscuntur, elapsis vero aliquot annis habitum cartilaginosum, a tendinosa substantia facilem distinctu, induunt.

*) *HALLER* *Icon. anat. Fasc. V. p. 49. Sect. ultima notae* XXXV. ossis sesamoidei quarti in digito pedis minimo inventi mentionem facit.

Os sesamoideum tertium, sive prius multo minus praecedentibus, infra gibbum, supra cartilagine tectum, lineâ transversa, in duas foveas, priorem minorem et posteriorem maiorem, quae duabus cartilaginosi articuli superficiebus incumbunt, divisum, in tendine flexoris longi pollicis pedis directo super articulo phalangis prioris cum media sedet. Raro deest.

COMPAGES OSSIUM ARTUUM INFERIORUM.

ALBINUS *Tab. sceleti I. II. III. XXXII. XXXIII. XXXIII.*
Hist. muscul. Tab. X. Fig. XXIII.

§. DLXXXVIII.

Artus inferiores, dextri et sinistri lateris, e triginta tribus ossibus componuntur, quorum duo, os femoris et tibia, articulo ginglymoide ea ratione inter se nectuntur, ut columnam forment, quae lato, e viginti novem ossibus composito, pede innititur, et una cum integri corporis pondere illi incumbente non solum in primum et aversum, sed etiam super astragalo in latus dari, et nisu plantae in terram, elevari potest.

§. DC.

In sexu potiori columnae nonnisi ad genua usque mutuo sibi adpropinquantur, deorsum versus ad perpendiculum et ad parallelam directionem decurrunt, in sexu vero sequiori ad pedem usque ad se invicem tendunt. Acetabulo ossium coxarum connexae reliquam corporis partem sustinent.

§. DCI.

Patellae tibiis connexae lapsum poplitum priora versus avertunt, et fibula, arcto et immobili fere nexu supra et infra tibiae alligata, columnam cum externo pedis latere firmiter connectit.

§. DCII.

In universum columnae ad externa curvantur, I. quia os femoris infra nonnihil ad externa flexum est, II. extremi tibiae superioris exterior pars numquam tanto elatior, quanto condylus femoris externus brevior est, conspicitur. III. Ipsius tibiae extremum superius ad externa curvatur.

In suprema parte columna plena est, et simplex, circa genu plenior, deinde tenuior et duplex donec ad pedem denuo plenior evadat.

Os femoris prorsum versus curvatum est, ideoque quum pes producit, artus inferiores arcum formant; nec minus lenis hicce arcus actum sedendi iuvat, sinusque femoris, genibus quam maxime flexis tibiam excipit. Extrema inferior ossis femoris pars nonnihil ad externa spectat, ut stante homine eo melius tibiae recta demissae innitatur.

Tibiae crassitudo femoris crassitudine minor esse potuit, fibula enim arcte illigata fulcitur, et directiore linea, quamvis maius onus, sustinet.

§. DCIII.

Longitudo pedis latitudine maior, priora versus producit. Cruri pes ea ratione subiectus est, ut posterior eius pars parum tantum, prior vero plurimum promineat, ideoque neque ad posteriora, neque ad priora pedem detorqueamus, quumque facilius in pronum, quam in aversum praecipites ruimus, id tamen rarius

accidit, pes enim ad priorem partem magis porrectus, et ad priora latior est, faciliusque digitorum ab invicem secessu cedit.

Calcibus pedum intra nonnihil revocatis firmius homo insistit.

Pes pleno initio in calcaneo oritur, adiectoque astragalo magis diducitur, digitos pedum versus sensim contrahitur, verum tamen ab interiore parte multo plenior est, a posteriore parte contractus, sensim prorsum diducitur, donec per phalanges digitorum pedis, duabus minimis phalangibus ad reliquas inclinatis, nonnihil contrahatur.

Ab interiore parte pes a calcaneo ad phalanges usque pro recipiendis musculis, vasis, nervis sinuatus est, nec terram, stante homine, tangit.

§. DCHIII.

Dorsum pedis non solum externam partem versus gibbum et declive, ut parte interna innitatur, sed etiam a posterioribus priora versus gibbum est. Ceterum vero integra externa pars debilior est interna.

§. DCV.

Planta pedis multum inaequalis ab interna parte, et in longum et in transversum sinuata, tribus locis, in posteriore parte calcaneo, in exteriori extremo posteriori ossis metatarsi quinti, in priore extremis prioribus reliquorum metatarsi ossium innititur.

§. DCVI.

Septem tarsi ossa *duas series* efficiunt. *Posteriorem seriem* calcaneus et astragalus, *priorem* quinque reliqua ossa componunt.

Mediam calcanei partem astragalus occupat, et caput in priora dirigit. Extremo calcanei priori oblique ad externa spectanti, os cuboideum, astragalo os naviculare in transversum, et huic tria ossa cuneiformia sunt praeposita.

Prior margo, e nexis ossibus cuneiformibus cum cuboideo natus, oblique retro agitur. Os cuneiforme medium omnium plurimum retro actum est. Os metatarsi pollicis ossi cuneiformi primo, os metatarsi digiti secundi pedis ossi cuneiformi medio, os metatarsi digiti tertii cuneiformi tertio, ossa metatarsi digiti quarti et quinti ossi cuboideo connectuntur.

Connexio ossium cuneiformium cum astragalo ope ossis navicularis simplicis aptior contingit, quam si proxime illi iungerentur.

Os cuboideum, ex una tantum parte constans, partem, proxime ante eum positam, magis firmat; pes enim priora versus illi innititur.

Ossa tarsi arcte sibi invicem adcumbunt, ossa vero metarsi sensim priora versus ab invicem secedunt, donec phalanges plane seorsim ponuntur.

§. DCVII.

Metatarsum quinque ossa mutuo sibi adcumbentia componunt. Os metatarsi pollicis

pedis prae reliquis amplitudine eminet. Secundum os metatarsi, quamquam seriei ossium tarsi insertum, plurimum tamen prominet. Cetera vero os metatarsi pollicis anticum est, os vero metatarsi digiti minimi posticum. A posteriore parte ossa metatarsi arcte mutuo sibi adcumbunt, a priore autem parte nonnihil ab invicem distant, praesertim os metatarsi pollicis pedis a secundo metatarsi osse distat, minus quintum a quarto, minus etiam reliqua, verum tamen hiatus in media parte, quum ibi graciliora sunt, maximus esse solet.

§. DCVIII.

Pollex pedis e duobus plenioribus et longioribus, reliqui autem quatuor digiti e tribus tenuioribus et brevioribus phalangibus componuntur. Phalanges tertii digiti pedis tenuiores sunt et breviores phalangibus secundi, hisce tertii digiti phalangibus quarti digiti phalanges tenuiores et breviores sunt, tenuissimae vero et brevissimae sunt phalanges quinti digiti pedis.

§. DCVIII.

Digitus pedis secundus, optime constituto pede, super pollicem, praesertim in sexu sequiori, prominet.

§. DCX.

Articuli phalangum tres in priorem partem gibbas, in exteriori parte ad se invicem tendentes arcus effingunt.

Primus sive posterior, et medius arcus omnes pedis digitos, tertius vero nonnisi quatuor minores occupat.

§. DCXI.

Metatarso, quem oblonga mutuo sibi adcum-bentia ossa constituunt, pes firmiter innititur, quum ossa, insistente homine, praesertim in priore parte nonnihil ab invicem separantur, eaque de causa pes multum diducitur.

§. DCXII.

Pollex pedis, cui et calcaneo plurimum innitimur, planissimus est. Regio primi articuli, cui ossa sesamoidea substernuntur, deorsum versus bulbum efficit.

§. DCXIII.

Articulus genu causa est, cur ambulando levato femore crus dependeat, eoque directa linea terrae imposito, statim alter pes sine periculo, non adlisus, producat, nosque commodius et sedere et eniti possimus.

§. DCXIII.

Patella insistente homine sursum versus, flexo autem genu deorsum versus trahitur.

Extenso igitur genu elatiorem, flexo autem eodem depressiorem situm in incisura condylorum ossis femoris trochileari patella habet, ideoque innixio et extenso genu facillime ultroque citroque, quod M. extensores genu laxantur, moveri potest, laxaeque tibiae coniuncta neque extensionem, neque flexionem, neque rotationem articuli

genu impedit, quem posteriorem actum, si apophysis ossis femoris patella esset, impediret.

Per patellam tendines M. extensorum minus tibiae illigantur, angulum enim insitionis auget.

§. DCXV.

Extenso genu pes rotatione femoris in acetabulo facillime vertitur, minus flexo genu, attamen tibia, non nihil circum axin rotari potest, versa fovea tibiae interna per M. popliteum nonnihil internam partem versus, quod in ambulando vel sedendo accidit.

§. DCXVI.

Calcaneus et astragalus ab interiori parte oblique in utrumque latus alternis vicibus moveri possunt, nosque, pedes pluribus partibus composito, ideoque ad terram sese non nihil adcommo-
dante, rectius insistimus et ambulamus.

Calcaneus et astragalus, qui magna ossa praesentant, securius, et quum duo tantum ossa sunt, firmiter sustinent.

§. DCXVII.

Pes, quo loco tibia excipitur, verti, h. e. non solum extendi et flecti, sed etiam in utrumque latus, praesertim in internum duci potest, quo fit, ut in scandendo melius sese pedes accommodent.

Quodsi flexus in externum latus aequè facilis esset, pedem facile detorqueremus.

§. DCXVIII.

Corporis pondus in insistendo ossa manifeste ab invicem dimovet, ideoque latitudinem et longitudinem pedis auget.

§. DCXVIII.

Quinque metatarsi ossa arctiori nexu, attamen non nihil laxiori, quam os cuboideum et os naviculare, inter se coniunguntur. Arctissimus nexus est os metatarsi pollicis pedis inter et tarsum, laxior secundum os metatarsi inter et tarsum, qui nexus ad quintum os metatarsi semper laxior evadit.

Ossa metatarsi in posteriore parte parum, magis vero in priore parte inter se moveri possunt.

§. DCXX.

Primae phalanges, quod exiguae earum superficies articulares maioribus, orbiculatis prioribus ossium metatarsi superficiebus innituntur, quoque versum, plurimum vero sursum et deorsum versus moveri, ideoque sursum magisque tamen deorsum flecti, et ab invicem seiungi possunt.

Reliqui duo digitorum pedis articuli magis trochleares, ideoque adstrictiores sunt, et flecti tantum et extendi possunt.

Pollex pedis, quo maius robur adquirat, non nisi duas phalanges accepit, minusque internam partem versus flectitur, et propter superficiem articulare, deorsum versus longiorem, magis deorsum quam sursum versus flecti potest.

§. DCXXI.

Reliqua corporis pars tam super unico, quam
per utroque femore verti, et quaque versum mo-
eri potest, et alternis vicibus artus inferiores
runcum versus moveri, et multis modis verti pos-
unt, ut procedere, retrocedere et in utrumque
atus pergere nobis sit datum. Maximus vero fle-
tus in primum datur.

§. DCXXII.

Omnium mammalium solus homo erectus,
non modo digitis pedum, sed etiam metatarso et
arsu innititur, ideoque calcaneo magis prominen-
te instructus esse videtur. Rarius solis pedum di-
gitis innitimus, quod v. c. fit, quum praecipitem
clivum adscendimus.

COMPARATIO ARTUUM SUPERIORUM ET INFERIORUM, QUANTUM AD OSSA.

FALGUEROLLES *Diss. de extremitatum analogia.* Erlanga
1785. 4to.

§. DCXXIII.

Femur cum humero comparari potest, arctioribus tamen limitibus eius mobilitas adstringitur. Superior pars est angulata. Trochanteres minus bene cum tuberculis humeri comparantur, aptius autem superficies humeri articularis pro excipiendo radio cum condylis femoris comparari potest.

§. DCXXIII.

Tibia et fibula, ulna et radius, in extremis quippe partibus invicem cohaerentes, in medio ab invicem distantes, et membranae tendinosae opem invicem cohaerentes inter se comparari possunt.

§. DCXXV.

Patella cum olecrano comparari potest.

§. DCXXVI.

Articulus genu motu ginglymoideo priora versus, articulus brachii cum antibrachio posteriora versus extenditur. Articulus tamen genu cartilaginee intermedias et ligamenta cruciata excipit.

§. DCXXVII.

Maximam quidem analogiam pedem inter et manum media pars et digiti efficiunt, verum tamen, pollex pedis cum reliquis digitis comparatus multo crassior est pollice manus, minusque distat. Os metatarsi pollicis pedis brevissimum est et mobilissimum, verum tamen pollice manus adstri-

ctius. Digitus pedis minimus, sicuti digitus manus minimus, reliquis est mobilior. Excepta phalangum digitorum pedis minore longitudine, quam phalangum digitorum, numerus phalangum digitorum pedis, et structura articularum cum numero phalangum digitorum manus et structura articularum multum conveniunt, verum tamen digiti pedis facilius dorsum pedis versus, quam digiti dorsum manus versus moveri possunt.

§. DCXXVIII.

Tarsus, vel universum vel singula spectes, multum a carpo, numero, magnitudine, forma, positu, vel ordine ossium differt, nec nisi astragalus cum osse naviculari manus, et duo ossa cuneiformia cum ossibus multangulis manus comparari possunt.

§. DCXXVIII.

Qua manum et pedem inter analogia facultas quorundam sine brachiis natorum, quam exercitio pedi dederunt, ut subtilissimas acus pede tollerent, facile explicari potest. Verum tamen pede a manu multum diverso, paucis tantum officiis eadem facilitate ac perfectione fungi potuerunt.

§. DCXXX.

Artus vero inferiores a superioribus, quantum ad ossa, in eo differunt:

- I. Claviculae et scapulae analogum non inveniuntur.
- II. Patella moveri potest, olécranon autem est immobile.

- III. Extremum tibiae inferius praecipuam cum pede connexionem constituit, in manu autem radius, pars fibulae analoga.
- III. Fibula, os radio analogum, a) femur non tangit, b) rotari nequit, c) tibiaque multo est tenuior, d) nec praecipuam cum pede connexionem constituit.
- V. Artus inferiores superioribus robustiores sunt et longiores. Longitudo eorum septem tredecimas partes totius corporis longitudinis comprehendit.
- VI. Pes cum crure minime, sicuti manus cum brachio, directam lineam effingit, sed angulum cum eo sat magnum constituit.
- VII. Tarsus longissima pedis pars est, carpus autem pars manus brevissima, metatarsus brevior, metacarpus longior, digiti pedis brevissimam, digiti vero manus longissimam partem constituunt; ex quo figuras pedis et manus plurimum ab invicem differre, sequitur.
- VIII. Ossa metatarsi, ratione ad artus habita, graciliora sunt ossibus metacarpi.



